







29,082/B

A xxxiii.0





12550
FRIDERICI HOFFMANNI
MEDICINÆ
RATIONALIS
SYSTEMATICÆ

TOMVS TERTIVS,

QVO

VERA THERAPIÆ FVNDA-
MENTA MEDENDI METHODVS ET
LEGES TAM NATVRÆ QVAM ARTIS
NEC NON SELECTISSIMA REMEDIA
CVM EORVNDEN PHYSICO-MECHANICO
OPERANDI ET DEXTRE APPLICANDI MODO
FIDELITER TRADVNTVR
OMNIA SOLIDIS RATIOCINIIS DEMONSTRANTVR ET
COMPLVRIBVS PRACTICIS OBSERVATIO-
NIBVS ILLVSTRANTVR

OPVS

NON TAM AD PRAXIN VULGAREM
QVAM RATIONALEM TVTAM ET COMPENDIOSAM
ADORNANDAM PERVTILE AC NECESSARIVM.

VENETIIS.

APVD BALLIONEM. Anno 1730.

DEO TRIVNI
OMNIPOTENTI RERVM SALVBRI-
VM CONDITORI
BENIGNISSIMO VITÆ AC SALVTIS
NOSTRÆ INSTAVRATORI
ET
SAPIENTISSIMO SALVTARIS SCIENTIÆ DO-
CTORI OMNISQVE MEDICATIONIS AVSPICI
SACRVM
NEC NON
INGENVÆ POSTERITATI MEDICÆ
DICATVM
ESTO HOC OPVS.





PRÆFATIO.



Uamvis complures eaque nobilissimæ ac utilissimæ scientiæ ad ornandum & perficiendum Medicum scitu sint necessariae; nihil tamen est, quod ad scopum medicum obtinendum propius pertineat & cui cetera omnia adeo serviant, quam ipsa praxis rationalis clinica. Potissimum vero hoc & princeps studii medici caput quam utile & necessarium, tam parum ab omni usque eo tempore excultum & ad perfectionem laudabili conatu perductum conspicitur. Possidemus certe egregios & multis experimentis ac inventis anatomicis, physico-mechanicis, botanicis, chymicis & physiologicis refertos plures libros; sed de ejusmodi scriptis, quæ pluribus praxin rationalem, specialissimam, individuaalem & clinicam solide doceant ac perpetuæ veritatis de hac præcepta tradant, minus, si eloqui licet quod verum est, gloriari possumus. Nolo equidem merita laude Veterum & Recentiorum SENNERTI, SYLVII, RIVERII, WILLISII, SYDENHAMII, PLATERI, MORTONIS, CRAANII, BONTEKOE, ETTMÜLLERI, WALDSCHMIDII, DOLÆI, WEDELII practicos defraudare egregios labores: verum quam multa adhuc in iisdem circa adæquatitas causas, morborum & symptomatum genealogiam, remediorum quoque vires & genuinum usum in variis casibus deficient, ii demum, qui in artis exercitio versantur & prolata theoremata ad resolvendas

morborum historias aut consilia inde capienda applicare volunt, rectius intelligunt. Deinceps neminem in medici argumenti scriptis vel mediocriter versatum latet, quam dissidentes, inter Medicos haud exigui etiam nominis, circa morborum ætiologiam & pathologica fundamenta, quæ tamen basin veræ therapie constituunt, regnent opiniones. Quot sunt & ante aliquot lustra fuerunt amplissimæ famæ Medici, qui applaudentibus multis ex acido & viscido, acido, bile & pituita morborum duxerunt primordia? Quot porro innotuerunt, qui ex varil generis salibus acribus, acidis, ponticis & humorum multifaria intemperie, materiales omnium fere morborum derivarunt causas & ad easdem removendas & remedia & medendi methodum direxerunt? Alii Cartesiana & corpusculari philosophia maxime imbuti, diversum & peregrinum ætherem, specifica & morbifica fermenta, turbatam sanguinis & humorum crasin atque texturam & varias materie peccantis peregrinas & heterogeneas, ratione figuræ & magnitudinis qualitates, ad evolvendas morborum causas in partes vocarunt. Nonnulli contra repudiatis excessivis salinis qualitatibus & potentiis, ex sola sanguinis & humorum nimia abundantia, spissitudine & excretionum defectu pathologicam doctrinam eruere & statuminare sategerunt. Ut discrepantes mirum Medicorum sententias, de causa & principio motuum & mutationum, quæ in corpore humano subinde contingunt, præteream. Et quum in morbis tum avertendis, tum curandis, præcipuum medentis auxilium a remediorum congruorum usu, quæ quasi ipsius instrumenta sunt, omnium consensu peti debeat; illæ adeo discordes Practicorum de medicamentorum viribus, facultatibus in hoc vel illo morbo opiniones, utique luculenter arguunt, plurimos sanitatis præsidiorum, inprimis magnæ efficacie, sive sic dictorum heroicorum, genuinas virtutes, ulum atque applicationem latuisse. Quod, ne gravius dictum videatur, liceat in confirmationem adducere exempla. Quot adhuc sunt & olim fuerunt, qui magnum istud & incomparabile sanguinis missionis auxilium penitus rejicere haud veriti sunt? Quam diversus Medicorum est sensus, de venæsectionis in febribus sive continuis, sive intermittentibus, nec non exanthematicis, purpura, variolis, morbillis,

pete-

petechiis, item erysipelaceis, arthriticis & catarrhalibus, puerperarum quoque morbis administratione, aliis eandem prorsus repudiantibus? aliis contra dilaudantibus & necessariam judicantibus. Quæ opium pro basi habent, & olim ab antiquissimis Medicorum, & nostro ævo a celeberrimis Chymiatriis, inter panaceas & incomparabilis in multis morbis & enormi motuum impetu componendo efficaciæ relata fuerunt; quum jam non desint, qui eadem propter virus quod recondunt naturæ viribus inimicissimum tantum non infamia censent. Peruvianus ille ex America allatus cortex ad expugnandam intermittentium contumaciæ usque eo non modo in Germania nostra, sed & in exteris regionibus ceu specificum venditatus fuit remedium, qui a nonnullis tanquam intutum & damnosum pharmacum fere ex toto rejicitur. Ex marte præparatis medicamentis olim a QVERCETANO, HARTMANNO, MICHAELIS, LVDOVICI, WILLISIO, SYDENHAMIO & WEDELIO in morbis ex mensium vitio, item ad cachexiam & hypochondriacam passionem sanandam laus adscripta est maxima; sed complures iisdem in morbis hæc ipsa plus damni quam emolumenti asserre, asserere non dubitant. Salia ex animantium regno volatilia & concinnati ex iis spiritus volatiles oleosi, ante aliquot lustra a Germanis æque ac Belgis, ceu spectatæ virtutis adversus chronicas potissimum afflictiones celebrabantur, quorum usus, quasi nimiam & noxiam sanguini inducerent commotionem, jam plane evilesceere incipit. Mixture sic dicta simplex Paracelsi & confectæ ad hujus exemplar a Chymiatriis, potissimum MICHAELIS, tincturæ bezoardicæ, in pluribus morbis, acutis æque ac chronicis, usui quondam erant egregio; ast ab hodiernis quibusdam, cur nescio, nisi forsitan camphoræ, vel acidorum connubium, spernuntur & minoris pretii essentiæ aliæ præferuntur. Purgantibus acrioribus, nec non aloëticis, quæ basin fere omnium pilularum constituunt, usi fuerunt veteres & recentiores; quæ tamen ob virulentam quam ratione & experientia teste obtinent indolem, merito suspecta sunt. Neque minus mirum profecto discrepantes Practicorum sunt sententiæ, de thermarum, acidularum & foteriorum aliorum fontium elementis, viribus ac usu, ita, ut a plerisque propter acidum & vitriolicum elementum,

fluidis & solidis infensum, quam maxime insegura censeantur, ab aliis vicissim ob innocentiam & præstabilem virtutem, in omnibus fere morbis commendentur. Nihil jam dicam, quantopere de mercurialium, emeticorum, antimonialium, nec non foniculorum, vesicatoriorum, setaceorum & hirudinum usu medico, in diversum abeant sententiæ; hoc autem, quod omnium maxime mirum adjiciendum: cunctos ad confirmandas suas adeo discordes sententias, ad unam tamen eandemque experientiam confugere & audacter provocare, cui an fidendum sit, prudentes judicent atque periti; id minimum pro certo asserendum: nullibi in pervestigandis effectuum causis tam crebro fallaciam causæ ut causæ committi, quam in medicis rebus. Decumana certe sunt, quæ de pharmacorum virtute in botanicis, chymicis & pharmaceuticis libris vel scripto consignata sunt mendacia, & adeo increvit medicamentorum ex universo naturæ penu simplicium & compositorum, indigenorum & exoticorum, Galenicorum & chymicorum supellex, ut propter immensum fere numerum, nec diligentissimus ad singulorum penitiorem cognitionem pertingere queat, primum vero artis opera tentans non possit non mirum turbari atque confundi. Gravis quoque oppido est illa formularum sarcina, quam ex amplissimo materiæ medicæ apparatu confectam, Medici, quasdam illarum in quovis morbo usui commendantes, tam scripto, quam dicto, suis liberaliter obtrudunt; quas tamen omnes, si quis peritior & virtutum in remediis solide gnarus curatius paullo expendit, ultro perspicit, propter inconcinnam differentis indolis ingredientium congeriem, parum, vel nihil auxilii inde posse expectari, sed morbum multo magis trahi, neutiquam abigi. Contra ea simplicissima, securissima & spectatæ adversus morbos arcendos æque ac persanandos præsidia, ut aqua pura simplex, sive calide in infuso, sive frigide assumpta, balnea aquæ dulcis, lacticia & maxime lac asininum, serum lactis rite paratum, minerales aquæ, item ex nitro & salibus neutris parata, plurimis medentum ignota plane sunt, vel minimum pensi ab ipsis habentur. Et quod maximum fere est, quum optima etiam medicamenta nihil valeant, nisi eorundem usus debito ordine, regimine, tempore, mensura & methodo ad morbi curationem perite di-

te dirigatur : plures tamen sunt, qui tumultuarie sine certa ratione medicationem instituunt, ac si unum non statim juvat, alterum promunt & subinde medicamenta commutant, alii methodo plane contraria incedunt, ut rarissime duos aut tres Medicos, qui eandem ad lectum de methodo porrigendi medicamenta foveant sententiam, invenias, plurimos autem in morbis eorumque causis recte cognoscendis & distinguendis, in iudicio de morborum eventu, medicaminum effectū, item in signis prognosticis ex urina, pulsu, sanguine, dierum criticorum habitudine aliisque desumendis, mirum discrepare, errare & hallucinari cum tædio videas. Ex quibus omnibus quisque sagacior haud difficulter perspiciet, non tam firmis & inconcussis, ut communis fert opinio, praxin clinicam insistere fulcimentis, ut potius pluribus adhuc difficultatibus, defectibus & erroribus tanquam morbis prematur, qui utique convenienti Medico & medicina opus habent. At vero ad tollenda hæc artis medicæ opprobria & incrementa ipsius ex voto promovenda, neutiquam certe apti sunt, qui tantum agunt sectarios & magistri sui verbis atque practicis semel haustis principiis tanquam saxo adhærent, nec volunt admittere, quæ nunquam audiverunt, vel didicerunt, qui magnifica arcana & certa specifica in quovis morbo quærunt & jactitant & exotica pretiosa, ex auro etiam deprompta, item varia composita chymica, domesticis, simplicibus & facile parabilibus ac diæteticis remediis præferunt. Neque illi ad perficiendam praxin clinicam quicquam conferre poterunt, qui absolutas quasdam vires & virtutes, in his vel illis morbis, nulla habita ratione individui & conditionis solidarum ac fluidarum partium, medicamentis assignant, qui non ex morborum historiis complete & accurate notatis sapiunt suamque theoriam praxi applicandam hausserunt & qui non ex his ipsis de remediorum effectū, viribus & operationibus, immo de eventu ipsius morbi, judicare didicerunt, sed una eademque methodo semper morbum unum tractari posse sibi persuadent. Neque etiam illi evehendæ ad altius fastigium arti nostræ erunt idonei, qui observationes & veritates facti variaque occurrentia phænomena non clare, distincte & ordine explicare & consuetudina quædam in usum practicum inde elicere norunt. Sunt autem

hi maxime, qui nec debitis subsidiis, ut philosophia naturali & experimentalis, mechanica, chymica & anatomica scientia corporis humani ejusque partium instructi sunt, quique artem solide demonstrandi non callent, nec recte definire, distinguere & apte res inter se connectere, nec foetus phantasiae a claris conceptibus, speciosa nomina a causis & rebus, res morales & metaphysica a physicis & quae necessario fieri debent, veritates ab opinionibus & apparenter veris distinguere unquam didicerunt. Nam profecto ego quidem asseverare plane non dubito: ob ignorantiam, quae olim regnavit & adhuc apud plurimos regnat structurae corporis humani & principiorum mechanicorum, praesertim doctrinae illius de motibus, ejus causis, legibus & effectibus in rerum natura, & ex defectu sufficientium observationum practicarum, artem nostram non meliora potuisse capere incrementa, sed omnium dissensionum, opinionum atque errorum causam atque originem inde merito esse petendam. Quare etiam cum illis nunquam facere possum, vel potero, qui ad explicandas res medicas, novum quasi systema condituri, plane incongrua quaedam & inaudita principia, vel sola prorsus nomina nihil significantia, ut naturae rationalis sensus, instinctus, conamina, molimina, pro veris & formalibus morborum causis venditant, omnes praeternaturales & morbosos motus in se & sua natura ratione intentionis bonos & salutares censent, & omnium quoque ac singulorum motuum & diversarum mutationum in corpore humano causam efficientem directricem, non tam physicum ex pura necessitate agens, sed morale, intentionale, rationale, pro arbitrio suo cuncta administrans principium, constituunt; eo quod admissio moraliter & intentionaliter, quandoque cum ratione, quandoque erronee, ad certum finem agente motus principio, uno quasi ictu omne quod certum, quod demonstrative verum in rebus medicis, practicis potissimum, penitus concidit atque exspirat. Quod si enim rebus physico-mechanicis corporeis, quae necessario, non pro arbitrio aliter atque aliter agunt, quo praecipue elementa, alimenta, medicamenta, immo partes solidae & fluidae corporis nostri pertinent, potentiam & efficaciam movendi & mutationes efficiendi in motibus vitalibus & naturalibus denegare,

& cau-

& causis moralibus atque arbitrariis, quæ captui humano non obviæ, nec in potestate Medici sunt, eandem tribuere velimus: nihil certe, nihil demonstrativi de rebus quæ ad vitam faciunt & morbos inferunt, nihil quoque solidi & firmi de remediorum effectu atque operatione, proferre & determinare poterit Medicus. Ne dicam suppositas ejusmodi metaphysicas theorias, tironum ignaviam & ignorantiam in rebus physicis, utpote inertibus per se & superiori principio agenti subjectis, mechanicis quoque & anatomicis, mirum fovere ac promovere. Quamvis vero non is sim, qui penitus neget, esse animæ spiritualis potentiam, regimen & influxum, admodum tamen limitatum, quasdam ex solidis partibus, præsertim externas, ad motum excitandi, & fluidum quod immediate movet artus subtilissimum quodammodo dirigendi, licet etiam probe gnarus sim, principii sensitivi vim imaginativam magnas turbas in motibus naturalibus efficere posse: his tamen minime induci possum, ut a particulari ad universale concludam & credam, omnes motus vitales, systolen nempe & diastolen solidorum, fluidorum progressum, atque motus secretorios & excretorios ab iisdem causis semper dirigi. Quin potius firmum semper erit manebitque, res corporeas quæ ab extra intra corpus operantur, regulis & legibus motuum & effectibus necessariis, pro dispositione causarum in corpore humano, non secus ac in macrocosmo, esse subjectas, adeo, ut positis certis ad agendum requisitis in corpore nostro causis, certi semper ex necessitate, non absoluta, sed hypothetica, & indeclinabiles proveniant effectus. Nihil enim in corpore humano contingit, quod non certas suas, adæquatas & sufficientes habeat causas. Et licet has veras invenire atque eruere res non adeo facilis sit, neque omnibus expedienda; de felici tamen pervestigatione & progressu scientiæ causarum non dubitandum vel desperandum, modo longiore observatione & profundiore meditatione artem nostram tractet quisque pro viribus, & physico-mechanica paullo subtilioris indaginis principia, diversas quoque motuum leges, in universa rerum natura inquirat & ad corpus humanum paullo sollicitius applicare discat. Quum vero morborum historia omnis fere pathologiæ, prognoseos, therapiæ &

intimioris virium quæ insunt medicamentis notitiæ sit basis seu fundamentum ; ad provehenda feliciter praxeos clinicæ incrementa nihil utique magis erit necessarium ac utile, quam ut Medici diligentes & attenti sint in consignandis observationibus practicis & morborum historiis, quæ quo pleniore sunt, nullis plane omisiss circumstantiis, eo majorem usum atque utilitatem in ratiocinando præbent. Hinc etiam merito inter characteres indocti & infelicitis Medici referendum, quando statim audito vix morbo, vel perceptis quibusdam ipsius tantum symptomatibus, ad formulas præscribendas promptus est, antequam de ægrotantis natura & constitutione, morbi indole, causis, statu, progressu & aliis necessariis phaenomenis plenius certior factus. Neque tamen sufficit practicarum tantum observationum uberi instructum esse apparatus, sed accedat etiam necesse est solida in anatomicis, physico-mechanicis, chymicis scientia sive vera theoria medica, quæ clavis historiarum de morbis & causis diversissimorum phaenomenorum eruendis inservit; his enim amico junctis conubio, demum fiet, ut ex multis particularibus veritatibus & regulis, universales sive axiomata resultent, quorum copiam si quis sibi comparabit, is profecto aptissimus erit demonstrative & scientifice resolvendis & explicandis quibuscunque etiam difficillimis in re medica casibus & ad suppeditandum accommodatum consilium. Ad hæc incrementis solidæ praxeos clinicæ quam maxime servit, ut paucis & selectis Medicus, bene tamen longiori usu cognitis & exploratis remediis, utatur. Nam sub tanta ut prostat medicaminum multitudine, medens ad veram singulorum notitiam pervenit & solidi quid in praxi præstare poterit nunquam, sed potius unacum natura eximie turbabitur. Mihi certe a multis jam annis vix duodecim classica quasi medicamenta a me ipso sollicitè confecta fuerunt frequentissima, quorum virtutem in variis morbis & varia circumstantiarum conditione exploratam penitus habeo, ut interius vix aliis quam his optimo cum successu utar. Quæ quum ita sint, id sane usque eo quam maxime mihi agendum esse ratus sum, ut solidis hisce fundamentis, omnia quæ dicto quæ scripto traderem, inniterentur, eandemque mihi etiam in elucubrandâ medicina hoc rationali

syste-

systematica, proposui normam. In primo & secundo tomo quid præstiterim, qui veritatis & candoris cupidi legerunt judicent, in hoc autem tertio excutienda mihi quam maxime summi veræ therapia, tutæ nempe ac rationalis fundamenta, quæ ad tria potissimum genera referenda esse arbitror, quorum primum est, ut Medicus solidas observationes & morborum historias accurate & solide consignare discat; alterum, ut ex regulis mechanicis, quæ materiæ & motuum indolem atque effectus tradunt, theoriam suam formet & causas, phænomena ac quæcunque fiunt & eveniunt in corpore humano recte & ordine explicare eorumque causas ac rationes reddere possit; ac tertium demum, ut medicamentorum facultates eorumque modum operandi probe noscat, paucis tamen & selectis recte utatur & quæ insalubria sunt, vel minus juvant remedia, a salutaribus discernere discat. Ita autem in perficiendo hoc labore versatus sum, ut varias inanes ac dubias in re medica opiniones atque hypotheses rejecerim, omne auctoritatis præjudicium seposuerim, & nonnisi ea, quæ ad valetudinem cum vita tuendam morbosque sanandos manifestum usum, utilitatem & conspicuam applicationem habere possunt, attulerim. Neque etiam quisque candoris & veritatis amans vitio mihi vertet, quod hac usus sim libertate & a nonnullorum celebrium nostro tempore virorum, qui ceterum non parum opis ad illustrandam artem nostram attulerunt, placitis discefferim. Quod vero libri hujus editionem licet ab eruditis crebro sollicitatus eo usque distulerim, hanc maxime factum ob causam: quod ego quidem quam optime facere censeam Medicos, qui perpetuas & tempus sustenturas practicas veritates posteris tradere propositum ceperunt, arduum hoc opus ad maturam ætatem, quin senectam differunt, quo longiori & multiplici experientia instructi, quæ usui sint ipsi edocti prius sint, nec errores aut opiniones disseminent, ut quidem fieri solet ab iis, qui vel juvenes minusque in artis operibus excitati practicos conscribunt & ex auctoribus compilant libros. Neque etiamnum hoc opus therapeuticum pro vulgo Medicorum scripti, qui præfidiis ad scientiam & veram theoriam medicam pertinentibus

nentibus destituti, nec historias morborum curant, nec earum causas recte inquirere sciunt, multo minus motuum regulas & leges in genere & œconomiam motuum vitalium in specie, in quoniam ea consistat, pernoscent, nec selectu remediorum probatissimorum utuntur, nec de avertendis morbis eorumque causis primario solliciti sunt, sed tantummodo certa arcana magnifice commendata anquirunt & variis inhiant formulis ad persanandos etiam difficiles morbos, in quibus tamen incongrua quam servant methodo, pius damni, quam salutis afferunt. Neque etiam eorum usui accommodavi hunc meum laborem, qui recte judicandi, ratiocinandi & philosophandi facultate destituti, præjudiciis magistri occæcati quasi sunt, tantummodo haustis opinionibus firmiter inhærescunt & ad perfectionem jam perductam medicam scientiam autumant. Sed dicata est opera Medicis eruditis & qui solidi quippiam docere vel discere cupiunt, qui artis firmitudinem ex certis principiis physico-nempe mechanicis, materiæ naturam, affectiones & dispositionem ad motum, item motuum causas, regulas, leges & effectus dilucide exponentibus, petunt, adstruunt & agnoscunt, horum usum in ipsa medica praxi, morborum causis cognoscendis & remediis inveniendis esse longe amplissimum, & qui etiam paucis & selectis remediis vitam & sanitatem tueri, morbos avertere & persanare tuto & compendiose student. Hos certe non poenitebit repetita lectione hæc quæ scripsimus capita perlustrare & assidua meditatione in suum convertere usum. Nam licet is non sim, qui mihi tantum arroganter tribuere velim, ut credam, doctrinam medicam a me traditam omnibus numeris esse absolutam, cui nihil adjici vel subtrahi possit: hoc tamen dicere & mihi vindicare licebit, quod viam Medico ingrediendam ad ultiores in re medica progressus faciendos compendiose & recte præmonstraverim. Et quicumque hunc in finem prolata a me in hoc tomo utilissima præcepta penitus cognita habebit atque perspecta; is etiam mox h. c. D. subsequuturum, qui specialiora de morbis omnibus sigillatim tractabit, longe majori cum fructu suo poterit impendere commodo. Summo autem

Numi-

Numini, cujus gratiæ omne omnino quicquid a me factum in acceptis refero, devotissimas reddo gratias, ac ut clementer efficere velit, quo veritas in physicis etiam & medicis rebus, magis semper eniteat, & falsæ ac detrimentosæ opiniones pessundentur, precor ac voveo.





CONSPECTVS TOTIVS OPERIS

SECTIO I.

DE

RATIONALIS THERAPIÆ FVNDAMEN-
TIS, HISTORIA MORBORVM COMPLETA, NOTI-
TIA MECHANISMI CORPORIS SANI ET ÆGRO-
TANTIS, MVTVV MOTVVM INTER SE CONSPI-
RATIONE, NEC NON PRÆDICTIONE EX
MOTVVM MORBOSORVM NATVRA RE-
CTÆ FORMANDA.

- CAPVT I. De veræ therapîæ medicæ natura & fundamentis
in genere.
- II. De historiis morborum recte consignandis, ceu
primo therapîæ medicæ fundamento.
- III. De morbis caute discernendis & recte digno-
scendis.
- IV. De genealogia morborum ex turbato solidorum
& fluidorum mechanismo, ad explicationem
historiæ morborum & veram ac solidam the-
rapiam.
- V. De consensu partium nervosarum generatim &
figillatim cum ventriculo, præcipua passionum
& symptomatum origine.
- VI. De fluidorum vitiis ex vitiosa solidorum dispo-
sitione.

CAP.

- CAP. VII. De causis morborum & quidem latentibus recte cognoscendis.
- IIIX. De damnis ex cohibita cuticulari excretionē.
- IX. De vitiis ex turbatis sanguineis aliisque evacuationibus.
- X. De generatione morborum ex morbis.
- XI. De rationali pulsuum explicatione & iudicio in morbis recte ex iisdem formandis.
- XII. De iudicio ex sanguinis inspectione & examine recte eliciendo.
- XIII. De iudicio ex urina aliisque excretis in morbis recte ferendo.
- XIV. De crifibus & criticis diebus in experientia rationali fundatis.
- XV. De certis imminentis in morbis periculi ipsiusque mortis indiis.
- XVI. De causis mortem in morbis gignentibus.

SECTIO II.

DE

METHODO, ORDINE ET LEGIBVS MEDENDI, TAM NATVRÆ QVAM ARTIS, NEC NON DE REMEDIIS EORVM QVATVOR GENERIBVS, OPERANDI ET RECTE APPLICANDI MODO, VNACVM CAVELIS ET OBSERVATIONIBVS VTILISSIMIS.

- CAPVT I. De optima natura morbis medendi methodo.
- II. De methodo ordine & legibus artis in medendo.
- III. De medicamentorum viribus & causis ignorantiae earum.
- IV. De medicamentorum quatuor summis generibus & operandi modo, speciatim alterantibus.
- CAP.

CAP. V. De evacuantibus.

VI. De roborantibus.

VII. De sedantibus.

IIIX. De specifica quorundam remediorum certis in mor-
bis efficacia.

IX. De venæsectione aliisque sanguinem subtrahendi
modis.

X. De balneorum, pediluviorum & clysterum usu
medico.



SECTIO I.

DE

RATIONALIS THERAPIAE MEDICAE FVNDAMENTIS, HISTO- RIA MORBORVM COMPLETA, NOTITIA ME- CHANISMI CORPORIS SANI ET AEGROTANTIS, MVTV- MOTVVM INTER SE CONSPIRATIONE, NEC NON PRAE- DICTIONE EX MOTVVM MORBOSORVM NATV- RA RECTE FORMANDA.



CAPVT I.

DE

VERAE THERAPIAE MEDICAE NATVRA ET FVNDAMENTIS IN GENERE.



Vum solidæ, hoc est, demon-
strativæ, therapiaë medicæ principia &
fundamenta, a quibus certa & tuta me-
dendi methodus potissimum pendet,
tradere, jam constitutum sit: non in-
congruum fore duxi, si prius paucissi-
mis attingerem, quam arcta & quam
amica inter scientiam physiologicam,
pathologicam ipsamque therapiam in-

tercedat connexio; quo tam necessarius præcipuarum artis medi-
cæ partium nexus eo clarius innotescat. Nimirum physiologia
motuum vitalium, qui corruptibilem nostram machinam a præ-
sentaneo interitu vindicant, & motibus, tam progressivis, quam
intestinalis, nec non secretoriis & excretoriis, absolvuntur, ac uni-
versi partium corporis functiones secundum naturam efficiunt &
moderantur, indolem, causas atque effectus perquam clare &
perspicue explicat. Pathologia vero ea est scientia, quæ motus
hos vitæ inservientes præter naturam turbatos, & inde pullulan-

tes actionum læsiones, proponit, earumque indolem, nec non multiplices a quibus dependent causas, accurate & solide indagat atque scrutatur. Et therapia denique est prudentia, corruptos & inversos vitales motus, functiones ipsius corporis diversimode lædentes, per congrua remedia, debito tempore & accommodata methodo, in integrum restituendi & amissam sanitatem revocandi. Ex quo utique conficitur, nullam solidam & veram therapiam medicam doceri, vel addisci posse, nisi veræ & rationalis physiologiæ ac pathologiæ præcepta prius cognita fuerint atque perspecta. Sane, nemo unquam firmis rationibus mortis & morborum causas demonstrare poterit, quam qui vitæ ac sanitatis naturam & fontem exacte intellexerit. Neque etiam ullus medentum solide & rationi congruenter declarabit, quibus auxiliis & qua methodo, morborum præternaturales motus, qui sanitatem labefaciunt & machinæ nostræ perniciem intentant, in ordinem redigendi sint; nisi ante mortis & morborum causas atque effectus intime perspexerit.

Posteaquam igitur in primo medicinæ rationalis systematicæ tomo philosophiam corporis sani & integri; in secundo philosophiam corporis ægræ, sive pathologiam, plenius pertractavi: succedit jam tertius, qui solida præcepta & fundamenta artis therapeutice tradet, quæ luculenter quemvis edocebunt, non perfunctorie, palliative & ambigue, sed cum ratione, certa & explorata convictione, quin etiam indubia successus spe, morborum curationes molindas esse & suscipiendas.

Asserui vero therapiam esse prudentiam, per quam habitum cum recta ratione effectivum, sive practicum, intelligo: & rectam hanc medendirationem, in acri & firmo medici judicio consistere, persuasissimus sum; adeo ut, quo magis is ipse subacta & præsentis judicandi facultate polleat, eo feliciorum illum habendum esse existimem. Nunquam enim properato, temere aut inconsiderate is, qui salutari arte fessos levare nititur, agere, sed diu meditando, solícite inquirendo & studiosè deliberando, ex claris & jam cognitis principiis judicare & demonstrare debet, quare in hoc vel illo morbo, quædam remedia, ex fonte chirurgico,

gico, pharmaceutico, aut etiam diætetico, deprompta, juvent, adeoque præscribenda: & vicissim, cur alia noceant & a curatione plane excludenda sint. Neque salubria & insalubria in sanandis morbis tantum nosse sufficit, sed medicus perspicaci etiam judicio determinare debet, quo tempore, quo ordine, quo loco, quocum regimine & qua mensura, seu dosi, pro corporis ægrotantis, morbi & symptomatum conditione, medicamina offerenda, nec non, quibus de causis & quem in finem, hæc vel illa, potissimum in usum vocanda sint. Tandem exigitur etiam a medente, ut de morbi decursu atque eventu, nec non remedium effectum, certum judicium & verax præsagium interponere possit, quo certe ad famam, existimationem & celebritatem consequendam nihil magis facit.

Quum autem ad rectum in therapeutice judicium stabilendum, plura, quæ accurate prius tenenda sunt, pertineant, eo quod judicium hoc actus voluntatis est, & jamjam eorum, de quibus sententia ferenda, exquisitam notitiam supponit: rerum in hoc tomo dicendarum ordo utique exigere videtur, ut de iis, quæ ad judicium therapeuticum exacte formandum scitu & cognitu valde sunt necessaria, ante agamus, quam ad ipsam specialem morborum considerationem eorumque medelam descendamus. Videlicet primum & potissimum therapeutice veritatis ipsiusque judicii medici fundamentum est, perfecta & omnibus numeris absoluta ægrotantis & morbi historia, quippe quæ, præterita & præsentia, omniaque quæ affligunt, fideliter, perspicue & ordinatim enumerat; quo ex iisdem futura certo dijudicari possint. Alterum est exquisita notitia mechanismi corporis, tum sani, tum ægrotantis, sive cognitio effectuum, legum & genii motuum in genere, non solum qui vitæ ministrant, sed etiam qui morbos excludunt, secundum quæ iidem jugiter & nunquam non operationes suas edunt. Deinde palmarium quoddam momentum conficit consideratio communicationis motuum in machina nostra præternaturalium, qualis nimirum & quanta cum his, vel illis partibus sit; quo medicus claras & perspicuas symptomatum rationes, quæ vulgo consensui partium tribuuntur, inde delumere

ac derivare queat. Tum ordo & series caufarum, quæ functiones præter confuetam naturæ normam immutant, & morbificæ dicuntur, quæ multiplicis sunt generis, earumque ratio & modus operandi, ftudiofe rimanda & penitus animo concipienda funt: quod fufius jam & luculenter fatis in fecundo hujus operis tomo excuffi. Præterea eximium judicii medici argumentum fuggert contemplatio naturæ motuum vitioforum, certis morbis folennium, quoniam videlicet horum ad corporis confervationem, & quoniam ad ejus deffruccionem, five mortem tendunt, ex qua pofttea veracem & firmam prædictionem de exitu morbi, tum ratione falutis & mortis, tum longinquitatis & brevitatis, nec non folutionis & difceffus, fumma cum prudentia depromere medentis eft. Porro mechanica remediorum operandi ratio, quæ aut circa materiæ, quæ morbum facit, vel correctionem, vel evacuationem, aut etiam motuum vitia emendanda verfatur, tam a priori, elementis nempe & principiis quibus agunt, quam a pofteriori, per identidem confirmatam experientiam, mente comprehendendi & explorata effe debet. Non minus etiam illi, qui morbis medelam afferre tentat, fummo eo annitendum eft ftudio, ut animo complectatur firmiterque teneat accommodatam componendis & in priftinum ordinem reducendis morbofis motibus methodum, nec non, quod præcipuum eft, folidas medendi, tam rationi congruas, quam crebrioribus experimentis comprobatas, leges. Succedunt tandem obfervationes & cautiones, in omnis generis remediorum ufu provide adhibendæ & applicandæ, quas alius animo infixas, memoria cuftodire debet is, qui cum ratione & exoptato fuccelfu in artis, quæ mortalium faluti præeft, exercitio verfari gefcit.

Hæc funt folida illa & firma fundamenta, quibus omne therapeuticum judicium fuperffruendum eft: jam unumquodvis eorum feorfim curatius enucleabo & uberius illuftrabo.

CAPVT II.

DE

HISTORIIS MORBORVM RECTE
CONSIGNANDIS, CEV PRIMO THE-
RAPIAE MEDICAE FVNDAMENTO.

Primum itaque iudicii therapevtici principium sunt historiae morborum. Hæ autem, ut insignem, tam in ipsa medicatione, quam vera prædictione, utilitatem ferant, recte utique concinnandæ sunt, ita, ut non mancæ, mutilæ aut necessariis circumstantiis privatæ, sed potius, quoad fieri potest, omni ex parte completæ, integræ atque perfectæ sint. Quemadmodum enim in Jure ad decidendas ex æquo controversias & solidum iudicium ferendum, integra facti, ut dicere amant legum periti, species, cum singulis circumstantiis, requiritur: ita idem in medicina obtinet. Sane medicus parum solidi de indole morbi iudicabit, minus quoque aptum & salubre consilium exhibebit; nisi prius omnium phœnomenorum circa morbum observandorum exacta notitia fuerit instructus. Et hæc circumspectio eo magis necessaria est, quia eorundem morborum non eadem semper sunt causæ eademque prorsus symptomata, subiecta quoque differunt, quoad ætatem, sexum, temperamenta, vitæ rationes, consuetudines & plura alia, quæ ad producendos fovendosque morbos concurrunt: adeo ut interdum certum constantemque morbi ejusque symptomatum naturam perturbent, & difficile sit veritatem indagare; nisi complexus horum omnium plene annotetur & sagaci rationis usu perspiciatur & perpendatur. Sæpiissime etiam unicum in morbo phœnomenon tanti momenti est, ut longe alia medendi via sit ineunda. Quandoque minima visa circumstantia maximæ est considerationis, ideoque non facile quippiam est prætermittendum. Præclare hanc in rem commentatur Baglivi libr. III. Prax. med. cap. 3. natura, inquit, nihil frustra

frustra molitur, minimaque sunt sæpius magnarum rerum initia, & minima quoque ad notitiam grandium nos ducunt. Eandem quoque sententiam exemplo illustrat, hunc in sensum pergens: *status pedendo emissi judicantur morus viles & nullius ad curationem momenti, & tamen, si in dysenteria status, qui prius non aderant, per inferiora exire incipiunt, brevi sanitatem promittunt, ut nos aliquoties observavimus.* Proinde quisque qui therapiae medicæ manum admoveere tentat, totus in eo esse debet, ut plenas & perfectas, nec fictitiis circumstantiis corruptas observationes, condat & undiquaque colligat. Quia vero rariores eæ deprehenduntur in monumentis tum veterum, tum recentiorum medicorum: vehementer certe optandum foret, ut quivis ad cultiorem in arte salutari eruditionem adspirans, hominumque sanitati fideliter invigilans medicus, casus in artis exercitio occurrentes, præsertim notabiliores, plenissime consignare, atque hoc pacto indefesso studio artis medicæ incrementum promovere anniteretur.

Ad integram vero historiam de morbis contexendam, non solum requiruntur circumstantiæ, quæ corporis agrotantis naturam & constitutionem intime patefaciunt, ac morbi genium & indolem exhibent, sed etiam ea, quæ vires & effectus produnt remedium phænomena, annotanda. Subjecti quod patitur accuratior cognitio, quantum conferat ad rationem, inprimis symptomatum, in eodem morbo non raro mire dissidentium, in diversis subjectis detegendam ac medendi methodum inveniendam, res tam clara est, quam quæ clarissima. Etenim pro differente corporum indole ac conditione, idem morbus, ab eadem causa productus, diversis plane symptomatibus incedit. Quemadmodum enim idem alimentum, idem purgans, vel emeticum, vel aliud quodvis heroicum remedium, idem quoque venenum, longe alios diversissimosque effectus pro differente corporum indole edit: ita etiam morbificæ causæ, ejusdem indolis, plane multis modis, dissidentem morbi faciem, ratione symptomatum, ratione periculi & salutis, in aliis atque aliis subjectis exhibent.

Necessarium igitur est, ut in condenda perfecta morbi cujusdam historia, mentio inprimis injiciatur ætatis, sexus, structu-

ra partium solidarum, five habitus corporis, & virium, nec non hæreditariæ ad hunc vel illum morbum dispositionis. Et sane ætatis, tam ad morbi genium perspicendum, quam ejus curationem legitime adornandam, maximum est momentum & mira diversitas: eo quod procedente eadem, solidorum structura & fluidorum ipsiusq; sanguinis crasis atque temperies, adeoque & humorum motus multum immutantur. Scilicet in pueritia insignis fibrarum mollities, remissio, laxus & rarus habitus, cum seri abundantia adest; juvenes autem fibras tensas & strictas obtinent, sanguinemque calidiorem & mobiliorem alunt; & senibus propria est magna solidorum rigiditas & viarum atque canalium angustia, nec non falso-sulphurea humorum dyscrasia. Ex qua differente partium constitutione, universi certe fluidorum & solidorum mechanismi diversa indoles, & dependens hinc ad certos morbos proclivitas, dissidentes etiam mores & inclinationes, non solum derivari debent, sed pro hac ipsa etiam varietate varia quoque & accommodata methodus excogitanda est & adhibenda: id quod experientia luculenter confirmat, ipsisque medentum sagacioribus apprimè cognitum est.

Præterea differentię sexus exacte ratio habenda est, quum foemina ob menstruum sanguinis fluxum, vel primum erumpentem, vel minus ordinate succedentem, vel plane tandem subsistentem, nec non ob partus & puerperii labores, multo pluribus ac ipsi viri, & peculiaribus prorsus afflictionibus, non solum sint obnoxia, sed systema etiam nervorum longè imbecillius in ipsis sit, & hinc motuum *aratic*, spasticis ac convulsivis tractionibus & distensionibus, vehementius afficiatur & facilius etiam ad integritatem reducatur, quam in virili & nobiliori sexu.

Plurimum quoque refert nosse: an ægrotans laxi & solutioris, an strictioris, habitus sit? an vasa exiliora & copiosiora, an capaciora & pauciora obtineat? Siquidem sub angustia & tenuitate canalium fibrarumque remissione, longe difficilior fluidorum & progressivus, & secretorius, & excretorius motus procedit: multo autem expeditior & promptior est, ubi fibræ magis

tenſæ & ſtriſtæ, vaſaque non nimis anguſta, ſed ampliora ſunt. Unde obſervamus, illos multo magis morbis & morboſis affli-
ctionibus patere, difficilius etiam ſaneſcere his, in quibus ob va-
lidiorẽ fibrarum motricium potentiam, fluidorum curſus per
corporis compagem citatior eſt. Id quod etiam de corporum
macie & obefitate tenendum eſt.

Porro color faciei & cutis diſpiciendus. Floridus enim
pulcher & nitidus aſpectus de lymphaticorum humorum purita-
te & pelluciditate; lividus vero, luridus & flaveſcens, de eo-
rundem impuritate ſalino-ſulphurea, & vacillante ſecretionĩ dica-
torum organorum, inprimis hepatis, officio, evidens præbet
indiciũ.

Et ſicuti teſtante quotidiana obſervatione, viſcerum & fi-
brarum debilitas, labes, vitia & inde pullulantes morbi, plerum-
que ad liberos propagantur: ita maxime omnium medicum de
his percontari oportet; utpote quæ, ad prædictionem non falla-
cem promendam multum faciunt. Nam imbecillitates & morbi,
qui a nativitate infeſtant, ægrius ſemper ſanationem admittunt,
facile recurrunt & medentibus multum negotii faceſſunt.

Neque virium ſolicita exploratio intermittenda eſt: utrum
ſcilicet natura depreſſæ fuerint? an vero ſub morbi, præſertim
acuti, initio, quod inter peſſima ſigna connumerandum, ſtatim
concuſſæ & proſtratae apparuerint? In robore enim & vigore vi-
rium, quæ non aliter niſi motu & impulſu fluidorum ſeſe produnt,
magnum ſanitatem recipiendi, & vitam, quæ a viribus nomen
fortita, ſervandi, præſidium collocari, indubium eſt.

Non ſolum autem corporis conditio ſcrutanda, ſed ipſius
quoque animi indoles perquirenda, & quibus morbis is labore
conſiderandum. Quum enim amicabile admodum & magna ſit
motuum, tam animi, quam corporis conſpiratio & communio;
prudens certe & rebus ſuis ſatagens medicus, ex mentis, ad has
vel illas impetuoſas commotiones diſpoſitione & proclivitate,
recte & ad veritatem accomodate argumentari poteſt, ad ſoli-
dorum & fluidorum mechaniſmum, & dijudicare, quomodo hic
ſit comparatus. Nam major & vegetior fibrarum ſolidorumque
tenſio

tenfio & mobilitas, ad iracundiam animum disponit; laxitas vero & deficiens eorum vis motrix, angustum, demiffum, timidum & pavidum illum reddit. Ira etiam solidorum tonum & stricturam augendo, fluidis impetuosiores motum inducit: timiditas viciffim, robur folvendo & dejiendo, ut remiffius trudentur & tardius circumagantur, efficit. Terror valide fuperficiem & extrema corporis constringit, fanguinemque ad interiores & nobiliores partes, præcordia nempe & caput, impetuofo reprimendo, graves ingignit affectus, nervofi maxime generis, id quod fenfim enervat & languore frangit. Idem præftat diuturnus mœror, qui fæpius quidem ex vitio vifcerum & curfu humorum impedito, ut in hypochondriaco malo affectis conftat, originem nancifcitur; fed dum nociva fua efficacia folidas maxime partes aggreditur, mirifice vires univerfi corporis atterit ejusque functiones, robur fibrarum minuendo illasque laxando, labefactat. Quid? quod ii, qui attentius & curiofius morbis fanandis præfunt, fubinde experiuntur, difficulter admodum ægritudines elidi & expugnari, fi animus non eft compofitus atque pacatus, fed patheticarum commotionum intemperie diverfimode jaçtatur. Præterea in medica hac animi confideratione inquirendum etiam eft: num forfan, quod literatorum maxime vitium eft, ex nimia ftudiorum intemperantia, profundis & mentem fatigantibus meditationibus, quæ in difciplinis abftractivis, ut metaphyficis & mathematicis, familiares, nec non intempeftivis lucubrationibus, confumtis fpiritibus, fic dictis animalibus, ingens cerebro & nervofis partibus illata fuerit debilitas? utpote quæ, poftea ad graviffimos capitis morbos, apoplexiam nempe, melancholiam, maniam memoriæque debilitatem promptum parat aditum, & vix fummo labore refarcitur. Dici enim vix poteft, quanta confenfio cerebro ejusque membranis, cum ventriculo eique annexis inteftinis, ceu valde nervofis, nec non aliis exquisito fenfu præditis partibus, intercedat: quæ fit, ut nimium literis fefe ingurgitantes, plerumque depreffa ciborum confectione & vacillante digeftione, nec non feigniori & difficiliiori inteftinalis excretionis

successu, maxime omnium vero familiarissimo ipsis morbo, sic dicto hypochondriaco, affligantur & excrucientur.

Porro ad pleniorē morbi historiam consignandam referendum etiam est, ut medicus non solum ubi locorum ægrotans degat & quo coelo & aëre fruatur, sed etiam quo victu utatur, curatius pernoscat. Altiora enim & sublimiora loca, ob liberiorē ventorum perflatum, aëre puro gaudent, ideoque salubriora sunt; humiliora autem & depressiora, aëre magis condensato, crassiore impurisque vaporibus referto infesta sunt. Et nihil certe ad ingenerandas graves & chronicas passiones, neque minus ad vigorem & robur solidis & motricibus partibus subtrahendum validius est, quam si quis sub coelo graviore, impuro & vappido aëre, cibum & somnum capit; eo quod hic ipse unacum esculentis & potulentis, ipsaque inspiratione, interiora corporis subintrans, humoribus sese intimius commiscet, & fluidum illud aëreo-athereum contaminat, ut motibus in corpore non ea, qua decet efficacia, præesse possit, sed functiones partium inde gravissime luant.

In victus autem ratione potissimum dispiciendum: num ægrotans duriori & crassiori victus generi, cujus census sunt cibi ex mari depromti, carnes induratae, salitæ & infumatae, panis grossior, assuetus? quippe quod in locis maritimis recepti usus est, & ad dyscrasiam, sive impuritatem sic dictam scorbuticam, ibi locorum endemiam, multum confert. Vel etiam explorandum est: an decumbens fructibus horæis, aut etiam acetariis, farinaeis cum butyro, ovis & saccharo frixis, quod mulierculis solenne, nimium delectetur. Alii caseum in deliciis habent, eoque immodice vescuntur, qui tamen & obstructioni, & calculorum generationi, multum velificatur.

Maxime omnium vero potus consueti genus considerare & explorare decet: eo quod, maximum sanie est momentum, quod ad texturam & crasin sanguinis humorumque constituendam potus confert; qui quo magis est temperatus, aqueus & dilutus, eo salubrior quoque existimandus est, quum ad sustinendum vitalem humorum motum, tres liquidi partes, & una tantum solidi desideren-

derentur & secundum naturam recipiantur. Hinc cerevisiæ nimis crassæ & nutrientes, multo magis acedentes, nec non omnes potus nimium spirituosus, vini & frumenti etiam spiritus, matutino inprimis tempore & ventriculo vacuo copiose ingurgitatus, mirum quantum sanitatem lædunt, quin sensim frangunt atque prosternunt. Inde enim viscera indurantur, polyposæ concretiones hinc & illinc in cavitatibus generantur & humores a debita temperie deturbantur, ut postmodum ad hæticam, cachexiam, hydropem, apoplexiam & subitam mortem promptus fiat transitus. Quum vero homo ad tuendam valetudinem copioso liquido indigeat; nihil certe parciori potu, in quo foemina & qui vitæ sedentariæ incontinentius dediti sunt, plerumque delinquant, damnosius est & insensius: siquidem hoc pacto, ob necessarii fluidi defectum, minimi tubuli, e quibus emunctoria corporis organa penitus coagmentata sunt, viscido & crasso humore infarciuntur, occluduntur, & obstructiones foecundæ plurimorum morborum genitricæ exsurgunt. Præterea sedula inquisitione etiam percontandum: num a largiore, nimis frigido haustu, corpori sudanti & impense calefacto ingesto, morbus sua duxerit primordia? Quod si enim primam morborum originem perquisitus scrutamur, nihil certe frequentius occurrit, quam quod a potu nimis perfrigerato, largiter & celeriter, post intensam corporis commotionem & exercitationem, vel post affectum quandam vehementiorem animi, aut succedente critica aliqua & salutari sanguinis excretionem, ingurgitato, universa functionum & motuum vitalium œconomia illico turbetur ac pervertatur, ita prorsus, ut ipsa veneni virulentia, neque citius, neque potentius, destructionem & exitium inferre queat.

Accedit vitæ genus, decumbenti huc usque solitum atque familiare, in cuius contemplatione hæc potissimum expendenda: an sit laboriosum, vequietum & sedentarium? an aulicum? an militare? an curis & laboribus mentis adstrictum? Nec non quale opificium tractet atque exerceat? an scilicet metallis & mineralibus fovendis, igne coquendis & perficiendis operam det? Nam quamlibet vitæ generis rationem, peculiare suos alere mor-

bos, non modo indubia experientia comprobatur, sed fufius etiam & folido argumentorum robore in elegantiffimo libro, quem *Ramazzinus de morbis artificum* composuit, abunde evictum atque excussum est.

Tandem eximium momentum ad interiorem ftatus, a naturali ordine defcipientis notitiam, ipfa confuetudinis ratio fubminiftrat. Quum enim nullus fere homo fit, qui non peculiari quadam rerum non adeo falubrium affuetudine teneatur, in victu, potu, fomno, motu, exercitio venereo, tabaci, fuffimigii, vel fternutationis caufa adhibiti, ufu, noftro ævo potus coffee forbitione, quin etiam, quod inprimis hypochondriacis folitum, nimia ipforum medicaminum affumptione, aliisque rebus: certe, fingula hæc errata, naturæ corporis noftri minus proficua, probe inquirenda funt & noxa ab iis illata ftudiofe penfitanda.

Nihil vero, nofta quidem fententia, ad ægri naturam & morbi generationem plenius cognofcendam & intelligendam, plus adjumenti affert, quam excretorum modum & rationem recte examinare atque perpendere. Ea enim excretionum indoles, conditio, quin etiam neceffitas eft, ut fine his valetudo falva perfiftere nequeat: propterea quod in homine, non amplius quoad corporis molem increfcente, tantum egeri debet, quantum ingeritur, & deficiente, vel fuppreffa, confueta & falutari per varia organa, fuperfluatorum, inutilium & mixturæ animali ac vitæ inimicorum eliminatione, e veftigio plurimæ morborum caufæ propullulant; ita, ut non fallaci præfagio exinde morbi prævideri atque prædici poffint. Inprimis autem id vacuationis genus, quod per alvum fuccedit, eo ftudiofius eft confiderandum, quo majus momentum eft, quod ad fanitatem illibatam præftandam, conficit. Etenim alimentaris ille & excrementitius inteftinorum canalis, fi diutius retinet ea, quæ e corpore proferibenda funt, graviffimorum non folum morborum fomes & minera excluditur, fed fedes etiam illorum ac domicilium in hoc erigitur atque firmatur. Hinc fi alvus incipit officii fui oblivifci, & præter confuetudinem obferatur, in proclivi & pro certo eft judicare, morbum vel præfentem, vel certe futurum effe. Præter al-

vinam hanc excretionem, attenta etiam contemplatione exploranda est perspiratio, quæ per universale illud corporis colatorium, extimam cutem, perficitur, & qua, secundum *Sanctorii* calculum, plus ejicitur, quam per omnia reliqua emunctoria. Hujus salutaris successus ex vestitu, ad corpus fovendum & in æquali semper calore servandum, apto, nec non temperato pedum tepore & madore optime dignoscitur: vicissim autem pedes sicci & frigidi, tubulosum cutis corticem strictiorem & sordium per hunc exhalationem sufflammatam esse, subindicant. Hinc si sub frigido, humido, mutabili & inæquali aëre, nec non vernali & autumnali tempore, tempestatibus crebrioribus vicissitudinibus interpolatis, exclusio sordium per halitus valde diminuitur, corpora fiunt languida, & morbi, qui populares habent circuitus, perquam familiariter infestant.

Quum vero homo plerumque plus alimenti assumat, plus etiam feri & sanguinis ingeneret, quam natura corporis ferre & in usum convertere potest, ut ordinariæ etiam excretiones sæpe supervacuis humoribus evehendis non sufficiant, extraordinarii subinde & statis nonnunquam temporibus, mensibus & annis recurrentes motus excretorii, contingunt, quibus vel ipse sincerus sanguis nimis abundans, uti fit in sexu sequiore, per uteri, & in nobiliore, per ani venas, nec non in pueris & adolescentibus, per narium stillicidium, foras dimittitur; vel etiam humores serosi & impuri per largiores sudores, per copiosas alvi dejectiones, per narium in coryza defluvium, nonnunquam validiori tussi, per diuturniorem visceri ac glutinosi humoris excreationem, cum singulari sanitatis commodo ejiciuntur: quæ salutare & consuetæ ejectiones, si deficiunt, vel prorsus supprimuntur, metus est, ne gravissimi morbi exinde emergant. Nihil vero æque perniciosum atque exitiale est, quam si criticæ ejusmodi, præsertim sanguinis, excretiones, celerrime & uno quasi ictu sistuntur; cujusmodi noxia vi potissimum pollet, tum gravis animi affectus, inprimis extrema & minima vasorum oscula constringens terror, tum aër nimis frigidus, aut frigus externum inconsideratius corpori admissum: siquidem exinde exitiales humorum sunt stagnationes,

tiones, & subitæ ac capitales noxæ in motuum vitalium ordinem redundant. Idem sentiendum est de excretionibus illis, quibus plurimi morborum solvuntur, & quæ propterea vocantur criticæ; si nempe medicus, vel ægrotans, easdem perperam & pessimo consilio compescere tentet: quippe cohibitis illis & compressis, facillime morbus non solum recrudescit & redit, sed pejor etiam multoque periculosior resultat.

Præterea ad genuinam morbi indolem exactius intelligendam, plurimum facit curiosius sciscitari & percontari: quibus morbis per vitæ decursum æger fuerit obnoxius? an forsan quidam haud ita diu præcesserit, & qua methodo quibusque auxiliis is fuerit sublatus? Nam turpe quidem dictu, sed proh! verissimum est: ex temeraria & imprudenti morborum, inprimis februm, medicatione, damnosissimam & maxime periculosam nonnunquam symptomatum oriri catastrophem, ita, ut fugato ambigue priori morbo, alius & longe gravior irruat ac diutissime infestet. Sæpenumero etiam, is, qui e morbo convaluit, salutaribus medici præceptis minus obtemperat, sed pro cœco libidinum impetu, gravissimos & nocivos in rerum non naturalium usu errores admittit, & hoc pacto de novo mineram morbificam colligans & cumulans, ipse sibi damnum procurat & morbum contrahit. Novimus sane plures, qui morbo superato & funditus extirpato, ex intemperanti & nimia ciborum ingestione, suppressa per subcutaneos tubulos ex incuria sordium exhalatione, nec non neglecto debito evacuationis alvinæ successu, in pessimas ægritudines iterum inciderunt & per diuturnum tempus cum iisdem conflictati sunt.

Nonnunquam etiam morbi mire complicantur, ita ut sæpenumero hypochondriaco malo jam antea affectus, aut cachexiæ implicitus, scorbutica labe infectus, debilitate capitis afflictus, hæmoptysin passus, phthisi emaciatus, hæmorrhoidum minus legitimo successu laborans, calculo excruciat, vel etiam podagræ doloribus detentus, alium adhuc durum morbum, sive acutum, sive chronicum, nanciscatur: ubi utique in medicatione summa adhibenda est prudentia, & longe alia medendi via ineun-

da, quam in alio ægrotante, eodem quidem morbo decumbente, sed visceribus integris, ac viribus nondum attritis & per antegressam valetudinem exhaustis.

Pari ratione ad exquisitius de morbis illisque medendi methodo iudicium ferendum multum certe valet, corporis laborantis, quoad viscerum & nervosarum partium dispositionem, plenior cognitio, in qua potissimum dispiciendum: utrum corpus succo & sanguine nimis sit fartum, vel an impura excrementitiorum & serosorum humorum sentina scateat, sive an sit cacochymicum? Qualis sit ventriculi & intestinorum ratio? an ructibus, flatibus & spasmis cum alvi strictura exerceantur, & æger sit hypochondriacus? Quæ hepatis sit conditio? An inoffensus sanguinis per hoc viscus transitus? an humoris biliosi in eodem secretio debita & non sufflaminata? id quod ex faciei colore & diminuta corporis nutritione patescit. Porro disquirendum: an tenera illa vesicularis & vasculosa pulmonis substantia adhuc sit salva & integra? quippe quod, exspiratio vel facilis vel difficilior, nec non rejectio humoris ex ore, luculenter produnt. Denique etiam temperies cerebri & systematis nervosi consideranda est, & ex natura somni, animi affectibus, mentis etiam & phantasiæ inturbatione, prudenter dijudicanda.

Exacte sic perspecta corporis ægrotantis natura, ad ipsum morbum quocum æger conflictatur, paullo penitius considerandum ejusque indolem & peculiarem genium intimius indagandum, transeundum, & maxime omnium videndum est: utrum malum populares habeat circuitus & epidemium sit? an ejus virulentia per exanthemata se prodatur? ex quo materiæ, quæ morbum facit, tenuitas & virulenta indoles potissimum dignosci potest, quippe quæ, dum nervosis partibus insidet, præcordiorum anxietatem, inquietudinem, extremorum frigus, conatum vomendi, capitis & dorsi, circa primam lumborum vertebam, dolorem, pulsus celeritatem, cum duritie junctam, mentis turbationem & spirandi difficultatem promptissime concitat; relegato autem ad corporis corticem noxio humore, horrida hæc symptomata, plurimum de vehementia sua remittunt & tantisper conquiescunt.

Scrutandum præterea est : an cum ingenti virium prostratione & intenso partium languore, nec non jactatione & summa inquietudine, morbus ægrum apprehenderit ? utpote quod occultæ humorum corruptionis, quæ vulgo malignitatis nomine venit, haud dubium subministrat indicium.

Et quum nulla fere febris vel alius morbus sit, in quo non sensibiles symptomatum remissiones vel intermissiones conspicuæ sint ; medicus certe, actiones tam naturales, quam vitales & animales, quomodo tam intra, quam extra paroxysmum comparatæ sint, sedulo pensitare debet. Nam in accessionibus & impetu ac vigore morbi, in quo motus & solidarum & fluidarum intensiores & accelerationes deprehenduntur ; necessarium est, ut omnia ea quæ motus cum excretionibus augent & exacerbant, penitus absint & prorsus intermittantur : contra vero diebus vacuis & intercalaribus, nec non paroxysmo silente, ubi omnes motus, maximeque pulsus, ob insignem solidorum succedentem atoniam & debilitatem, sunt imbecilles & languidi, ea, quæ materiæ peccanti commovendæ & exterminandæ inserviunt remedia, perquam opportune propinari possunt. Maxime vero omnium in morborum incremento dispiciendum est : quas functiones maxime, animales, an vitales, vel naturales ? iidem lædant & labefactent ; quippe ex hujus læsionis gravitate, morbi causæque morbificæ vehementia dijudicanda est. In acutis ex somni, respirationis, nec non pulsuum conditione atque natura, morbi genium & vim uberius & perquisitius cognoscere, solerti & perspicaci medico datum quidem est atque concessum ; sed dolendum certe, quod perpauci sint, qui ex arteriarum pulsatione, sanguinis per universum corpus, & præcipue pulmones, circuitum, atque etiam systematis nervosi & fluidi nervei, quod veteres spiritus animales vocarunt, naturam & constitutionem indagare atque perspicere norunt. Plane mirabilis enim cerebri & cordis est conspiratio, ita, ut quivis cerebri vel nervorum morbus, quivis etiam animi ex affectu motus, pulsus illico mutet. Porro quum nemo ex morbo, nisi inflammatione & sphacelatione interna moriatur, & in acutis quidem ventriculi & membranarum cerebri inflam-

inflammationes facile succedant & interitum inducant; in chronicis vero viscerum sphacelationes, lethalem vitæ catastrophem imponant: medicus certe oculum & animum ad funesta hæc symptomata cumprimis advertere & dirigere debet, quo exinde perquam utilia consuetaria in usum suum elicere possit. Neque minus diligens suscipienda est investigatio in primarum viarum sub totius morbi decursu conditionem: an scilicet sordibus refertæ sint, vel fordescere incipiant, & quidem sub initium vel progressum morbi? Qualis sit excretionis alvinæ ratio? quæ rejectorum copia, color & qualitas? utpote quæ de functionum naturalium vitiata vel legitime comparata constitutione, haud incertum præbent indicium. Urina etiam contemplanda, qualis hæc reddatur colore, consistentia, indole & quantitate, e quibus, collatis aliis in morbo phenomenis, spasmodicæ partium internarum stricturæ cognosci & æstus præternaturalis augmentum vel decrementum judicari potest.

Uterius ad integram morbi historiam contexendam, nihil aptius judico, quam si medicus probe & summa cura operationes remediorum, quæ præscribit, observet, & omnes, quæcunque post medicaminis usum inciderunt mutationes, studiose annotet, inprimis: utrum symptomatum vis ac vehementia inde tantisper vel mitigata, vel adaucta sit? an vero nihil plane horum contigerit? Quum enim totius therapie cardo in eo potissimum vertatur, medici etiam peritia ex eo maxime patescat, si is in graviore morbo apta & idonea ad oppugnandum eum sciat exhibere remedia: certe qua ratione medens palmario hoc suo officio satisfacere & auxilia utiliter & convenienter applicare possit, si non exacta illorum notitia fuerit imbutus, equidem non video. Hanc vero remediorum intimiorem cognitionem animo rite concipiendi, vix certior, rectior & compendiosior datur via, ac per observationes & morborum historias, quæ simul medicaminum propinatorum usum, genuinam applicationem & certos effectus recensent atque complectuntur. Et hinc demum vera, certa & non fallax de remediorum viribus & efficacia, quæ tantopere in desiderio est, experientia, proficiscitur & medenti innotescit.

Jam dudum enim non solum *Celsus* monuit, sed experientiæ etiam calculo constat: eadem medicamenta, quæ in eodem morbo uni subjecto maxime proficua sunt, alteri gravissime nocere; quo fit, ut ipsi medici, remedium quoddam mirificis laudibus & encomiis extollant, alii vero illud ipsum plane damnent atque rejiciant, utrisque ad experientiæ asyllum confugientibus, cujus tamen ea ratio est, ut nunquam fallere possit, si modo omnes & singulæ circumstantiæ omniaque phænomena, quæ in perfecta subjecti & morbi historia commemorantur, exacte pensitentur; neglectis autem, ut perditus plerumque mos obtinet, iisdem, hæc ipsa utique anceps est summeque ambigua. Nam vires & operationes remediorum neutiquam sunt absolutæ, sed conditionatæ, hoc est, ad varias conditiones & circumstantias, tam individui, quam morbi, nec non causas, tempora aliaque id genus relatæ; ideoque eum omnino in finem accuratæ observationes & exactæ curationum historiæ conscribuntur, quo genuinæ medicamentorum virtutes, in tot diversis naturis, locis atque temporibus, perspiciantur & intelligantur. Hinc præstantissimum profecto est *Hippocratis* monitum libro de decenti orn. Sint, inquit, in memoria tibi morborum curationes & harum modi, quotupluciter & quomodo in singulis subjectis se habeant: hoc enim principium in medicina est, medium & finis.

Quum vero morbi, præsertim acuti, sæpissime sine ullo medico & pharmaceutico subsidio, aut aliis per artem adhibitis auxiliis, solius naturæ beneficio, & nonnisi domesticis quibusdam remediis, temporis præsertim diuturnioris tempestitate, cedant, quin non raro rectius persanentur, ac ubi ingens pretiosissimorum medicaminum copia exhibita fuit: multum profecto ad therapiam rite instituendam & convenienter perficiendam proficit, omnes sedulo annotare circumstantias, sub quibus, quo tempore, quo ordine, quibus excretionibus, quo symptomatum successu, morbus decurrerit & tandem solutus fuerit. Optandum hinc quam maxime foret, ut accuratæ prostant observationes de singulorum morborum in diversis individuis naturali processu ac spontaneo decursu, ubi nimirum totum opus naturæ commis-

sum,

sum, nec ullum plane adhibitum fuit medicamentum, & in quibus omnes circumstantiæ tam nude & simpliciter enumeratæ sunt, quam se invicem non interrupta serie exceperunt. Ita firmitus sane iudicium de viribus remediorum interponi posset, & non solum facillimum esset dijudicatu, utrum affectus alicujus exacerbatio, quæ post medicaminis usum contigit, ex immutabili naturæ lege atque causarum nexu profluxerit, an vero a remedio illo stricte & absolute inducæta fuerit, sed vicissim etiam longe certiori argumentatione concludi posset, remissio & allevatio symptomatum, administrationi remedii succedens, hujusne, an naturæ operationi, an utrisque simul adscribenda sit & tribuenda. Non infrequenter enim fit, ut medici arcanis suis accepta ferant, quæ iussragante tantum natura, quoad afflictionum mitigationem, vel totius morbi curationem, evenerunt; unde tam gloriosa simplicium & compositorum medicamentorum encomia in libris practicis & botanicis prostant, quæ tamen plerumque omnem spem & expectationem, tam medici, quam ægrotantis, fallunt atque destituunt.

Denique ad observationes & completas morbi historias adornandas, sectio cadaverum morbis defunctorum maxime referenda est; quandoquidem non facile aptius & certius ad naturam causæ morbificæ & sedem affectam pernoscentiam, immo ad mortis causas detegendas medium, sectione & inspectione solertiori cadaverum eorum hominum, qui iisdem morbis extincti sunt, invenitur. Quanquam enim non omnia, quæ in dissectis corporibus observantur, semper primæ & proximæ morborum causæ habendæ sint, sed sæpius effectus tantum causarum atque ipsius mortis sistant: nihilominus non raro tamen accidit, ut hac ratione genuina morborum atque symptomatum insolitorum causæ manifestæ fiant. Obversantur sane animo plurimi casus, ubi tum in ipsis morbis, tum in eorum causis cognoscendis, non incelebres etiam, sed magni nominis medici, valde hallucinati sunt, maxime aliena de morborum quorundam indole & causis proferendo, quorum erroneas cogitationes

tiones cadaveris post mortem apertio evidentissime refutavit. Facta enim sectione, ut plurimum polyposæ in corde vel vasis majoribus concretiones, aut empyemata in pectore abscessus mesenterii, calculi in bilis conceptaculo, vel urinaria vesica, rupta sanguinea vel lymphatica vasa, ingentes glandularum tumores, scirrhotitates, vel corruptiones putredinosæ viscerum, uterus difruptus, in conspectum venerunt, de quibus nihil plane antea suspitionis fuit. Monendum tantum est, ne in cadaverum dissectionibus, causam morbi confundamus cum causâ mortis, quod a pluribus minus ingenuis medicis fieri assolet, quibus sufficiens peritia ad iudicium aptum de læsionibus partium, quæ in sectionibus deprehensa fuerunt, ferendum, deest. Nonnulli etiam data opera causam mortis pro causa morbi venditant, ut hoc pacto aliis imponant, quasi nulla arte morbus, quo vita defunctus æger, medicamentis potuisset submoveri, & sub hoc indeclinabilis moriendi necessitatis prætextu famam suam salvam atque integram conservent.

Dissectiones itaque cadaverum frequentiores & solertiores a medicis anatomes peritis maiorem in modum commendandæ sunt; eo quod vera causarum morbi cognitio, & prudens remediorum ad eas auferendas applicatio, duo quasi poli sunt, circa quos rota praxis medica vertitur. Et utut accuratior causæ morbificæ cognitio, non semper satis sit ad morbum tollendum, sed is sæpe remediorum efficaciam vincat; non tamen ideo inquisitio diligentior cadaverum, tanquam labor parvæ utilitatis inculanda, quod a nonnullis sciolis, qui sapientiam suam non ex puro naturæ fonte, sed lutulentis lubricæ phantasiæ speculationibus, haurire satagunt, fieri consuevit, siquidem ad minimum id emolumenti inde resultat, ut medicus an morbus similis occurrens, sanationem admittat, necne? & quænam medicamenta huic malo avertendo idonea sint, quæ non? dijudicare possit. Profecto enim ex unica per anatomen circa morbi alicujus causam facta observatione, plus utilitatis in praxin, præsertim si eadem affectio iisdem plane circumstantiis stipata denuo occurrat, redundabit, quam ex mille subtilibus theoreticorum ratiunculis,

ex fictitiarum hypothesium scrinio depromtis. Pulchre hanc in rem scribit *Baglivus lib. 1. Praxeos med. cap. V. S. 6.* dum ait: errant, qui putant, se morbos feliciter curaturos, quia doctrinam theoretizandi ad amussim callent; errant, inquam, quia medicus ad multo altiora respicere debet, ut innocentem artem a calumniis vindicet, agrosque a morborum radio ad salutis tranquillitatem revocet: cadavera hominum morbis denatorum, secanda sunt ei, manusque inquinanda, ut inveniat, quæ morbi sit sedes, quæ causa, qui exitus antecedentium symptomatum, qui demum effectuum omnium in antecedenti morbo observatorum eveniunt.

Reliquum nunc est, ut, præter ea, quæ jam sparsim in ipsa tractatione monuimus, etiam dicamus, quinam fructus ex medicorum plenioribus observatis in perfectionem & certam rationem artis nostræ redundant. Sunt vero hi eximii. Neque enim alia via vel methodus suppetit, quæ morbos a se invicem probe distinguere eorumque causas multum quoque dissidentes cognoscere possumus, quam per multiplices & recte institutas observationes. Ad prudentem etiam prognosin, sive iudicium de morbi eventu formandum, certior & melior, quam per observationes, nulla ratio invenienda. Quam infinitæ circa morborum prognosin regulæ in *Hippocratis* aliorumque veterum monumentis quidem prostant; sed maxima ex parte fallaces sunt, tantum abest, ut pro universalibus sententiis & aphorismis veris haberi possint. Idque accidit eam maxime ob rationem, quia non ex integris morborum historiis, sed ex earum fragmentis tantum, & quibusdam, non omnibus & singulis circumstantiis, depromptæ sunt. Igitur longe perfectior & hæc doctrina de prognosi speranda nobis erit, modo ex multiplici observatione & accuratiori consideratione circumstantiarum prognosticas regulas elicere incipiamus. Neque dici satis potest, quam utilia corollaria in usum futurum, ratione methodi medendi, ratione applicationis remediorum, & in cognoscendo, quamnam ex horum genere noceant, vel prosint, hauriri queant. Medico enim nunquam desistendum est ab observa-

tioni-

tionibus & experimentis, neque ulla, licet etiam minoris momenti videantur, negligenda sunt. Nos certe non facile casum quendam prætermittimus, quia vix ullus incidit, ex quo non quippiam adhuc addiscere possimus, quum ad minimum, quod iam inventum & cognitum fuit, exinde confirmetur.

Inter alios vero fructus, quos ex recte consignatis morborum historiis expectare possumus, insignis omnino etiam est is, quod ad diversas medicorum hypotheses, opiniones & controversias in praxi decidendas reddamur aptissimi. Quod si enim ulla, certe medica disciplina, innumeris opinionum figmentis, sectis & dissensionibus immerfa est. Ex harum vero dissidentium sententiarum labyrintho nosmet extricandi non meliorem novimus viam, quam si earum applicationem ad medicas observationes, quæ genuinum ac immutabilem naturæ ordinem & processum in vitæ, sanitatis ac morborum negotio complectuntur, urgeamus: tum enim clarissime elucescet, quæ firmo stent talo & ad veritatem accedant, ac vicissim, quæ a vero abludant & luxuriantis imaginationis foetus sint.

Quot diversissimæ medentur in praxi medica, circa remedium valentiorum & heroicorum, e. c. venæsectionis, fonticulorum, vesicatoriorum, purgantium, emeticorum, mercurialium, opiatorum, chinæ chinæ, salium volatilium, martialium sunt sententiæ, hi eadem laudant, illi damnant, & omnes pro veritate sententiæ suæ acriter pugnant, ut demum cui assensum præbere possis, nescias. Hic certe non accommodatior emergendi ex hisce difficultatibus patet via, quam si observationes cum cura & diligentia conscriptas de illis morbis, in quibus damnum vel salutem hæc medicamenta attulerunt, consulamus, quippe tunc facile apparebit, pro differenti circumstantiarum ratione, in eodem morbo remedia hæc insignem opem, vel luculentum etiam damnum attulisse, adeoque in se non esse nociva, sed in medicos culpam esse refundendam, qui iis non recte usi sunt.

Adhæc integræ atque exactæ morborum historiæ hanc quoque eximiam utilitatem afferunt, ut eorundem originem, primordia atque generationem exinde perspiciamus ac discamus. Etenim quemadmodum nihil in rerum natura sine causâ evenit, & effectus semper proportionati sunt viribus causarum suarum: ita etiam graves & plane inordinatæ motuum vitalium mutationes, ac inde dependentes turbatæ & læsæ functiones, ab efficacibus & sufficientibus causis ut proveniant necesse est. Has sollicita & sedula indagine pervestigare oportet medicum. Quocirca præter considerationem ætatis, habitus corporis & temperamenti, nec non dispositionis ad morbos, secundum ordinem rerum non naturalium, quibus unusquisque quotidie indiget, itemque quoad regimen in vitæ ratione, inquirere decet medicum: in quonam deliquerit vel errores admiserit æger; quo deinde his exploratis ac junctim pensitatis, proximæ, quæ morbum facit causæ, generatio elucescat. Nam si quispiam originem morborum curate investigaverit, semper observabit, causas plures, quæ medicis remotæ dicuntur, concurrere ad causam proximam, qua posita morbus ponitur, constituendam. Et has remotas, sive antecedentes causas, iis rebus contineri, quæ maxime sunt externæ & ab arbitrio ac potestate utentis pendent, exploratum est.

Quo facilius autem & crebrius errata inconvenienti harum rerum usu committuntur, præsertim ab iis, qui vires illarum, tam ad juvandum quam nocendum aptas, plane ignorant, quorum tamen maxima pars est: eo facilius quoque, certior magisque obvia est enata inde ad morbos dispositio, quin ipsa eorundem origo. Hinc dici vix potest, quantum utilitatis exactior primæ morborum generationis cognitio, nobilissimæ medicinæ parti, præservatoriæ, conferat. Quod si enim ex crebrioribus observationibus perspectum habeamus, a quibus causis prægressis, & admissis in vitæ ratione delictis, morbus in hoc vel illo corpore incunabula traxerit; in prono deinde ac facili est, salutare consilium aliis impertire, a quibus scilicet, valetudini dispendiosis rebus, sibi cavere ac temperare debeant,

ne in eundem morbum incident. Et utinam hæc præstantissima artis nostræ pars, quæ afflictionibus morboſis avertendis addicta est, qua nihil utilius, & quæ etiam in potestate medici plus posita, quam morborum sanatio, nostris temporibus majori studio & solertia excuteretur, & hunc in finem uber observationum idonearum apparatus colligeretur; tunc utique futurum esset, ut mortales, & vitam a morbis magis immunem, & diuturniorem, ducerent.

Sed hæc de modo conscribendi observationes morborum in uno individuo earumque insigni utilitate dicta sunt: nunc etiam perpauca subjiçienda erunt monita, observanda iis, qui historias de affectibus vel epidemiis, sive populariter in loco quodam grassantibus, vel endemiis, sive certis regionibus inquilinis & quasi propriis, rite concinnare ac colligere nituntur. Scilicet quum multi morborum, ac inprimis omnis generis febres, tam malignæ & periculi plenæ, quam contagio infestæ, continuæ, æque ac intermittentes, exanthematicæ & catarrhales, arthriticæ ac rhevmaticæ, nonnunquam certo quodam anni tempore, regionem vel urbem universali quasi labe inundent & multos simul invadant, sæpius etiam gravioribus aut mitioribus, immo peculiaribus symptomatibus stipatæ sint, & non unam semper eandemque, sed subinde aliam atque aliam medendi rationem exposcant: causæ utique popularis hujus incurſus & singularis tamen quem obtinent genii, non aliæ esse possunt, quam quæ pluribus hominibus sunt communes & in omnes æque cadunt. Jam vero si oculos circumferimus, exploratione curatius instituta, aëris potissimum insalubrem conditionem, ejusque communem omnibus sub eadem plaga usum, incusandum esse, pateſcit: eo quod non solum fluidum illud catholicum aërium-ætherium elasticum, ad motus qui vitæ præſunt conservandos & immutandos, prout ex physiologicis constat, multum facit, sed ipse etiam aër mutatus, fluidorum temperiem & solidorum constitutionem afficit, iisdemque aliam & præternaturalem habitudinem inducere potest. Etenim quam ingentes mutationes diversum

versum tantum solis ad telluris superficiem positum subsequantur, anni tempora luculenter arguunt, quibus si accedunt tempestatum vicissitudines, a ventorum varietate & sibi invicem succedentium diuturniori ex certis plagis flatu oriundæ, ut cælum vel nimis frigidum, nebulosum & pluviosum incumbat, vel æstuosum & siccum regnet: utique corpora his exposita, non possunt non inde graves alterationes, tam quoad ipsam partium constitutionem, quam ordinatum motuum successum incurrere, eo pluribus solennes, quo minus quispiam ambientis aëris accessum arceret potest.

Verum hæc generalis aëris, quoad tempestatum vices contemplatio, quæ plures sæpe regiones tangunt & latissime se diffundunt, non sola sufficit ad eruendam morborum epidemiorum generationem. Nam multiplici observatione constat, sub eadem plaga & cœli constitutione, hunc vel illum morbum unius tantum loci incolas affligere, proxime adjacente ab eodem vel plane immuni, vel minimum mitius & partius infecto; id quod variolarum, dysenteriarum ac purpuræ exemplis inprimis confirmatum habemus. Quare simul ratio habenda fluidi aëris cuius loco proprii, quod mirifice pro varia indole exhalationum, tam ex patulis stagnorum ac paludum conceptaculis, quam reconditis ibi in terræ sinu mineris sulphureis, vitriolicis, aluminosis, bituminosis, salinis, ipsi insinuatarum, discrepat. Quæ effluviorum, & inde dependens ipsius aëris, cuius loco & urbi quasi propria varietas, non luculentius demonstrari potest, quam ex cerevisiarum diversitate, utpote quæ, licet ex eadem polenta iisdemque aliis ingredientibus, eodem quoque modo & artificio, quin eadem aqua coquantur, mirifice tamen & sapore, & colore, & virtute, differunt.

Non minus ad meliorem & specialiorem causarum, quæ morbos epidemios gignunt, cognitionem, ipsius loci situs, aquarum indoles, receptum vitæ genus & sueta victus ratio pensanda sunt: quo ex omnibus his inter se comparatis ac simul consideratis, innotescat, in quo epidemiorum morborum causæ in-

dole, materia, textura, potentia ac virtute differant, & partium corporis structuram motusque turbent ac præter naturam afficiant. Quin prævisis sic causis & concurrentibus circumstantiis, in proclivi est, non tantum imminentem cuivis regioni epidemiam luem prædicere, verum etiam utilissima suggerere consilia, quo pacto eadem arceri, vel congruis auxiliis mature abigi possit. Et quamvis hoc negotium admodum arduum & perdifficile esse videatur: spem tamen non penitus abjiciendam esse reor, modo plures periti & rerum naturalium gnari medici, unitis consiliis, in diversis locis, per omnes decurrentium annorum periodos, singulis diebus, cœli mutationes, tempestatum vices, ventorum flatus, & in barometris ac thermometris exacte conspirantibus, liquidi ascensum & descensum, nec non in hygrometris ficcitatis & humiditatis differentias, curate annotarent, & simul quoque locorum situm, victum in genere & specie, præsertim eorum, qui in morbos epidemios incidunt, quibus symptomatibus hi incedant, quem exitum fortiantur, quæ medicamenta respuant, quæ admittant? exponerent. Intensissimè itaque optandum ac serio monendum est, ut omnes, qui historias ejusmodi popularium morborum contexere sibi sumunt, quemadmodum id laudabili instituto per aliquot annorum decursum quidam exorsi sunt, ad omnia hæc inculcata monita studiose attendant & ad earum normam observationes consignent, emolumento certe non satis deprædicando.

CAPVT III.

DE

MORBIS CVRATE DISCERNENDIS ET RECTE DIGNOSCENDIS.

§. I.

AD therapiam tuto & feliciter instituendam nihil æque conferre, ac morborum, quorum sanationi medicus annum admovere sibi sumit, causas, symptomata atque peculiarem indolem probe nosse, res est, de qua inter medicos, rationali artis culturæ vacantes, nulla unquam fuit relicta dubitatio; ut potius jam apud præcos medicinæ auctores inter universales aphorismos relatum legamus: quod qui bene cognoscat, idem quoque bene curet. Et certe veritas hujus dicti in aprico posita est; siquidem plures utique sunt morbi, qui maximam inter se alunt cognationem, tantaque procedunt symptomatum similitudine, ut eorum interior indoles & specialis differentia, vel a sagacissimo medico interdum vix deprehendi, cognosci & erui queat.

§. II.

Quare quum unus morbus alterum, tam invasionis modo, quam symptomatum plurimorum parilitate, tam exacte sæpius reterat, ut primo statim intuitu vix alius ab alio exquisite possit discerni; utique maxime necessarium est scire: quænam speciales notæ characteristicae attendi debeant, ex quibus postmodum intimior de morbo aliquo possit obtineri cognitio. Si quid enim est, quod medicum reddit fama celebrem & quasi *ισόδοτον*, profecto est illa doctrina, qua ipse instructus, ad firmum & indubium de genuina indole ac certo eventu morbi proferendi judicium, redditur longe capacissimus. Contra vero nihil perinde existimationi medicorum detrahit, quam si hac in parte turpiter impingant & fallacem inprimis circa morbi cujusdam processum atque exitum interponant sententiam; quandoquidem si de iis, quorum veritatem dies futurus commonstrare debet, alienum quis fovet conceptum, error ipsius facile fit evidens ac manifestus. Nam qui circa nudas theoreticas in medicina veritates singulares ex phantasiæ potius fonte, quam ipsa ex rei natura desumtas opiniones alit, is ea propter ignominia labem haud incurrit, quoniam

niam maxima hominum pars incapax plane est de rebus medicis solide judicandi, & connexionem theoreticorum axiomatum cum practicis perspiciendi. Haud injuria vero ignarus medicafter imprudentiæ præmium fert ignominiam, quum non levis ex ignorantia caularum morbi & neglecta inter morbos apparenter cognatos distinctione, in medicina facienda & indicationibus medendi eliciendis, emergat difficultas. Etenim *quem morborum origo & primordia fefellerunt, is*, secundum præclarum medicorum Ciceronis, *Celsi*, effatum, *minus recte curam suscipit*: & vicissim, *qui ad cognoscendum sufficit medicus, ad sanandum etiam sufficit*, quemadmodum sapienter proditum est ab *Hippocrate Lib. de arte §. 20.*

§. III.

Verum enim vero, quo excellentiori usu hæc doctrina sese commendat, eo minus vulgo ejus rationem haberi constat. Dici certe vix potest, quam turpiter nonnunquam ludibrio vulgi sese exponant medici etiam ii, quorum eruditio in reliquis medicinæ partibus non mediocris est, si v. c. uterum a prole expansum pro hydrope ascite, vel ascitem pro imprægnatione venditant: si febrem malignam, periculi raro expertem, pro benigna catarrhali: si inflammationem ventriculi & intestinorum, pro solo dolore colico: asthma flatulentum pro catarrho suffocativo: syncopen pro apoplexia: variolas pro petechiis: purpuram pro variolis: dolorem ex calculo pro affectu ischiadico, molimine hæmorrhoidali vel dolore colico & quæ plura sunt, habeant. Equis hic non clarissime perspicit, medicum in morbis hisce distinguendis hallucinantem, tum in prognosi facienda, tum in curæ administratione legitima, quam facile peccare posse? Alia enim remedia hydropicus & cachecticus status, alia imprægnatio, rursus alia febris maligna, quam benigna catarrhalis, postulant. Quæcunque profunt in dolore colico, illa ipsa in ventriculi inflammatione maxime nocere possunt. Secus procedendum in cura asthmatis flatulenti, quam catarrhi suffocativi. Sic etiam methodus, qua utimur in syncopoticis excitandis non sufficit in apo-

apoplexia auferenda. Longe alia quoque medendi via ineunda in calculosa affectione, quam in ilchiadica, & urgente hæmorrhoidalis sanguinis congestione ac colicis torminibus. Variolarum, petechiarum, purpuræ diversa itidem inter se est conditio, & diversam quoque ex parte therapiam & medicam tractationem requirunt. Ut adeo pateat, ingentem intercedere differentiam inter medicos artis suæ gnaros & rerum suarum satagentes, qui doctrinam & distinguendis morbis ex observationibus conquissitissimis rite hauserunt, & inter illos spurios Æsculapii filios, qui hujus doctrinæ prorsus rudes, fortunæ tantummodo omnia committunt.

§. IV.

Ne igitur medens in re tanti momenti impingat, sed morbum quem curandum suscipit ab aliis, eadem ferme facie incidentibus, curate discernere possit, animo imbibenda & firmiter tenenda sunt, indicia certa & notæ characteristica, quæ unicuique propriæ sunt eundemque produnt ac manifestant. Nimis vero longum foret singulas morborum species percurrere eorumque differentias inter se conferre; ideoque mihi suffecerit communissimos, difficulter tamen distinguibiles, in medium attulisse, in quo differant indicasse & mutuo demum comparasse. Et febris quidem denominatio permultis morbis communis est, qui tamen ratione causarum, indolis, periculi & medendi methodi quam maxime discrepant, eamque ob causam caute sunt distinguendi. Scilicet est febrium quoddam genus ephemera dictum; quod præcipuum & peculiare id obtinet, ut intra breve temporis spatium, & plerumque intra viginti quatuor horas, perspiratione auctiori ad finem pertingat. Alia febris species est synocha, his a reliquis dignoscenda signis, si primo horror & refrigeratio levior, quam in ceteris est, dein parum remittunt symptomata, quam ob causam a veteribus febris continentis nomine insignita fuit. Solet quoque maxime circa auroram adoriri & terminatur ut plurimum hæmorrhagiis narium vel sudoribus largis, circa quartum vel septimum diem erumpentibus. Casus a ter-
tiana

tiana continua, in qua simillima præsto sunt symptomata, differt in eo, quod in hac exacerbatio tertio die observetur, in caussa vero singulis diebus ea præsens sit.

§. V.

Febris porro maligna, *κατ' ἐξὸν* ita dicta, discrepat ab aliis febribus, v. g. semitertiana, synocha putrida, febre ardente biliosa inflammatoria, quæ inflammationem ventriculi vel intestinorum junctam habent, periculo. Ratio autem distinctionis in eo posita est, quia febres malignæ, stricte sic dictæ, contagio ortum debent, quo recensitæ febres inflammatoriæ carent. Dein causam quoque agnoscunt diversam, quæ in sic dictis inflammatoriis est stasis ad sphacelum transiens, in malignis vero lymphæ magis fermentescibilis, putrida, nervorum fluidum celeriter eadem corruptione contaminans; unde subitanea virium corporis prostratio jungitur. Distinguitur identidem hæc febris maligna a catarrhali in eo, quod in illa repentina & mox ab initio morbi virium adsit defectio, cum perpetua agrypnia, quam mentis perturbatio tandem excipit, maculæ quoque rubræ, petechiarum nomine venientes, vel etiam purpura, plerumque alba, ipsis complicantur & funestum exitum minantur, quæ cuncta in benignis catarrhalibus non observantur, ubi potius seri erodens salina qualitas coryzam, gravedinem, raucedinem, tussim & pectoris oppletionem & quasi erysipelaceum intra fauces asperamque arteriam ardorem causatur. Ubi itaque hæc signa non adsunt, ibi etiam perperam catarrhalis febris judicatur. Illud tamen non inficias eundem, febrem catarrhalem malignam æque ac benignam, cum malignis petechialibus multum alere convenientiæ, adeo, ut ab incautis minusque exercitatis medicis sæpissime confundantur, eo quod lenissime sine magno æstu, dolore atque anxietatibus eminentibus procedunt, in utrisque dejectio mucidæ materiæ per tussim jungitur & circa vesperam symptomatum fit exacerbatio.

§. VI.

Accedunt aliæ febrium species & quidem mesentericæ, quæ

quæ quo frequentiores, eo difficilius vulgo dignoscuntur, ita, ut sub malignarum titulo plerumque vendantur. At vero longe distinctissimæ sunt ab his, quoniam non epidemice grassantur, neque contagio aut exanthematibus infestæ sunt, neque celerem mortem inferunt, sed ultra vigesimum primum diem ut plurimum trahuntur, & lubentissime in hæcticas lentasque degenerant. Signa reliqua, quibus hæc febres ab aliis distinguuntur, præter jam prolata, sunt extremitatum frigus, urinæ tenues, paucum spissamenti & subsidentis sedimenti dimittentes, tussis copiosæ, sine multa materia, siquidem non cocta, sed cruda exspuunt, faucium dolor & rûbor, perpetuum cibi fastidium, sitis defectus, febris uno die remissior, altero gravior iterumque exacerbatus hemitritæorum more insultus, quæ signa sigillatim collegit *Hippocrates Lib. 1. popular. §. 1.*

§. VII.

Quod attinet ad febres purpuraceas, variolaceas, morbillosas & petechiales, eæ facillima ratione ex cutis efflorescentiis dignoscuntur. Differt enim purpura rubra a petechiis & febre sic dicta purpurata maligna, dum in hac maculæ non sunt elatæ, nec cutim scabram reddunt, neque cum frigore, æstu volatico, pruritu & ardore cutis, ac summa oppressione pectoris erumpunt, uti purpura tam rubra, quam alba, quæ & tangentibus & videntibus sese conspicuam præbet: & iisdem notis distinguitur quoque a morbillis. Petechiarum a variolis in eo diversa est ratio, quod septimo plerumque die, non vero ut variolæ quarto erumpant, ac sine elevatione & suppuratione superficiem obsideant: a morbillis autem distinguuntur, quod minoris ambitus maculæ sint, quam in his, neque instar morbillorum tantisper emineant. Variolæ & morbilli primo eruptionis die ægrius discernuntur, secundo autem facillime, quia illæ mox sese efferre, pustulasque protrudere solent. Differunt vero utræque a purpura, quod neque cum horripilatione cutis ejusque scabritie prorumpant neque tactui ita sese offerant. Variolæ & morbilli respectu periculi etiam dispescuntur in malignæ & benignæ indolis, item in regulares & irregulares. Distingui etiam merito debent variolæ

veræ a spuriiis, quæ vulgo dicuntur *VVasser-Pocken*, *Spitz-Pocken*, & rumpunt cum vesiculis magnis pellucido humore oppletis, minori symptomatum agmine, vehementia & sine periculo.

§. VIII.

Jam ad febres intermittentes transitum facimus. Differt quotidiana intermittens a quotidiana continua, qualis solet esse sæpius catarrhalis benigna & maligna, dum in hac remissio tantum fit symptomatum & singulis diebus exacerbatio, non autem plenaria intermissio, uti in quotidiana intermittente; quæ etiam differt a febre lenta & hæctica, siquidem illius paroxysmus tempore matutino, harum vero circa tempus vespertinum ingruit. Dein discernitur quoque a tertiana duplici, quæ etiam singulis diebus accedit, sed ita, ut ejus accessiones non sint æquales, id est, non quovis die in eundem temporis articulum incidant, sed altero tantum die sibi respondeant, ut tempus paroxysmi, qui invasit primo die, congruat cum tempore paroxysmi tertii diei, & tempus paroxysmi secundi diei, conveniat cum tempore quarti diei.

§. IX.

Variaæ autem sunt tertianarum species & differentiaæ: distinguitur enim in simplicem & duplicem. Illa est, quando uno die, qui spatium viginti quatuor horarum complet, plenaria est febris & symptomatum intermissio; in hac vero singulis diebus paroxysmus recurrit, ita tamen, ut subinde alternis diebus ratione temporis convenientiam invicem monstrent. Rarius quoque tertiana duplex in principio invadit, sed potius simplicem sequitur. Deinde dispelcitur in legitimam & notham, seu spuriam: illa dicitur, quando horrorem insignis æstus sequitur, cum siti, capitis dolore, quæ ultra decem horas non facile durant, urina flammea secedente; hæc vero non adeo magno æstu stipatur, ad viginti horas & ultra extrahitur, urinam turbidam reddit, non flammeam, & finito paroxysmo, insignem languorem & concussionem quasi artuum, *als vvernn alle Glieder zerschlagen wvären*, cum inappetentia post se relinquit. Distinguuntur alias quoque tertianaæ

tianæ in cholericas & pituitosas, in regulares & irregulares, ver-
nales & autumnales, epidemicas & endemias; sed quoniam exi-
gua admodum difficultas in hisce discernendis occurrit, quum ex
ipso appposito epitheto differentia satis superque pateat, earum
nomina tantum attigisse suffecerit.

§. X.

Accedimus nunc in explicatione differentia februm ad
quartanam, quæ dividitur in legitimam ac simplicem, & in dupli-
cem ac notham, dein quoque in intermittentem & continuam.
Simplex & legitima est, si quarto quoque die revertitur paroxy-
smus, si vero intra quatuor dierum spatium duo paroxysmi in-
gruunt, febris quartana duplex audit. Notha quartana dicitur
ea, quæ non servat tempora ordinaria invasionis, quæ sunt post
meridiem ac vesperi. Quartana continua vocatur, ubi paroxy-
smi quarto quidem die redeunt, intra id vero tempus febriles
motus non plenarie silent, sed symptomatum tantum remissio ad-
est, & languor corporis, cum lento & præternaturali calore &
pulsu celeri, remanet.

§. XI.

Febris porro lenta & hæctica ita distinguitur, ut hæctica
superveniatur hydropi, phthisi, atrophie, vel cachexie scorbu-
tica, & incunabula trahatur ex viscerum, aut ipsius mesenterii
apostematibus, vel etiam glandularum mesentericarum, corru-
ptione, putredine, induratione, eamque ob causam sit insa-
nabilis. Lentæ vero febres ex febribus maxime diariis,
quotidianis, tertianis, duplicibus oriuntur, si eæ perversa
methodo per adstringentia styptica & nimis calida tractantur.
Nascitur quoque febris lenta a virium debilitate summa, ob
præcedentes enormes hæmorrhagias, uteri v. g. in abortu, vel
a gravioribus vulnerationibus, item a longioribus morbis præ-
gressis; siquidem ob virium imbecillitatem ventriculus de-
bilis multas ingenerat cruditates, a quibus postea lentæ febres
suam originem nanciscuntur. Lentæ quoque febris ab hæctica
in eo dispar est ratio, quod longe gravioribus hæc stipata sit

symptomatibus, siquidem pulsus continuo celer micat, etiam matutino tempore, post somnum peractum, unde genæ quovis tempore aliqua rubedine tinctæ observantur, major quoque præsens est virium resolutio, ac in lenta, ubi mane & ante cibum arteriarum ictus remissior & naturali similis, vesperi vero & post cibum celerior fit, genarum rubor cibo sumto tantummodo se prodit, minorque virium adest prostratio, quippe adhuc extra lectum versari febre lenta laborantes possunt.

§. XII.

Hisce deductis inflammatoriæ febres expendendæ, e quibus frequentissimæ sunt peripnevmonia & pleuritis. Admodum autem conspicua est peripnevmoniæ ac pleuritidis veræ & spuria differentia: siquidem pleuritis spuria ea est inflammatio, quæ membranas & musculos intercostales tantum occupat & ad rheumatismi potius speciem referenda est; vera autem pleuritis sedem suam habet in ipsa pleura, quæ intus thoracis cavitatem investit & plerumque in consensum trahit annexos subinde pulmones; & peripnevmonia ipsam pulmonum substantiam occupat. Porro in pleuritide spuria fit dolor etiam exterius manifestus, dum tactu manuum exasperatur, isque magis vagus, quam fixus est, quandoque latius sese extendit & usque ad scapulas propagatur: tussis magis sicca, quam humida, omnis cruoris expers, cum febricula quadam leniori complicatur, vesperi potissimum incommoda est, & hic morbus intra breve plerumque temporis spatium, sæpius sine venæsectione, discutitur. Contra ea in pleuritide vera, dolor est acutior, magis fixus, febris intensior, respiratio difficilior. Et in peripnevmonia hæc omnia quidem concurrunt, sed dolor non ita impensus est, licet ad dorsum & scapulas sese extendat, major visitur pectoris oppressio, respirandi difficultas, & sputum cruentum, sanguine fusco tinctum, sreatu rejicitur.

§. XIII.

Ad inflammationem ventriculi quod attinet, differt illa
a car-

a cardialgia, neque cum ipsa debet confundi. Nam licet in utroque morbo adsit maxima anxietas, inquietudo, *daß sie sich hin und wieder schmeißen im Bette*, & dolor pectoris atque ardens circa præcordia; in eo tamen subest differentia, quod inflammationis ventriculi dolor sensum intensissimi ardoris præ se ferat & quasi instar prunæ sit; deinde, quod nec alimenta, nec medicamenta facile ferre, sed ab illis ingravescere soleat, item quod febris cum pulsu celeri & inæquali, depresso ac debili, ventriculi inflammationi juncta sit, quod secus evenit in cardialgia. Distingui etiam debet inflammatio ventriculi ab inflammatione hepatis, & quidem concavæ partis, qua ventriculus tegitur, non solum vehementia symptomatum, sed etiam quod ardor circa scrobiculum cordis in ventriculo inflammato est vehementissimus & fixus, in hepatitide vero ad latus magis dextrum & spurias costas vergit, neque ab assumtis dolor & anxietas increfcit, ut sit in ventriculo inflammato. Discrepat etiam ventriculi inflammatio ab ejus erosione; nam illa subito oritur passioque est acutissima, & sicuti spasmis ortum debet, ita cum spasmis violentis & symptomatibus gravissimis stipata est. Dolor vero ex erosione non tam ardens est, neque stricturis spasticis infestus, sed malum potius chronicum febrem lentam comitem habens, nisi quod in eo similitudo cum inflammatione ventriculi adsit, quod ad assumpta dolor anxius exasperetur. Denique inflammatio ventriculi, a veneno caustico animique vehementiori affectione orta, distingui debet ab ea, quæ fit ex potu frigido corpori calefacto immisso, quæ non tam horridis & atrocibus symptomatibus est infesta, neque tam violentas in totum corpus exercet spasticas contractiones, sed febre magis lenta & putrida, nisi mature succurramus, jugulat.

§. XIV.

Angina præterea species variæ sunt, & pro earum differente indole, diversa quoque sortiuntur nomina, quas distincte nosse in praxi non minus utile, quam necessarium est. Nimi-

rum quando inflammatio obsidet interiores partes laryngis, præsertim musculosas, extus autem nec rubor, nec tumor quidam apparet, sed magna adest respirandi angustia ad suffocationem usque, vocari solet cynanche, & intra viginti quatuor horas sæpius necat, dum complicata est exquisita acuta febris. Altera species anginae, in qua interiores pharyngis muscoli magis affecti sunt; & ubi major difficultas deglutiendi, quam respirandi est, pariter sine insigni externo rubore vel tumore, dicitur synanche. Quando vero inflammatio vergit ad partes exteriores, adeoque tumor & rubor magis est conspicuus, tunc, si malumprehendit gutturis seu laryngis partes, paracynanche, si vero pharyngis exteriora occupat, parasynanche appellatur.

§. XV.

Distingui etiam solet angina in veram & spuriam. Illa fit a stasi sanguinis inflammatoria & morbus maxime acutus est, ob febrem impense acutam, & talis plerumque est interior: hæc notha vero, pro causa magis agnoscit congestiones sanguinis, vel etiam lymphæ, in partibus oris, faucium & colli glandulosis, febrem magis comitem habet lymphaticam & minus alit periculi, sed diutius affligit. Deinde angina optime dispesci potest in siccam, valde ardentem, & humidam, sive mucosam. Illa fit a sanguinis stasi in morbis maxime acutis; in hac vero muco copioso & lingua & faucium regio obducta & quasi inviscata est ac febribus catarrhalibus complicatur, neque minus scorbuticis, cachecticis familiaris est, & diutius durat orisque foetore molesta est.

§. XVI.

Ab hisce inflammationum speciebus discernenda porro est inflammatio oris & oesophagi mucosa, quæ vocari solet prunella, & febribus acutis exanthematicis supervenit, vel etiam plerumque inflammationi ventriculi succedit. Dicitur a nonnullis Germanico idiomate *die Hertzbräune*, & malum est admodum anceps ac periculosum, in quo muco etiam incrustata sunt narium interiora, sub quo ardens inflammatio delitescit. Differt etiam

etiam angina ab aphthis, sive pustulis ardentibus in lingua & faucibus; siquidem angina latius diffunditur & vicinas partes late in consensum rapit, in aphthis vero tantum ardentes & dolentes vesiculæ in lingua vel faucibus certas modo partes obfident.

§. XVII.

Denique angina sicca interna, quæ vocari solet cynanche, non confundi debet cum spasmus, histericarum fauces firmiter constringente & respirationem ac deglutitionem difficilem reddente; quia hic sine periculo & facilius transit & facile etiam vincitur; in angina autem vera sanguinea interna, non tantum dolor ardens & pungitivus, circa interiora faucium percipitur, sed & lingua sanguine turget, tumida ac rubicunda fit, quandoque nigra redditur, facies rubore inflata est, temporum arteriæ valide pulsant, in quibusdam etiam cephalalgia, in aliis somnolentia, in nonnullis lipothymia visitur, externa ut plurimum frigent & alvus adstricta est.

§. XVIII.

Ab angina pergitur ad phrenitidem, quæ est inflammatio membranarum cerebri & sese manifestat delirio feroci, cum oculis rigentibus fulgentibusque, febre ardente, vigiliis assiduïs, rubore faciei, arteriarum vehementi, non secus ac si in cranii cavo pulsarent, & circa tempora vibratione. Differt phrenitis a mania, quod illa affectus acutus & ut plurimum febrium symptoma valde periculosum, mania vero malum est chronicum sine periculo & febre. A phrenitide porro mentis alienatio, aliis febribus jungi solita, gradu dignoscenda, quia mitius procedit & facilius abigitur. Distat etiam phrenitis a melancholia, quæ itidem malum est chronicum, & collecto in vasis, præsertim capitis, sanguini crasso originem debet. Tandem etiam differentia intercedit inter phrenitidem & hydrophobiam. Etenim hydrophobia a canis rabidi morfu inducitur, ejusque specialior nota characteristica est liquidorum omnium averlatio, adeo ut affecti

fecti viso tantum liquore aliquo, mirum inhorrescant & motibus convulsivis corripiantur.

§. XIX.

Hepatis inflammatio duplex est, vel enim in parte concava consistit, vel in parte convexa. Signa, quibus illa cognoscitur, sunt singultus, vomitus, cardialgia, ardor & dolor fixus sub scrobiculo cordis, versus latus dextrum, febris, tussis sicca, inspiratio difficilis, alvus adstricta. Quando vero in convexa parte erysipelacea inflammatione hepar affectum est, tunc in costis spuris lateris dextri dolor gravativus, constrictivus & punctorius percipitur, cum tussi, febre, respiratione difficili. Et hac ratione mentiri solet pleuritidem spuriam, a qua tamen discriminatur febre ac respiratione remissiori, & dolore infra diaphragmatis regionem urgente: quibus accedit, quod pleuritis spuria facilius discutitur & die septimo ut plurimum finitur sudore vel hæmorrhagia; in hepatide vero, si res male succedit, convulsiones præsto sunt, vel si diutius perdurat, quippiam hydropici vel hæctici, ob abscessus latentes, post se relinquit.

§. XX.

Nephritis pura & simplex, quæ est levior renum inflammatio, in eo a nephritide calculosa discedit, quod in illa dolor circa lumbos fixus, sed tendens & pressorius diuturnus esse solet, in calculosa vero longe acerbior, qui etiam locum mutat & se magis extendit ad ilia; siquidem exquisitus ille dolorificus sensus, qui a calculo fit, demum in uretheribus eorumque principio, non vero in renali substantia, sese exferit. Deinde in calculosa nephritide sabulum crassum per urinam secedit, quod in nephritide simplici non contingit, utut crystalli rubicundæ & pellucidæ vitri urinalis parietibus sese apponant. Neque etiam nephritis cum malo iichiadico confundi debet, quod quidem facile accedit, quia in hoc dolor sapius per totum femur excurrit, quod inde stupore atque rigore afficitur, nihilominus tamen disparitas utriusque exinde patet, quod

ejus

dolor nephriticus in loco, quo renes situm habent, pertinacius consistat, quum ischiadicus dolor ossi coxendicis fixus magis inhæreat. Tum in nephritide crebrior ad urinam est stimulus, parcior tamen ejus fluxus, quod secus in ischiadica affectione observatur.

§. XXI.

Ex inflammationibus, quæ partibus externis incumbunt, frequentius occurrit erysipelas, quod superficiem tantummodo cutaneam rubore, tumore & dolore afficit, eaque propter probe distinguendum est a phlegmone, in qua ipsos substratos musculos inflammatio simul corripit. Phlegmonem autem a gangræna discernere identidem oportet; siquidem in hac inflammatio aliquando profundius serpit & non modo musculosas, sed & tendinosas ac nervosas partes occupat, atque adeo tum intensiori ardore & dolore, tum profundo ac latius se extendente duro tumore ac rubore, qui tandem in livido-nigricantem transit, cognoscitur.

§. XXII.

Devenimus nunc ad varias hæmorrhagiarum species, e quarum censu, quæ non parum periculi alit est hæmoptysis, si-ve sanguinis floridi e pulmonibus per tussim rejectio. Hæc curate distinguenda est a sputo cruento, quod ex interiori gurgulionis, faucium ac narium ductu emergit, & potius screatu, quam tussi, succedit, parcius etiam esse solet, pituita remixtum & obscuro sanguineo colore tinctum. Deinceps vera hæmoptysis discernenda quoque est ab illo sputo cruento, quod parciore in quantitate ex fauciatis arteriæ asperæ vasis cum tussi ejicitur, & cum pruritu ac sapore salso jungi suevit. Multum quoque hæmoptysis distat a vomitu cruento, siquidem in illa sanguis tenuis, nitide floridus, arteriosus, non sine magnofu ac labore eliditur, in sanguinea vero vomitione cum anxio conatu crassus, coagulatus & nigricans cruor, ex venosis magis vasis elapsus, citra tussim exturbatur. Neque ipse vomitus cruentus sine discrimine considerandus & excipiendus est,

(III.)

F

sed

sed ratione causarum multum differens, aliam & diversam medendi rationem quoque desiderat. Alius enim est a causa materiali caustica erodente, in ipsius ventriculi cavo contenta, quemadmodum fit a venenis causticis & fortioribus emeticis assumtis; alius vero oritur a motu sanguinis impetuosiori, ex aliis & remotis partibus ad ventriculi vasa, præsertim brevía, quæ facile perforantur, delati, quale quid fieri suevit in mensibus & hæmorrhoidibus subito & cum violentia quadam repressis; atque ejusmodi vomitus plerumque suas statas ac certas periodos servare solent.

§. XXIII.

Porro in mictione cruenta hæc potissimum distinctio observatu digna est, quod alia fiat ex calculo asperiori, uretherum vel urethræ vascula dilacerante, quæ tamen rarior est, neque facile in nephriticis comparet, & exigua etiam tunc stillat sanguinis quantitas: contra vero si citra quandam violentiam a sanguinis impetu, ad renum substantiam ex aliis partibus raptò exoritur, sincerus largiter sæpius sanguis, sine singulari incommodo vel sensu, cum urina emittitur, & interjecto pauco tempore, ad fundum colorem non rubicundum, sed ex bruno fuscum exhibens, secedit. Affectus hic familiarius accidit ætate gravibus, vegetis tamen & plethoricis, ac sæpius sine periculo contingit. Stillicidium sanguinis ex præputio rarior quidem affectus est, a nobis tamen binis vicibus observatus in plethoricis & senio jam proximis, his a mictu cruento notis dignoscendum, quod guttatim stillet sanguis, & quidem continuo, etiam si urina non reddatur, quum in mictu cruento nunquam, nisi simul cum urina, sanguis proliciatur.

§. XXIV.

Tum fluxus sanguinis periodicus, qui in gravidis quandoque salutariter contingit, probe etiam discerni debet ab eo, qui abortum minatur. Scilicet quando sanguis periodice & paulatim, per tres vel quatuor priores menses, manat, tunc fluxus est salutaris: si vero largius sanguinis profluvium ex internis
uteri

uteri vasis apertis succedit, vix sine gravidæ & embryonis detrimento fit. Quin si fluxus est vehemens, indicium præbet totalis separationis secundinæ & subsequuturi abortus; si moderatus, pars tantum abcessit, & foetus salvari potest. Et hoc sanguinis stillicidium, si periodo catameniorum respondet, & orificium uteri sub fluore clausum contrectatur nullique partus dolores superveniunt; tunc probabiliter infertur, non ex ipso utero, verum e vagina tantum scaturire hunc laticem. Contra vagæ five erraticæ magis & periculosæ judicandæ excretiones sanguinolentæ, quæ male ad calculum tributi lunaris exsolvuntur, justo copiosiores prodeunt, quæ ostium uteri patulum & conatus partus imminentis junctos simul habent.

§. XXV.

Præterea etiam hæmorrhoidum fluxus a dysenteria rite est distinguendus, quum ambo convenientiam in eo exhibeant, quod utroque in affectu sanguis excrementis intermixtus secedat. At si paulo curatius reliquorum symptomatum inter se comparisonem instituamus, tum facillima ratione differentia harum fluxionum inter se invicem patefcet. Etenim in hæmorrhoidum fluxu sanguis cum excrementis prodit sine ullis torminibus & dolorificis spasmis, ac ejusmodi etiam fluxio critice & salutariter succedit: contra vero in dysenteria cum atrocissimis spasmis & torminosis doloribus stercora sanguinolenta deji-ciuntur & universum corpus inde gravissime affligitur, præsertim si intestina tenuia simul patiuntur, ubi primis morbi diebus adiunt vomitus, singultus, anxietates præcordiorum, appetitus prostratus & virium insignis languor. Denique dysenteria alba a rubræ & carnosæ indole haud parum abludit; in alba enim parum cruoris manat, ingens autem muci copia excernitur, in rubra autem sanguis copiosior, cum frustis parvis carneis, quandoque rejicitur.

§. XXVI.

Nunc sequuntur dolores, e quibus ii, qui caput divexare solent, frequentiores sunt, & pari ratione admodum variare

fertim quoad causas & generandi modum, observantur. Etenim causa cephalalgiae si est sanguinis impetuosior ad caput congestio, tum calore, rubore & tumore faciei, cum magna arteriarum, quæ sunt in collo & temporibus, pulsatione se exferit, quinimo dolor & ardor interdum ad oculi bulbos se extendit, atque extremorum refrigeratio plerumque jungitur. Si pertinacior est cephalalgia & venerei contagii soboles, noctu magis, quam interdiu ingravescit, & plerumque certæ parti firmitus dolor insidet, ut cutis ibi a subdito humore viscido non raro in tumorem attollatur. Porro quemadmodum frequentius causa doloris in capite partibus externis cranii & maxime pericranio inhæret; ita, si in cerebri meningibus sedem suam ac domicilium habet, cum vertigine, rubore oculorum, stupore, oblivione, auditus gravitate infestat, & vel paralyfin, vel apoplexiam præcedit, aut sequitur.

§. XXVII.

Alia vero doloris capitis causa est effusio feri & sanguinis e vasorum alveis & in sinuositatibus ossium frontis firmiter impacti, quod si accidit dolor est pertinax, acerbus, fixus, & supra oculos in radice frontis per dies noctesque urget. Interdum quoque caput male habet ex cruditatibus in ventriculo obhærescentibus, quæ ructibus, phlogosi ac primarum viarum spasmus sese produunt, dum quoque ingestis flatulentis dolor augetur, vomitu vero, evacuantibus & stomachicis medicamentis minuitur. Alia adhuc, sed minus a medicis cognita est cephalalgiae causa, si lymphæ extravasata in ventriculis cerebri secedit & stagnat, neque per infundibulum aut glandulam pituitariam secernitur; quo casu interiora totius capitis continuo dolent, & doloris allevatio non certius & commodius impetratur, quam abstinencia a potu, & feri per evacuantia aut diuretica in cachecticis & cacochymicis absumptione ac eliminatione.

§. XXVIII.

Inter omnes dolorum species cardialgia acerbitate cete-

ras facile superat. Hæc autem est dolor spasmodicus orificiorum ventriculi, tam dextri, quam sinistri, qui tamen longe multumque ratione causarum differens est. Scilicet alius est a causa intra ventriculum hærente, materia nempe acri, caustica, ut a veneno assumpto; item in cholericâ passione, vel etiam dysenteria, ab acerrima caustica bile proficiscens. Alia vero cardialgia est a sanguine, suppressio mensium vel hæmorrhoidum fluxu, ad membranas ventriculi nerveas regurgitante easque nimium tendente. Hinc enim est, quod affectus hic foeminis, quibus post quinquagesimum annum menstrua purgatio vel parcius accidit, vel plane subsistit, præsertim si spongiosioris habitus sint, admodum familiaris esse observetur, & in curando eo, convenientes vel per scarificationem aut venæ incisionem sanguinis missiones, omne pœne absolvant punctum; quum vicissim in illa cardialgia, quæ a materia acri caustica suscitatur, demulcentia, oleosa, temperantia, lac asininum, vel infusum florum chamomillæ saturatum, cum cremore lactis, interposito pulvere absorbente, desideratissimam opem ferant. Deinceps cardialgia jure meritoque etiam distingui debet ab inflatione ventriculi dolorifica quæ a flatibus mirifice stomachum distendentibus subnascitur. In hoc affectu sub costis spuris, præsertim in sinistro latere, dolor, & sub cordis scrobiculo, versus dextrum, tumor instar vesicæ flatu distentæ, frequentius viuitur & percipitur, adest simul magna spirandi cum anxietate difficultas, quæ eo gravior est, quo magis diaphragma a distento stomacho, sursum urgetur & pulmonum expansioni obicem ponit. Et hoc malum admodum solenne est infantibus, qui adhuc lactantur, si ipsum lac in ventriculi cavo stagnans, coagulatum & corruptum in flatu explicatur. Frequentius quoque accidit hypochondriacis, præsertim si nimium & cum magna aviditate cibos, qui ob viscosam & ægrius solubilem substantiam flatuum proventui favent, ingerunt.

S. XXIX.

Neque parum refert, ut medicus dolorem colicum pro-

be discernat ab eo, qui ex calculi descensu per uretheres oboritur. Quippe in calculo renali dolor profundus pressorius, lumbis quasi infixus pertinaciter hæret, cum quodam horripilationis intercurrente sensu; adsunt porro nausea, vomitus & tormina etiam ventris, & ubi calculus per urinarias vias iter conficit, tunc ad regionem ossis ischii dolor etiam excurrit, & stuporem femori ejusdem lateris non infrequenter inducit: urget præterea creber ad urinam emittendam conatus, quæ cum stranguria mingitur & sæpius fabulum deponit. In dolore vero colico res secus se habet; tunc enim dolor & tormina magis circa umbilicum colliguntur, vaga sunt, & nunc huc, nunc illuc discurrent, & plerumque flatibus venter distenditur. Non raro tamen contingit, ut colica simul sit nephritica, inde dijudicanda: quod in ea gravissima tormina ventrem torqueant, cum alvo fortiter adstricta, vomitu, cephalalgia, extremorum frigore, mingen- di stimulo, donec finito paroxysmo, urina fabulosa secedat vel calculi etiam excretio sequatur. Deinde dolor colicus a dolore, qui hypochondriacos excruciat, in eo diversus observatur, quod hic in hypochondriis magis, ille vero circa umbilici regionem potius consistat. Deim in hypochondriacis latus, præsertim sinistrum, tumere solet, quia ibi in coli flexuris flatus incarcerati hærent, & crebrius quoque hic dolor recurrit, quam communiter sic dictus colicus.

§. XXX.

Verum enimvero quum doloris intestinorum variæ etiam sint causæ, diversis etiam signis ut a se invicem mutuo dignoscantur, necesse est. Si igitur flatus in causa sunt, tunc magna inflatio fit abdominis & quandoque tam ingens, ut hernia circa umbilici regionem a flatibus protuberet. Et talis colica in dispositis, præsertim in corporibus infirmis & senilibus, ex refrigeratione abdominis, aut tantummodo pedum, vel a frigido, item foeculento potu, cibo flatulento, carne vervecina, præsertim frigido potu superingesto, quam facile excitatur. Et quia multi ex calculosis ad colicam flatulentam valde proclives sunt,

sunt, hinc crebrius nephriticum malum cum colico complicatur.

§. XXXI.

Quod si vero, prout frequentius obvium est, dolor intestinorum flatulentis, maximis anxietatibus & dolore dorſi tenſivo alvoque pertinaciter clauſa infeſtat & torquet ægros, & ex levi occasione aut errato irritatur faciesque ſimul eſt cachectica; tunc plerumque cauſa vitii hæret in viſceribus abdominis, per quæ ſanguis non recte & libere trajicitur, ſed in inteſtinorum volumine ſtagnat, & quum exitum ibi per vaſa hæmorrhoidalia non inueniat, intra inteſtinorum membranas hærens, ea nimium diſtendendo & lancinando, hanc colicam parit, quæ ob genus nervoſum graviter ſimul afflictum, convulſiva audit. Eadem languinis ſtagnatio, ſi fit ab hæmorrhoidibus conſuetis non rite fluentibus, vel præpoſtere cohibitis, atrocem inteſtinorum dolorem parit, qui exinde vocari ſolet hæmorrhoidalis: & ſi in foeminis, a menſium inordinato & parciore ſucceſſu, ſanguis ad inteſtinorum volumen reſluit & tormina inducit, colica audit hyſterica. Alia denique eſt ſpecies colicæ, quæ dicitur bilioſa, & cholericæ conſtitutionis hominibus, nec non iracundiæ deditis ſenſibilioribus perquam familiaris eſt. Hæc cum vomitu, capitis dolore vel etiam diarrhœa ſæpius complicatur, & quia ſpaſmodica conſtriſtione liberior bilis deſcenſus ad inteſtina inhibetur, ipſa ad habitum corporis regurgitans, colorem flavescen-tem ei inducit.

§. XXXII.

Multum etiam intereſt, ut medicus colicæ ſpaſmodicæ, ſive convulſivæ, genium, ab aliis colicæ ſpeciebus probe diſcernat. Illa ſæpe horrendum in modum non modo inteſtina, ſed & alias univerſi corporis nerveas & membranaceas partes per conſenſum exagitat, ſiquidem vehementior ſpaſmus per univerſum fere genus nervoſum diſpergitur, ut non modo ven-
tri-

tricus & intestina fursum & deorsum trahantur, & alvus, omnibus spretis enematibus, arctissime claudatur, sed & muscoli abdominis cum umbilico introrsum stringantur & ad interiora arctentur. Et quia violentia spasmi ad partes genitales sæpius pertingit, fit, ut testiculi retrahantur, & constrictis vesiculis feminalibus, involuntaria seminis fiat excretio, ob urinarias autem vias spasmo affectas, urina difficulter reddatur. Si etiam ad pnevmonicos nervos vehementia spasmi penetrat, respiratio valde anhelosa ac difficilis est, cum valido motu thoracis. Quin malo ingravescente, cerebri etiam membranæ ac nervi patiuntur, & vertigo, scotomia, levior mentis alienatio, vigilia & extremarum partium refrigeratio intensa, & pedum ac brachiorum vehementissima agitatio, observatur, non raro etiam tam atrocem dolorem harum partium resolutio, sive paralyfis, subsequitur.

§. XXXIII.

Sunt autem huic affectui gravissimo spasmodico quam maxime obnoxii metallurgi, qui mineras saturninas igne tractant & improvide copiosum lithargyrii fumum ore hauriunt atque cum saliva deglutiant. Perquam etiam familiaris est hæc spasmodica affectio scorbuticis, cachecticis, præsertim ubi consuetus hæmorrhoidum fluxus desinit, vel non rite procedit, aut si intermittens febris temere vel imprudenter adstringentibus validioribus cohibita est. A vermibus, a calculo ductibus biliosis vel cystidi felleæ inhærente, idem malum non semel ab auctoribus observatum fuit. Ut hinc clarissime videamus, in hac passione, non tam peccare materialem, mobilem, aut quæ corrigi vel evacuari facile possit, causam, ut in colica biliosa, flatulenta vel viscida sit, quam potius nervosis membranaceis partibus, quæ tam faciles sunt ad subeundos hos spasticos motus, vitium inesse. Etenim & cardialgiam & dolorem intestinorum convulsivum, in sensu exquisitiori præditis corporibus, sæpissime a cohibita iracundia, affectibus animi gravioribus, terrore, crebra ira, & in adolescentibus, a nimio & intempestivo

stivo veneris, nec non largo potuum spirituosorum usu, ortum traxisse observavimus.

§. XXXIV.

Quum vero ingens plerumque in morborum cognitione admittatur confusio doloris arthritici & rheumatici; operæ pretium visum est, amborum differentiam hoc loco planius sistere. Uterque quidem dolor spasticus est, & partibus membranaceis infestus, rubore, ardore, dolore, tumore & partis ad movendum impotentia, sese prodit; in eo tamen discrimen comparet: quod arthriticus a sero tartareo acri, intra juncturas articulorum obhærescente, proficiscatur, in rheumatico vero materia illa serosa salino-caustica, membranarum musculorum & ligamenti articulorum exterius potius insideat. In arthritide quoque tum glandulæ, quæ in articulationibus reconduntur, mucosæ, a cl. Anglo *Clopton Havers* inventæ, tum ligamenta glandulosa, materiam arthritidis evomunt: contra ea in rheumatismo stagnans illud acre serum, ex sanguine in canalibus nimium congesto, inter membranarum & musculorum interstitia magis secedit & colligitur. Ex quo jam facile apparet ratio, quare rheumatismi curatio, minus laboris vel difficultatis habeat, quam articularis morbi, & quare arthritidis, topicis cujuscunque fere generis adhibitis, minus feliciter componatur, quum rheumatici dolores iisdem sæpius mitigentur.

§. XXXV.

Deinceps probe etiam notari debet illa differentia, quæ inter dolorem arthriticum & inter dolorem artuum venereum intercedit. Ille interdum magis affligit, hic vero noctu ingravescit; arthritico quoque febrilis quædam commotio associatur, cujus venereus expers est. Arthritidis porro statura sua & anniversaria tempora observare solet & acrioribus pharmacis, ut mercurialibus, mirum exacerbatur; quum contra dolores luis Gallicæ continuo fere affligant, & nonnisi hisce præsidiis facile auferantur. Tandem etiam peculiarem adhuc differentiam ponendam esse existimo inter dolores artuum v. g. crurum aut pedum,

cum tensione, rigiditate, imbecillitate movendi junctos ac epidemice quasi grassantes; & inter veros arthriticos. Audiuntur enim sub certa temporum & tempestatum constitutione passim ejusmodi querelæ de doloribus crurum, ut alii de tensivo, alii de obtuso & contusivo, alii de pungente, in profundo circa ossa tarfi & metatarfi hærente, conquerantur, cum immobilitate, stupore & rigiditate harum partium, & doloris a motu graviore augmento. Afficiuntur autem, prout observavi, hoc dolore maxime ii, qui sanguinem e vena pedis mittendum curarunt & aëri frigidiusculo corpora exposuerunt; quo facto ingens mox sequuta fuit affecti membri debilitas, & successit postea dolor, qui ad aliquot menses duravit & pro arthritico ac podagrico vulgo habitus fuit; sed quum nulla febricula, nullus tumor, rubor aut ardor simul apparuerit, neque tam in juncturis, quam potius in ipso periosio, animadversus fuerit, jure meritoque eum distinguendum a vero arthritico esse dijudicamus.

§. XXXVI.

Progressum nunc facimus ad eos morbos inter se bene discriminandos, qui convulsivi vel spasmodici quippiam foveant, e quibus pectoris illa ingens concussio, quæ tussis vocatur, non postremum sibi vindicat locum. Perquam plurimæ etiam, pro differentia causarum & sedis affectæ, dantur tussis species; nobis vero jam tantummodo commodum visum est, eam tussim, ubi causa hæret in ipsis pulmonibus, ab ea, ubi in aliis, præsertim nervosis partibus, & præcipue stomacho, consistit, certis notis atque indiciis a se invicem mutuo discernere, quippe quæ distinctio non parum utilitatis in medendo affert. Si igitur causa subsistit in pulmonibus, respirationis semper adest quædam difficultas, quæ motu, vel exagitatione corporis aut sanguinis, augetur, adest quoque plerumque vox clangosa, dolor pressorius in pectore & raucedo quædam. Si ficca est & per longum tempus durat, plerumque tubercula dura, vel vomica pure repletæ in causa sunt, & tussis phthisica est: si vero est humida cum ejectione materiæ copiosæ viscidæ stipata, indicium est magnæ cavita-

vitatis & secessionis humorum e tubulorum alveis in pulmonibus; atque in ejusmodi tussi pulmonali difficilis est in latere affecto decubitus, sique pus purum vel sanguine tinctum simul eliditur, de pulmonibus affectis non amplius dubitandum erit.

§. XXXVII.

Tussis vero stomachalis alia identidem humida, alia etiam sicca est. Si humida, lentum & copiosum sputum post sumtum cibum maxime ejicitur & sæpius quoque simul vomitus movetur, a pectoralibus, dulcibus increbescit tussis & circa matutinum tempus maxime suum resumit impetum. Adsunt quoque simul multæ spasmodicæ & flatulentæ in abdomine afflictiones, neque excretiones per alvum suum servant ordinem, neque in feminis menses recte procedunt. In tussi vero convulsiva, ferina & sicca, causâ maxime hæret in stomachi tunicis nerveis, ac vehemens tunc totius thoracis concussio adest, cum sono profundo, ac post pastum, post potum etiam frigidum, aut acidum assumptum, valde augetur. In hac tussi perniciosa plerumque hypochondria laborant, vel diathesis scorbutica, salsa sanguini intermixta; quare non infrequenter ejusmodi tussi purpura jungi solet. Si vero latitat materia in duodeno, quale quid sæpius contingit in febribus intermittentibus, præsertim tertianis, item in hypochondriacis; tunc ructus acidi & flatus præsto sunt, & in paroxysmo, post horripilationem, infestat, ac facile vomitum, qui valde biliosus & acidus est, proritat. Infantili ætati tussis convulsivæ admodum sunt familiares, partim quod eorum systema nervorum ad spasticos convulsivos motus admodum proclive est, partim etiam quia cruditates acidæ biliosæ in ventriculo & duodeno in his solenniter stabulantur. Vomitus quoque infantum tussi frequenter accedit; interdum vero plane sicca est, atque ita invalescit, ut suffocationis metum adeste judicaveris.

§. XXXVIII.

Asthma, frequentissimum malum, uti diversas suas agnoscit causas ac causarum sedes: ita etiam non parum inter se differentiae alit. Frequentius hæret vitium in stomacho, & tunc

flatulentum est, & fit ab inflato ventriculo, diaphragmatis liberum descensum impediēte. Frequens malum est hypochondriacis, imbecillitate ventriculi laborantibus, ab ingestis præsertim flatulentis, malum recrudescere, & vomitu humoribus rejectis, mitigari solet. Asthma convulsivum, ab asthma humorali, immo sanguineo, multum distat; nam periodicum est & certis tantum temporum intervallis infestat, maxime vero noctu invadit; spiritus sæpe adeo est angustus, ut collo extenso erectoque corpore eundem trahat æger necesse sit. Adest sæpius sudor frigidus, sique ad viginti & ultra horas durat, animi defectio accedit. Percipitur maxime compressio constrictoria circa thoracem, quæ sæpius usque ad collum & jugula propagatur. In hoc affectu subest plerumque vitium in visceribus abdominis, præsertim hepate, & facile cachecticus subsequitur status. Si vero polyposum in cordis vasis obhærescens concrementum asthma parit, vel illud exacerbatur, tunc cordis palpitatio jungitur. Si denique, quod frequentioris observationis est, asthmatis convulsivi & suffocatorii causa est ingens aquarum in thoracis cavitate extravasatio; dolor simul extra paroxysmum fixus in latere thoracis, quæ aqua comprehenditur, percipitur, & pes ejusdem lateris, vel ambo, intumescunt, & paroxysmus est diuturnus ac vehementissimus, cum maxima anxietate, licet sine tussi, & plerumque etiam necare solet.

§. XXXIX.

Non minus & differentia quædam inter asthma convulsivum, & catarrhum suffocativum, adstrui debet; siquidem hic paralysis quædam species est, nervorum paria, quæ respirationi inferviunt, tangens, quæ ex improvise adoritur, cum magna anxietate, stertore & sono quasi spumido, inter respirandum vultus rubore intumescit & suffocatio imminet: asthma vero convulsivum servat magis suas periodos & chronicum malum est, quum suffocativus catarrhus ad passiones acutas non sine ratione referendus sit. Deinde quoque in hoc perpetuus quasi materię affluxus percipitur, qui in asthma deficit, ingens etiam

virium jactura, plus catarrhum suffocativum, quam convulsivum asthma comitatur. Est autem catarrhus suffocativus maxime familiaris senibus, imbecillioribus, immo infantibus, præsertim retropulsis exanthematibus, variolis, morbillis, tinea capitis, achoribus faciei, scabie & hujus generis aliis.

§. XL.

Accedimus jam ad gravem illum apoplexiæ morbum, qui quomodo ab aliis affectibus differat, dispiciendum est. Cum syncope multum alit convenientiæ, quum in utroque omnium sensuum, tam internorum, quam externorum, fiat obliteratio; in eo tamen conspicua est differentia: quod in hac pulsus & respiratio non amplius percipiatur, facies palleat & omnia frigeant, in illa vero, præter durantem spiritum, florida sæpe & rubra facies sit, atque arteriarum pulsatio adhuc observetur. Majoris difficultatis est, veram apoplexiam a spuria distinguere. Hæc frequentissimum hysteriarum symptoma est, & a violentia spasmodi in abdomine proficiscitur, quibus sanguis ex mensium stagnatione redundans, magno impetu ad cerebrum delatus, in ejus valis subsistens, omnem sensum ac motum intercipit, salvo tamen pulsu & spiritu. Vulgo habetur pro syncope, vel etiam epilepsia hysterica, sed minus recte, raro quoque feralis est, sed ubi remittit strictura, vel sanguis largius ex pertusa vena subtrahitur, facile discutitur. At vero magis terrere debet apoplexia vera, quæ ob sanguinem, vel serum, vasorum alveis elapsum, subito sæpius jugulat. Deinceps apoplexia perfecta a debiliore ita etiam est distinguenda, quod illa ex vasorum cerebri ruptione, hæc vero ex horum tantummodo nimia distensione & sanguinis ibi facta stagnatione subnascatur, & sæpius paralyin sensuumque debilitatem inducat, vitam autem non adimat.

§. XLI.

Quod attinet ad paralyin, identidem hæc recte in
G 3 veram

veram & spuriam dispescitur. Illa in ipso cerebro, vel principio spinalis medullæ, fixam habet sedem; sensumque fere omnem ac motum sufflammat: spuria vero mitior est, neque tam altas radices agit in cerebro, sed quibusdam nervorum paribus, ad certam partem decurrentibus, tantummodo inhæret, & sensum ac motum quodammodo lædit. Hæc quoque a colicis, cardialgicis & spasmodicis gravioribus passionibus, si præsertim a sanguinis restagnatione in plethoricis fiunt, originem suam sæpissime trahit, quando nimirum sanguis ad nervos, vel etiam musculos, qui manus vel pedes movent, transfertur, & stagnatione viscidum serum deponit, quod membranis nerveis incumbens, motus quidem impotentiam; sensu tamen & dolore residuo, efficit.

§. XLII.

Distinguere etiam convenit epilepsiam a convulsionibus. In illa affectæ sunt cerebri membranæ; in hiis vero membranæ & nervi spinalis medullæ magis patiuntur, neque pollices tam fortiter contracti sunt, licet maximum robur sub artuum agitationeprehendatur. Motus convulsivi etiam invadunt maxime pueros, circa decimum quartum ætatis annum, ex suppressa iracundia, terrore gravi, intempestivo veneris exercitio, corporis refrigeratione, vel etiam vermium morfu, ac tam mira sæpe artuum totiusque corporis est distortio atque quassatio, ut ob insolentiam fascino vulgo tribuantur. Mens quoque in quibusdam variis phantasmatibus turbatur, sique non opportuno ac prompto auxilio oppugnatur malum, ita vires sumit, ut vigesies & sæpius quoque quotidie ingruat. Epilepsia autem accessionum periodos magis circa lunæ phases statas, neque tam crebras, servat, ac tempore pubertatis plerumque cedit. Denique catalepsis differt ab apoplexia, quod illa derepente invadat, & membra rigida in ea positura ac situ detineat, in qua accedens eaprehendit. In utroque vero affectu sensuum omnium ad tempus abolitio, cum stupore ac sopore quodam, præsens est.

CAPVT IV.

DE

GENEALOGIA MORBORVM

EX TVRBATO SOLIDORVM ET FLVI-

DORVM MECHANISMO, AD EXPLICATIONEM

HISTORIÆ MORBORVM ET VERAM AC

SOLIDAM THERAPIAM.

§. I.

Cognito sic atque perspecto, ex allatis superiori capi-
 te characteristicis notis, quis & qualis sit morbo; ^{Alterum}
 necessarium porro est, ut Medicus formalem ejus ef- ^{therapia}
 fectam, genealogiam, causarum primordia & ubi sedem ^{menta-}
 obtineat, curate scrutetur, quippe quod alterum veræ pa- ^{est cogni-}
 thologiæ ac therapiæ fundamentum est. Nam profecto ex- ^{tio ortus}
 quisitor cognitio modi, quo morbi succrescunt, planam ac ^{& causa-}
 facilem ad eos tam arcendos, quam persanandos, viam me- ^{rum mor-}
 denti pandit. Hinc licet in secundo medicinæ rationalis sy- ^{bi.}
 stematicæ tomo de morborum ortu & causis copiose satis ege-
 rim: haud supervacaneum tamen fore duxi, si succinctam
 pathologiæ synopsis, proximas morborum quorumvis caus-
 sam complectentem, hoc loco insererem. Enimvero si fa-
 teri licet quod res est, solida pathologiæ fundamenta usque ^{Qua mi-}
 eo minus recte, hoc est, cum connexionione ac demonstratio- ^{ne recte}
 ne, exposita sunt, ut potius passim quamplures hallucinatio- ^{huc usque}
 nes ac ipsis in exercitio artis obviis factis minus respondentes ^{tradita-}
 opiniones deprehendantur.

§. II.

Scilicet varii quidem sunt modi, hypotheses atque ^{Ex variis}
 principia, quibus tum ab antiquioribus, tum a recentiori- ^{tamen}
 bus, medica disciplina fuit tradita: nulla tamen, ut verum ^{medicinæ}
 fate- ^{tractandi}

*methodis
optima
Hippo-
cratis.*

fatear, faciliior, simplicior & naturæ magis consentanea salutaris artis doctrinas pertractandi ratio mihi unquam visa est, quam quæ a primo & antiquissimo Medicinæ parente, Hippocrate, in ipsius monumentis, immortalī memoria dignis, proposita est. Gravissimus enim hic auctor, non ex solis materiæ affectionibus, respectibus & qualitatibus physicis, neque etiam ex speciosis nominibus, sed potissimum ex proportionē, mensura & temperamento, tam motuum, quam humorum corporis nostri, nec non eorum, quæ ingeri & egeri debent, adeoque pure mechanice, solidas rationes, in difficilibus rebus medicis explicandis, scite ac doctē deducere annisus est, usus maxime ad hoc ministerio scientiæ physicæ, anatomicæ & observationum clinicarum.

§. III.

*Quod ejus
potiora
dogmata
testantur.*

Sane primus fuit magnus hic naturæ consultus, qui artem nostram, ex vero non minus, quam apposite, per subtractionem eorum, quæ superflua sunt, & additionem, quæ deficiunt, per convenientia nimirum remedia, definivit. Primus porro fuit, qui corpus humanum ex partibus solidis, fluidis & impetum facientibus, sive spirituosīs, constare, illud permeabile esse, ejusque partes invicem consentire & conspirare, rectissime docuit. Hic quoque primus omnium de sanguinis progressu & circuitu, ejus motu inæquali & a partibus exterioribus ad interiores resiliente, & rursus ab his ad illas converſo, in scriptis suis, præsertim libro de flatibus, luculentam mentionem injecit. Idem præterea peritissime in mediocritate ac temperie sanitatis fundamentum, in nimio vero, & tam ratione quantitatis, quam qualitatis, excessivo, quod naturæ humanæ inimicissimum judicat, læsionum & morborum causas constituit. Denique ex omnibus primum asseruit, naturam corporis humani esse optimam morborum, ut cum ipso loqui liceat, præservatricem & curatricem, immo omnis ratiocinationis in Medicina principium.

§. IV.

§. IV.

Jam itaque vehementer optandum foret, ut qui post *Sed per Hippocratem* vixerunt artis professores, & inter hos maxime *peram Galenus* cum suis sectatoribus, his tam egregie jactis a summo viro fundamentis pressius institissent, & divinam artem *Hippocratis doctrinam* magno apparatu observationum practicarum, nec non inventis anatomicis, quæ artificiosissimam corporis structuram pandunt, atque experimentis physico-mechanico-chymicis, quæ rerum corporearum vires, quibus ad vitam continuo homo eget, & motuum quibus vita conservatur leges, recludunt, melius excolere, ulterius perficere & confirmare, per tot sæculorum decursum operam impendissent. At vero, si verum fateri licet, otiosis potius speculationibus & sterilibus ratiociniis ex Philosophia potissimum Aristotelica, secundum quatuor elementa desumptis quatuor qualitatibus, humoribus, temperiebus & intemperiebus, nec non variis animæ & spirituum potentiis & facultatibus, vix aliud egerunt, quam ut majorem progressum & lætiora artis incrementa mirum quantum retardarint, tantum abest, ut quicquam solidi ad amplificandam illam addiderint. Neque melioris notæ sunt quorundam nostri ævi Medicorum principia atque hypotheses, quæ partim ex corpusculari *Cartesii* Philosophia, partim ex Chymicorum potentiis salinis & sulphureis, partim etiam ex Metaphysicorum scholis, ortum trahentes, ac specioso multorum, ut obscurorum, sic sterilium nominum, fuco innixæ, ad solidam theoriam & rationalem Medicinam stabiliendam, parum adjumenti attulerunt.

§. V.

Ego vero quamdiu per divinam gratiam promovendis artis medicæ incrementis, in publico etiam docendi munere, mentem & operam adjeci, id maxime mihi agendum duxi, ut vetustissima illa ab *Hippocrate* inventa & felici auspicio inchoata mechanice circa corporis humani naturam *Quæ igitur revocanda magisque excolenda.*

*Instituti
ratio.*

& accidentia ratiocinandi methodus, ulterius luculentioribus observationibus, nec non anatomicis, item physico-mechanicis & chymicis inventis atque experimentis, illustraretur, confirmaretur & ad uberiores perfectionem traduceretur. Proinde jam etiam hæc instituti erit ratio, ut breviter, solide tamen, ex simplicissimis & veris naturæ principiis, motu nempe atque materia illiusque affectionibus & legibus in microcosmo, vitæ, sanitatis & mortis naturam, morborum & varii generis symptomatum genealogiam, cui deinde rationalis therapia, sive vera remedia inveniendi & applicandi methodus, firmiter superstruenda, in usum maxime discipulorum & futuræ praxeos, eruam atque ingenue exponam.

§. VI.

*Inquirendum pri-
mo verum
medicina
princi-
pium.*

*quod non
est anima*

Quemadmodum autem ad omnem in disciplinis demonstrationem ac veritatem, prima quædam simplicia & intellectui facilia principia seu fundamenta requiruntur, e quibus, tanquam notis, multa incognita & difficilia phænomena apta serie clare deduci, explicari atque resolvi debent: ita pari modo, in Medicina rationali reddenda, sive scientificè tractanda, idem merito faciendum esse judico. Inquirendum videlicet tale principium ac fundamentum est, in quo non modo vitæ, mortis, sanitatis ac morborum ratio continetur, sed ex quo etiam, ceu fonte, accommoda omnium, quæ in naturali & præternaturali statu occurrunt ac in morborum historiis continentur, explicatio, promi, nec non ea, quæ in hoc vel illo casu salubria & insalubria sint, peti possunt. Quodnam vero hoc sit principium, de eo discors admodum est Medicorum sententia. Qui corpus nostrum mere passivum atque ad motus edendos ineptum judicant, rebus quoque corporeis vim & efficaciam in istud agendi denegant, immateriale quoddam principium, quod apte plerumque & sapienter motus exsequatur & dirigat, animam nempe, sive rationalis sit, sive sensitiva, universæ medicæ

doctrinæ fundamentum esse contendunt. Alii spiritus in ce-^{neque}rebro & sanguine contentos, æthereæ, sulphureæ, mobilis^{spiritus.} & elasticæ naturæ, motuum vitalium causam, eorumque considerationem in pathologicis & therapeutis utilissimam ac potissimam esse, asserunt.

§. VII.

Nos cum *Hippocrate* naturam corporis humani princi-^{Sed natu-}pium omnis sermonis & ratiocinationis in Medicina esse cen-^{ra corpo-}semus. Per hanc vero nihil aliud intelligimus, quam per-^{ris huma-}ennem sanguinis & fluidorum per corpus mere tubulosum^{ni Hippo-} & hydraulicum, beneficio systoles & diastoles, quæ in o-^{cratica,}mnibus canalibus viget, progressivum & in circulum abeun-^{qua a-}tem motum; ut adeo vita in corpore humano nihil aliud sit,^{quabili}quam motus fluidorum, a solidis, præsertim corde & arte-^{solidorū}riis, & solidorum, a fluidis, quo salvo, machina ratione^{& fluido-}rum mixtionis suæ maxime in putridam corruptionem prona, ab^{rum mo-}tu continetur^{tu conti-} hac immunis persistit, & quo prorsus extincto, putrefactio^{netur.} mortifera incipit.

§. VIII.

Quamvis autem de penitus inquirendis remotioribus^{Ex inte-} motuum vitalium causis non valde sumus solliciti, eo quod^{gro hoc} subtilior talis theoria, non tam ad scopum medicum, quam^{motu} potius ad physicam, seu metaphysicam scientiam sublimio-^{proxima}rem spectet; non dubitamus tamen asserere: motum illum^{vita ac} systoles & diastoles in universo vasorum systemate, qui fluida^{sanitatis} movet eorumque cursum moderatur & dirigit, neutiquam^{causse} persistere posse, nisi ad tunicas fibroso-nerveas, e quibus^{petenda.} vasa coagmentantur, sanguini per arteriolas, & liquido, cu-
juscunque sit indolis, per nervulos, liber patcat affluxus, ad-
eo, ut hoc intercepto, repente omnis motus concidat. Por-
ro firmiter asserimus: sanitatem, quæ in libero & ordinato
functionum, tam animi, quam corporis, exercitio consistit, a
motu systoles & diastoles in solidis, & progressivo fluidorum
in vasis, imperturbato & æquabili, a partibus internis & vasis

majoribus, ad extimos & minimos canaliculos vergente, unice dependere, quo integro ac inoffenso, humorum utilium, qui ad usum retineri debent secretiones, & inutilium ac superfluatorum excretiones saluberrimæ, legitime perficiuntur.

§. IX.

Et læsio morborum origo arcessenda.

Pervertitur autem quaduplici modo;

1) per spasmodicum

2) per spasmodicas stricuras

3) per convulsivos epilepticos motus

4) per atoniam.

Hoc itaque posito sanitatis fundamento, læsionem functionum corporis nostri, quæ formalem morbofi status rationem exhibet, a vitiato solidorum & fluidorum motu unice deducimus; qui, sicuti variis modis lædi potest, ita etiam morborum, seu potius motuum morbosorum, causas formales & proximas varias adstruimus. Attenta tamen in omni morbo, seu statu præternaturali, observatione compertum habemus; motum illum vitalem a partibus interioribus ad exteriores, constrictione minimorum vasculorum & fibrillarum spastica, valde intercipi, ac inverso plane cursu, a circumferentia ad centrum urgeri, & deinde rursus cum impetu a peritralibus ad ambitum, accelerata systole & diastole, agi, qualis motus, si universum corpus afficit, febris dici solet. Deinceps id quoque observatu constat, motum intensiorem systoles, sive spasmodicum, certas nonnunquam tantummodo partes occupare & fluidorum motum ibi turbare, qui motus vocari suevit spasmodicus. Porro in quibusdam morbis animadvertimus: motum reciprocum constrictionis & expansionis in partibus musculosis, tam internis, quam externis, præter voluntatem intendi, qui convulsivus, aut si enormis, epilepticus, dicitur. Tandem etiam in plurimis morbis obvium, motum activum systoles in solidis valde esse remissum ac resolutum, & fluidorum progressum inde retardari, quæ affectio, si levior, atonia, si gravior, paralyfis vocatur, & foecunda est morborum mater.

§. X.

Ad primam classem refer-

Constitutis sic quatuor motuum morbosorum generibus, primo loco istos recensebimus, qui ex aucta spastica

vasorum & fibrarum strictura in externo corporis habitu, sanguinem & fluida ad interiora urgente, subnascuntur, quos inter maxime eminet febris. Nulla enim ejus species est, sive sit intermittens, sive continua, eaque vel benigna, vel maligna, acuta sive lenta, inflammatoria, sanguinea, aut lymphatica vel biliosa, item, cum vel sine exanthematibus, sive denique symptomata, in qua non sub accessione, progressu, immo tempore exacerbationis, partium extimarum refrigeratio, summae cutis ejusque pororum constrictio, vasorum detumescencia, horripilatio, partium rigor, sudoris suppressio alvique constipatio, observetur. Nullam porro febrent videas, qua sanguis non ab exterioribus ad interiora, cor & appensos eidem majores canales, superiores quoque partes pellatur & congeratur, ut hinc dolor dorsi & capitis, praecordiorum anxietas, inquietudo, spirandi difficultas, pectoris oppressio, pulsuum durities & frequentia, oboriantur, vel plane, coacto ad cerebri & spinalis medullae membranas sanguinis impetu, deliria, convulsiones ac epilepsiae, nonnunquam in principio, quandoque etiam, quod magis periculosum, in vigore, accedant. Nulla denique febris, vel motus febrilis species discedit ac solvitur, nisi spastica illa in superficie cutis & minimis vasculis strictura intermittat, vel plane remittat, ut liberior & aequabilis sanguinis ad exteriora & emunctoria affluxus restituatur, quem mollior & validior arteriarum pulsatio, sudor vel mador & perspiratio auctior, nec non alvus solutior & urina crassior, tanquam bonae criseos signa, sequuntur, vel comitantur. Et duplici hoc motu, omnis febris, sive motus febrilis, essentia & natura continetur.

§. XI.

Post febres multi alii adhuc sunt morbi & motus morbosus, in quibus pariter sanguinis a partibus exterioribus & inferioribus, ad interiores ac superiores cursus praeter naturam convertitur. Videlicet obvium hoc est in omni genere

ris hæmorrhagiis, tam salutaribus, sive criticis, quam pernicialibus, sive symptomaticis. Menstrualis illa sanguinis in feminis, & hæmorrhoidalis in masculis effusio, antequam succedit, inferiora refrigescunt, cutis stringitur, in dorso circa pubem & os sacrum dolor percipitur, artus lassantur, genæ gracilescent & pallent, demum pulsus intenditur & tunc sanguis effluit. In narium stillicidio, extremæ & inferiores partes levius minimum quoque frigent, facies vero rubet ac tumet, vasa temporum intensius salient, gravativus dolor caput obsidet, & sub aucto arteriarum pulsu, sanguis stillat. Hæmoptysin porro nunquam non antecedit extremorum, præsertim pedum, frigus, lassitudo, flatus in abdomine, alvi adstrictio, pectoris oppressio & difficilis spiratio. Ipse cruentus vomitus, & nigri cruoris per anum secessus, nec non mictus sanguinolentus, nunquam accidunt, nisi præcesserint spasmi in abdomine, dolor in dorso, ani constipatio, cum cutis & extimarum partium refrigeratione ac detumescencia, arteriis semper citatius & ad tactum durius micantibus.

§. XII.

*Inflam-
mationes
omnes.*

Eadem ratione inflammationum genesis contingit. Phrenitis, idiopathica æque, ac symptomatica in febribus continuis, vix aliter inducitur, quam cum horrore & rigore in corporis cortice, alvo compressa & urina tenui aquosa, raptò interea sanguine ad caput, in quo arteriæ, tam internæ, quam externæ, fortiter pulsant, facies rubet, oculi scintillant & nares siccæ & calidæ sunt. Et quia sanguis copiosius appellitur, quam canalium sanguiferorum diameter capere potest, neque per nares exsolvitur, ad lateralia arteriolarum, non cruoris, sed feri vel lymphæ trajectui dicata vasa, cogitur, in quibus stasin concipiens, dolorem, ardorem, ac delirium cum phantasie turbatione ingignit. Reliquæ inflammationes, in oculis ophthalmia, in faucium & asperæ arteriæ principio, angina, in pulmonibus, pleuritis & peripneumonia, in ligamenti hepatis membranosis, hepatitis, in re-

num

num substantia, nephritis, nec non ea quæ in ventriculo, intestinis, utero & vesica consistunt, non alio etiam modo subnascuntur, quam quod sanguis per spasmos & dolores, in abdomine & intestinis præsertim, e minoribus vasorum propaginibus repellatur, & inde ad alias partes fortiori appulsu congeratur; unde sæpissime observavi peripnevmoniam & pleuritidem, perpeffo prius colico dolore, accessisse. Insuper inflammationes illæ dolorificæ, quæ extremas partes cum dolore & rubore obsident, ut erysipelas in cute vel facie, rheumatismi in membranis musculorum, arthritis in ligamentis nervis juncturarum, podagra in pedibus, gonagra in genubus, chiragra in manibus & itchiatis in ossibus ischii, eosdem obtinent natales: quandoquidem ante earundem accessionem, cutim plerumque horripilatio & refrigeratio tangit, vasa detumescunt, vires cum appetentia languent, præcordia anguntur, quandoque etiam vomitus exoritur & feces retinentur, luculento indicio, spasmis extrema ac interiora stringi, ipsumque sanguinem retro agi.

§. XIII.

Accedunt graves illi capitis & cerebri affectus, insul- *Graves*
tus sive pæroxyfmi epileptici, maniaci, apoplectici, paraly- *quidam*
tici ac soporosi. Dum enim in his sanguinis & humorum *capitis*
impetus ad caput, & maxime ejus interiora, urgetur, neque *morbi.*
exitum ibi invenit, cruor vel in vasis membranarum cerebri stagnat, & principia nervorum comprimendo, apoplexiam, levio-
rem tamen sive spasmodicam, hystericeis & hypochondriacis familiarem, inducit, vel ruptis plane ob nimiam
distensionem plexus potissimum choroidei vasculis, effunditur,
ac ventriculis illapsus, funestam graviorem apoplexiam gignit,
vel serum ob moram secedit, ac in substantiam cerebri & spinalis
medullæ descendens, paralyfin nec non soporosos affectus & memoriae
imminutionem suscitatur, vel denique rapido velocius & cum impetu
per cerebrum sanguine, distentis quoque simul nimium minimis
canalibus, furor exoritur.

Hinc

Hinc est, quod semper ante incursum horum morborum, in extremis frigus ac horripilatio sentiatur, & maxime in hypochondriacis, iisdem maxime obnoxiiis, dolores & spasmi in ventriculo, in dorso, hypochondriis & abdomine, membrorum lassitudo & alvus compressa, advertatur. Quinimmo in epilepsia, compressis per spasmum venis externis jugularibus, facies a copiosioris sanguinis appulsu, non modo turget, sed & colore ex rubro nigricante perfunditur, motu arteriarum velociori ac duriori, quam in apoplecticis insultibus visitur.

§. XIV.

*Catarrhi
& diarr-
rhea se-
rofa.*

Porro omnis feri copiosioris & vitiosi in coryza, per glandulosam faucium & narium substantiam, in tussi humida, ex pulmonum bronchiis, ac in diarrhea feri acris, falsi & biliosi largior & salutaris sæpe excretio, cum horripilatione cutis, extremorum refrigerio, artuum lassitudine, corporis languore ac perspiratione suppressa, accedit, & vernali potissimum, nec non autumnali tempore, quo ob ærem frigidum & humidum cortex corporis constringitur & fluida ad interiora sese recipiunt, solennis est. Neque effrenis salivæ profusio argento vivo proritata, quæ mihi aliquoties lethalis visa est, sine ingenti & continua refrigeratione extremorum, cutis constipatione, alvi siccitate & urinæ difficultate, observatur.

*Salivatio
quoque.*

§. XV.

*Recidiva
morbo-
rum.
Efflores-
centia
cutanea
retroce-
dentes.*

Omnis quoque febrilis vel alius morbus recidivans, perfrigeratis prius notabiliter artubus, dorso dolente, viribus languentibus, corpore lasso, horroris cujusdam sensu & alvi obstipatione, incipit ac repetit. Inprimis frequentissimæ observationis est, exanthemata, in acutis quidem variolas & morbillos, purpuram rubram & albam, nec non petechias, in chronicis scabiem, pustulas vel falsas alias acres & erodentes cutis defædationes, post spasticam tubulorum cutis crispaturam, incauta perfrigeratione, vel topicis adstringentibus

tibus improvide applicatis, inductam, disparere, reficari ac ad interiora recedere, gravius damnum certo investura. Quin sapius vidi, oedematofos pedum tumores, accessione febris intermittens, cui horror & extremorum stupor junctus, evanuisse, sed intro pulsos, pectoris suffocationem intulisse.

§. XVI.

Neque denique in artis exercitio versantibus igno- *Nec non*
tum esse poterit, quam sæva pathemata subitam lochiorum, *quæ post*
mensium & hæmorrhoidum fluxus suppressionem, conlequi *suppressas*
soleant, nullam certe aliam ob causam, quam quod, quæ *hæmor-*
sanguinem plorant vascula, vehementiori frictura, vel a fri- *rhagias*
gida aura, vel animi affectu, vel etiam medicina præpostere *sequun-*
adhibita, afficiantur, quibus compressis, motus antea eo *tur pa-*
directus retrocedit, & sanguinem ad nobiliora viscera & ma- *themata.*
jores canales trudit, ubi copiosius collectus, varias & diffi-
les turbas sulcit, in intestinis quidem, acerba tormina, in
ventriculo, cardialgiam, in præcordiis, summas anxietates,
in thorace, spirandi angustiam & difficilem ad suffocationem
usque anhelitum, in dorso, dolores, in artubus, lassitudi-
nem, languorem & movendi impotentiam, in corde, pal-
pitationem ac tremorem, immo syncopen cardiacam, in capi-
te, cephalalgias, aurium tinnitum, scotomiam, quandoque
vertiginem, nonnunquam plane epilepsiam, melancholiam,
sive anxias & meticulosas cogitationes, cum perversa phan-
tasiæ impressione, ac in universo corpore, languores virium-
que jacturam.

§. XVII.

Et hæc cuncta timoris & periculi plena atrocita mala, *Nullus ex*
in omnibus quos recensui morbis, febribus, inflammationi- *his mor-*
bus, doloribus, profluviis aliisque, prius non desinunt ac la- *bis solvi-*
borantes deserunt, quam sanguinis ac fluidorum a centro ad *tur,*
peripheriam, ab interioribus ad exteriora & vasorum mi- *quam*
nima, beneficio naturæ vel congruis remediis, repetat aut *spasmo*
sublato.

(III.)

I

resti-

restituatur. Quare etiam perfectæ solutionis morbi quam Græci crisin vocant, certa indicia præbent pulsus mollior & sedatior, calor per omnem corporis ambitum æqualiter diffusus, tepidus ex auctiori perspirationis successu mador ac sudor, somnus placidior, alvus solutior & urina crassior, facile sedimentum ponens, ex quo potissimum Veteres, coctam esse febrilem & morbificam materiam, augurabantur.

§. XVIII.

*Morbosi
igitur
motus non
per se &
sua natura
sunt
salutares.*

Quæ quum ita sint, nemo certe, qui allata curatius expendit, facile in eorum sententiam descendet, qui haud ferentur affirmare: & febres, & omnes hos plane morbos motus, in se & sua natura esse salutes, ad vitam conservandam & corpus ab interitu vindicandum, a sapienti natura provido consilio institutos. Qui enim motus ejusmodi spastici, qui circulum sanguinis vitalem, liberum, æquabilem, ad exteriora corporis per minima vascula iter legentem, sistunt, cohibent ac pervertunt, naturæ amici & salubres dici possent? quum non modo excretiones saluberrimas, sine quibus vita consistere prorsus nequit, intercipient ac sordes ad interiora reprimant, sed & attenta observatio doceat, sub iisdem lethalem vitæ catastrophem induci. Certe in omnibus chronicis & acutis morbis ipsisque febribus, quando ægri occumbunt, ex iisdem motibus mortis signa desumuntur, quæ inter tanquam ipso eventu toties comprobata referuntur maxime extremorum frigus, horror & rigor partium, sudor frigidus, & exanthematum, si adsunt, retrocessio, facies contracta, nares acuminatæ, tempora collapsa, respiratio anxiosa & difficilis, summa virium prostratio, cum pulsu inæquali, debili, contracto vel etiam intermittente, insequente demum mentis ac sensuum emotione, aut convulsione. Ipse quoque notavi, eos, qui ex intermittente moriuntur, in ejusdem accessione & frigore, ubi omnia a spasmo contracta rigent, perire, & omnes, qui ex præcedente morbo, ad infestos hos motus, proni sunt, ut hypochondriaci, hysteri-

steri-

stericæ, hæmorrhoidum vel mensium suppressione laborantes, his in morbis acutis per se non adeo periculosis, repetentibus, jugulari.

§. XIX.

Quapropter nulla certe alia ratione, nulloque alio re-^{Sed tan-}
spectu, hi motus, per se morboſi, vocari possunt salutareſ, ^{tum per}
quam quod per accidens, licet sapius, per eosdem, alter ^{accidens}
iſte, revera per se ſalutaris dicendus, ſanguinis nempe a par- ^{sunt ſa-}
tibus internis ad externas tendens progreſſus, mechanica qua- ^{lutiferi.}
dam ratione excitetur, augeatur, ac per ejusdem appulſum,
interventu mechanicorum, quibus a ſummo opifice machina
animalis ſapientiffime inſtructa eſt, motuum, ipſius morbi
cauſſa, vel ſtagnantem materiam reſolvendo, vel eandem
expellendo, auferatur. Et hoc demum ſenſu, febris ad Cel-
ſi loquendi modum medicina & præſidium corporis appellari,
vel ut Hippocrati aliisque Veteribus ſolenne, denominatio
pugnæ naturæ cum morbo, nec non naturæ optimæ morbo-
rum medicatricis, admitti poterit, intelligendo per morbum,
perniciæ illos ſpaſmodicos & κατ' ἐξοχὴν morboſos motus, vin-
cendos per naturam, hoc eſt, ſalutarem illum ab interioribus
ad exteriora corporiſque ambitum vergentem ſanguinis &
humorum motum.

§. XX.

Atque hi ſunt natales morborum, quos ſpaſmi ſan-^{Alterius}
guinis & fluidorum motum retroagendo ingignunt: jam et-^{classis}
iam illuſtrabimus perniciæ illos effectus, quos iidem ſpaſmi ^{morbis,}
in partibus, ubi incipiunt & fixam habent ſedem, ſuſcitant. ^{ex ſpaſmo}
Incipiemus a doloribus, quorum cauſſam plerumque præ-^{particu-}
bent ſpaſmi, dum ſcilicet nervoſas tunicas, quæ acutiori ^{lari, ac-}
ſenſu præditæ, gravius & pertinacius infeſtant, & tantum ^{cenſendi}
pro diverſitate locorum diverſam fortiuntur denominatio- ^{dolores in}
nem. Videlicet vehemens ejuſmodi ſpaſtica ſtriſtura, ex-^{capite}
ternas capitiſ membranas, ut pericranium, attentans, ce-
phalalgiam, modo in ſincipite, modo in occipite, parit, ſi

dimidiam cranii partem, in sinistro vel dextro hemisphærio, detinet, dolor vocatur hemicrania, quando vero circumscriptæ tantum certæ regioni insidet, clavus audit. Idem hic spasmus ad ligamenta nervosa dentium descendens, odontalgia, & valde nervosam meatus auditorii membranam exercens, otalgia vocatur. Ventriculi tunicæ nerveæ, nec non orificia, crispata & spastice contracta, cardialgiam, cum ingenti circa præcordia anxietate & angustia faciunt. Intestina quum spasmi exagitant, & quidem tenuia, dolor ilei, circa umbilicum subsistens, urget; si in confiniis hypochondriorum crassa, præsertim colon, tormina vocantur colica; & quando infimam voluminis regionem, a stagnatione maxime sanguinis hæmorrhoidalis, dolor hæmorrhoidum cæcarum nominatur.

§. XXI.

*Aliæque
corporis
partibus.*

In uretheribus reliquisque urinæ evehendæ dicatis & ex tunicis penitus nervosis & musculosis conflatis canalibus, si quando infixus major calculus, hinc distractionem, hinc crispaturam, causatur, immanis dolor, cum dysuria & aliis gravibus symptomatibus stipatus, gignitur. Stricto autem & corrugato vesicæ sphinctere, ardens urinæ stillicidium, quod stranguriam dicunt, adest. Dolorificus porro hic spasmus, ligamenta, quæ artus vinciunt & continent, obsidens, articulorum morbos excludit, & denominatione a proxima parte desumpta, podagræ, gonagræ, chiragræ, vel ischiatis, vel etiam extremam tantum musculorum membranam sollicitans, rheumatismi, vel pleuram, pleuritidis spurie nomine, in Medicorum scholis insignitur. Ipsum periosmium ubi lancinatur & spastice quoad certam partem affligitur, acutissimus crudelis dolor suscitatur, in lue venerea & paronychia obvius, cui atrocitas non cedit, qui facta in luxatione ossium dislocatione, ægros angit.

§. XXII.

§. XXII.

His non minora, sed majora utique sunt damna, quæ *De noxi*
 pernicipales spasmi, locis, quæ saluberrimis excretionibus *spasmi*
 vacant, firmitus inhaerentes, intentant. Nimirum tubu-
 losa & cribrosa cutis substantia, e cujus spiraculis copiosis-
 simi tetri vapores exhalant, spasticam stricturem, vel ab *effectu in*
 acri frigore improvide admissio, vel per consensum ob affe-
 ctas interiores partes, ut fit in febribus & doloribus, pati-
 ente, excrementitiæ illæ salinæ & sulphureæ activæ admo-
 dum indolis sordes, in corporis penetralia resorptæ, vel fe-
 bres catarrhales ipsamque coryzam ac tussis cient, vel ad
 intestinorum tunicas latæ, & bile acriori reddita, diar-
 rheas cum torminibus concitant, vel ad renale emuncto-
 rium & urinarios ductus appullæ, copiosiore quidem uri-
 nam, sed cum difficili mictu, efficiunt; quid? quod eadem
 superficiales tubulorum in cute stricture; liberam perspira-
 tionem sufflamantes, ad fomitem chronicarum passionum,
 primis in viis, præsertim duodeno constituendam, multum
 conferant.

§. XXIII.

Alimentaris ille canalis, ab oesophago ad anum por-
 rectus, ingestorum digestionem & relictorum ex his fecum ex-
 cretioni dicatus, si hostili spasmo stringitur, maxima inde & *Inte-*
 varia in corporis integritatem redundat noxa. Inprimis al-
 vi contumax adstrictio, plerumque debetur spasmis, qui vel
 ipsis in intestinis, & maxime inferiori coli portione & recto
 consistunt, vel per consensum e strictis remotioribus parti-
 bus eo propagantur. Suppressa autem hac ratione alvi
 evacuatione, scybala non modo retinentur, sed & omnes
 flatu cum ipsis sordibus ad superiora & tenuia intestina, im-
 mo sæpius ad stomachum, reprimuntur, ubi propter inflatio-
 nes inde pullulantes, multa eaque gravia insequuntur sym-
 ptomata, id quod hypochondriaco vel hysterico malo la-
 borantium exemplo luculenter patet. In medio intestino-
 rum

rum hospitans spasmus, motum peristalticum invertit, & ad superiora non modo flatus, sed & feces excernendas urget, ut sursum latæ, per os ac vomitum rejiciantur, quod sæpissime fit in passione iliaca, præsertim incarcerata hernia stipata.

§. XXIV.

*Specia-
tim ileo.*

*& ventri-
culo.*

Ileon sicuti intestinorum est tenuissimum & sensationis exquisitissimæ; ita hoc modo præter naturam affectum, non solum atrocissima circa umbilicum tormina, sed etiam dejectiones crebras & copiosas parit, ut in colica cum diarrhea juncta, sive biliosa, aut ubi drasticum purgans fuerit assumptum, contingit. Vehemens quoque strictura spastica, quum occupat inferius orificium ventriculi ejusque motum subvertit, vomitus vel conatus ad vomendum emergit; quando vero ambo orificia, sinistrum & dextrum obserantur, ipse ventriculus flatibus turget & mirum distenditur, unde in hysteriis & hypochondriacis truculenta sæpe pathemata. Nonnunquam etiam clauso adhuc pyloro, stomachus superius laxatur, & patefacto exitu, ipsi flatus ingenti copia & cum impetu e faucibus erumpunt & ructus fiunt.

§. XXV.

*3) In du-
stibus bi-
liariis.*

Et quia totum systema vasorum biliariorum, quæ in hepate & extra illud discurrent, & motu idemtidem peristaltico, quem nonnulli recentiorum oscillatorium dicere malunt, biliosum succum demum ad duodenum trudent, spasmis pariter ex facili patet, ob tunicas, quibus canales biliares instructi sunt musculares & nerveas, fit, ut pro diversitate stricturæ in vasa hæc cadentis, variæ affectiones morbosæ resulent. Nam orificio ductus choledochi constipato, ut sæpe accidit ab ira retenta, nec non in cardialgia, in vomitu, vel ab assumpto purgante aut veneno, bilis motu etiam inverso peristaltico regurgitat ad lymphæ & sanguinis massam, & ictericum cuti inducit colorem, simul quoque crasin temperatam & benignam sanguinis & humo-

rum corrumpit ac destruit. Ductus cystici & hepatici, quando ob bilem nimis acrem redditam, vel modo dictas causas, arctius adducuntur, ipsa bilis ingenti in copia amandatur ad duodenum, & sedes vel vomitiones admodum biliosas efficit, ipsumque cholericum sæpe parit morbum. Detenta vero in duodeni cavo bilis tam copiosa & vitiosa, cum aliis corruptis ibi stibulantibus male coctis succis facile in corruptionem abit, & gravium symptomatum atque inflammationum fomitem præbet.

§. XXVI.

Idem de systemate ductuum, qui urinam vehunt, ⁴⁾ *In urinetenendum.* Hi enim quum non minus peristaltico, hoc est, ^{navis} reciproco systoles ac diastoles motu gaudeant, intensiori ^{viiis.} facta per spasmus systole earum, & quidem ubi uretheres renibus implantantur, urinæ fluxus plane intercipitur, ac retentus falsus latex non modo renale conceptaculum valde distendit, sed & ad sanguinis massam redit, ut, si diutius perstiterit malum, gravis ad suffocationem usque anhelitus, vel etiam tumor hydropicus, aut convulsiva quædam affectio, quin non raro mors, ingruant. Clausura uretherum ad ingressum in vesicam, quacunque etiam ex causa, contingente, urina e pelvi jugiter stillans appensos uretheres cum sævissimo dolore mirum expandit, ut instar farciminis diducti post mortem appareant. Quando vero spasmus ad vesicæ sphincterem vergit, urina non redditur, sed vesicam implet ac ampliat. Urethra demum a graviore strictura compressa, mictum difficile cum ardore & dolore, sive stranguariam, conciliat.

§. XXVII.

Uti vero excretoria, sic quoque secretoria corporis *In secretoriis organa,* detrimetofus spasmus nonnunquam tangit, admissio inprimis externo frigore, vel perpeffo graviore terro-*ganis.* re. Sic ductus mammarum lactiferi eidem crebrius obnoxii sunt, ut non solum secretio lactei liquoris in glandulosa mam-

faucibus & palato. mammarum substantia impediatur, sed etiam inde tumores, in abscessus & ulcera desinentes, contrahantur. Faucium & palati glandulosa compages, ex qua continuo lymphaticus & salivalis succus stillat, ubi arctius stringitur, quod non tantum in æstu præternaturali, sed etiam febrium accessione, nec non in aliis affectibus internis spasmodicis contingit, fauces arescunt & sitis accenditur. Pariter tunica villosa intestinorum tenuium, quæ tota vasculosa & cellulosa si inflata exsiccetur apparet, spasmodice contrahitur, ob tunicam nerveam cui infernitur, & tunc parum humoris ex ingestis per venas lacteas ad massam sanguinis fertur, unde corpus emaciatur, inus contra venter intumescit, immo durus ac renitens a flatibus intro coactis fit, ac ita tandem tympanitis gignitur. Vicissim quum glandulæ, quæ salivalem laticem in fauces eructant, medicamento mercuriali ad iteratas fortiores strictiones sollicitantur, salivæ ingens exoritur profluvium, quod etiam evenit, in hypochondriacis ab humore stimulan-
glandulis faucium. te acri acido.

§. XXVIII.

Porro in diaphragmate.

Superiores & nobiliores corporis partes, quo magis reliquis in œconomia animali præstant, eo gravius detrimentum, si infesto spasmo premuntur, ipsa corporis patitur integritas. Diaphragma, & maxime ejus portio nerveo-tendinosa, quando præter naturam valide contrahitur, asthma nascitur sic dictum spasmodicum, cum sensu coarctationis & compressionis circa præcordia, solenne hypochondriaco malo vexatis symptoma. Quin spasmo hoc diutius septo incumbente, summa spirandi urget angustia, quam haud raro œdematosus, sive hydropicus inferiorum partium tumor, insequitur, eo quod cava vena, ex hepate emergens ac per diaphragmatis substantiam nerveo-tendinosam transmissa, hoc corrugato, simul angustatur, ut sanguis per adductum ejus alveum difficulter ad cor volvatur, & liberiori transitu exclusus, non tantum in inferioribus

par-

partibus, verum etiam in venæ portæ ramis & plurimis abdominis visceribus copiosius collectus, restagnet, ac mora serosam in poros dimittat portionem, unde tumores. Vasa & ^{aspera} ^{arteria.} ramificationes asperæ arteriæ per pulmonum substantiam dispersæ, tunicis muscularibus & nerveis vestitæ, quando vehementiam spasmī experiuntur, quod non raro fit inhærente iisdem intus genita, vel retropulsa quadam acri, serosa, exanthematica materia, ingens pectoris oppressio & respirationis difficultas oritur, quæ, propulsa ad habitum corporis perniciā illa materia, protinus cessat. Laryngis & pharyngis ^{Larynge} ^{& pha-} nerveis & musculosis partibus, quum insidet spasmus, ^{rynge.} contractivus quidam circa gulam observatur sensus, haud secus ac si palus ibi infixus hæreret, quod hystericeis, spasmō ventriculi laborantibus, familiare.

§. XXIX.

Longe magis adhuc terrent spasmī sensibilibiorum ^{Cerebro} ^{ejusque} ^{membra-} ^{nis, pra-} ^{sertim} ^{dura} ^{matre.} rebri membranarum. Nam dura sic dicta mater, per quam sinus venosi feruntur, & a qua, tanquam matre, omnes membranæ nervosæ originem sortiuntur, ob texturam prorsus nervosam ac fibrosam, motu tonico vitali, systole & diastole, pollet, & sanguinis per caput & cerebrum progressum, nec non fluidi tenuissimi in nervorum principia ingressum, quam maxime moderatur. Quapropter læso ejusdem motu eoque per spasmos intensiore factō, non mirum est, perquam sæva pullulare pathemata. Inprimis hoc loco ceu perpetuæ veritatis assertum inculcandum: quod animi dispositio, inclinatio ejusque varii motus, immo impressiones & functiones in judicando, a sanguinis & fluidorum motu ac transitu per cerebrum ejusque membranas, plurimum dependant; hic vero sanguinis cursus, pro varia duræ potissimum meningis textura, tono ac motu, succedat atque regatur, Et hanc ob causam mentis emotionem sive delirium, tam melancholicum, quam furibundum, aliaque gravia in capi-

te mala a præternaturali hujus membranæ constitutione quam maxime arcessenda esse judico.

§. XXX.

Unde melancholia.

furor,

& apoplexia levior.

Scilicet quando ita stringitur dura mater, ut sinus venosi angustentur, & hinc per ipsam sanguis impeditius trahatur, in animo variæ anxietatis & sine omni causa formidolosæ ac tristes comparent phantasie, ad desperationem quandoque accedentes, cum intellectus errore, qui affectus melancholia vocatur, in spasmodico-hypochondriaco malo obviat. Ubi vero durante tali strictiore duræ matris habitudine, sanguis a causis in corporis interioribus delitescens, vel etiam ab iracundia, cum impetu ad caput rapitur, insania furibunda cum lædendi impetu, vehementi odio & ira sine evidenti causa, nascitur. Et nunc facile intelligitur, quare melancholia facile transeat in furorem, & hunc sæpe melancholia excipiat. Quodsi vero sanguinis progressus ob rigidum duræ matris spasmodum sistitur, & vasa cruore repleta nervorum principia comprimunt, levior species apoplexiæ gignitur, quæ nobis dicitur spasmodica, & crebro visitur in gravi affectione hysterica, ac tempestive admissa venæsectione, repente nonnunquam tollitur.

§. XXXI.

In sensoriis sensus lædit.

Neque sensoria a crispatura spastica penitus sunt immunita. Si ad nervos pertingit opticos, quod aliquoties vidimus a vermibus, visus ad tempus perit, vel duplicatur. Si ad interiores aures, quæ labyrinthum cochleam & meatum auditorium succingunt, tunicas fertur, non modo tintinnus & susurrus molestissimus, sed & intolerabilis anxietas a sono externo acuto percipitur. Nervi linguales spasmo correpti, quod etiam aliquoties in verminantibus observatum est, aphoniam sive loquelæ defectum inferunt. Intermedium narium spatium, unacum sinibus ossium cranii, tunica valde nervosa & glandulosa, quæ pituitaria vocatur, obductum est, quæ ubi spasmo, sive acri frigore, sive ab austero humo-

humore huc delato, aut nimio pulveris tabaci usu, adstricta, non modo muci excretio cum odore impeditur, sed & gustus simul læditur. Insignis enim est saporis & odoris sympathia, utpote membrana narium posticæ ossis palati parti, quæ columellam apprehendit, appenditur, & ex pari quinto nervi ad palatum & nares etiam mittuntur. A spastica hujus membranæ strictura deducenda etiam mihi videtur ratio, quare feminæ hystericae & qui gravibus pathematibus spasmodicis affliguntur, suaveolentia, quæ penetranti agilitate stricturas intendunt, ægerrime ferre queant; adeo ut si factum fuerit, universo nervorum systemate in consensum tracto, sævissima symptomata, syncope, summa præcordiorum anxietas, spirandi angustia, in quibusdam convulsiones, proritentur.

§. XXXII.

Neque dubium est, quin membranæ, quæ medullam *In me-* in spina contentam cingunt, & ejusdem sunt structuræ, na- *dulla spi-* turæ & usus cum membranis cerebri, spastica strictura affi- *nali ac-* ciantur, idque secundum meam sententiam sapissime, maxi- *cessiones* me omnium vero in principio omnium februm, præsertim *februm.* intermittentium contingit. Nam illa per universum corpus conspicua horripilatio, refrigeratio, pororum cutis corrugatio & vasorum ejus cum pallore detumescencia, neque minus oscitatio, pandiculatio, sunt affectus nervorum, qui ex medulla spinali suam accipiunt originem. Idem quoque dolor circa primam vertebam lumborum, qui plerumque ab initio omnium motuum febrilium obviis, id adstruere videtur. Quod argumentum tamen in peculiari dissertatione, de vera motuum febrilium indole ac sede fusius prosequutus sum.

§. XXXIII.

Supereſt adhuc alia motuum præternaturalium, quæ *Tertie* morbos proxime efficiunt, species explicanda, cujus indo- *motuum* les non tantum in intensiōe & aucta fortius systole, seu *morboso-* *rum con-* *vulsio.*

contractione, sed etiam reciproca & successiva vehementiori expansione, seu dilatatione, consistit. Dicuntur hi motus convulsivi, & incipiunt in locis nervosis, sive immediate, sive per consensum valde irritatis, & demum transeunt ad musculos, etiam eos, qui voluntatis arbitrio subiecti sunt, quos dire & horribiliter saepius agitant, distorquent & e situ suo dimovent. Quod si dura mater cerebri, cuius actio & conspiratio cum membranis nerveis universi corporis, inque primis medullæ spinalis maxima, convellitur, universalis hæc est convulsio, particularis magis, si membranæ & nervi medullæ spinalis, in hoc vel illo latere, tali motu afficiuntur. Sæpe ipsa spina, vel antrorsum, vel retrorsum, horribiliter curvatur, jactatur & distorquetur, modo totum corpus flectitur, modo certi artus, manus vel pedes, hinc inde agitantur.

§. XXXIV.

Intra
corpus
palpita-
tio cor-
dis.
asthma
convul-
sivum.

Hiscæ motibus internæ quoque musculosæ & nobiliores partes obnoxie sunt. Cordis quippe palpitatio, quæ e sede sua validissime dimovetur, nonnisi convulsionis species est. Diaphragmatis succussus, quo thorax cum impetu ampliatur & rurius angustatur, cum intensiori expiratione, rectissime etiam ad convulsionem referri potest. In apoplexia, epilepsia & gravibus quibusdam capitis morbis, ipsius thoracis convulsio conspicitur, quæ cum intensiori facta respiratione, thorax vehementer diducitur & repente etiam contrahitur, lethale ut plurimum in apoplexia signum. Singultus. Quando diaphragmatis musculus convellitur, fit singultus, cuius causa ut plurimum hæret in ventriculo. Quandocumque larynx valde nervosa & tunica quæ bronchia pulmonum cingit nerveo-glandulosa, a fero acri irritantur, peëtoris etiam fit convulsio & succussio, cum vehementi conatu expectorandi, in tussi sic dicta ferina, seu convulsiva. Quamprimum fibræ nervosæ nares oblinentes ab acri quodam stimulo vellicantur, illico, ob com meatum nervi intercostalis, diaphragma per inspirationem altio rem deprimitur,

& mox

& mox spafmo remittente, violenter retractum, fortiorem expirationem, cum vehementi aëris exufflatione præstat. Quin notabile est, quod a titillatione super costas facta, diaphragma motu reciproco agitatum, cachinnos moveat.

§. XXXV.

Percommode quoque in convulsionum censum vomitu *Vomitus.* tum referre licet, qui a fortiori strictura pylori & fundi ventriculi, aucta vero nimium expansione orificii sinistri & œsophagi, perficitur. Non raro ex intestinis tenuibus, ut fit in passione iliaca, contenta vomitu rejiciuntur, quod non sine inverso motu peristaltico, qui in succedanea contractione & relaxatione consistit, fieri potest. In cholera ac diarrhea, *Cholera, diarrhea.* qua sordes mucosæ & biliosæ brevi tempore ingenti copia eji-
ciuntur, ejusmodi convulsivam affectionem, non modo intestinorum, sed & ductuum biliariorum, adesse, censendum est. Ructuum impetuosa e stomacho fortiter contracto expulsio, *Ructus.* hypochondriacis perquam frequens, eo quoque referri debet. Præmatura foetus in utero exclusio, sive abortus, nun- *Abortus*
quam sine ejus convulsione contingere potest; neque par- *& partus.* tus legitimus aliter peragitur, ita tamen, ut convulsiva agi-
tatio non tantum uterum, verum etiam partes vicinas in regione pubis & ossis sacri, tangat, & musculos quoque dorsi & abdominis in consensum trahat. Nam ejusmodi vehementes spasmos, sive constrictivos motus partium, subsequitur tandem mira orificii uteri interni dilatatio.

§. XXXVI.

Expositis sic iis morbis, quorum formalis ratio in con- *Atonia*
vulsione versatur: transeundem nunc est, ad eam affectuum *debentur.* classem, qui ex toni, seu potentia motricis, in nervosis & muscu-
lofis partibus, item in ipsis canalibus qui fluida vehunt, imbecillitate, seu nimia remissione, aut exsolutione, quam Græci atoniam, vel si gravior affectio, paralyfin, vocant, subna-
scuntur, quippe qui non levius periculum, ac priores, vitæ inten-
tant, sed certo respectu gravius. Quicunque paullo cura- *Mors*
tius ipsa,

tius ipsius mortis theoriā scrutatur, is non a vero aberrabit, si censebit, eandem in plenaria & universali resolutione, seu potius extinctione, motuum, qui in corde, arteriis, membranis & omnibus musculis vigent, consistere. Nam simul ac motus ille activus systoles cordis & arteriarum filet, vel extinguitur, protinus tota œconomia reliquorum motuum & functionum aboletur. Si systole cordis ad tempus intercipitur, syncope, quæ imaginem mortis præbet, oritur. Sub languida valdeque imbecili cordis & arteriarum pulsatione, quæ fit sæpius a metu vel magna mœstitia, vires naturæ ita exsolvuntur ac prosternuntur, ut anima, cujus operatio in sensu & cogitatione consistit, deliquium quoddam patiatur. Mors, quæ venenum assumptum sequitur, ab extincta vi motrice cordis oritur, dum illud vel narcotico quodam vapore hanc suppressit, vel ob vehementiam spasmodum, cor quassantem, fluidum, quod motum præstat, penitus dissipatur, ut ex toto desinat systole.

*Syncope.**Animi deliquium.*

§. XXXVII.

*Graves cerebri morbi.**Gutta serena.**Vertigo.**Surditas & tinnitus.*

Lubet vero sigillatius damna certarum partium ex atonia exponere. Graves illi cerebri morbi, stupor, sopor, torpor, continua ad somnum propensio, sensuum, memoriæ & ingenii abolitio, vix gigni possunt, nisi sub magna atonia & imbecillitate ac systole deperdita duræ matris, nervorum & membranarum nervosarum, si nempe fluido summæ activitatis, tenuissimo & purissimo, quod veteres spiritum animale vocant, variis de causis destituuntur. Gutta serena, sive plenaria visus obscuratio, salvo oculo, nihil aliud quam nervi optici paralyfin indicat. Sique hi nervi a vicina carotide, sanguine distenta, paullo arctius comprimuntur, vertigo fit, quæ tamen etiam a spasmo nonnunquam suam petit originem. Soluta penitus nervorum acusticorum vigore, quod vel a nimia ibi exundante humiditate, aut occalescentia fit, surditas est. Molestus ille aurium tinnitus, qui in interiori aure, intra tympanum & tubam Eustachianam, con-

continetur, a nimia humiditate membranarum, quæ offeas has partes cingunt, demum in vapores resoluta, producit. Nervi linguales, uti spasmo constricti, ita etiam paralyti re- *Aphonia.* soluti, loquelam auferunt. Nimium relaxatæ ab incumben- te sero tunica nervosæ, quæ ossa narium squamosa investi- unt, quod frequentius fit in coryza, odoris sensum auferunt. *Odoris &* Nimia muscutorum pharyngis laxitas efficit, ut difficulter *degluti-* ore ingesta deglutiantur, quod etiam fit, si tunica nervea œ- *tionis* sophagi, ab humore pituitoso nimium relaxata fuerit. Ner- *vitia.* vorum pnevmonicorum & qui ad bronchia porriguntur pa- *Catar-* ralyti, spiritum intercipit & catarrhum sic dictum suffocati- *rhui suffo-* vum infert. *catus.*

§. XXXVIII.

Inprimis nimia tunicarum nervearum ventriculi ato- *Varii* nia gravi detrimento corpus maciat; quippe hac præsentē, *ventricu-* ingesta non tantum gravativo dolore epigastri regionem pre- *li & inte-* munt, verum etiam diutius ibi hærentia & mora corrupta, *stinorum* stomachi inflationem & anorexiam caussantur. Idem evenit, *affectus.* si a tono suo admodum dejectum est intestinum duodenum, quod alter & succenturiatus quasi secundum nostram senten- tiam ventriculus & altera chyli officina; quandoquidem hu- mores ex ventriculo appulsi, moram in ejus cavo neccentes, si in corruptionem abeunt, multorum morborum causam præbent, adeo, ut sedes ac seminarium fiat multarum ægri- tudinum. Labefactatus quoque peristalticus intestinorum re- liquorum motus, flatulentias, borborygmus, murmura ac sonitus in ventre parit, qui si in acuto & periculoso morbo comparent, lethalis internæ sphacelationis indicium præbent. Sphincteris qui vesicam & anum claudit paralytica resolutio, *Urina,* involuntarium urinæ & fecum secessum affert, atque in mor- *stercorū* bis robur virium naturæ exsolutum subindicat. Laxata nimis *& sudo-* atque remissa tubulosa cutis secretoria compages, magnam *ris efflu-* imbecillitatem prodit, ac ut sudores frigidi, vel plane colli- *xus.* quativi, manent, efficit.

§. XXXIX.

§. XXXIX.

*De mor-
bis ex
aronia in
pulmoni-
bus.*

*Hepate
& liene.*

*Vasis san-
guiferis.*

Nobiliora porro viscera robore debito orbata, variis & pernicialibus morbis ortum præbent. Sic pulmones infirmati, copioso humorum affluxui & collectioni patent, unde tussis humida & copiosa, vel etiam asthma sic dictum pituitosum, quin sic allectus salforum & acrium humorum decubitus, ad abscessus, exulcerationes, vomicas ipsiusque phthitici mali generationem quam facile disponit. Hepatis & lienis viscus, propter vim motricem tonicam amissam, humorum infarctibus, vasorum obstructionibus, indurationibus quoque & scirrhescentiis obnoxium est, & hinc diræ illæ chronicæ passionis, icterus niger & flavus, cachexia, scorbutus, hydrops, incunabula trahunt. Ipsa vasa sanguifera, præsertim arteriosa, robore haud raro exuuntur, ut languente eorundem motu, sanguis difficulter cursum conficiat, spissescat, passim in alveis stagnet minimosque obstruat, & sic gignatur sic dicta plethora ad vires, foecunda morborum matrix, quæ frequentissime causam constituit morbosam in corporibus imbecillis ab alio morbo brevi liberatis.

§. XL.

*Specia-
tim vasis
hepatis.*

Et quum nullum viscus in universo corpore ægrius per copiosissima vasa sanguinem transmittat, simulque ad dejectionem toni ac roboris & hinc oriundam humorum stagnationem ac tumorum generationem, tam proclive sit, quam hepar & in feminis uterus: grave utique & frequens damnum ex iis imminet. Nimirum advehit ad hepar sanguinem vena sic dicta portæ, quæ, si robur obtusum est, minus expedite ac promte sanguinem per hoc mere vasculosum viscus trajicere & propellere valet, sed cruor regurgitat ad illas partes illaque viscera, quibus vena hæc propagines suas inferit, stomachum puto, omentum, pancreas, lienem ac totum intestinorum volumen, & propter stases atque stagnationes parit ibi dolores, spasmos, flatus, obstructiones, indurationes, corruptiones, abscessus, hæmorrhagias, aliasque

que timoris & periculi plenas passiones. Uterus vero mille *Et uteri.*
 ærumnarum, juxta *Hippocratem*, mulieribus auctor, si copio-
 sissimi tortuoso ductu per ejus compagem discurrentes cana-
 les, ob remissum robur sanguini trudendo non sufficiunt, is
 pariter relabitur ad vasa hypogastrica arteriosa & ad viscera
 abdominis reliqua, unde non secus ac in nobiliori sexu pathe-
 mata sic dicta spasmodico-hypochondriaca, in feminis hyste-
 rica dicta, suboriuntur. Ipsa quoque uteri vasculosa substan-
 tia, stagnante sero ac sanguine farta, immodicum mensium aut
 feri mucidi profluvium, abortum & sterilitatem, tumores ingentis
 magnitudinis, carcinomata, quin in ipso cavo, varias con-
 cretiones carneas, quæ molarum nomine notæ, contrahit.

§. XLI.

In tubuloso renum colatorio, debito robore destituto, *In reni-*
 ferum a sanguine effuse secedit & diabetes nascitur, qua plus *bu.*
 urinæ redditur, quam liquidum assumtum. Ex eodem etiam
 fonte, destructo nempe renum tono, calculi renalis petenda
 est generatio. Quod si enim transitus sanguinis per vasa e-
 mulgentia languida tarde & difficulter succedit, retardatur
 simul excretio urinosi liquoris, qui in tubulis urinariis prope
 pelvim subsistens, dimittit crassam, tartaream & mucidam
 materiam, successive in calculos concrementem. Pariter si *Et vesica.*
 vesica enervis, vi, ut ita loquar, expultrice privata, uri-
 nam non reddit, hæc retenta, mora illa crassum ponit ac mu-
 cidum sedimentum, quod sensim solidescens, calculo gene-
 rando ansam præbet. Insuper hebetata vesicularum & vaso-*Vasisque*
 rum seminalium contractilitas, in causâ est, ut lymphaticus *seminalis*
 & seminalis liquor copiosius in oculis colligatur, ac demum *libus.*
 nimium congestus, per pollutionem nocturnam, immo ipsam
 benignam gonorrhæam, sponte exstillet.

§. XLII.

Denique etiam membranæ & nervi spinalis medullæ, *In mem-*
 variis de causis sæpe penitus a tono ac robore dejiciuntur, *branis*
 quod, si in uno latere accidit, hemiplexia, sive paralyfis sit, *spinalis*

(III.)

L

dex-medulla.

dextri, vel sinistri lateris, sub qua sensu & motu orbantur partes lateris, ad quas nervi ex spina feruntur. Si autem non in ipsa spinali medulla, sed extra eam discurrentes nervi ac membranæ nervosæ artuum, v. c. brachiorum & pedum, obtunduntur, motus affectæ partis remanente quodammodo sensatione, exspirat, & affectus vocari solet pareisis.

§. XLIII.

*Atonia
spasmo
deterior,*

Quum itaque omnes omnino morbi ad motus, nimium vel intensos, vel debiles atque remissos, ortum referant, ita quidem, ut hi chronicas & rebelles, illi autem acutas & celeres magis passiones invehant; quæstio nunc disquisitione haud indigna incidit: spasmus, an atonia partium sit deterior & negotio vitali magis infensa? Nos ingenue & libere profiteamur: atoniam esse peioris indolis ad sanitatem cum vita subruendam, quam spasmus. Nam licet ipse spasmus atroces dolores, ingentes molestias atque anxietates pariat; sæpius tamen per accidens utilissimum effectum præstat, dum motu solidorum & fluidorum aucto, causæ morbificæ, ex qua ipse pullulat, submovendæ inservit, stases, stagnationes & infarctus dissolvendo, & humores vitiosos, temperie & quantitate peccantes, exturbando, ut hoc facto, morbus ipse feliciter solvatur atque discedat. Deinde longe facilius est, motus excedentes impetuosos componere ac sedare, quam deficientes plane revocare & excitare; quandoquidem atoniæ ea est ratio, ut exhaustis naturæ viribus, sanguine nempe & succo nerveo consumtis, subnascatur, quorum jactura non tam promte refarcienda. Debilitas quoque, five vis motricis in partibus languor, causa plerumque est sanguinis in certo loco congestionis, stasis, stagnationis, corruptionis, immo viscerum infarctus, e quibus postea, ceu proximis causis, febres, spasmi & præternaturales motus succrescunt, vel denuo repetunt ac recidunt. Neque etiam ullus morbus ullumque symptoma gignitur, nisi præcedat

exi-

eximia generis nervosi infirmitas, aut nobiliorum partium atonia, sive hæc in ventriculo, intestinis, systemate vasorum mesaraicorum, membranis cerebri aut medullæ spinalis, sive etiam ipsis excretoriis, consistat; quo etiam fit, ut roborantia & balsamica medicamina, languidam partium facultatem refocillantia, ad morbos arcendos efficacissima sint præsidia.

§. XLIV.

Porro, qui motus microcosmicos eorumque indolem *Spasmus* attentius expendit, compertum habet: spasmodum, qui trucu- *atoniæ.* lenter in morbis torquet & exagitat corporis partes, in iisdem *hac illum,* semper motus impotentiam, sive imbecillitatem, relinquere, *ingignit.* & hanc plerumque causam esse repetentis denuo paroxysmi. Atroces dolores excipit demum partium affectarum intumescencia, inflammationem acutam, sphacelatio, quæ summus atoniæ gradus. Vehementem illam in febrium insultibus externarum partium stricturam, in declinatione magna cutis relaxatio cum sudore copioso sequitur, æstum antea intensum, cutis refrigeratio, pulsus celerem ac durum, die vacuo tardus ac molliter undulans. Convulsivi truculenti motus, artibus quos exagitarunt, ingentem post imbecillitatem atque languorem conciliant. Ipse quoque observavi, post vomitiones & dejectiones alvi creberrimas, immo validiorem purgantium operationem, alvum claudi & ventriculi atque intestinorum robur mirum atteri, quod potissimum uber flatuum proventus testatur. Ut adeo perpetua hæc sit microcosmica lex, in pathologicis studiose inprimis observanda: quod spasmus relinquat atoniam, & atonia vicissim spasmis ingignendis velificetur.

§. XLV.

Monendum tamen est: quod tam imbecillitas, quæ *De morbis* auctore *Celso*, omnibus morbis patet, quam ipse spasmus, *atatum* certis ætatibus, ratione partium quas afficit, certis quoque *ex hoc* ratione structuræ corporibus, magis vel minus solennis at- *fonte de-* que *rivandis.*

que familiaris sit. Enimvero historia medica experientiae innixa testatur: atoniam & infirmitatem capitis & quae ad illud pertinent partium, infantibus & pueris esse frequentissimam, ac inde veram morborum, quae teneriorem aetatem infestant & capiti plerumque incumbunt, derivandam esse originem. Hanc enim saepius achoribus, tinea capitis, aurium & oculorum defluxionibus, glandularum tumoribus, coryza, narium stillicidiis, sanguinolentis & mucosis, epilepsia quoque corripi, res est inter omnes notissima. Currente juvenili & prima virili aetate, spasmodica stricturae in praecordiis ac pectore, in universum quoque motus solidorum & fluidorum intensiores, frequentius conspiciuntur. Hinc enim est, quod juvenes ac viri ad inflammationes pulmonum, pleuritidem veram ac spuriam, peripneumoniam, haemoptysin, phthisin, hecticam, asthma, inflationes ventriculi & affectum hypochondriacum, qui in praecordiis maxime sedem obtinet, imo ad febres ardentes biliosas, tertianas & continuas, admodum sint proclives & crebrius iisdem tententur. In adultioribus tandem, debilitas & atonia inferiores in imo ventres partes magis corripit. Et hanc ob causam aetate ingravescente, morbi, qui in abdomine sedem & originem habent, quam maxime affligunt, quorum in numero sunt renum & vesicae calculus, colica, diarrhoea, cachexia, hydrops, scorbutus, mictus cruentus, fluxus haemorrhoidum nimius, tumores pedum oedematosi, atrophia, anorexia & stranguria, infesta senibus pathemata.

§. XLVI.

*Omnes
igitur
morbi
sunt ge-
neris ner-
vosi affe-
ctiones.*

Ex hisce autem omnibus uberius haecenus excussis, perquam dilucide apparere arbitror: quod solus spasmus & simplex atonia, aequabilem, liberum ac proportionatum sanguinis omnisque generis fluidorum motum, quo excretionum successus & integritas functionum animi & corporis proxime nititur, turbando ac pervertendo, universam vitalem oeconomiam subruant ac destruant, quod hinc universa pathologia

lon-

longe rectius atque facilius ex vitio motuum microcosmicos in solidis, quam ex variis affectionibus vitiosorum humorum, deduci atque explicari possit, adeoque omnis generis ægritudines internæ, ad præternaturales generis nervosi affectiones sint referendæ. Etenim læsis quocunque modo vel nervis per corpus discurrentibus, vel membranosis quibusvis ac nervosis partibus, illico motuum anomalix, modo leviores, modo graviores, subsequuntur. Deinde attenta observatio docet, motus quosvis morbosos, principaliter sedem figere & tyrannidem exercere in nervosis corporis partibus, cujus generis præter omnes canales, qui systaltico & diastaltico motu pollentes, contentos succos trudent, universum nimirum intestinorum & ventriculi ab œsophago ad anum canalem, totum systema vasorum arteriosorum, ductuum biliariorum, salivalium, urinariorum & subcutaneorum, sunt quoque membranæ nerveo-musculares cerebri & medullæ spinalis, præsertim hæc, quæ dura mater vocatur, organis sensoriiis obductæ, nec non tunica illæ ac ligamenta, quæ ossa cingunt artusque firmant. Nam nullus dolor, nulla inflammatio, nullus spasmus, nulla motus & sensus impotentia, nulla febris, aut humoris ullius excretio, accidit, in qua non hæ partes patiantur. Porro etiam omnes, quæ morbos gignunt causæ, operationem suam potissimum perficiunt in partes motu & sensu præditas, & canales ex his coagmentatos, eorum motum, & cum hoc fluidorum cursum, pervertendo; ita tamen, ut sicuti variæ indolis sunt, sic etiam varie in nerveas partes agant iisdemque noxam affricent. Demum omnia quoque eximiæ virtutis medicamenta, non tam in partes fluidas, earum crasin ac intemperiem corrigendo, quam potius solidas & nervosas, earundem motus alterando ac moderando, suam edunt operationem: de quibus tamen omnibus, in vulgari usque eo recepta morborum doctrina, altum est silentium.

CAPVT V.
DE
CONSENSV PARTIVM NER-
VOSARVM GENERATIM ET SIGILLA-
TIM CVM VENTRICVLO, PRÆCIPVA PAS-
SIONVM ET SYMPTOMATVM
ORIGINE.

§. I.

*Tracta-
tionis
ratio.*

OMnis generis morbos & præternaturales motus ad duo genera, spasmus nempe & atoniam, referri posse, & generis nervosi maxime esse affectiones, superiori capite succincte & distincte docuimus: jam sequitur, ut consensum, sive potius mutuam illam conspirationem & communicationem motuum vitiosorum, quam partes nervosæ, motu ac sensu exquisito gaudentes, inter se alunt, tradamus, ac imprimis quam singularis ventriculo, cum nervosis universi corporis partibus, sympathia intercedat, edisseramus; exposituri simul, quod non modo omnes quæ motus præternaturales cient causæ, sed & medicamenta, proxime nervosas partes, & maxime ventriculum cum intestinis, virtute sua ac operatione afficiant. Et hac demum ratione fiet, ut genealogia multarum passionum & symptomatum in morbis, quæ eo usque abstrusa admodum atque incognita fuit, ipsorum quoque remediorum effectus ac operandi modus, clarius innotescant & perspiciantur.

§. II.

*Partes in
corpore
tanquam
machina
connexæ.*

Videlicet corpus nostrum esse machinam, & artificio & usu omnibus aliis, quæ ab humana arte proficisci possunt, longe superiorem & perfectiorem, dudum quidem sagacissimi Medicorum agnoverunt; non tamen facile firmius ad idem

idem demonstrandum suppetit argumentum, quam exquisita illa mutua connexio & coordinatio, inque eundem finem conspiratio partium, quæ undiquaque in universa compage conspicitur. Hinc etiam est, quod unius partis vitium, aut læsio, mox, ob arctum hunc nexum, in alias transeat, ut inde omnes machinæ motus inordinati fiant, vel sensibilem turbationem patiantur: haud recus ac videmus, læso vel unico rotulæ dente in machinis artificialibus, protinus earum motus inde reddi inordinatos.

§. III.

Sicuti vero omnis machina tantummodo eum in *fi-Ex par-*
nem constructa est, ut ex sua structura convenientes edat *motum*
tus: ita animadvertimus, corporis nostri structuram, *ma-structura*
xime esse hydraulicam & vasculotiam, quo fluida *motus.* diversi
generis jugi & continuo motu, vi & potentia motrice, non
modo cordis atque arteriarum, expansiva & contractoria,
sed & aiorum ductuum secretoriorum & excretoriorum, per
diversissimæ amplitudinis tubulos circulari in orbem motu fe-
rantur, & variæ indolis humores, pro diametro & directio-
ne canalium, & secernantur, & excernantur. Animad-
vertimus porro machinam corporis nostri ex meris fibris ac
membranis nervosis elasticis, contractilibus & expansilibus,
esse contextam, atque in iis ipsis motus quosdam tensivos,
tremulos, oscillatorios celebrari, qui tam motibus vitalibus
secundandis, quam ad offerendam materiam principio, quod
in animantibus est, sentiendi ac percipiendi, serviunt. Et *Et nexu*
quia præterea totum systema nervorum & membranarum *co-consen-*
hæret ac mirifice inter se connexum est, non aliter fit, quam *sus.*
in chordis tentis, ut fibrilla una pulsa, altera quoque movea-
tur, in quo quidem mutua illa conspiratio fibrarum & mem-
branarum, qua motus vitiatos & præternaturales invicem
communicant, consistit.

§. IV.

S. IV.

*Partes
specia-
tim con-
sentien-
tes.*

Atque hæc harmonia ac sympathia partium nervosarum, maximi momenti & usus est in pathologicis, adeo, ut sine ejusdem accurata notitia, plurima, quæ in morbis accidunt symptomata, quomodo producantur, vix ac ne vix quidem explicari possit. Quapropter merito dolendum esse arbitror, quod hæc doctrina in libris medicis huc usque partim minus recte pertractata, partim etiam penitus neglecta & prætermissa sit. Operæ hinc pretium utique fore ducō, si tam utile argumentum pervestigatius paullo & subtilius in præsentī disquisitione agitem atque expendam. Prius vero quam id exsequar, ante omnia in genere tenendum est: quod partes nervoso-membranaceæ, inter quas ejusmodi consensus quam maxime viget, sint primo membranæ cerebri & spinalis medullæ, deinde membranæ nerveæ, quæ organa sensuum, oculos, aures, nares, ora & fauces interius investiant, ac porro membranæ, quæ omnis generis ossa succingunt, caput, dentes, articulos ipsosque musculos. Tum quoque totus ille canalis, qui a pharynge ad anum usque elongatur, ac œsophagum, ventriculum totumque intestinorum volumen conficit, & mere nervosus ac membranaceus est, conspectius consentit. Idem præterea consensus in universo systemate ductuum biliariorum, urinariorum cum vesica, & qui glandulas constituunt ac ex iisdem liquorem secretum devehunt, & denique in ipsa cute, quæ ex meris fibris tendinosis & nerveis contexta est, per omnem corporis ambitum, observatur atque succedit. Omnium itaque & singularum harum partium mira invicem est connexio, conspiratio, sympathia & motuum quoque ac læsionum communicatio, quando a causâ quadam violenta, sive subtiliori, sive crassiori, gravius afficiuntur.

S. V.

*Omnis
sympa-
thia par-
tium a
nervis.*

Quemadmodum vero nobiles hæc partes motum, sensum atque actionem suam, a nervis eorumque propaginibus for-

fortiuntur, licet emergentes inde singularum functiones mirum differant; ita plurimum utique refert, nervorum conjugationes ac distributiones ramulorum, a quibus singulae partes animantur atque moventur, probe pernoscere, quo vitiosorum organis ab iisdem impressorum motuum origines rite patefiant. Recte enim jam cel. *Ettmullerus*, ex hoc fonte partium sympathiam derivavit dum *opp. Tem. II. pag. 36.* ita scribit: *consistit ergo consensus partium in connexionem unius cum altera, quae triplici imprimis solet fieri ratione, ita quidem, ut omnis proprie dictus consensus fiat ratione saltem nervorum. Consentiunt nempe partes nervae triplici modo: primo, quatenus fibrae nervae sunt continuæ, qua ratione imminente vomitu, tremu labium inferius: vel secundo, quatenus sunt contiguae, quarum ratione calculus vesicae subinde stimulum infert alvi & tenesmus excitat, quia collum vesicae & intestinum rectum invicem incumbunt, sic affecto orificio stomachi, sequitur singultus. Tertio, consensus partium fit ratione connexionis mediantibus funiculis nerveis; qua ratione consentiunt renes, urethrae & intestina, stomachus & caput.*

§. VI.

Inprimis tamen necessarium est, exacte cognitae habere illas nervorum conjugationes & propagines, quae ex *Inprimis* cerebri inferiori substantia oriuntur, & extra calvariam de- *a quinto* latae, ad internas partes corporis abeunt; siquidem per has, *& octavo pari.* & partes inter se, & omnes ac singulae cum cerebro ejusque membranis, consensu fruuntur. Sunt vero haec paria solenniora & notabiliora, quae ex cerebro ad partes feruntur, duo, quantum videlicet & octavum. Et quia intercostale ex ramis quinti paris & ramo sexti, item octavi paris, originem suam sumit, & cum pari octavo quoque intra cavum thoracis & abdominis plurimum conjungitur, & ramis ex spinali medulla, intra costarum spatium prodeuntibus, increfcit, & hoc ipsum demum fere ad omnes corporis partes,

tes, quo motum, robur ac sensum accipiant, defertur, id eo ob hunc nervum diffusissimum maxima fit partium inter se & cum capite consensio atque motuum communicatio. Quia vero ut omnium, sic etiam horum nervorum, descriptionem nemo accuratius & excellentius persequutus est ipso *Vieussen*: nolumus eam repetere, sed ingenuum lectorem ad hujus *Neurographiam*, pro perspicienda & intelligenda varia nervorum distributione, remittimus. Nobis vero jam satis erit ostendere, quomodo per hos dictos nervos partes inter se consentiant, & unius læsio in alias transmigret, variaque symptomata inde progenerentur.

§. VII.

Ad consensum
evolvendum
sufficit maxima
nervorum
sensibilitas:

Ut autem hæc omnia, quomodo peragantur, & quaratione præter naturam affecti nervi tantas mutationes, etiam non sine exitio & periculo vitæ ac sanitatis efficiant, intelligi possint: nequitiam nobis opus est, in subsidium principium quoddam incorporeum, singulari sensu & notitia rerum, quæ corpori insunt & in eo fiunt, instructum, vocare, quia ejusmodi principio ad vitale negotium plane non indigemus, utpote quum non sensus, sed motus tantum, ad producenda symptomata morbosa satis sit. Neque disputare hic nostri instituti erit, quod & quale liquidum in nervis vehatur, & quomodo ejus motus a causis morbificis præter naturam afficiatur, sed suffecerit saltem nosse, omnes motus vitales cum secretionibus & excretionibus, naturales, placidos & ordinatos esse, si in nervorum ac membranarum systemate omnia tranquilla & pacata sunt: id est, si nullam vim patiuntur, neque ulla, quæcunque etiam fuerit, violenta motio ipsis inducitur. In genere enim hæc regula perpetuo ac probe, in rationali morborum explicatione, observanda est: nullam vim vel motum tolerare posse nervos, & quæ ex iis prodeunt partes membranosas. Simul ac enim hæc a causa quadam vehementer commoventur, concutiuntur, vel distenduntur, aut comprimuntur, lancinantur,

tur,

tur, punguntur & trahuntur, protinus ratione sensus dolor, ratione motus contractio, crispatura, strictura & partium vicinarum, præsertim vasorum, compressio præsto est: unde magnæ in circuitu sanguinis & humorum æquabili turbæ atque anomalix exoriuntur.

§. VIII.

Sola perversa & minus rationalis cogitatio & impressio, quæ sub animi quodam impetu fit, quæ & directe & proxime nervosas invadit partes, ingentes turbas in tota oeconomia motuum vitalium & animalium excitat. Scindum autem est, vim perversæ cogitationis & impressionis nihil quidem corporei esse; attamen, simulac influit in corpus & nervosas partes præter naturam exagitat, meros effectus corporeos, videlicet vel partium vehementem stricturam, contractionem, aut earum resolutionem, laxitatem & flacciditatem producit. Quare etiam ea remedia, quæ spasmodice contractos nervos molliunt, leniunt & efferos motus sedant, perquam feliciter acerbis illis symptomatibus, quæ animi impetuosior quidam motus concitat, opponuntur. Eum vero in finem hæc adduximus, ut addiscamus, ab animi motu, ceu ideali atque incorporeo tantum actu, universum genus nervorum ita affici & commoveri posse, ut omnium partium munera inde labem contrahant & periclitentur.

§. IX.

Deinceps quanta læsio & perniciēs toti corpori accedat ex gravi percussione capitis & cerebri, ac principium nervorum inde facta sola commotione, salva partium internarum textura, sensuum abolitio cum corporis lapsu in terram, nausea, vomitus, omnium virium simul & semel facta convulsio, satis abundeque declarant. Et quod magis mirandum est, sola commotione corporis & capitis externa, in sano homine, confestim acerba symptomata produci possunt, cujus rei exemplum navigationis insueti præbent, quos

navi maris fluctibus jactata, vel in gyrum circumacta, vertigo, nausea, enormis vomitio cum summa anxietate, pallor faciei, virium languor, appetitus prostratio, fatis misere excruciare solent, quæ morborum ærumnæ vix ullam aliam agnoscunt causam, quam quod nervorum in capite principium insolito motu agitetur & commoveatur.

§. X.

*Minimæ
molis
materiis.*

Igitur minimæ molis sapius materia & levissima causa, modo in nervosis partibus insolentem quandam motionem vel agitationem excitare possit, magnis præter naturam motibus provocandis apta est. Fumus tabaci, etiam non adeo magna quantitate ore haustus, quas non ingentes anxietates cum sudore frigido, faciei pallore, vomitione, nausea ad animi ferre usque defectionem, in insuetis producit. Effluvia stupendæ quanquam sunt exiguitatis, quæ ex suaveolentibus, moscho, zibetho & floribus jasmini exhalant; attamen tanta efficacia pollent, ut feminam, cujus nervi enormibus anomalis contractionibus assueti sunt, id est, quæ secundum veterum loquendi modum sensibillissimæ est indolis, vehementissime affligant, syncopen inferendo, usum vitæ ad tempus suspendant, corpus humi prosternant, vel graves anxias & suffocatorias pectoris oppressiones & spirandi angustias concitent, quæ aspectu horrenda symptomata, foetido naribus admoto vapore, ex tempore & miraculi instar sisti possunt, eam videlicet ob rationem, quod exhalationes tenuissimæ sulphureæ, intimæ ad nervosas partes sint admissionis, & contrarium suaveolentibus effectum, nempe sedativum, in iis exserant. Etenim quando vapor, odore per nares susceptus, nervorum ramulos, ex quinta conjugatione prodeuntes, præter naturam afficit, protinus hujus insoliti motus communicatio, mediante pari intercostali & octavo, transit ad fauces atque ventriculum, cor & pulmones, unde horum symptomatum ratio petenda est.

§. XI.

§. XI.

Simili ratione quando subtilissime caustica materia, *Aliisque* sive venenata, in cute sauciata nerveæ fibrillæ interius tan-*tenuissi-* guntur, quod fit, si cum punctura vel moriu virus sese altius *mis cau-* insinuat, in morfu viperæ, scorpionum, canis rabidi, vel *sticis.* instrumento, succo hellebori albi, oleo tabaci, aut linimento, quod arsenicum ingreditur, imbuto, in quas non horribiles universum systema nervorum commotiones & spasticas stricturas conjicitur? unde acerbissimorum, maxima ex parte lethalium symptomatum, origo. Febris enim, syncope, sudor frigidus, faciei pallor, vomitus, nausea, flavus color faciei, artuum convulsio, mentis emotio, alvi pertinax contractio, urinæ suppressio, summa anxietas, inquietudo, spirandi angustia, nonnisi affectus sunt præter naturam & supra modum generis nervosi commoti, quibus gravissimis & funesti certo effectus afflictionibus, non alia ratione, nisi maturatione, & statim inter initia, antequam motuum vitalium œconomia prorsus destructa fuerit, medicina, eaque specifica, succurrere licet. Nam, si unquam tantopere a Medicis collaudata specifica locum inveniunt; certe tunc opem conferunt præstantissimam, ubi genus nervosum ex minina, virulenta tamen causa, in pessimos, vitæ inimicos motus & contractiones abreptum fuerit; si videlicet contrariæ indolis materia, eas maturiori exhibitione cita ope compefcunt. Quam gravia & funesta symptomata post medicamentorum septicorum, ut est arsenicum, factam partibus tendinosæ & nerveis exterius tantum applicationem sequantur, legi mereatur *obs. 80. Cent. VI. Hildani*, qui refert: virum robustum, qui tumore cancroso laboravit & cui Chirurgus pulverem ex arsenico applicuit, mox in dolorem vehementem, vigiliam, febrem ardentem & continuum cibi fastidium ac vomitum incidisse, & tandem delirio & syncope exorta, intra paucos dies mortuum esse.

§. XII.

*Magis
commo-
ventur
nervi a
crassiori-
bus mate-
riis.*

*Ut pun-
ctura
tendinū.*

*Clavo
exciso.*

*Spina &
festuca.*

Multo magis a solido & rigido corpore, quodcumque nervi portio læditur, acerbæ & gravia in toto corpore visuntur symptomata. Ita tenuissima acu vel lanceola, ex purissimo chalybe confecta, quando in ferienda vena improprie læditur substratus nervus vel tendo, in corpore etiam exquisite sano, dolor, tumor durus, partis inflammatio, cum horrore, febre, vigilia, & quandoque, nisi cito succurramus, sphacelus & mors consequitur. Qualia tristia exempla complura sæpius, non sine dolore, in praxi conspiciuntur. Neque tantum Chirurgi, qui læsionem inferendo primam occasionem malis subministrant, sed & ipsi maxime Medici, qui progredienti malo commoda medicina, quæ tantummodo in principio in unico emolliente consistit, non satis dextre & mature occurrunt, inculpandi sunt. Anni jam aliquot exacti sunt, ubi juvenis, medicinæ culturæ addictus, subito febre, cum siti, vigilia, summa anxietate levique delirio corripiebatur; quæ quum per sex dies durassent, in consilium vocor, inquisivi in causam, edixit: bene se sanum & valentem fuisse, simulac vero cuspis cultelli scriptorii, de mensa forte delapsi, inciderit in dorsum pedis, ingentem dolorem ibi fuisse excitatum, & ab eo tempore graviter se laborasse. Locus affectus erat durus, tumidus & bruni coloris; applicuimus cataplasma emolliens ex floribus emollientibus, croco etiam, in lacte decoctum, insuper dedimus emulsionem papaveraceam, cum pulveribus bezoardicis, quo facto, mox omnia symptomata interitum minitantiæ ex toto conquieverunt. Quam infeliciter pedum clavi, in senio præsertim confectis & scorbuticis corporibus, non raro excindantur, tristissimis exemplis ac historiis indies ferre edocemur. Tendinibus enim cum supersedeant clavi; hinc quo altius adigitur cultelli cuspis, eo facilius fit, ut tendo subjectus pungatur, unde exitialis, ob sphacelum exorientem, corporis ruina pendet. Spina vel levis festuca membrano-

branosis, vel tendinosis locis altius, v. g. infra ungues, infixa, brevi etiam in sano homine, similibus generis symptomata, dolorem, tumorem, ruborem, partis pulsationem & febrem, cum siti & vigilia parit. *Hildanus Cent. V. obs. 2.* complura exempla proponit, ubi a punctione spinæ in pede vel in digito manus tacta, dolor maximus, inflammatio, febris, delirium & sphacelus obortus fuit. Non ita pridem a caustico, ad excitandum fonticulum, in loco incongruo improvide posito, in honoratiori femina ingentem totius brachii tumorem doloremque usque ad humeros & pectus pertingentem, cum febricula notavimus; ubi tamen mox externis & internis convenientibus auxiliis, divina sub Numinis gratia, suppetias tulimus. Quod vero sphacelus, inprimis in extrema ætate & scorbutico corpore, tam facile nervosis partibus, præsertim extremis membranis, insideat, id non tantum propter nervorum læsionem fit, verum quod exinde membranæ nervæ constringantur, & interpositis numerosis venis & arteriis sanguis immotus detineatur, qui in sphacelosam corruptionem quam facile ruit.

§. XIII.

Quam gravia ex punctura vesparum, præsertim in *punctura* locis membranosis & tendinosis, ut sunt carpi manuum, *vespa.* tempora capitis, juncturæ artuum, pathemata suboriantur, compluribus observationibus, hinc inde in Medicorum clarissimorum monumentis annotatis, edocemur. Inter has notabilis est ea, quam in medium producit *Hildanus Obs. 87. Cent. IV.* ubi femina a vespa punctiorem circa carpum sinistrum accepit, & protinus ingens dolor in loco affecto, cum lipothymia, exortus est, qui ab initio manum quidem & carpum solum occupavit, mox tamen per totum corpus expansus, acerbior factus est, quin eodem die etiam vesicæ, seroso & pellucido humore repletæ, effluerunt; convaluit tamen, inunctione facta ex oleo scorpionum. Et *observatione 80. l. c.* refert: juvenem robustum & plethoricum, a *vespa*

*Aliisque
levibus
caussis.*

*Et inde
universum
systema
patitur.*

vespa in dextrum faciei latus, haud procul a minori cantho oculi, punctum fuisse, ubi ingens dolor & inflammatio cum gangræna faciei sequuta est. Idem laudatus auctor *Cent. V. obs. 25.* refert historiam puellæ, cui Empyricus liquorem in aures instillavit, incredibili dolore postea, febre, vigilia & dolore subsequenter. Et *Cent. I. obs. 4.* memorat exemplum puellæ, cui in concavum auris globulus vitreus instar pili illapsus est, quo facto, mira symptomata successerunt, tota pars illa capitis usque ad futuram nocte dieque doluit, accesserunt etiam sinistro brachio stupores usque ad digitos, pollicem & indicem, progredientes ad lumbos usque, tibiam & pedem, tussicula sicca assidua affuit, menstrua suppressa sunt, accesserunt epilepticæ convulsiones & ipsum brachium in atrophiam incidit: quæ cuncta acerba pathemata, feliciter extracto globulo, simul & semel conquieverunt. Hæ adductæ observationes satis abundeque id confirmant, læsiones nervosarum partium, quæcunque & ex quacunque etiam causa exortæ fuerint, propter communicationem, quam nervorum propagines inter se habent, mirifice functiones partium etiam dissitarum lædere & conturbare posse.

§. XIV.

*Ejusdem
indolis
sunt interna
nervose
partes.*

Quod quidem quemadmodum in læsionibus partium nervosarum externarum in propatulo est; ita idem gravius affectis internis exquisitè sentientibus partibus contingit, ut plane mirandum sit, quam horrenda symptomata exinde subsequi soleant. Insigne hac de re exemplum prodidit idem laudatus *Hildanus Cent. I. obs. 34.* ubi aciculam grandiusculam forte quæpiam deglutivit, ex quo non ita multo post in fundo ventriculi & circa pylorum exortus est tam intollerabilis dolor, ut dies noctesque exclamare & ululare coacta fuerit. Sexto die a morbo phrenitica facta est, cum ardentissima febre, lingua arida, vultu inflammato, ut neminem agnosceret, nec cibum nec potum exposceret. Convulsiones colli, brachiorum & crurum maximæ & horrendæ

ad-

aderant. Aliquando sese ex una in alteram partem lecti tali impetu projiciebat, ut tres viri, quantumvis robusti, vix illam tenere possent, mox tanquam semimortua jacebat, rursus tamen & repente priora symptomata revertebantur. Huic tam graviter afflictæ, *Hildanus*, optimo consilio, nihil nisi oleola & juscula præcepit. Et quum aciculam tandem egressisset, pristinae sanitati paullo post restituta est.

§. XV.

Utut vero consensus & mutua motuum communi-
 catio inter omnis generis partes, quæ nervosæ sunt texturæ
 ipsisque nervis dotantur, perpetua sit, ac imprimis in acutis
 passionibus elucescat: attamen nulla pars in universo corpore
 est, quæ tam conspicuam ac intimam cum omnibus & singulis
 nervosis corporis locis & organis harmoniam ac sympathiam
 alat, quam ipse ventriculus, adeo, ut si ulla pars, quæ ex-
 quisitæ sensationis est, etiam longius dissita, præter naturam
 afficiatur ac moveatur, statim etiam stomachus inde luat &
 compatiatur. Inde etiam patet ratio, quare in omnibus fere
 morbis, actio ventriculi, quæ revera est systematica, vide-
 licet appetentia, digestio, chylicatio, vacillet, ac attenta
 observatio medico-practica doceat, quod ventriculo male
 habente, vel gravius læso, a quacunque etiam causa id fiat,
 protinus universum nervosarum partium systema inde offenda-
 tur, quo procul dubio permotus fuit acutissimus ille *Helmon-*
tius, ut animæ sensitivæ sedem in ventriculo collocaverit. Et
 profecto, res est maximi momenti & subtilioris indaginis,
 quod nonnulli, percusso fortius, pugno vel duro alio instru-
 mento, exterius cordis scrobiculo, sub quo pylorus recondi-
 tur, cito ac insperato perierint, inventa post mortem nulla
 læsionis mortiferæ nota, sed macula tantum ex flavo rubra,
 circa extremitatem diaphragmatis & inferiorem ventriculi par-
 tem, quales casus, ambigentibus de lethali-tate Medicis, ali-
 quoties ordini nostro ad decidendum oblati.

§. XVI.

*Quod te-
statur ve-
norum
operatio.*

Nihil vero clarius & manifestius ventriculi cum omnibus corporis nervosis ac sensibilibus partibus conspici rationem demonstrat, quam actio veneni, e vegetabilium, vel mineralium censu desumpti, spiculis acerrimis, causticis, tenuissimis ventriculi & intestinorum tunicas nerveas intime penetrantis, lancinantis ac arrodentis, cujus generis maxime sunt arsenicum, & quæ ex mercurio ac regulina antimonii substantia prodeunt corrosiva, cicuta aquatica, fungorum varia genera, ipsa quoque purgantia, quæ non alio modo necant, quam per fortissimas spasticas universi generis nervosi contractiones. Inde enim cardialgia, inanis vomendi conatus, singultus, præcordiorum anxietas, spirandi angustia, constrictio diaphragmatis, linguæ ac faucium ariditas, fitis inexhausta, alvi suppressio, flatuum retentio, diarrhæa torminosa, perpetuus ad urinam emittendam stimulus, extremorum refrigeratio, sudor frigidus, facies sic dicta Hippocratica, artuum tremor, pulsus intermittens & suppressus, delirium, animi deliquium, epilepsia, convulsio, inquieta corporis agitatio, quæ ordinaria sunt veneni assumpti symptomata, atque ab arrosione tunicarum ventriculi fiunt. Et tametsi in iis, qui veneno corrosivo necantur, ventriculi & intestinorum inflammatio ac sphacelatio semper post mortem conspiciatur; hæc tamen nequiquam tantorum symptomatum & tam celeris mortis causa est, sed potius horrendi illi per totum genus nervosum propagati spasmi, quorum consequens in intestinis & ventriculo consistens inflammatio est, feralem vitæ catastropham inferunt. Nam spasmo veluti forti vinculo coarctatis ventriculi venis & arteriis, sanguis immotus hæret, regredi nescit inque corruptionem transit. Ex quo jam facile intelligi potest, quare non præsentius & certius adversus corrosiva venena sit præsidium, quam in copioso lactis, oleosorum atque emollientium usu, quæ non modo ob id mortem avertunt, quod tenuissi-

nuissima veneni spicula obtundant, atque contextu suo oleoso viscoso involvant, sed & quia ad constrictas nervosas partes relaxandas, vix ullus melius quam in hisce est auxilium. De quibus autem omnibus meretur certe evolvi *Wepferi*, Medicorum & Anatomicorum peritissimi, doctissimus libellus *de cicuta aquatica*, qui varia experimenta cum venenis, emeticis & purgantibus, animantibus eadem ingerendo, instituit, & quæ ea sequuta sunt symptomata, nec non internas quæ post mortem deprehendit læsiones, curate notavit & consignavit.

§. XVII.

Ipse mercurialia, sicuti dextre præparata & prudenter *Mercu-* adhibita, usus sunt longe præstantissimi; ita vicissim minus *rialium* recte parata & præpostere exigua etiam dosi propinata, uni- *praposte-* versum corpus gravissimo damno afficiunt. Memini præ aliis, *re dato-* Chymicum quendam Empiricum ante aliquot annos jactitasse, *rum no-* se incomparabilem adversus podagram possidere medicinam, *xa.* tam præsentaneæ virtutis, ut tribus tantum granis, tertia quavis hora assumtis, omnes omnino dolores, intra XXIV. horas, ad miraculum usque abigeret. Permotus hac gloriatione generosissimus quidam vir, exquisitissime sentientis naturæ & jam a triginta annis dolore podagrico ex hæreditaria dispositione afflictus, Lipsiæ periculum fecit, ac per diem sex pulveres deglutivit, quibus usurpatis, omnis quidem dolor simul & semel conquievit, sed subsequenti nocte inquietus erat, anxietate summa cum vertigine premebatur, ut caput vix erigere posset, extrema frigescebant, & mane quum e lecto surgere volebat, apoplexia tactus misere interiit. Oblati postmodum a cognato mihi sunt ad examen efficacissimi hi pulveres, quo, institutis nonnullis experimentis, eosdem mercurialis esse prosapiæ deprehendi, tam corrosivos, ut gustatæ fauces & linguam instar mercurii sublimati afficerent atque constringerent; quod autem dolor inde evanuerit, procul dubio ratio est, quod fuscitatus in exterioribus spasmo, materia acris ad interiora repulsa est.

§. XVIII.

Alia no-
xia in
ventricu-
lo deten-
ta.

Porro *Forestus lib. XIIX. de stomach. aff. obs. XIV.* ex lacte in stomacho concreto symptomata veneno similia annotavit, quippe ægra nausea sine vomitione afficiebatur, cum ingenti ventriculi dolore, adeo ut syncope subsequeretur & anhelitus præfocatio, adstantesque illam morituram putarent, omnia tamen pathemata, rejecto per vomitum lacte, evanuerunt. Et *Galenus* memoriæ prodidit, adolescentem ab humore æruginoso, os ventriculi mordente, sæpius universali convulsione fuisse tentatum, eamque ipsum non deseruisse, donec ærugo ejecta. Dum aliquid, inquit, os stomachi velli-
cat, mordendo ac æstuando, fiunt fastidia, jactationes, cardiognus, atque jam vomituriens os sputo plenum esse videtur & labrum inferius concutitur, ventris ore ad vomitum excitato.

§. XIX.

Pathe-
mata hy-
pochon-
driaca &
hysterica.

Eandem ventriculi cum universo nervorum systema-
te sympathiam confirmant porro symptomata truculenta, quæ subinde hypochondriacos exercere solent, quandoquidem radix mali sic dicti hypochondriaci omniumque in eodem solennium symptomatum in ventriculo male affecto fixa est, in quo spasmi incipiunt, postea per propagines nervorum successive serpunt & consueta illa symptomata ingenerant. Nam si ventriculus, quod sæpissime fit, flatibus prorsus distentus est, ejus orificiis simul spasmo constrictis: tunc nervorum conjugationes, quæ ex pari octavo, item ex intercostali, ad ipsum feruntur, molesta tractione, tensione in partibus diversis, quas simul transeunt, varia & gravia invehunt pathemata. Ita nervi pnevmonici & qui ad præcordia abeunt retracti, summas & constrictivas anxietates, cordis tremores, palpitationes, pulsus frequentem, durum & contractum suscitant; sique ii tenduntur, qui ad fauces, ad oesophagum ac cervicem tendunt, faucium contractio cum deglutitione difficili, tractio molesta in cervice, dolor con-

stri-

strictivus in humeris, regurgitatio ciborum & flatuum ad os; in capite vero vertigo, oculorum caligo, cataracta spuria, capitis dolor, frigoris in eo acerrimus sensus, anxia & tristis cogitatio, hemicrania, animi perpetua anxietas & desperatio maxima, ad timorem ac terrorem proclivitas, nullius rei voluptas, somnus parvus & inquietus, cum virium languore & vitiata in sensorii perceptione, oriuntur. Et quia simul plexus mesenterici & nervi intercostales in consensum trahuntur, dolores adsunt dorso, tormina ventris, mensium & hæmorrhoidum inordinatus fluxus, dolor artuum, urinæ tenuis & aquosæ mictio, alvi strictura, quandoque etiam nimia ejus dejectio, extremorum quoque refrigeratio. Quorum omnium & singulorum symptomatum ingens fit allevatio, discussis ex ventriculo & intestinis ructibus aut flatibus, spasmodicis constrictionibus per clysteres, per balnea & antispasmodica sedatis, & viscida acida ac biliosa colluvie per benigna laxantia, cum amaris balsamicis juncta, educta.

§. XX.

Communicationem quoque ventriculi cum partibus *Nec non* nervosis universi corporis, paroxysmi febrium intermittenti-*intermittentium* non obscure declarant. Procul enim omni dubio hærentium febrium minera primis in viis delitescit, & ex universo *paroxysmi.* corpore, per glandulas, ductus biliarios & pancreaticos, in hæc loca descendit, & ex mora, dum firmiter tenuium intestinorum valvulis ac tunicis inhæret, corrumpitur ac pessimam indolem contrahit, & nonnisi spasmis, qui in prima regione incipiunt, omnia illa, quæ febribus solent associari symptomata, absolvit. Nam extremorum frigus, tremor, & horror partium, præcordiorum anxietas, pulsus in principio parvus & compressus, postea celerior, nausea, vomitus, faucium & linguæ ariditas, sitis, dolor dorso & capitis, tensio abdominis, constriction alvi, urinæ tenuis & flammæ sine sedimento secessio, pandiculatio, oscitatio, dolor ossa quasi

contundens: profecto nullam aliam nanciscuntur originem, quam quod plexus stomachicus & mesentericus, qui ex intercostali & octavo pari concrescunt, vehementi spastica tractione & constrictione laborant. Quare etiam non certior & præsentior intermittentibus medendi est methodus, quam convenienti medicina mineram febrilem temperandi, expellendi & vehementes spasmos compescendi, postea afflictas & debilitatas partes roborandi. In eo tantum unice latitat intermittentes curandi arcanum, ut pro diversitate causarum, individuorum ac temporum, hæc remedia debito ordine, tempore ac dosi offerantur.

§. XXI.

Consentit ventriculus cum capite.

Sigillatim vero maximus observatur consensus inter caput ejus membranas, ipsumque ventriculum. Rectissime hinc scribit *Baglivus* pag. 565. qui laborant animi pathemate, potissimum corripitur solent morbis ventriculi, ut inter cetera observavi in marentibus, qui conqueruntur primo de languore ventriculi, mox inappetentia, oris amaritie, siti circa horas matutinas, cruditatibus, flatibus & tensionibus hypochondriorum. Eamque ob rem monet Medicos, ut in morbis ab animi pathematibus præ ceteris ventriculo prospiciant. Ego non semel sed sæpius a diuturno animi angore & mœstitia, in hominibus antea sanis, hilaris animi & sanguineæ complexionis, affectum hypochondriacum, qui potissimum in ventriculo consistit, subortum fuisse, vidi, anxium scilicet dolorem circa præcordia, inappetentiam, languorem, inquietudinem, mœstitiam sine causa, alvi constrictionem, continuam eructationem & inflationem circa cordis scrobiculum.

§. XXII.

Quod testantur animi pathemata ut ira.

Ira quoque potissimum operationem suam exserit in ventriculum & duodeno connexos ductus nervoso biliarios, unde frequentissime ii, qui ira excanduerunt, cardialgiam, contractionem circa scrobiculum cordis, cum ardore, pro-

pen-

penfione ad vomitum, oris amaritie & alvi obftipatione experiuntur. Et tunc nihil deterius eft, quam frigidum potum ingerere, quo affectum perfecte hypochondriacum optime antea valentibus inductum, ſæpe obſervavi. Longe autem pernicioſius eft, ſub tali ſpaſtica ſtomachi ex ira conſtitutione, draſticum aut emeticum porrigere, quandoquidem ex facili inflammatio ipſaque mors accedit, quod pluribus in *diſſertatione de medicina emetica & purgante poſt iram veneno*, aſſerui ac demonſtravi. Quam grave damnum ex *Et deſiderio* ardentiori deſiderio ventriculus experiatur, peculiaris ille Hel-
vetis maxime familiaris affectus, nostalgia dictus, teſtatur, quo apud exteros degentes, tam impenſo patriæ deſiderio tenentur, ut, ſi patrios lares non repetant, appetitus proſternatur, digeſtio lædatur, flatus & ructus e cruditatibus gignantur, cardialgia accedat & cum languore ipſum corpus emacietur.

§. XXIII.

Immoderatiора ſtudia & nimia per ſpeculationes ani-
mi fatigatio incredibili modo debilitant ventriculum ejus-
que vim digeſtivam enervant tonumque & robur auferunt, *Animi fa-
tigatio
per medi-
tationes.*
unde acidæ cruditates gignuntur, quæ ad ſupprimendam al-
vum, ad progignendas flatulentias malumque hypochon-
driacum, primum fere fundamentum ponunt. Quinimmo
ſunt inter exempla hypochondriaco malo obnoxii, qui ſi-
mulac impenſiore meditatione animi nervos nimis intende-
runt, illico anxietates præcordiorum, ructus e ſtomacho &
borborygmus in ventre, perſenſerunt. Vertiginem ex ipſo
ventriculo fieri, vel ex eo cognoscitur, quod, ſi quis jeju-
nus ſit, maxime affligat, ſumto vero cibo, minuatur, at-
que poſt ea, quæ primam regionem clementer expurgant &
digeſtionem juvant, plane diſcedat. Meminit etiam
Lomius Lib. II. obſervat. ſuffuſionis ſeu incipientis cata-
ractæ, ex ſtomacho profiſcentis, & aſſerit, talem ſuffuſionem in-
termittere & remittere, ſi curata coctione proſpectum ſto-
macho

machio est, invalescere & reverti, si is cruditate labefactetur. Ventriculo bene habente, totum corpus alacrius est, somnus fit placidus, si vero onustus est alimentis incongruis, præsertim circa noctem sumtis, somnus deficit, vel insomniis terrificis interturbatur. Nihil frequentius, quam quod ventriculo vino non adeo bonæ notæ nimis obruto, ex retenta vap-
pa, acorem corrosivum contrahente, postridie atroces capit-
tis dolores oboriantur.

§. XXIV.

*Capitis
dolores,
vulnera
aliaque
phæno-
mena.*

Eundem ventriculi consensum cum capite adstruit; quod si caput gravius doleat, omnis ciborum appetentia per-
eat, multæ cruditates flatuum genetrices crescant, alvo stric-
tione reddita & stomacho ad vomitum inclinante. Gravio-
res etiam cerebri morbi ventriculum mox in consensum ra-
piunt, unde observamus, in iis, qui apoplexia tanguntur,
ventriculum ad subversionem stimulari. Ubi mens ægrotat
& duram matrem spasmus corripit, cibi est fastidium, tor-
mina & anxietates præcordia exercent, & ructus cum impetu
erumpent, alvo stricta & magna in pulsibus facta mutatione.
Nemini facile obscurum est, quod ii, qui graviter vulneran-
tur, vel læduntur in capite, vomitu & ciborum fastidio affi-
ciantur; ac quod vicissim ventriculo laborante, ipsum caput
gravius luat. Pariter scriptorum medicorum fide constat,
a comesto solano, furioso dicto, atque in ventriculo adhuc
hærente, maniam productam fuisse, & semen hyoscyami,
& maxime daturæ, majori paullo quantitate exhibitum,
promptissime ingentem torporem, stuporem ac omnium sen-
suum internorum & externorum usum abolere & phantasiam
corrumpere.

§. XXV.

*Dentitio-
nis sym-
ptomata.*

Et quia nervi stomachici & intestinorum, ex inter-
costali & octavo pari coaliti, cum pari quinto, cujus ra-
mus ad maxillas & dentes fertur, communicationem habent;
hinc fit, ut in infantibus, ob gingivalis carnis ab erupturo den-

dente lancinationem, non modo in capite convulsiones, vigiliæ & epilepsiæ, in pectore asthma, in corde febris, sed & inferiori ventre tormina cum alvi adstrictione, vel nimia ejus fluxione; contingant, & quod notabile est, feces virides & corrosivæ secedant, eo quod, a spastica harum partium sub dolore contractione, ingesta non alvo exclusa, sed diu retenta, acefiant & corrosivam indolem accipiant. Ex quo judicare promptum est, quam imprudenter & temerarie ii faciant, qui in dentitionis difficultate, ubi spasmi genus nervosum vehementer torquent & feces virides sunt, purgantia acia & cum mercurialibus mixta, iterum iterumque propinant, tristi eventu præposterum ejusmodi consilium satis confirmante. Atque ob eandem communionem, quam nervi stomachici & intestinales cum pari quinto sovent, accidit in gravioribus stomachi spasmiss, qui fiunt a veneno vel validiori purgante aut emetico sumto, faciem fieri Hippocraticam, tempora collabi, vultum pallefcere & nasum acuminari. Neque semel, sed iterum iterumque notavimus, in pathematibus hysteris vultus deformitatem & aspectu horribiles oris, labiorum & oculorum distorsiones.

S. XXVI.

Proxima vero stomachi est societas atque connexio cum *Consens-* oesophago, propter tunicarum communionem; hinc fit, *sub stoma-* ut a pluma vel digito, tantum faucibus intruso, principium *chi cum* oesophagi irritante, protinus ventriculus, præsertim humo- *oesophago.* rum copia onustus, subvertatur & vomitio fiat. Fumus quoque tabaci ore suctus stimulat alvum, nullam, mea ex sententia, aliam ob causam; quam quod hic fumus sale suo volatili acri tunicas oris & faucium irritet, e quibus propagato ad ventriculum motu, is contenta citatius protrudat ad intestina & anum. Et quando in ventriculo acris residet humor, vel inflammatio est, oesophagus cum faucibus moleste constringitur, ita, ut non raro copiosa aqua in os effundatur, quod unum ex pessimis indiciis est. Infantibus quorum

ventriculus faburra causticæ bilis infarctus est, convulsionis certa species molesta & fatalis est, dum ii, spasmo gulæ affecti, continuo deglutire coguntur & certum sonum cum quodam singultu edunt, quæ symptomata identidem ab irritatione ventriculi, œsophago, faucibus & diaphragmate in consensum raptis, oriuntur. Fovet quoque ventriculus consensum cum intestinis: unde sub atrocissimo intestini ilei vel etiam coli dolore, vomitus tam vehementes fiunt, ut non modo in intestinis contenti humores, sed & ipsa stercora haud raro sursum ferantur.

§. XXVII.

Cum du-
dibus
biliaris.

Deinceps magna est consensus ventriculi & annexi duodeni cum ipsis biliariis ductibus, eam maxime ob causam, partim quod ductus cholodochus per duodeni membranas feratur, partim, quod dexter nervi intercostalis & paris octavi ramus, qui ventriculum adit, ramum quoque ad hepar ejusque biliferos canales mittat. Propter hunc itaque consensum fit, ut spasmo ventriculi & duodeni, qui in febre tertiana observatur, item a vehementi vomitorio, vel purgante, aut veneno assumpto, nec non ab atroci dolore colico, icterus oboriatur. Infantes tertio vel quarto a partu sæpius die ictero corripi, ex retentione mœconii in intestinis, auctor est *Baglivus oper. pag. 38.* Iracundiæ vehementiori icterum supervenire non novum est; siquidem ab hoc affectu patitur maxime fibrosior & robustior pars ventriculi, quæ pyloro adjacet, dum constringitur: unde ordinario in dextro circa scrobiculum cordis latere, ab ira, dolor compressorius, cum ascensu bilis ad os, observatur. Quodsi vero vel calculo, vel bilioso alio concreto tartareo humore, in vesicula fellea aut ductibus biliariis contento, horum tunicæ nerveo-musculosæ violenter tenduntur; in consensum quoque abripitur ventriculus, & hinc immanis cardialgia, nausea, vomitus cibique fastidium cooritur. Memorabilis & lectu dignissima est observatio, quam *Mis-*

nat. curios. A. VI. Dec. I. obs. 20. referunt: ubi mulier immanem dolorem & lancinationem ventris per triginta fere annos passa est; cujus originem & causam sagacissimi etiam Medicorum vix hariolari poterant, post mortem autem inventus est ingentis magnitudinis calculus, qui totam fere vesiculæ felleæ cavitatem implevit. Eandem quoque in rem obs. 61. Sculteri in armamentario, conferri meretur.

§. XXVIII.

Porro exquisitam ventriculus cum diaphragmate & pulmonibus fovet communicationem. Quid enim familia-
rius est, quam in infantibus stomacho refrigerato, vel mate-
ria acri ejus tunicis inhærente, singultum concitari, qui tho-
racis est convulsio? Quid solennius est? quam a cruditate
ventriculum obsidente, vel sero acri intra ejus membranas de-
tento, tussim nasci convulsivam, in infantibus non raro suf-
focatoriam, quæ pectoralibus & dulcibus assumtis plus exa-
cerbatur, acrimoniam vero corrigentibus, emollientibus at-
que discutientibus, neque minus lenioribus laxativis, expu-
gnatur. Quid porro crebrius occurrit in praxi, quam quod
a violenta tussi, vitio hærente in bronchiis, vomitus conci-
teretur? Nihil quoque frequentius est, quam quod abinflatio-
ne ventriculi summa fiat spirandi angustia cum suffocationis
periculo, quod symptoma in infantibus, quorum ventricu-
lus lacte corrupto fartus est, sæpius visitur, ubi leni emeti-
co, vel quæ leniter alvum ducit medicina, omne punctum
curationis absolvitur. Quin in convulsiva tussi ex stomacho,
tantam pectoris vidi concussionem, ut sternutatio impetuosa
& reiterata, cum ingenti sanguinis vel lymphæ profusione e
naribus, facta fuerit.

§. XXIX.

Præterea magnæ considerationis ea est sympathia, Cum re-
quam renes cum ventriculo & intestinis, propter commu-
nionem nervorum, alunt. Nimirum nihil familiarius est,
quam quod dolores ex calculo perpetuo fere nausea & vo-
mitus

mitus comitetur, & calculosos tormenta intestinorum tor-
queant. Nam quando ren calculo laborat, abdomen sem-
per multis flatibus turget, qui majores faciunt molestias,
quo gravior dolor est, immo ipsæ flatulentia sæpissime do-
lorem renum provocant & calculum in uretheres urgent.
Providendum itaque est calculo obnoxiiis, ne abdomen fri-
gori exponant, alias facile dolor renum irritatur. Si quis
dolore ex calculo premitur, digestio turbatur, stagnant in-
gesta in ventriculo, acefcunt & bilis viridis evomitur. Et
faciunt tunc egregium officium clysteres carminativi &
emollientes oleosi, nec non omnia ea, quæ citra calorem
flatus dispellunt & dolorem lumborum mitigante facultate
pollent. In spasmis flatulentis ventriculi, qui affectione hy-
pochondriaca vel hysterica detentos torquent, molesta cri-
spatura identidem ad renes pertingit, ita prorsus, ut eorum
tubulis constrictis, urina alba mingatur, quæ certum fere
paroxysmi hysterici vel hypochondriaci imminens indicium
præbet.

§. XXX.

*Cum pe-
dibus.*

Neque exiguus ventriculi consensus est cum pedibus,
qui innumeris tendinibus & nervis atque membranis con-
stant. Quum enim nervus intercostalis ad crura etiam per-
tingat, & nervum cruralem anticum & posticum consti-
tuat, mutua hinc inter caput, ventriculum & pedes consen-
sus nascitur. Ex quo jam facile patet, quare digitorum in
pedibus immanem dolorem, quod aliquoties vidimus, spa-
smus cynicus subsequatur, & quare ex pedis pollice epile-
psia non raro originem capiat, dum spasmus ibi incipiens,
successive ascendit, & primo ad abdomen, postea ad cor &
diaphragma, tandem ad caput delatus, abdominis tensio-
nes, præcordiorum constrictiones, pectoris oppressiones,
aphoniam, denique convulsiones & epilepsias producit.
Ægroti exprimunt, sensum quasi venti a pollice ad caput
sursum ascendere ac elevari, quæ tamen in sensu est fallacia:
siqui-

fiquidem nullus datur flatibus locus ita per solidam substantiam ascendendi, sed spasmi sunt, qui oscillatorio quodam motu successive per nervorum propagines ad superiora serpunt. Notum quoque est, ex infessu nudis pedum plantis in pavimentum frigidum, nec non improvida pedum refrigeratione, cutim per omnem corporis ambitum stringi & tormina ventris, nonnunquam cum alvi fluxu, arcessi.

§. XXXI.

Tandem nec silentio prætermittere oportet sympathiam, *Cum ipsa* quæ est inter ventriculum & ipsam cutem. Videmus exanthemata, quæ in cute effloruerant, cujuscunque etiam fuerint generis, repulsa, non sine ingenti periculo ad ventriculi & intestinorum tunicas migrare, ubi ferale spasmos, tormina, anxietates, constrictiones alvi & inflammationes efficiunt. Quare etiam omnia, quæ spasnum in ventriculo concitant, ut sunt purgantia & animi pathemata, in exanthematicis morbis admodum perniciofa esse observantur; quandoquidem contracta ex consensu simul ipsa cute, acris illa exitialis materia ad interiora, ipsasque nerveas ventriculi & intestinorum membranas, revocatur. Et sæpius quoque observavimus, ab indusiorum, præsertim si frigida & humida fuerint, mutatione, in sanis etiam, ventris inflationes & inquietas noctes redditas fuisse. Quo patet, quam gravem noxam ejusmodi improvidus ausus in morbis, quorum materia per summam cutim expelli debet, caussetur. Quandocunque dolor ventriculum vel intestina torquet, pori cutis clauduntur & nihil sudoris effluit, extrema refrigerantur, meatibus vero cutis rursus adaperitis, certum indicium est doloris aut alvi fluxus finem adesse. Si variolarum materia subtilis caustica intestinorum membranis insidet, ægri sunt inquieti, jactabundi, loco stare nesciunt & ne minima pustula prodit in cute, neque sudoris guttula profilit, alvo contracta & convulsa, adeo ut univerfum cutis systema contrahatur, quod probe notavit *Baglivus*.

§. XXXII.

Consensum intestinorum testantur pathemata a vermibus.

Neque tantum ventriculo, verum etiam intestinis, quæ ejusdem cum illo naturæ & structuræ sunt, ex tunicis nempe pariter musculosis & nerveis contexta, cum universi corporis tunicis membranaceis societas est atque consensus, ob plexus maxime mesentericum, intercostalem & paris vagi, quem præter alia truculenta universi generis nervosi pathemata, quæ a vermibus, teneras tenuium tunicas arrodentibus, suscitantur, testatum reddunt. Neminem enim, qui leviter in artis exercitio versatus est, fugit, inde pullulare in capite epilepsiam, deliria, vertiginem, sternutationes, guttam serenam temporariam, aphoniam, surditatem & tintinum aurium transitorium; in spinali medulla, aspectu horribiles motus convulsivos & artuum agitationes; in corde & systemate vasorum, febres, cordis tremores ac palpitationes; in pectore, tusses, dolores, qui pleuritidem mentiuntur; in ventriculo, inappetentiam, inclinationem ad vomitum pytalismum & lymphæ ex ore fluxum; in intestinorum volumine, atrociam tormina; in urinariis viis, ad urinam stimulum; in extremis, horripilationes & refrigerationes, manuum pedumque contracturas: quæ cuncta symptomata, primo aspectu admodum funesta, exturbata a specifico anthelminthico, pilulis nempe ex asa foetida, myrrha, croco & mercurio dulci paratis, verminosa progenie, protinus sedantur & conquiescunt.

§. XXXIII.

Colica sic dicta convulsiva & ileus,

Colica sic dicta convulsiva & passio iliaca, quibus intestina, ileon, vel colon, vehementi spasmo constringuntur, quot non atrociam, & nonnunquam lethiferam, symptomata inducunt? febres, deliria, convulsiones, inquietudinem, summas anxietates, animi deliquia, artuum contractiones, extremorum frigora, cum sudore frigido & pulsu duro & contracto, vomitus, alvi tam insolentem constipationem, ut nec clysterem admittat, vel flatum transmittat.

Ejus-

Ejusdem indolis sunt acerbissima pathemata in colica spasmodica metallurgis solenni obvia, quæ sigillatim evolvi & ad rationes revocavi, in dissertatione *de metallurgia morbifera*. In cholera quoque, quando bilis caustica nervosas intestino-^{Cholera} rum parietes rodit atque gravius irritat, omne nervorum ge-^{& dysen-} nus compatitur, ac eadem plane, quam si venenum assum-^{teria.} tum fuisset, prodeunt passiones, mortem celeriter arcessentes, quæ non aliis, quam quibus venenorum noxæ, demulcentibus nempe oleosis, lacticiis, terreis & antispasmodicis, discutiuntur: id quod etiam pari modo de dysenteria, ab eadem causâ prognata, notum est.

§. XXXIV.

Accedunt phænomena post purgans assumptum con-^{Purgan-} spicua. Quamvis enim omnis generis cathartica opera-^{tium} tionem suam nonnisi in intestinis exsequantur, iisdem tamen^{effectus.} oblatis, dissitæ etiam partes annunt. Elaterium quando hydropicis exhibetur, virtutem suam tam late diffundit, ut strictis in extremis quoque partibus fibrillis, stagnans humor ex universo corporis ambitu ad intestina agatur, ac per anum effuse exturbetur, subsidente postea notabiliter in posterioribus tumore. Similiter in tussi humida, quâ magna humorum colluvies sereatu e pulmonibus ejicitur, nullum certius atque efficacius præsidium est, lenioribus & balsamicis laxantibus, quibus superfluum serum e pectore ad intestinales glandulas allicitur & per alvum educitur. Inprimis autem imprudens purgantium usus, intestinorum cum reliquis nervosis partibus, ac præsertim spinali medulla, con- spirationem, prodit. Præterquam enim quod *Solenander* in consiliis, & *A. N. C. Dec. II. A. VII. obs. 162.* fidem faciant, quod grave damnum inde in universum corpus redundarit, ipse quoque aliquoties notavi, propinata in pulvere vel pilulis resina jalappæ, non solum enormes cum acerbis torminibus successisse dejectiones, sed etiam in quibusdam convulsiones, epilepticas commotiones, quin in aliis paralyfin dextri

dextri & sinistri lateris accidisse, hanc procul dubio ob rationem, quod resina jalappæ, quæ facile in liquido aqueo conglobatur & difficillime liquefcit, firmiter parti cuidam nerveæ intestinorum tunicæ adhæsit, eandemque jugiter lancinando, convulsivas ejusmodi in dissitis etiam locis spasticas tractiones suscitavit.

§. XXXV.

*Viscera
sanguinea non
cum nervis
consentiunt.
Ut uterus.*

Viget itaque consensus inter partes nervoso-membraceas mutuus, qui an etiam his, cum visceribus sic dictis sanguineis, quorum structura & compages ferme tota vasculosa, ut sunt hepar & lien, nec non uterus, intercedat? jam paucis dispiciendum. Plurimi quidem ex Practicis, quos inter maxime eminet *Villisius*, consensionem uteri cum nervoso totius corporis systemate constanter asserunt, imprimis quum experientia fere quotidiana doceat, quod affectio hysterica, quæ ex vitio uteri & sanguinis irregulari motu in feminis æque ac in puerperis cooritur, pathematibus spasticis, convulsivis, epilepticis, quæ præternaturales generis nervosi læsi affectus sunt, absolvatur. At vero ipse uterus minime partibus nervosis & exquisitæ sensationis annumerari potest, utut motu tonico suo & interno non destituatur. Nam si talis esset, nequiquam summas illas sæpius a gemellis distensiones in gravidis, item a tumoribus & excrefcentiis intra ejus cavitatem ipsamque substantiam prognatis, sine summa molestia & vitæ periculo, ferre posset.

§. XXXVI.

*Mali hysterici
caussa
quidem
in utero
est.*

Quare recte distinguendum potius esse cenfeo, inter sedem morbi, sive spasmodum, quæ nullo modo est in utero, ac inter sedem causæ morbi, sive pathematum spasmodicorum in genere nervoso existentium, quorum causam ipse uterus male affectus subministrat. Neque quidem inficiandum est, quod si ob dejectum uteri & ejus vasorum tonum ac robur, sive a puerperio, sive ab aliis causis ex-

ternis

ternis & internis, sanguinis superflui menstrua periodo non sufficiens fit diminutio, sed fluxus supprimitur & cohibetur, gravissima inde sæpius in universo corpore, inque primis ejus partibus nervoso-membranaceis, oboriantur symptomata; horum tamen ratio non a nervis, quos sensibiles hæ partes cum utero communes habent, sed potius a sanguine, ad interiora ac sentientes nobiles partes restagnante, petenda est ac derivanda. Et hanc etiam Hippocratis fuisse sententiam, auctor nuclei Hippocratis *Cent. III. aph. 44.* clarius exponit, *refluens*, inquit, *sanguis ab utero & premens septum transversum, retracto utero, præfocationem, in caput irruens, insaniam, epilepsiam, catochos, apoplexias, occupans thoracem, insulares affectus, irruens in cor, palpitaciones & tremores, nonnunquam synopes, in nervis denique facit stuporem, immobilitatem & resolutionem.*

§. XXXVII.

Ego proinde re paullo curatius expensa, præcipu-
am pathematum hystericorum sedem in ventriculo & cana-
li intestinorum collocandam esse arbitror. Nam anxietas illa *triculo & intestinis.*
constrictiones & angustia circa præcordia, dolores cardial-
gici, qui ad dorsum, ubi sinistrum ventriculi orificium, por-
riguntur, palpabilis stomachi circa scrobiculum cordis infla-
tio, continuæ eructationes, nausea & ad vomendum pro-
clivitas, alvus firmiter obseata, cum flatuum retentione &
regurgitatione ad superiora, borborygmi, tormina, con-
volutiones intestinorum instar globi, molesti dolores in hy-
pochondrio sinistro, dolor circa vetebas lumbares, creber
ad urinam stimulus, extremorum frigus, inquietudo, pul-
sus celerior, contractus, vel plane intermittens, animi de-
fectio, cordis palpitatio, quæ perpetua fere passionis hy-
stericæ sunt symptomata, nihil certe aliud subinducunt, quam
nobilissimam & ex præcipuis sensibilem maxime partem, ven-
triculum nempe, esse affectam. Quare etiam omnia ea,
(III.) P quæ

quæ spasticas stricaturas efficaciter leniunt & laxant remedia, ut sunt fofus calidus præcordiis applicatus, interne liquor nofter fic dictus anodynus mineralis, feu fummum & tutiffimum antifpafmodicum, vel folus, vel cum effentia carminativa, aut caftorei, remixtus, & clyfter oleofus emolliens, præfentiffimæ & fere miraculoſæ funt efficiaciæ. Horum quippe atrocium ventriculi fpafmorum proxima cauſſa, non funt acres, biliofi, vel viſcidi, crudi fucci in ftomacho contenti, fed folus fanguis copioſe irruens in vaſa ventriculi, quæ quum tunicis ejus nervofis intertexta ſint, nimia diſtenſione has fortiter premunt, & hac ratione jam memoratas paſſiones gignunt. Hinc etiam ratio pateſcit, quare feminæ, quibus menſes poſt quinquageſimum annum deficiunt, ſi non fanguinem, vel per ſcarificationem, vel per incifionem venarum, emittunt, aut etiam conſuetas has artificiales evacuationes omittunt, hyſtericis ejusmodi ſpafmicis affectionibus, præ omnibus aliis excrucientur: & quare viciffim inſtitutæ opportune ejusmodi fanguinis ſubtractiones, paroxyſmos hyſtericos certis periodis redeuntes, vel minuant, vel penitus tollant.

§. XXXVIII.

Nullus
quoque
hepatis
& lienis
conſen-
ſus.

Idem de hepatis & lienis viſcere ſentiendum. Nam licet nonnulli inter hæc & nervoſas partes conſenſionem adſtruant, & potiffimum ad pathemata in malo hypochondriaco, ſub quo labes & vitium plerumque in fanguineis hiſce viſceribus conſiſtit, conſpicua provocent; ambo tamen, hepar & lien, præſertim humanus, partes, ut luculenter inſectionibus ſuis cl. *Ruyſchius* demonſtravit, ſunt fere totæ vaſculofæ, ex innumeris quippe vaſis majoribus, minoribus & minimis contextæ, ſenſus plane expertes, ut hinc ſæpe ſine acuti doloris perceptione intumeſcere ac etiam in magnam molem augeri poſſint. Interim tamen, ſi ipſarum compages, & maxime quidem vaſa, quæ fanguinem ad hepar, ut eſt venæ portæ, adducunt, convenienti tono ac robore ac vi ſuf-

ficien-

ficienter motrice impellente destituuntur, promptam spasmodum in nervosis locis causam subministrant. Nam quando sanguis a ventriculo, toto volumine intestinorum, mesenterio, liene, omento & pancreate refluus, per truncum venae portae, qui manifesta systole sive pulsu caret, per minimos copiosissimos hujus venae in hepatis parenchymate propagines, non satis expedite trajicitur, necesse est, ut regurgitans ad viscera unde advectus, in iisdem non modo stagnet & canales farciat atque distendat, sed & ulterius, ut appulsus per arteriam coeliacam & mesentericam a tergo ad has partes sanguis, pracluso in venas repletas transitu, ad vasa minima & lateralia cogatur, & sic undiquaque obhaerescens in vasis nervosae maxime ventriculi & intestinorum tunicae instratis cruor, molesta pressione stricturas & truculentos spasmos cieat. Et hac utique ratione omnia illa pathemata, quae hypochondriacos per certos insultus vexant, affectiones & laesiones generis nervosi sunt, ac ut probe primus *Willisius* & *Hobokenius* notarunt, exquisitam convenientiam eandem quoque sedem cum hysterice pathematibus obtinent. Minus recte secundum Veteres, ac ut nonnullorum recentiorum adhuc opinio fert, dolores & passiones in latere sinistro, lienis adscribuntur, quum potius stomacho, cujus tres partes in hoc latere conduntur, nec non subjectis coli flexuris, ut inter alios primus cum *Conringio* docuit *Emmüllerus*, debentur. Ipse quoque ante aliquot annos peculiari dissertatione monstravi atque defendi, quod praecipua sedes spasmodum hypochondriacorum in ventriculo sit constituenda.

§. XXXIX.

Neque etiam ut plurimorum recentiorum est sententia, cruditates vitiosae primis in viis stabulantes acidae & viscidae biliosae, primam, originalem & veram causam pathematum hypochondriacorum suppeditant, sed sequuntur demum spasmos & eorum productum sunt, licet ad eorum

Hinc cruditates non sunt causa mali hypochondriaci.

recursum & exacerbationem multum conferant, & ipse potius sanguis copiose circa hæc viscera stagnans, sive harum partium plethora particularis, accusanda. Testatur hoc inter alia cura affectus hypochondriaci, in qua quidem ea, quæ spasmis placandis, stricturis partium fibrosarum relaxandis dicata, insignè levamen afferunt; nisi tamen redundanti sanguini exitus paretur, ac is vel per sanguinis missionem in partibus inferioribus, vel fluxum hæmorrhoidum, si natura ad eum inclinât valde salutarem, exsolvatur, aut ejusdem progressus aquarum mineralium, balneorum & medicamentorum roborantium tonicorum usu, vel etiam per motum & exercitium corporis, liberior reddatur, ac per vasa venosa melsaraica ipsumque hepatis & lienis viscus restituatur, certum & constans vix, aut plane non, sperare licet auxilium.

§. XL.

Consensum testatur medicamentorum operatio.

Liquoris anodyn.

Is autem a nobis assertus nervosarum partium consensus, quemadmodum tam eximius est atque conspicuus, ut venenum, vel etiam alia infesta materia, nervoso, ubicunque sit loco, insidens, vel in ventriculo contenta, illico vires suas perniciales cum universo nervorum systemate communicet: ita simili ratione pharmacum efficacis ac penetrantis indolis, accisa etiam dosi exhibitum, immo adhuc in stomacho versans, mediante eadem nervorum conspiratione, protinus vim suam in universum corpus diffundere potest. Liceat in confirmationem producere liquorem a nobis inventum & ex sulphure mineralium concinnatum, jure dictum anodynum mineralem, gratissimæ & penetrantissimæ indolis, qui certe, si ullum aliud medicamentum, promte, sine noxa tamen, dolores & spasmos in universo corpore levât atque sedat, & in pathematibus hypochondriacis, hysteriis, gravi cardialgia, enormi vomitione, commotionibus etiam epilepticis & convulsivis, singultu, diarrheâ, ad guttas tantummodo XXX. vel XL. semel aut bis, oblatus,

præ-

præsentaneum & mirabile plane præstat auxilium. Massam pilularum ita dictarum de styrace ad aliquot tantum grana deglutitam, in tussi ferina, quæ universum corpus affligebat & concutiebat, omnibus aliis frustra exhibitis, singularem plane effectum sedativum exseruisse, sæpius observavi, subsequito simul blando cutis, quæ ante frigida, horrida & exsicca erat, madore.

§. XLI.

Pauxillum laudani liquidi, si vel solum, vel cum liquore volatili Bussii, aut cornu cervi succinato remixtum, in ^{Aliorum} ^{sedativo-} ^{rum &} ^{antispa-} ^{smodico-} ^{rum.} enormi, etiam cruenta, alvi defectione, porrigitur, protinus, quando adhuc in ventriculo hæret, atroces cruciatus in abdomine, borborygmi & motus conquiescere incipiunt, somno blando obrepente. Idem medicamentum si in pathematibus hysteris, quæ universum corpus exagitant spasticis, datur, mox mirabile sequitur levamen. Pariter in enormibus sanguinis profusionibus, hæmoptysi nempe, narium hæmorrhagia, ab assumtis aliquot granis massæ pilularum de cynoglossa, vel aliquot guttulis liquoris martialis, sæpe temporaneam vidi fluxus adstrictionem. Oleum amygdalinum bene præparatum, & cum jusculo ad aliquot cochlearia ingestum, præbet medicinam in omnibus doloribus & spasms, etiam diffitas partes quotientibus, efficacissimam; eaque propter in tussi convulsiva clamosa, asthmate spasmodico, dolore ex calculo, stranguria, colica, non sine insigni fructu usurpatur. Nitrum saltim vulgare, probe depuratum, ad aliquot grana datum, protinus fervorem præternaturalem extinguit, vel ad sensum refrigerat, sitim sedat, commotiones sanguinis hæmorrhagicas sistit, cutim ad madorem disponit & alvum lubricam reddit.

§. XLII.

Corticem Peruvianum, pulverem florum chamomil- ^{Corticis} ^{Peruvia-} læ, crocum martis subtilissimum, quem fontes Lauchstadien- ses eructant, ad sistendos febriles in intermittentibus motus ^{ni.}

*Pilula-
rum bal-
samica-
rum.*

*Caphali-
corum.*

*Et clyste-
rum.*

summa pollere efficacia, res est nec leviter in praxi versatis ignota. Longe etiam præstantissimus certe est effectus, quem pilulæ balsamicæ, leniter aloëticæ, in omnibus fere uteri affectibus, atque etiam in hypochondriaca passione, exsequuntur, dum ad foetum, secundinas, molas, immo lochia expellenda in puerperio, præ omnibus aliis purgantibus & uterinis eximie conferunt, non aliam ob causam, quam quod peculiari ratione, non modo intestina, sed & confines partes atque vasa uterina solentur & afficiant. Has tamen cum plerisque reliquis non facile primarum viarum limites operatione sua transcendere, veri videtur simillimum. Ad vires a senio vel morbo collapsas restaurandas, nec non animo deficientes refocillandos, balsamum nostrum liquidum spirituosum, exterius & interius usurpatum, singularem præstat opem; contra vero suaveolentia ex moscho, ambra, zibetho, si naribus tantummodo offeruntur, hysteriis vel hypochondriacis, totum genus nervosum in consensum trahendo, sævissima symptomata, ut syncopen, cordis palpitationes, anxietates summas, nauseam, vomitum, immo convulsiones quandoque, arcessunt. Clysteres oleosi demulcentes in colica convulsiva & paroxysmis hysteriis & hypochondriacis levamen afferunt exoptatissimum, eo quod non tantum in intestina, verum etiam alias nervosas partes suam maxime distribuant facultatem.

§. XLIII.

*Item spe-
cificorum.*

Neque dissimilis mihi specificorum sic dictorum videtur ratio, ut castorei & asæ foetidæ in pathematibus hysteriis placandis, pulveris secundinæ humanæ, cranii & corii humani, in epilepticis insultibus sedandis; hæc enim dum ventriculi & intestinorum tunicas nerveas *αναδυσιασται* sua mulcent ac imbuunt, ex his ad diffitas etiam atque remotas partes virtus propagatur. Fuit nobis a multis abhinc annis in usu singularis quidam mercurius diaphoreticus fixioris naturæ, qui ad pauca grana adhibitus, in lue venerea & mor-

& morbis a summa lymphæ impuritate nascentibus, sudorem per multas hebdomadas eliciendo, mirabilem præstitit opem. Sic quoque sulphur antimonii, si rite præparatum fuerit, quo etiam referenda paracea sic dicta Glauberiana, nec non regulas antimonii medicinalis, duorum vel trium granorum pondere oblata, acres & salvas diu durantes in oculis, faucibus quoque ac pedibus defluxiones resiccant, simulque perspirationem ac respirationem liberiores reddunt.

§. XLIV.

Et hæc tam singularis & late patens interiorum quo- *Externo*
rundam medicaminum virtus, in externis quoque, ob ean- *rum que*
dem partium sympathiam deprehenditur, ut miro plane
modo in extremis sæpius interiora leventur. Exemplo fit
vesicatorium, vel emplastrum Strobelbergeri, quod carpis
applicatum, paroxysmos intermittentium experientia teste,
compefcit. Pariter vesicatorium nuchæ appositum lippitu-
dinem discutit, & in apoplexia tactis sufflaminatum sensum
sanguinisque motum reducit. Oleum terebinthinae umbi-
lico tantum illitum, in urinæ suppressione efficacissimum est
remedium. Unguentum, de arthanita dictum, umbilico in-
unctum, alvum non solum efficaciter movet, sed etiam ver-
mes in intestinis necat. Emplastrum anodynum temporibus
appositum, non modo capitis dolores placat, sed & vomit-
iones sæpe enormes sistit. Linimentum spirituosum ex oleis
aromaticis paratum & præcordiis admotum, tam ventriculo,
quam toti corpori vigorem præstat. Frictio quoque artuum
& maxime præcordiorum asperior, suspensum in syncopiticis
cordis pulsus revocat.

§. XLV.

Egregia porro huc trahenda est observatio: quod *Inprimis*
in morbis capitis, quæ ex atonia & imbecillitate nascuntur, *pedibus*
ut memoriæ ac sensuum debilitate, paralyfi, quæ sæpe post *applica-*
apoplexiam relinquitur, item somnolentia, vesicatoria & *torum.*
rube-

rubefacientia pedibus applicata, efficacissimo sint præsidio. In iisdem morbis capitis ex resolutione ac remissione nervorum subortis, capiti admota spirituosâ cephalica aromatica, omnes non æque terre quidem possunt, ut potius sæpe magis inde lædantur: si vero pedes iisdem perfricantur, ut aqua Anhal-dina cum oleo majoranæ & lavendulæ, caput inde allevamen-tum percipit præsentaneum; & vidi aliquando, hac ratione in affectu soporoso, largiorem pituitæ ex naribus & faucibus effluxum suscitatum, summo subsequente levamine. Rube-facientia quoque plantis pedum applicata, sanguinis e naribus stillicidium comprimunt. Qui difficulter sudant, appposito plantis latere calefacto, sudore perfunduntur, si vero manus & pedes sub sudore nudantur, perspiratio illico sistitur. Et pediluvia temperate calida, quid in capitis morbis & omni-bus passionibus spasmodicis efficiant, tam notum est quam quod notissimum.

§. XLVI.

Conclu-
sio.

Sed ne latius evagemur, mittimus alia, ac interim ex allatis insignem consensionem & magnam conspirationem partium in corpore sensibilibus liquido patere arbitramur. Quo magis mirandum censemus, esse adhuc inter Medicos, qui hunc nervorum consensum plane negare, immo pro fabula venditare, hæud verentur. Sed videant, rogo, novaturientes hi doctores, qui sapientiam medicam in obscuris, metaphysicis, noviter quoque confictis terminis quærunt, & universam fere pathologiam ex moliminibus naturæ ad hæ-morrhagicas excretiones consarcinant, quo pacto cum con-ne-xione ac demonstratione, ex spirituali sua natura, hæc vera & per experientiam confirmata phænomena, deducere atque explicare possint. Ego certe, si ullam in rebus medicis do-ctrinam scitu perquam necessariam & utilem, hanc ipsam de consensu, fructuosam judico, & his egregio Hippocratis lib. de aliment. §. 4. effato finem impono: *confluxio una, conspiratio una & consentientia omnia.*

CAPVT VI.

DE

FLVIDORVM VITIIS EX VI-
TIOSA SOLIDORVM DISPOSITIONE.

§. I.

Perlustrauimus in superiori capite mutuam illam conspi- *Fluida a*
rationem & harmonicum consensum, quem partes cor- *solidis*
poris nervosæ exquisitioris sensationis & motus inter *vitium*
se fovent, ac pluribus argumentis asseruimus, quam utilis & *patium-*
scitu necessaria in rebus medicis explicandis hæc sit doctrina- *tur.*
nunc porro sequitur, ut solidorum, si vitio laborant, in fluida corporis nostri actionem & ad pervertendam naturalem eorum constitutionem operationem monstremus ac eruamus; quod certe argumentum, non minus eximie in pathologicis erit utilitatis. Jam nemo quidem facile negabit, machinam animale ex solidis & fluidis esse constructam, & corporis vitam maxime in eo consistere, ut solida agant in fluida ipsaque moveant, & fluida rursus in solida eademque animent: ideoque hisce suppositis, nostra inpraesentiarum meditatio in statu tantum præternaturali & morbido erit defixa, clarius ostendendo, quid patiantur fluida a solidis læsis & præternaturam constitutis.

§. II.

Initium autem merito facimus a celeriter aucta reciproca *Et qui-*
systole & diastole cordis & arteriarum, ac universi generis va- *dem sub*
sculosi ac fibrosi, quæ pulsu duro & celeri, velociori quoque *febrili*
sanguinis tam progressivo quam intestino motu, stipatur, in *motu.*
quo formalis febris ratio continetur. Sub auctiori hoc & ad-
co accelerato motu, in omni febre, cujuscunque sit generis
(III.) Q vel

vel speciei, sanguinis & humorum crasin, temperiem ac mixturem incredibili fere modo immutari ac perverti experientia docet. Sanguis qui antea erat temperatus & sensu medico dulcis, bonæ consistentiæ, diuturniori intenso solidorum motu quassatus, a blanda sua temperie plane desciscit, falsus, sulphureus ac biliosus redditur, ut demum in excrementa pæne fatiscat. Hinc sudor febricitantium falso-acidus ac foetidus, urina materia viscida, tartarea, sulphurea admodum saturata & tincta, & feces alvinæ, valde pituitosæ, biliosæ, coloratæ & foetidæ secedunt. Deinde validiori illa intestinali sanguinis motione, partes subtiliores spirituosæ, quæ vires & motum materialiter constituunt, aufugiunt, materia sanguinis *πικρὴ*, dulcis, rosida, qua nutriuntur solida & quæ placidum somnum conciliat, consumitur, idque eo magis, quo vehementior ac diuturnior est febris. Quin crebriori observatu constat, commotionibus febrilibus demum vappidam sanguinis & humorum fieri massam, ut corpus aliis chronicis passionibus, cachexiæ, tumoribus œdematosis, exulcerationibus, abscessibus, viscerum scirrhis & infarctui facillime pateat, & profecto res non mediocris prudentiæ sit, febre intermittente vel acuta diu afflictum corpus sanitati & viribus brevi reddere, & commoda medicina atque diætâ ab aliis morbis defendere.

§. III.

*Inprimis
si corpus
jam antea
impu-
rum.*

Sed hæc omnia longe deteriora fiunt & cum majori periculo eveniunt, si febris apprehendit corpus, cujus vasa sanguine & humoribus impuris, sive particulis falsis, sulphureis, excrementitiis, sive diathesi scorbutica, jam antea imbutis, facta sunt, quippe tum major adhuc partium, quæ mixturam sanguinis constituunt, dissolutio corruptiva metuenda est, quam exanthemata varii generis, purpura miliaris, maculæ purpuratæ & pustulæ acri humore turgidæ arguunt, non sine summo virium & vitæ discrimine. Vidi sæpius in scorbuticis suborto levi tantum febrili a catarrhis motu, præsertim

vere

vere vel autumno, materiam arthriticam vel purpuraceam in sanguine delitescens, commotione ista excitata & ad exteriora pulsam fuisse, sub atrocium dolorum & gravium symptomatum choragio.

§. IV.

Affectus animi, quorum operatio in solidas & nervo-^{Animi}fas partes impetiosa ac vehemens est, crasin ac temperiem^{affectu-} humorum mirifice immutant. A diuturna tristitia & ani-^{um esse-}mi angore, succi corporis spissescunt & cruditates viscidæ^{tus in} acetosæ ventriculo ingignuntur, quin si diutius durat, a san-^{fluidis.}guinis spissitudine fiunt viscerum infarctus & chronicæ multæ passiones. Ira, quæ vasa potissimum biliaria stringit eaque accelerata systole a bile nimis vacuat, simul quoque ventriculū & duodenum striculis exagitat, efficit, ut humores biliosi in his coacerventur, corrumpantur & ad vomitus, febres biliosas cholericas, cardialgias, viam sternant. Quumque animi pathemata, maxime operentur in ventriculū, ejus motum invertant, digestionem & chylificationem lædant multasque hinc cruditates, foecundas morborum matrices, ingignant, nihil etiam perniciosius est, quam post omnes animi patheticas commotiones esculenta aut potulenta capere, vel etiam inter cibum & potum, vel post eum, animo gravius affici.

§. V.

Vehemens membranarum capitis in atroci dolore^{Dolorum} spasinus, detinet etiam cibos in stomacho, concoctionem^{operatio} turbat, inappetentiam conciliat & cruditates excludit, quod^{ex solidis} etiam valet in dolore dentium. In dentitione infantum dif-^{in fluida.}ficilliori, nihil occurrit frequentius, quam quod in paroxysmo feces antea naturales & bene coloratæ, virides & corrosivæ, cum acerbis torminibus & flatuum impetu, non sine convulsionum metu, secedant, dubio procul, quod a spasms per dolorem gingivarum excitatis, ipse stringatur ventriculus cum tenui intestino, & lac diutius contentum ingentem

corrosivum acorem contrahat, & a bile admixta viridis emergat color.

S. VI.

*Alii spasmodi
& dolorum in
fluidis
effectus.*

In omnibus porro doloribus & spasmis, cutis poros & spiracula claudi, subinde observamus. Non mirum itaque est, ab excrementis subtilioribus falso-sulphureis, quæ in naturali statu exhalant, intus retentis, valde impuram sanguinis & lymphæ massam reddi, & inde vel morbum augeri, vel ad novos paroxysmos pabulum suppeditari. Alvus quoque ubi dolores & spasmi urgent, ut videmus in hypochondriacis & hysteris, semper fere clauditur. Quare a retentis fordibus & fecibus istis putridis salino-biliolis, & ad sanguinis massam vergentibus, hanc inde valde inquinari & conspurcari extra dubium est. Præterea in omnibus spasmodicis morbis urinam aquosam & tenuem reddi, ob stricturam tubulorum urinariorum, perpetuæ fere observationis est, neque dubium, quin vasa in hepate biliaria, quæ ex tunicis valde nervosis & musculosis contexta, hisce in morbis eandem experiantur crispaturam, ut hac ratione plures crassiores excrementitiæ, biliosæ & salsæ tartareæ urinosæ sordes in sanguine remaneant, eumque non leviter deturbent. Et hæc subest causa, quare in malo tam hypochondriaco, quam hysterico, ingens simul cacochymia, sive impuritas humorum scorbutica, successive ingeneretur, quam ipse sanguis e vena missus, coloris ob alcalium excrementitiorum salium mixturam, intense rubicundi, luculenter arguit. Ex hoc autem succorum vitio, plures postea passiones, cachexia icteritia, dolores, inflammationes, rheumatismi, inflammationes atque exulcerationes foecundo germine pullulant. Sed omnium pessimum est illud vitium, quando sub vehementi spastica strictura, ut fit a veneno, inflammationibus & doloribus, sanguis firmiter incarceratus in sphacelosam putridam corruptionem abit.

S. VII.

§. VII.

Nihil frequentius in artis exercitio obvium, quam *Ex spasm-* quod ab asthma spasmodico, quod validiori diaphragma-*smo dia-* tis spasmopotissimum absolvitur, diutius affligente, hepar *phragma-* tandem obstruatur, induretur ac tumores oedematosi pedum *tis hy-* ipseque dirus hydrops, ascites maxime, sequatur. Quod *drops.* quidem nullam profecto aliam ob rationem evenire arbitror, quam quod vehementi strictura portionis diaphragmatis nervosæ, cui adhæret hepar & emergens inde vas venosum cava, sanguinis recursus ad cor valde retardetur, & cruor, præcluso transitu, ad inferiora relabatur, ibique & maxime in portæ vena & hepatis viscere stagnans, tam truculentos morbos cieat.

§. VIII.

Quæ quum ita sint, liquido patescit; spasticas in *Et sic spa-* morbis quæ urgent affectiones, majorem obtinere succos *smi suc-* corrumpendi iisdemque impuritatem conciliandi potentiam, *cos in-* quam ipsa incongrua & intemperata alimenta, paullo lar- *quant.* gius etiam sumta, modo excretiones, maxime per alvum & sudorem, vigeant. Hæ enim quamdiu salvæ sunt & integræ, ac omne quod superfluum, alienum & mixturæ humorum vitalium minus congruum est, secedit, nullum ab eo metuentum erit detrimentum. Porro etiam ex dictis prona fluit consequentia, quod sub ejusmodi morbis spasmodicis, & maxime eorum paroxysmis, oppido tutum & consultum sit a copia alimentorum, & præsertim heterogeneæ indolis, abstinere, eo quod his ingestis, ob retentas sordes excrementitias, major adhuc humorum vitalium inquinatio contingat necesse est.

§. IX.

Ingens vero etiam illa est dyscrasia atque impuritas, *De vitii-* quam humores & fluida ex atonia, tam solidorum in genere, *fluida-* quam speciatim viscerum, contrahunt. Sic nimiam sanguin- *um ex* nis & humorum redundantiam, quæ plethora vocatur, & *atonia.*

tonum ac robur validamque systolen cordis, arteriarum omniumque vasorum, resistentia sua imminuit & frangit, ca-
 cochymiam inducere nemo nescit. Nam sicut ipsa pletho-
 ra ab imminutis & suppressis excretionibus ortum trahit; ita
 tardior sub eadem sanguinis cursus & minus expeditus ad ex-
 cretoria appulsus, non parum sordium secretionem & seces-
 sum, tum per varia organa, tum maxime per universale illud
 omnium præcipuum emunctorium, cutim, minuit atque suf-
 flaminat. Hinc etiam est, quod sanguis e corpore plethori-
 co emissus, crustam gelatinosam & variegatam exhibeat, &
 frequentius ad minima & lateralia vascula coactus in iisque in-
 carceratus, inflammationes suscitet ægre discutiendas.

§. X.

*Ex atonia visce-
 rum &
 quidem
 hepatis
 & lienis.*

Si hepatis vel lienis viscera, mere fere vasculosa, ex
 atonia nimium sanguine infarciuntur, vel demum occallescent,
 aut indurantur, non modo intercipitur biliosi humoris secre-
 tio ac sanguineus latex bilioso sulphureo excremento inquinat-
 ur, sed & sanguinis ac lymphæ motus plane aliter & præ-
 ter naturam dirigitur. Sanguis enim ad vasa & viscera vici-
 na regurgitans, & appulso arterioso, transitum in venas im-
 pediendo, obicem ponens, efficit, ut nimie ac perniciosæ
 cruoris fiant profusiones, in ventriculo quidem per vasa bre-
 via dehiscencia, vomitiones cruentæ, ex disruptis uterinis va-
 sis, menses copiosi & uteri hæmorrhagiæ, ex venis ani ni-
 mium apertis, enorme hæmorrhoidum profluvium & in reni-
 bus mictio cruenta. Lymphæ autem itinere per vasa lym-
 phatica, quæ his in visceribus discurrunt copiosissima, inter-
 cepto, humor restagnat, & copiosius in vasis abdominis col-
 lectus hydatides format, quibus tandem disruptis, feralis
 lymphæ extravasatio & partium corruptio inducitur. Hinc at-
 tenta observatione patet, & cachexiam, & scorbutum, &
 hydropem, ex solo hepatis vitio, obstructione & infarctu,
 incunabula trahere.

§. XI.

§. XI.

Insuper grave est vitium, quod sanguis tam in cras-^{Ex atonia uteri.}si, quam temperie, a tono uteri admodum dejecto patitur. Videlicet quando perquam salutaris illa per uteri vasa singulis mensium periodis succedens sanguinis evacuatio, quacun-
que etiam ex causa id fiat, imminuitur, supprimitur, vel ob ætatis rationem plane cessat, omnis humorum massa protinus inde vitium capit, & totius corporis malus habitus, sive cachexia, sequitur, languor universum corpus occupat, appetitus prosternitur, facies fit livida & luridi coloris, pedes intumescunt, lassitudo omnes artus infestat, ac demum variæ exulcerationes, item erysipelata, dolores rhevmatici, lentæ quoque febres, proveniunt. Quin sanguis ipse in tali statu exantlatus, morbidum & pravum exhibet colorem, valde serofus est, quandoque pæne lacteus.

§. XII.

In affectibus soporosis, item paralyticis & hemiplecti-^{Ex debilitate capitis.}cis, progressus sanguinis & humorum languidior, languidam-
sape secretionem seri superflui impuri arcessit; unde fit, ut seri summa subnascatur impuritas. Proinde sæpius vidi, post hos cerebri & medullæ spinalis affectus diuturniores, erysi-
pelata, exulcerationes, tumores artuum, purpuræ morbum, ipsamque cachexiam scorbuticam, accessisse. A longiori^{Et ventriculi.} morbo tonum & robur ventriculi valde exsolvi, ut cibi as-
sumti in ejus cavo hæreant, dolorem procreent gravativum, ace-
fcant, corrumpantur & materiam tandem ad febrem len-
tam, nisi medicamento digestivo, emetico, aut roborante stomachico, id avertatur, subministrent, certæ & constan-
tis est observationis.

§. XIII.

Intermittentium paroxysmos, qui universum genus^{Ex imbecillitate post paroxysmos febriles.} vaforum & fibrarum graviter exagitant, sequenti interca-
lari die ingentem excipere atoniam atque debilitatem, pul-
sum febriles.

sum languidum, cutem humidam ac frigidam, a paucis quidem attenditur, licet res ad oculum pateat. Hanc autem partium solidarum laxitatem, & inde retardatum excretionis salutaris impurarum partium negotium, ego quidem merito pro præcipua causa habeo, quod nova materia ad insultum febrilem denuo ciendum succrescat. Sub ipso enim paroxysmo, a motu auctiori solidorum & nimio fluidorum attritu, temperata succorum schesis destruitur plurimaque gignuntur recrementa, quæ si prudens Medicus, remittente febrilium motuum impetu, die vacuo, commoda vacuante medicina, per omnis generis emunctoria opportune educit, fomes subtrahitur & levior incurrit paroxysmus, sin minus, non modo gravior imminet, sed & collectis nimium sordibus, deteriora alia mala sunt metuenda.

§. XIV.

*Remedio-
rum vir-
tus ex so-
lidis in
fluida
transit.
Ut anale-
pticorum.*

Quemadmodum itaque ex vitio & prava solidorum corporis nostri habitudine, in fluida labes & vitium transit; ita vicissim illis ad meliorem rationem redeuntibus atque erectis, ob communionem inter utrosque mutuam, hæ quoque meliorem schesin, indolem atque efficaciam recipiunt. Sic quando vires naturæ ita collapsæ sunt, ut cordis motus languidior, periculosam in morbis omnium motuum, tam secretoriorum, quam excretoriorum, intermissionem ac cessationem mineatur, efficax analepticum ex cinnamomo, vel aliquot guttulæ balsami nostri liquidi, aut potus vini generosi, mox fluidorum progressum & circulum refocillat atque intendit, & omne abigit periculum.

§. XV.

*Venase-
ctionis.*

Quando remissa vis tonica & elastica cordis & articularum in corpore plethorico, in quo pulsus contractus & compressus est & excretiones imminutæ, subtractione superflui sanguinis per venæ incisionem, augetur & revocatur, protinus cordis & vasorum systole intenditur, excretiones suppressæ sordium restituuntur, interdum etiam consuetæ san-

sanguinis evacuationes repetunt. Sanguis nimis spissus & *Motus glutinosus*, qualis est vitæ sedentariæ nimium addictis, ad *corpora* graves morbos disponit, sed motu & exercitatione corporis, aut partium frictione, tenuis, fluidus & ad progressivum motum aptus redditur. Id quod etiam, si occasio vel vires ad corpus motu exercendum deficiunt, clara voce & intenso sermone perfici potest, utpote ex diuturna elata voce oratione, universum corpus calore & sudore perfundi, perspirationem augeri, pulsum celeriores fieri, non ignotum est iis maxime, qui brumali tempore sermones ex suggestu in templo perorant. Dum enim sub loquela vox intenditur, citior quoque fit respiratio, & pulmonum expansio cum reciproco collapsu acceleratur, unde sanguis celerius per pulmonum compagem trajicitur ad cordis ventriculum sinistrum, ex hoc incitatus ad canales appensos per universum corpus truditur, tandemque auctiori facto ubique circulo, velocius ad dextrum ventriculum agitur, pristinumque iter relegit.

§. XVI.

Neque id tantum succedit in partibus externis, sed idem quoque contingit, si partes internæ vehementiori motu agitantur. Nimirum videmus in iis, qui forti & repetita manuum motitatione tympana pulsant, vel globis conos prouunt, universum corpus cum pulsu & respiratione impensiori incalescere, eo quod aucto inde tonico musculosarum partium motu, sanguis vegetius circumagitur. Sola pedum paullo longior & fortior frictio tantum valet, ut *Frictionis* universam sanguinis & humorum massam in celeriores motum, cum intensiori calore ut & perspiratione, adducat; quæ quidem sanguinem commovendi ratio eorum valetudini tuendæ convenientissima est, qui ob senium vel infirmitatem alio motus genere corpus exercere nequeunt. Contra vero *Nitrosi* si spasmodicæ constrictiones in febribus vel affectibus *chronicis* vehementer urgent, & sanguinem gravius exagitando

(III.)

R

æstum

æstum atque dolorem inferunt, medicamentum nitrosum, vel nostrum minerale, naturæ amicissimum, universum sanguineum laticem æstuantem placat, fervorem exstinguit & cutis poros relaxando, liberiorem efficit perspirationem.

§. XVII.

*Corticis
Peruviani.*

Quando cortice Peruviano febriles paroxysmi, qui totam massam sanguinis fervidam & salino-sulphuream reddunt, sistuntur, protinus id ipsum in urina & fecibus alvi animadvertitur. Nam urina, quæ antea, remittente impetu febrili emissâ, erat saturate colorata & crassum deponebat sedimentum, jam tenuior & limpidior redditur, feces autem valde biliosæ & obscuro colore tinctæ, nunc naturalem rursus colorem acquirunt. Longe vero major & excellentior virtus fluidis valde impuris & deturbatis in hypochondriacis & scorbuticis insinuat, quando viscerum infarctus congruo aquarum mineralium potu tollitur & obstructions expediuntur. Et sic quoque solidorum ad immutandam fluidorum schesis facultas patefcet.

*Aquarum
mineralium.*

CAPVT VII.

DE

CAVSIS MORBORVM, ET
QVIDEM LATENTIBVS, RECTE CO-
GNOSCENDIS.

§. I.

*Causarum mor-
bificarum
cognitio
necessaria.*

SI ulla in universa arte nostra doctrina insigni utilitate ac fructu sese commendat, atque etiam ad tutam & auspiciatam medicationem expeditam viam pandit, profecto ea est, quæ morborum genuinas causas perspicue tractat, & quomodo recte eæ cognoscendæ sint, clarius exponit. Quodsi enim Medici officium potissimum hoc est, ut mor-

morbos, vel imminentes arceat, vel præsentés abigat, simulque verum de eorum eventu judicium promat, quomodo ad hunc finem obtinendum certiori ratione pervenire possit, ac si morborum causas exacte scrutetur ac feliciter quoque inveniat, equidem non video. Sane corpus a morbis ingruentibus defendere, quid aliud est, quam eorum primordia & origines scire, & iis salubri consilio & medicina depulsandis studium operamque conferre? Neque aliud sanare est, quam causas, veluti fontes graviorum symptomatum, prudenti medicatione remove. Multo minus vero quis rectum de morbi cursu & certum de eventu formare poterit judicium, nisi ejus causæ veræ & proximæ planius & plenius perspectæ fuerint. Sapienter itaque proditum est ab Hippocrate ejusque fidis sectatoribus: *medicum ad sanandum sufficere, si ad cognoscendum suffecerit*, ut ait, *Lib. de arte* §. 20. Id quod clarius exprimit *Lib. de flatibus* §. 2. *Si quis causas corporis affecti probe cognoverit, potens est valde ea corporibus adferre, quæ corpori commodent, nimirum contraria, morborum natura perspecta.* Atque etiam pulchre more suo Celsus scribit: *causæ morbi investigatio ejusque primordia & occasio in affectionis & remedium cognitionem deducunt amplissimam.*

§. II.

Verum enim vero, quo majori & plane mirifica utilitate hæc de morborum, quinimmo mortis natalibus recte cognoscendis doctrina, eminet: eo negligentius & incuriosius fere in Medicorum scholis & monumentis, vel minimum non satis exquisitè & solide agitur, vel plane silentio transmittitur. Plurimos, qui quotidianis in artis operibus versantur, id tantummodo quærere, ut nomen morbi, quo æger laborat, noscant, neque multum ulterius de corporis ægotantis natura, de causæ morbificæ indole ac vehementia, de sede affecta, deque mali prima origine sollicitos esse, vulgari & ubivis obvia curandi ratione perspectissimum est.

Perquam paucos profecto Practicorum invenies, qui non prius curam morborum aggrediuntur, quam completam & integram morbi historiam hauserint; sed plurimi audito tantum morbi nomine, mox ad medicamenta præscribenda se accingunt, sique unum remedii genus non juvat, confestim aliud in promptu habent, ac demum inopes consilii ad practica scripta confugiunt. Quin oppido rari sunt, qui ex historiis & morborum observationibus, cum cura etiam consignatis, veras causas elicere, vel quod ad praxin tutam conferat, cum certa & fundata ratione eruere possunt, vera theoria & philosophia corporis humani rerumque, quæ saluti vel damno sunt, destituti.

§. III.

*Quod testatur
quorundam
indicationes.*

Morborum causas certa auxiliorum genera indicare, & ex causis bene perspectis, aptam curandi methodum sibi formare debere Medicum, constans quidem omnium merito tulit sententia; sed ineptæ in scriptis obviæ indicationes, eosdem nec unquam de genuinis morborum causis verum & utilem habere & habuisse conceptum, luculenter produnt. Videas, qui magno conatu perhibent, furibundum archeum esse sedandum, & depressum ac emortuum excitandum, naturam in opere suo deficientem adjuvandam, ejus errorem corrigendum, naturam vel archeum alibi & minus recte occupatum, vel aberrantem, sui officii admonendum, discursivum spirituum motum sistendum, morborum fermenta peregrina ejicienda, viscerum fermenta debiliora, & acido exuberante deturbata reparanda, & acidum certis morbis ingenerandis aptum invertendum, lympham fermentificam acido-volatilem tollendam, humorum qualitatem malignam temperandam & expellendam, calidum innatum restaurandum esse, & id genus innumera alia, quorum meminisse piget, immo pudet. Quid vero aliud obscuræ hæ, ineptæ, nullius conceptus & nihil reale significantes, neque ad vitæ, sanitatis, vel morborum rationem explicandam, vel ad remedio-

mediorum inventionem idoneæ, medendi indicationes, quæ proxime ex natura perspecta caussarum morbificarum deprecandæ erant, manifestant, quam genuinas morborum & symptomatum, immo mortis causas, ejusmodi speculatoribus minus esse perspectas planeque incognitas. Quare an quicquam certi vel tuti ab eorum medicatione polliceri sibi quispiam possit, æquus & perspicax quisque dijudicet.

§. III.

Hæc autem tam utilis tamque necessaria veras morbo-Causarum origines investigandi doctrina, quod adeo incognita sit, ^{ignorantia sectionum raritas.} præter alias hæc quoque subest causa, quod morbis defunctorum dissectiones rariores sint, & quod perpauci ex illis utile quippiam & quod ad morbi mortisque historiam explicandam pertineat, apta ratione elicere queant. Non enim certius & melius ad naturam morbificæ causæ & sedem affectam pernoscendam datur subsidium, diligentiori cadaverum morbis enectorum inspectione. Plurima certe in promptu sunt exempla eorum, qui mirificas speculationes de morbi causa in hoc vel illo casu habuerunt, dum alii lienis, alii glandularum mesenterii & hepatis vitia, alii rursus naturam in motibus suis aberrantem, quidam humorum excessivam acredinem accusarunt; ubi dissecto cadavere, apostemata in mesenterio, aut empyemata in pectore, aut polypi in vasis majoribus, vel scirrhusitates viscerum, aut extravasationes humorum in conspectum venerunt. Et licet accuratior causæ morbificæ cognitio non semper satis sit ad eam tollendam, si nempe remediorum efficaciam vincat; id tamen efficit, ut Medicus, an morbus sanationem admittat, nec ne? & quænam medicamenta in minenti malo avertendo idonea sint, quæ non? dijudicare possit.

§. IV.

Interim non dissitendum, arduum & minus firmis con-^{Causarum scrutinium}jecturis esse plerumque stipatum caussarum morbi scrutinium, ut in præstantissimis Medicis jure meritoque is haberi ^{de-}difficile.

debeat, qui in eo excellit. Hoc enim revera est, quod Medico nominis famam ac celebritatem quam maxime conciliat, si veraci augurio quæ impervia corporis penetralia reconducunt, assequi, & felici cum successu ad eadem medicationem suam dirigere, vel si majus arte malum, ipso sub sectione aspectu, ratiocinii veritatem confirmare novit. Et justa certe de causa *Johannes Langius Lib. I. Epist. I.* conquestus est: quod minus celebre nomen sit Medicorum Germaniæ apud externos, quia nempe præcipua Medicinæ pars diagnostica, quæ ex suis signis morbi naturam, causas & substantiam docet cognoscere, vel ignoratur, aut ob desidiæ negligitur.

§. V.

*Instituti
ratio.*

Posteaquam igitur in superioribus formalem omnium morborum rationem, in turbato æquabili & moderato solidorum inprimis cordis & omnis generis vasorum, motu contractorio & expansivo reciproco, contineri demonstravimus, simulque vitia quæ inde in fluida redundant exposuimus: transeundum nunc etiam est ad causarum disquisitionem. Quum vero in *secundo medicina rationalis systematicæ* tomo omnes omnino causarum series, quæ proxime, mediate & remote ad morbos producendos conferunt, cunctas quoque res quæ sanitati & vitæ infestæ, accurate satis & copiose excussimus: licebit ibi dicta hic tantisper supponere, & meditationi potius subicere eas tantum morborum causas, quæ latentes & paullo abstrusioris sunt indaginis, graves tamen ac difficiles morbos, quin ipsam mortem, ingignunt, simulque dispicere, quo pacto Medicus probabiliter, rationali tamen conjectura, easdem possit investigare atque cognoscere.

§. VI.

*Ad causas
latentes
referenda
malignitas.*

Placet autem tractationis exordium ab evolutione malignitatis, quæ communi Medicorum consensu compluribus morbis summum adjicit periculum, capere. Jam vero nihil

nihil certius est, quam plurimos inter mortales morbis extingui, quibus malignitas assignatur, ceu causa summi periculi & mortis, & quæ prudentiam medentis & virtutem medicamenti facile superat, quod testantur potissimum febres acutæ & præcipue epidemice grassantes malignæ, purpuratæ, petechiales, catarrhales, pleuritides, dysenteria, angina, variolæ atque morbilli. Malignitatis itaque in morbis acutis nota est subita & plenaria omnium virium prostratio atque defectio, quæ hisce indiciis se prodit: omnis animi ac corporis vigor dejectus est, artus robur & pristinam ad motum potentiam amiserunt, pulsus arteriarum ob systolen cordis contractiorem & languidam exilior & debilior fit, nullus placidus & qui reficiat est somnus, sed somnolentia quædam magis magisque debilitans, vel assidua vigilia premit, ægri jacent plerumque sine dolore & sine singulari sensu, neque calor in exterioribus partibus adeo intensus est, sunt anxii & inquieti, mutant sæpius situm, inque eo erecto perquam facile in animi defectionem incidunt, alvus minus recte respondet, urina plerumque tenuis, licet crebrius emittitur, respiratio est difficilior, male cohærentia loquuntur & sine singulari convulsione valida frequentius intra paucos dies extinguuntur.

S. VII.

Ex hisce liquido apparet, malignitatem viribus, quæ vi-
tam absolvunt & tuentur, insensissimam esse. Quid vero sit *bus ma-*
malignitas, & cur tam pernicialis sit? non alienum erit, hic *xime in-*
exponere. In quo quidem evolvendo, si quis defectionis *sensa.*
virium & malignitatis causam per calidum nativum debile vel
extinctum, aut per cessationem naturæ vel archei a motu
suo & directione corporis, aut per spirituum vitalium oppres-
sionem, explicare velit: is certe nihil, quod concipi pos-
sit, quod vere existat & quod in applicatione & in connec-
tione usui sit, afferet. Missis potius ejusmodi fictis ter-
minis, ita sentiendum esse censemus: vires quæ corpori no-
stro

suo insunt, non alias esse, nisi motrices, & quæ a convenienti boni sanguinis in partes influxu, salvis tamen & integris nervis, proficiuntur; atque adeo eos præ aliis esse robustiores, qui ampliora habent vasa, qui fibras compactiores & laudabilem sanguinis apparatus obtinent; imbecilliores vero, quibus fibræ sunt laxæ, vasa angustiora & quibus parcius sanguis inest. Præterea corporis nostri vires a convenienti victu, a liquido subtili & spirituofo, ab aëre puro & temperato egregie foveri & depressas mox resuscitari, & vicissim a victu incongruo, omnis spiritus & virtutis experte, ab odore vel medicina vaporosa & graveolenti, ingentem induci virium jacturam. Denique omnibus iis affectibus, qui a conferta crudorum & impurorum humorum, vel sanguinis copia, originem trahunt, notabilem languorem viriumque lapsum perpetuo fere jungi. Manifestæ igitur sunt virium, quæ vitæ, & omnium actionum vitalium præsidēs sunt, causæ, præsentē quippe sanguine temperato, subtilibus elasticis & volatilibus partibus referto, & sufficiente facto ad quævis organa affluxu, omnes partes solidæ & motrices, earumque princeps cor, debitum suum tonum, robur motumque constrictionis & dilatationis, qui universam œconomiam animalem gubernat, accipiunt.

S. VIII.

Ob putridam in interioribus corruptionem.

Has itaque vires prosternit malignitas, cujus indoles atque origo quam optime ex interiorum perlustratione in iis, qui ex acutis & malignis morbis decesserunt, erui potest. Nimirum si observationes & dissectiones eorum, qui peste, petechiis & aliis malignis febribus mortui consuevimus, & quæ a nobis ipsis hac in re visa sunt recordamur, nunquam non notabilis, vel in ventriculo, vel intestinorum volumine consistens putrida, foetida corruptio, sive sphacelatio, sese obtulit; ut inducamur credere, nunquam veram malignitatem periculi plenam adesse, ubi non quædam ex solidis partibus interioribus sphacelo & putredine infectæ fuerint

fuerint. Jam nihil in universa rerum natura existit, quod magis animantibus adversum sit, quam ipsa putredo. Hæc enim intestinus & celerrime vires sumens destructivus motus est, qui non modo partium fluidarum texturam ac mixtionem, sed & solidarum structuram invertit, dissolvit & subtiliores fluidas, impetum ac motum facientes partes, hostili vapore contaminat. Videmus certe sphacelum exterioribus partibus incumbentem subito & omnes vires exhaurire & vitam brevi extinguere; multo magis interior ejusmodi partium corruptio exitium creabit præsentissimum. Et quemadmodum, qui ex cancro maligno, cui teterrima putredo semper jungitur, vel ex sphacelo moriuntur, haud dissimilibus symptomatibus, ac illi qui peste & malignis febribus decedunt, divexantur, ita horum unam eandemque esse causam, nempe putredinem, merito concludimus.

§. IX.

Neque vero tantum putredo & sphacelatio interna ^{Que in} rum partium in acutis & malignis febribus reperitur, sed hæc ^{acutis &} ipsa etiam funestorum morborum aliorum frequentior causa ^{chronica} est, ac plerumque fert opinio. Proinde nostrum de mor- ^{morbis} bis plurimis feralibus & periculosis judicium hoc est: pleri- ^{adeft.} que pro causa putridam corruptionem internam agnoscunt, & raro homo ex morbis moritur, ubi non putris quædam corruptio in causa fuerit. Sicuti autem ipsa putredo gradu majori, vel minori, differt, & alia in sero, alia in sanguine est, ipsæ etiam partes, quibus infidet, ratione structuræ & usus valde diffidentes sunt; ita effectus quoque & vis putredinis diversa est, quum quædam vehementius agat & celeriter interficiat, alia mitiori modo incedat magisque chronica sit. Patet hoc febrium hæticarum exemplo, quæ nunquam non a corruptione viscerum foveantur, & phthisi, hydropi, cachexiæ scorbuticæ, in fine ordinario fere accedere solent, similibus quoque ferme symptomatibus progrediuntur, tantum quod lentiori gradu ad mortem grassentur. Nemo enim

enim non novit, hæcticis & quæ demum hydropicis, scorbuticis & cachecticis complicantur febribus, ingentem corporis languorem viriumque jacturam, cum plenaria ad motum & labores impotentia, appetitus identidem totalem prostrationem nec non somni quieti & reficientis assiduum defectum & calorem consumentem, cum sudore colliquativo & marcere incredibili pulsusque continua celeritate ac debilitate, perpetuo conjungi; donec tandem alvi profluvium, pedum intumescencia, crebrior animi defectio finem vitæ claudant. Quo facto sub interiorum lustratione, hepar, lienem, pancreas, maxime omnium vero omentum, interdum etiam uterum, in thorace pulmones corruptos ac putridos, cum extravasato ibi putrido sero, plerumque reperimus.

§. X.

De spacelo ventriculi.

Quamvis autem morbi, a putredine & sphacelo interno orti, plurima signa communia habeant: nihilo tamen fecius pro differentia viscerum quæ occupant, & pro natura etiam putredinis, celerius vel tardius serpentis, peculiaribus quibusdam notis, quas breviter strictimque recensere, distinguuntur. Primo vero notandum est, deterrimæ indolis esse eam sphacelationem, quæ partes ventriculi & intestinorum nerveas membranaceas occupat, eo quod celerrime interficit & morbos etiam peracutos, immo acutissimos, progignit. Videlicet, si putrida corruptio in ventriculo consistit, præter summam illam virium prostrationem & signa malignitati communia, singularis nausea & quædam eructationis lymphæ in os species, ad vomitum inclinatio, itemque singultus, cum sensu quodam frigoris circa præcordia interno, sese exserunt: præcedit summa anxietas corporisque jactatio, & fixus in regione præcordiorum ardor, qui tamen cum dolore subito cessat. Ab hac non differt, quæ a veneno vel maligno pharmaco in robustis & sanis antea corporibus producit, quippe quæ brevi pariter necat, & deli-

delirium ac convulsio, cum plenaria pulsuum per aliquot horas intermissione, mortem antecedit.

§. XI.

Neque duodeni inflammatio eique succedens sphace-^{Duodeni.}latio infrequens est. Nam morbis acutis, cholerae & febribus cholericis, ex facili supervenit, & gravissimae quoque irae soboles est. Hisce vero notis distinguitur: ingens & valde anxius viresque prosterbens cum sudore frigido circa dextrum regionis praecordialis latus constans est ardor, cui facies lurida & flavo colore tincta jungitur, quia spastica strictura liber bilis ad intestina descensus praeccluditur, eademque per vasa lymphatica ad sanguinem regurgitat: comitem quoque duodeni inflammatio plerumque habet singul-^{Et reli-}tum, incredibiles anxietates & inquietudines, ob nervosas partes tam graviter laceffitas. Intestina tenuiora ubi spha-^{quorum}celosa inflammatio adoritur, praeter assiduam febrem, dolor ^{intestino-}cum interno incendio circa umbilicalem regionem percipitur; ^{rum te-}alvi nimia strictura est, succedit tandem summa virium defe-^{nuum.}ctio, cum sudore frigido, pulsu debili & inaequali, sensus doloris simul & semel perit & excrementa foetida, interdum sanguinea, sponte feruntur. Quae signa priora inflammationem, posteriora vero sphacelum designant; ubi iterum notandum hoc est, quod, si a causa violenta externa, ut ab intestino in hernia incarcerato, ab assumpto veneno, vel pharmaco virulentiae non exerce, aut ab animi graviore affectu, producta fuerint, delirium & convulsio mortem celeriore efficiant.

§. XII.

Intestina in deterioris notae dysenteria, inflammatio-^{Maxime}ne acuta & sphacelo quoque corripitur, procul ab omni dubio ^{in dysen-}est. Illam atrocia, cum febre, siti, interno ventris ardore, ^{teria.}tormina, penitus manifestant: hujus vero subita indolentia, quando confestim simul & semel dolor, qui antea erat intolerabilis, & ardor desinit, haud fallax indicium est; ma-^{S 2}jori

jori simul reddito excrementorum pædore & virium decremento adaucto. Rectum etiam intestinum ex acutissimo & immani, ob profundiorum hæmorrhoidum internarum tumorem, dolore, foetidissimæ sphacelationi obnoxium esse, non semel sed sæpius experti sumus. Hæc mox latius serpit, & tam intestina, quam partes exteriores, nates & scrotum, tetra putrilagine cum nigrore ac tumore inficit. Fæces, quæ sponte plerumque secedunt, intolerabilis, ob iis admixtum putredinis fermentum, sunt foetoris, tandem febris continua, sed mitior, cum totali virium lapsu juncta, cujus naturæ solet esse putrida & vere maligna, vitam extinguunt.

§. XIII.

De sphacelo viscerum abdominalis.

Quando porro putrida corruptio abdomen inque eo contenta viscera, hepar, lienem, omentum, invaserit, tum non tam cito tragoediam suam conficit. In hydropicis, scorbuticis & cachecticis eandem prodit totale ciborum fastidium, pulsus celer, debilis & inæqualis somnusque laboriosus. Certum vero ac plane infallibile viscerum in abdomine sphacelatorum signum est, si plenaria appetitus prostratio indefinenter per aliquot hebdomades laborantem premit, & hanc nunquam in ejusmodi morbis fausti ominis esse plurimis experimentis confirmatum habeo. Putredo enim adjacentibus visceribus insidens, non potest non ventriculi robur enervare & liquoris gastrici menstrua vim atque activitatem penitus infectione contaminare atque infringere. Neque uterus ab ejusmodi foetida perniciali corruptione plane immunis est. Hæc in puerperis, vel in aliis, maxime nimio sanguinis profluvio debilitatis, sexus sequioris corporibus, facile contingit. Visitur ab initio inflammatio & febris acuta inflammatoria, ex suppressione lochiorum frequentissima, qua sedata, circa pubem frigoris sensus est, ad alvum maximeque urinam stimulus, & fluxus lochiorum,

Uteri quoque.

antea

antea pertinaciter cohibitus, brevi ante mortem sponte sua demum procedit.

§. XIV.

Phthificis & qui ex pulmonum diuturno vitio laborarunt, *De corruptione* tandem putredo cum febre putrida sic dicta hectica, quæ *viptione* paulatim opprimit, supervenit, cujus indicia sunt, præ-*pulmo-*ter foetidam ex ore exhalationem, facilis in situ erecto animi *num.* defectio, expectoratio cessans, pectorisque oppressio cum spiritus difficultate. *Et seni-* *rum* corruptionem incidunt, omnis perit appetitus, assiduus *bis fami-* *adeft* calor, unde vires paulatim consumuntur, ut tandem *liari ma-* *penitus* deficient, qui affectus communiter marasmus appel- *rasmo.* latur. Ceterum internis viscerum corruptionibus individuus comes est febris continua, cum calore quidem non adeo acris & externo, qui tamen vires & succos sensim absumit: ita quidem, ut certis intervallis remittat, non vero intermittat, postea exacerbetur, donec tandem plenario virium lapsu penitus opprimat.

§. XV.

Corripit denique sphacelus ipsas membranas cerebri, *De spha-* *ejusque* substantiam, qui tamen non nisi præcedente inflam- *celo* *matione* oboritur, & hisce indiciis sese manifestat. Primum *membra-* *arteriæ* temporum & interiores cerebri vehementius pulsant, *narum* *facies* est rubicunda, oculi feroces, somnus nullus, *cerebri.* *urina* *tenuis*, omnia furoris plena, quæ notæ phrenitidis sunt. Postea subito compositus fit animus & ad intelligentiam redit, nihil vero nisi de summa virium defectione ægri conqueruntur, facies ante rubicunda in luridam mutatur, pulsus inæqualis ac debilis est, & sponte sæpe sanguis e naribus, paucus tamen, prodit, & hæc omnia inflammationem in sphacelum transiisse & mortem adesse significant. Lethalem ejusmodi phrenitidem aliquoties vidi in puerperis, quæ subsistente lochiorum fluxu, accedente febre acuta, nono interierunt die.

§. XVI.

*De puru-
lenta
sanguinis
corru-
ptione.*

Præter putridam quæ in sanguinem cadit corruptionem, alia adhuc non adeo tamen exitiosa, ejus species est, qua ille extra vasa consistens, ex inflammatione præcedente, in purulentam substantiam fatiscit, & apostema, quod nihil nisi ingens purulentæ materiæ in quadam parte collectio est, efformat. Prout vero ejusmodi abscessus variat, easque vel internas, vel externas,prehendit partes, ita differentibus etiam & peculiaribus signis cognoscitur. Et quum subinde apostema longo artis usu exercitatos Medicos fallat, non incongruum erit, hoc loco exponere, quibus indiciis in universum & speciatim etiam sese prodatur. Igitur in genere sciendum est: omnibus abscessibus, ubicunque etiam lateant, febrem continuam, lentam quotidianam, cum remissione & exacerbatione, pulsu debili & celeri, quæ tandem vires & succos depascit, nec non sudorem continuum, præsertim nocturnum, conjungi, adeo, ut corporis partium marcor nunquam non sequatur.

§. XVII.

*De ab-
scessibus
in abdo-
minis in-
tegumen-
tis.*

Primum vero apostema non raro abdominis regionem obsidet, atque inter peritoneum ejusque musculos sedem fixam habet. Cognoscitur, si vel supra, vel infra umbilicum, aut ad latera, circa costas spurias, versus dorsum, fixus cum tumore duro dolor per longius tempus persistit. Præterea inappetentia, calor lentus cum insigni marcere, pulsuque celeri adsunt, urina sedimentum ponit, & vires indies decrescunt. Quæ symptomata, valde dissidentes Medicorum conjecturas subinde perperisse meminimus, quum alii malum pro inflatione intestini coli, alii pro glandulæ omentalis tumore & scirrho, nonnulli pro dolore calculi habuerunt: adhibitis vero externis mollientibus cataplasmatibus, tumor durus tactui renitens, mox pure repletus valde increvit, & apertus copiosum cum foetore pus effudit.

§. XVIII.

S. XVIII.

Si quando abscessus thoracem occupat, quod sæpius *in the-*
ex male curata pleuritide, & vera & spuria, aut ob gravio-*race.*
 rem casum, vel etiam ex morbillorum aut variolarum reli-
 quis accidit, tunc identidem continua lenta adest febris, sed
 tamen specialibus indiciis ejusmodi abscessus se prodit. In
 dextro vel sinistro thoracis latere dolor est obtusus & pressor-
 ius, cum anxietate inexplicabili, tussi nocturna, spirandi
 difficultate, pulsus est celer & languidus, partes marcore
 confectæ, & inter has maxime pectus emaciatum, quin sano
 lateri vix incumbere possunt. Si vero ingens puris quantitas
 ad plures sæpius libras in thoracis cavo fluctuat, tumor in la-
 tere affecto circa dorsum satis manifestus, a scapulis usque ad
 ilia, sæpe prominet.

S. XIX.

Quando pus extra vasa effusum fuerit, id diuturnio-*Pure ef-*
ri mora acre factum, diaphragmatis nerveos processus ve-*fuso.*
 hementius lancinat, & dolor intolerabilis non procul a
 lumbis oritur, qui sæpe sagacioribus Medicis imponit. Re-
 dit præ ceteris in memoriam exemplum serenissimi Principis
 juventutis, qui post variolas lenta febre, spiratione difficili,
 cum virium languore & macie afficiebatur, quibus demum
 accedebat atrox circa regionem lumbarem sinistri lateris do-
 lor, appetentia prostrata, somnum cum viribus penitus con-
 sumens, ægre post aliquod tempus occumbente. Medicus
 curæ præfectus dolorem riaturæ esse errorem quidem vole-
 bat, sed aperto post mortem abdomine, ex diaphragmate,
 acie cultri læso, sanies copiosa stillabat, & dissecto demum
 thorace, ingens puris quantitas in conspectum prodibat, to-
 tusque sinister pulmo ad vasa usque consumtus & tabo dif-
 fluens, deprehendebatur. Ubi vero purulenta sanies conce-*Et vom-*
 ptaculo adhuc includitur, vomica appellatur, quam fixus diu-*ca inclu-*
 turnus ac comprimens in pectore dolor prodit, qui nec per *so.*
sputa, nec per sanguinis detractionem, neque per infusa ca-
 lida

lida resolventia placatur, sed cum pulsu celeri, tussi sicca, anhelitus foetore, marcore, virium languore, inappetentia & largo debilitante sudore, continuat. Ipsa magnitudo vomicae ex majori spiritus angustia, ingenti anxietate, pulsu duro, quandoque erecto collo intermittente, dijudicatur. Ubi demum pus perrumpit & vomica aperitur, tussi foetidi quippiam puris ejicitur.

§. XX.

*Abscessus
mesen-
terii.*

Evenit quoque non raro, ut variis ex causis, praesertim vehementiori in terram lapsu ac contusione, intra mesenterii membranas abscessus colligatur, cujus notae non semper cognitu adeo faciles sunt. Sentitur in medio abdominis quaedam gravitas, sine manifesto dolore vel tumore, febris est lenta, virium languor & animi crebrior defectio cum sudore frigido urget, quandoque vires melius constant, interdum sanies cum excrementis per alvum secedit, inhorrescit sapius aeger, & haec symptomata diutius detinent. Si ex disrupto abscessu sanies in abdominis cavum ipsamque pelvim descendit, dolor acutus cum crebriori ad urinam stimulo affligit, sed parum redditur, quandoque etiam puris acrimonia, intestinorum tunicas rodendo, immanem dolorem cum febre ac tumore procreat.

§. XXI.

*In mu-
sculis
dorsi.*

Ex utero.

Ubi vero in dorso, intra peritonei membranam, & musculos psoas usque ad os sacrum, tabi copia colligitur, praeter alia consueta abscessuum symptomata, dolor cum tumore ardens in lumbis continuus & satis gravis ac fixus, qui situ in dorso exacerbatur, percipitur, & tunc urina, pauca tamen, variis fibrillis repleta, cum stranguria emingitur. Observatum quoque a nobis est apostema in utero, post abortum, ab assumpto vehementi emetico productum, ita quidem, ut postquam diutius laborantem dolor circa os sacrum & pubem cum febre, alvo adstricta, urinae difficultate, exercuisset, facta sectione, pus foetidissimum circa uterum ad libram & ultra fluctuans, totus uterus pure scatens, erosa pas-

sim per cuniculos perforatos ejus substantia, deprehenderetur.

§. XXII.

Renes porro patent pariter abscessibus, qui totam eo-^{In reni-}
rum substantiam non adeo raro ita consumunt, ut teste ana-^{bis.}
tome, nihil præter membranofum concrementum, sacculi in
modum contractum, relinquatur. Tali in casu mingitur uri-
na mox cruenta, mox ob puris miscelam lactescens, inter-
dum glutinosa, crassa, tenaci materia mali odoris referta,
quæ in fundo hæret, neque ad vitri agitationem dissolvitur.
Nonnunquam sanies ex rene putri in pelvim stillat, subsequen-
te vix tolerando in regione pubis dolore, ob rosionem quam
in vesica & adjacentibus partibus efficit. Ejusmodi abscessus
in plethoricis & scorbuticis feminis, cessante circa quinquagelimum annum mensium fluxu, item in viris, quibus hæ-
morrhoidum fluxus substitit, vel consueta sanguinis missio
omissa, notavi, imprimis si Medici diureticis calidioribus,
vel etiam imprudenter thermis Carolinis ad calculum dissol-
vendum & ejiciendum, usi fuerunt.

§. XXIII.

Neque caput ab abscessibus penitus immune est, quan-^{In ca-}
doquidem intra parotides, præsertim apud infantes, si pus^{pire.}
detinetur, intolerabilis circa aures cum tumore fit dolor, vi-
gilias cum febre ad delirium usque producens. Intra cavitates
ossis frontis abscessus quoque delitescit, qui intensissimum
in fronte & circa radicem nasi dolorem, totum caput in con-
sensum trahentem, excitare solet; sed pure tenui, flavo,
foetido, successive ad aliquot cochlearia per nares sive sponte
prodeunte, sive ab applicato convenienti errhino subducto,
tandem conquiescit.

§. XXIV.

Accedit aliud genus abscessuum, sive potius tumo-^{Tumores}
rum, qui non purulentum, sed lymphaticum & serosum hu-^{seroso-}
morem continent, neque ex præcedente inflammatione, sed^{lymphati-}
^{tici in}
(III.) T po-thorace.

potius ex lymphæ cursu impedito originem trahunt, quorum sedes minime in visceribus vel in partibus sanguine plenis est, sed intra membranarum tunicas consistit, neque humor, quem condunt, erodentis, ut pus, est naturæ, inde etiam non partium quibus inest substantiam depascit. Hi tumores non raro prægrandes fiunt, ut vel plures libras feri puri, quod calore in offam, ut albumen ovi, abit, completantur, ac sæpissime hærent intra duplicaturam pleuræ, & cavitatem thoracis replent; quibus disruptis, ingens pectoris fit inundatio, quæ pulmonum expansionem & motum diaphragmatis impediendo, ægrum suffocatione tollit opprimitque. Vidimus talem casum ante aliquot annos in generoso militiæ præfecto, qui de dolore in pectore continuo, fixo & compressorio sinistri lateris conquerebatur, paulo difficilis cum tussi sicca perpetuo aderat respiratio, quæ intervallis, præsertim noctu ab incongruo maxime situ, ita ingravescebat, ut summa anxietas cum suffocationis metu per aliquot horas adesset, pulsus continuo frequens, mollis tamen, sine siti vel notabili calore, neque appetitus, neque somnus plane deficiebant; pedes frigidi & una cum scroto tumore oedematoso laborabant, exterius in thoracis regione nihil tumoris, nihil ruboris animadvertebatur. Accidit demum, ut a paulo fortiori thoracis commotione a cachinno confestim in maximam & continuam spirandi angustiam atque anxietatem, quæ ad quindecim horas durabat, incideret, qua etiam infelicitè misereque suffocatus periit. Aperta thoracis cavitate, latus sinistrum totum feri minimum octo libræ inundabant, quod largius, levi saltim incifura facta, effluebat, eodemque penitus effuso, membrana-ceum receptaculum disci majoris magnitudine, tenue tamen, ad latus sinistrum in conspectum venit, quod sine omni dubio ex membrana pleuræ productum erat, & collecta intra duplicaturam ex vasis lymphaticis disruptis lymphæ, talem capsulam sibi efformaverat. Reliqua viscera satis erant in-

tegra, nec alio, nisi quod ex morbi diuturnitate contraxerant, vitio laborabant. Causam vero & ortum hujus affectus æger in acre ac intensum frigus, quod in expeditione Rugienti passus, rejecit.

§. XXV.

Neque dubium est, quin ejusmodi serosi abscessus & *In abdomine.* tumores in abdominis cavitate sæpe occulti lateant, & vel in mesenterio, aut in dorso, intra duplicaturam peritonei, vel intra uteri membranas, quandoque etiam intra ipsum ovarium, contineantur, qui dehiscences, facto semper affluxu majori, feri copiam in abdominis cavitatem ingentem fundunt, quod corruptione dum inficit viscera, fatalem diem arcessit. Non quidem sine difficultate ejusmodi tumores cognoscuntur, & a posteriori magis & noxio eventu atque effectu demum se produnt, si videlicet in mali habitus corporibus & diutius infirmis subito hydrops gignitur, abdomen intumescit, & fluctuantes aquæ vario in latera decubitu percipiuntur; id quod etiam concludendum est, si quis diuturno pectoris dolore & respirandi angustia affectus, confestim in suffocativam spirandi angustiam non superabilem incidit, ubi certe subiti ejusmodi hydropis generatio non aliam causam, quam rupturam ingentis aquosi tumoris & effusionem copiosam feri in cavitates agnoscit. Quod vero intra membranas tumores, quibus extra vasa positus humor infidet, gigni possint, evidenti testimonio est ille tumor, qui salvis internis visceribus intra duplicaturam peritonei hospitatur & mole sua abdomen ejusque musculos mire distendit, adeo, ut verum hydropem mentiatur. Quo in casu *Nuckius* aliique paracenthesin, quæ in anasarca nunquam non plus exitii quam salutis affert, summe proficuum observarunt.

§. XXVI.

Ab abscessibus ad partium exulcerationes transimus, *Exulcerationes* quæ ab illis non parum differunt, tum quod abscessus *co-raciones* *piam interne.*

*In ven-
triculo.*

piam materiæ, & purum, album, coctum pus, ulcera vero parum ichoris & feri foetidi fundant, illi magis partes sanguineas succulentas, hæc vero membranaceas, frigidas & ficcas adorianitur ibique sedem fixiorem habeant. Ipse ventriculus, qui partium membranacearum facile princeps est, ab his nonnunquam attentatur. Meminimus olim civem Mindensem, ob nimiam spiritus vini ingurgitationem & frequentiore iram, acerbissimo dolore ac tumore circa præcordia correptum fuisse, qui sumto cibo crescebat, utut vomitu non ita multo post rejiceretur. Accedebat universi corporis marcor, frequens erat lipothymia, alvi excrementa nigricante colore interdum tincta erant, quumque per dimidium fere anni misere decubuisset, tandem fato concessit. Aperto cadavere, ventriculus parvus & valde contractus, crassus tamen & albicans inventus fuit, rugis & etiam punctulis intus obsitus, quibus incisus, materia saniosa foetida exstillavit, & in corde ac omnibus vasis parum sanguinis repertum.

§. XXVII.

In vesica.

Vesicam quoque non raro chronicum & molestum ulcus, sive ex luis Gallicæ contagio, sive ex calculi grandioris attritu, aut ex cessante consueto hæmorrhoidali fluxu, fovere, non novum est. Id vero magnus urinam emittendi stimulus, cum ardore & difficultate manifestat. Urina mingitur crassa, quæ subinde instar albuminis ovi coherens, simul ex vase effunditur, inque ea non modo pelliculæ & furfuracea quædam natant, sed & serum viscidum ac purulentum in fundum dejecitur. Dolor etiam valde gravis pubis ac perinæi regioni incumbit, cujus tanta sæpius sævitia, ut partes extremæ inde inhorrescant, qui tamen remittit, si largiorem quotidie ac tenuem potum ægri assumunt, quippe tunc urina facilius prodit, cum copioso mucido sedimento. Ab ejusmodi ulcere vesica densatur & corrugatur, exterius albicat, fibræ contractæ, nigricantes

ac

ac sphacelatæ apparent, & pus in ea cuniculos format. Quin si materia foetida acris in pelvim descendit, vicinæ etiam partes putredine inficiuntur, qualem observationem *Miscell. Natur. curios. Dec. II. Ann. VI. observ. 100.* commemorant. Si calculus in vesica ejus exulcerationis causa est, tenesmus, cujus vehementia non raro rectum propellitur, perpetuo urget, urina est purulenta & arenosa, inque pelvi pruritus percipitur, & sub situ erecto dolor augetur.

§. XXVIII.

Si vero prostratis & glandulosæ urethræ multis lacu- *In pro-*
nis præditæ tunicæ, quod sæpius a male curata gonorrhœa, *stratis.*
nec non in lue venerea infectis accidit, exulceratio insidet, ut plurimum in consensum collum vesicæ trahitur, crebrior ad urinam est stimulus, sed cum intenso ardore & dolore mingitur, & difficulter, ob urethram spasmo contractam, redditur. Ex glande etiam membri subinde liquor, qui consistentia, colore & acrimonia differt, stillat, vel manu exprimitur, atque in urina sedimentum albicans, cum filamentis natantibus, quæ vermiculorum figuram referunt, conspicitur.

§. XXIX.

Ad caussarum quæ valde difficiles & plerumque le- *Funebris*
thales affectus inducunt classem referendæ porro sunt san- *morbore*
guinis, vel etiam feri, extra vasa factæ effusiones & stagna- *caussis*
tiones. Inter has ea, quæ intra cerebri ventriculos, ob ple- *annume-*
xum choroideum disruptum, contingit sanguinis extravasa- *randæ*
tio, periculosissima est, & apoplexiam fortem, brevi enecan- *effusiones*
tem, efficit. At vero quum alia etiam sit apoplexiæ non in- *sanguinis*
frequens species, qua ægri salvo pulsu & respiratione, fa- *in capite.*
cie florida & rubicunda, diu sine sensu & motu jacent, & tamen servantur, non immerito indicia, quibus utraque distinguatur, desiderantur. Fortis quum a sanguinis effusione immedicabili fiat, has habet notas: jungitur illi ut plurimum vel paralyfis, vel convulsio. Illa visitur, si unum la-

tus frigidum & quasi mortuum torpet, alvusque sponte fertur: hæc vero vehementi thoracis motu & elevatione cum stertore, roncho & sonitu, neque minus artuum distractione, elevatione, aut ventriculi per vomitum subversione, manifestatur, & sanguis interdum e naribus profluit. In mitiori vero, secus res habet, quæ in hysteris, hypochondriacis, plethoricis, a vasorum cerebri, ob copiosius per spasmos eo congestum sanguinem, distensione fit: quo casu maxima spes in sanguinis missione reponenda est, ne pernicialis canaliculum ruptura accedat.

§. XXX.

In abdomine & quidem ex ovario.

Rarius in thoracis cavitate, nisi a violenta vasorum dilaceratione, sanguinis effusio contingit; in abdomine vero id evenisse recorder. Ante viginti circiter annos nobilis in hac urbe femina triginti annorum, elegantis formæ, quartum mensem gravida, præter omnium opinionem de subito virium languore conqueritur, facies contrahitur, livida & frigida fit, ad vomitum adest inclinatio, erecto capite animi defectio invadit, quæ crebrius repetens, intra decem horas cum magno dolore mariti uxorem e vivis abripit. Dissecto abdomine, in ejus cavitate ingens sanguinis congruati ad libras aliquot copia reperiebatur, qui ex disruptis ovarii multum tumefacti & grumis sanguinis adhuc obseffi, vasis effusus erat.

§. XXXI.

Ex vasis brevibus ventriculi.

Nullibi tamen canales sanguiferi facilius diffiliunt, quam in sinistra ventriculi parte vasa sic dicta brevina, quæ tenui membrana obducta, ab irruente copiosius cruore, non solum ex facili diducuntur, sed etiam demum perforantur, hanc potissimum ob causam, quod intercepto sanguinis per lienis vasculosam, ac raræ mollisque texturæ compagem progressu, is per brevium emissaria exitum sibi paret. Hoc autem si evenit, vomitus sequitur sæpe effrenis sanguinis nigri, foetidi atque grumosi, qualis etiam per alvum secedit &

cly-

clysteribus educitur. Et licet rejecta stomachum aggravante sanguinis mole, symptomata tantisper levare videantur; repetit tamen ut plurimum vomitio & ægri intra paucas horas inter lipothymias placide obdormiscunt. Cognoscitur hic morbus ex inappetentia, animi dejectione, magna circa præcordia anxietate, vomituratione ad animi usque deliquium, ardore ac aestu in regionis epigastricæ sinistro maxime latere, & familiaris est feminis post quinquagesimum annum, diuturno mœrore confectis. Dici enim vix potest, quam gravem labem lienis viscus ex longa contrahat tristitia, quæ uti ira hepar & ductus biliarios potissimum afficit, lienem noxam affricat, ita quidem, ut præter imbecillitatem, quæ inde in universum corpus redundat, huic potissimum robur & vim resistantem adimat illudque ad concipiendos infarctus disponat. Ut adeo Veterum sententia, qua hepar iræ & lien melancholiæ sedem esse volunt, ratione & experientia non destituatur, modo melior & rationalis accedat explicatio.

§. XXXII.

Pariter quandoque lethalis ruptura vasorum interno-^{Ex ruptis} rum hæmorrhoidalium accidit. Novimus primipilum quendam, natione Gallum, qui liberalius utens vino adstringen-^{interne} te Francico, quod vocant Pontack, subsistente consueto hæmorrhoidum fluxu, in atrocem dolorem dorsi & cruciatibus^{hæmorrhoidalibus.} infra umbilicum incidit, cum febre lenta, purpuracea etiam, largo sudore & alvi tam firma constipatione, ut clystere injecto nihil redderet, sed tormenta potius augescerent. Secta fuit vena, propinata nitrosa, oleosa, demulcentia, mannata aliaque plura, demum simul & semel aliquot mensuras sanguinis foetidi & grumosi per anum ejecit, ipseque lipothymia correptus diem obiit. Neque alia hujus affectus & eventus fuit causa, quam quod facta nimium & distenta coli ac recti vasa, dolorem, & rupta, funestum profluvium intulerint.

§. XXXIII.

§. XXXIII.

*Extrava-
riones se-
vi varia.*

His frequentiores sunt feri intra cavitates effusiones, ac inter has ea, quæ fit in capite, & ætati infantili infesta, immani magnitudine ac tumore, quem hydrocephalum dicunt, & aliarum partium marcore, in conspectum venit. Eadem feri intra cavum thoracis collectio & stagnatio, quæ hydrops thoracis audit, iis, qui polypum grandiore in corde & majoribus ejus vasis gerunt; & asthinate convulsivo laborant, satis frequens est, & nunquam fere non, ubi magna spirandi difficultas jungitur, extravasati feri copia in thorace, instituta anatome, visitur. Hæc ipsa vero sic judicanda est: respiratio antea difficilis si longe difficilior redditur, & paroxysmus quasi suffocatorius diutissime affligit parumque remittit, non fallax feri in thorace copiosius collecti indicium præbet, præsertim, si, quod exspuitur, sanguineis striis distinctum, eo quod ob nimiam pulmonum compressionem & diaphragmatis motum sufflaminatum, sanguinis liber cursus ex uno cordis ventriculo in alterum intercipitur, & is ex arteria pulmonali vehementius contracta, in arteriam asperam exprimitur, quod signum in funestis præcipuum est. In abdominis cavo serum vasorum alveis elapsum tum ex murmure, fluctuatione, tum etiam ex majori virium prostratione & lenta febre, quum viscera corrumpi incipiunt, in hydropicis dignoscitur, quæ corruptio per paracenthesin, aëris atmospherici liberiori accessu facta, magis magisque promovetur, & mors acceleratur. De purulenta materia ex abscessibus disruptis in cavitates exstillante, quibus nimirum effectibus se prodatur, jam in superioribus mentio facta est.

§. XXXIV.

*Ruptura
partium
interna-
rum.*

Quid? quod quandoque plane pars quædam interna disrumpatur & subitam insperatam mortem afferat, id quod potissimum de liene & utero annotavimus. Erat quondam Hemipoli femina viginti & quod excurrit annorum, sangui-

neæ

neæ constitutionis & floridæ faciei. Hæc venæsectionem nunquam passa & sexto jam mense uterum gerens, non solum ob matris obitum gravi afficiebatur mœrore, sed etiam incendio suborto terrore percellabatur, eoque excita, præcipiti lapsu e scala cadebat, post quadrihorium expirans. Inquirentibus autem in tam subitæ mortis causam, facta sectione, aliquot libræ sanguinis corrupti, ex disrupto in convexa parte tumido & friabili liene, effusæ, in abdominis cavo sese obtulerunt, licet exterius ne vestigium quidem fugillationis compareret. Oblatus etiam haud ita pridem ordini nostro ad ferendum iudicium est casus, de viro, qui inverso rostro forte percussus, paullo post obiit, inventa sub sectione nulla externa macula aut læsionis mortiferæ nota, sed abdomen cruore ex liene, ad costas usque spurias infimas elongato, discisso, plenum. Uterum vero perrumpi, sæpius quam quidem putatur accidit. Videlicet quando femina per aliquot dies graviter ex partu laboravit, & retento foetu, subito occumbunt, post mortem plerumque uterus ex ruptura perforatus deprehenditur, propendentibus ex hiatu infantis, pariter extincti, pedibus.

§. XXXV.

Dantur adhuc aliæ chronicorum & rebellium affectionum causæ, quæ licet aliquanto rarius occurrant, eorum viscera tamen habent in sanando & cognoscendo difficultatis. Sunt autem hæ ipsæ partium scirrhosæ indurationes, quarum viscera, ex innumeris tenuissimis vasis conflata, tum etiam glandulas, quarum structura identidem mere vasculosa & nervoso-membranacea est, potissimum invadunt. Quum enim ex obturatione tubulorum trahant incunabula, facile colligitur, eas partes, quæ fere penitus ex minimis & capillaribus vasculis constructæ sunt, ejusmodi malis ex facili patere. Sicut autem in abdomine copia glandularum & varia viscera continentur, ita etiam hæc vitia crebrius ibi conspiciuntur. Inprimis pancreas, quod totum mere

De scirrhus viscerum & glandularum.

In pancreate.

glandulosum est, immo corporis glandula maxima, crebrius quam ullam aliam partem, scirrhis indurationibus expositum invenimus. Profecto diuturniora illa mala ac vitia, quæ circa digestionem & primas vias in hypochondriacis & hysteriis frequenter occurrunt, ut plurimum pro causa pancreatis inexpugnabilem obstructionem, teste anatome, agnoscunt; unde fit, ut ejus succus deficiens, vel heterogeneo acore imbutus, non solum digestionem & dissolutionem ciborum minus recte inservire possit, sed etiam perpetuus sit acidi corrosivi proventus, qui famem caninam efficit. Denique pancreas etiam penitus induratum in iis, qui ex quartana diuturna laborarunt, sæpius vidi.

§. XXXVI.

*Pyloro &
duodeno.*

Quumque pylorus eique annexum duodenum copiosis & eximiis glandulis obsideantur, accidit quandoque, ut scirrhus tumor etiam in iis deprehendatur, qualis tumor, si aliquanto major fuerit, circa dextrum epigastrii latus rententia se manifestat, & ad tactum digitis comprimentibus, utut non sine dolore, cedit. Pylorum & duodeni principium dum ambit idque angustat & fere ocludit, alimentorum in ventriculo digesta massa neutiquam ad intestina descendere inque corpus distribui potest, unde fit, ut hoc marc core consumatur. Diutius vero alimentorum massa ibi subsistens & acidior reddita, ventriculum ad vomitum sollicitat. Præterea ejusmodi duodeni exquisitè sentientibus membranis inhærescens tumor, distensione acerbissimum & indefinentem dolorem circa ventriculi regionem per aliquot menses concitat, cujus sævitia somnus impeditur & vires consumuntur.

§. XXXVII.

In vesica.

Vix ulla vero in abdomine contenta pars facilius scirrhis infestatur, quam vesicæ corpus membranaceum & ex parte glandulosum, cui, præsertim circa cervicem, neque tantum externe, sed & interne, accrescunt. Ita

*Miscell.
Nat.*

Nat. Curios. Cent. I. & II. Obs. 186. memorant: scirrhosum tumorem exterius vesicæ tam insignem adnatum fuisse, ut totam pelvim impleverit. Produnt ejusmodi tumorem, præter dolorem in pube gravativum, dysuria cum tenesmo, alvi difficultas; in feminis fluor albus sanguini permixtus. Neque novum est, vesicæ ostio interius tumorem scirrhosum appendi, vel interiorem ambitum orificii in magnam crassitiem excrecere. Hæc difficilem producit mictionem, sique incrementum capit, pænè supprimit, ut urina retenta & vesicam & uretheres farciminis in modum cum exquisito dolore distendat, abdominis sequatur inflatio & febris, quale exemplum notavimus in illustrissimo Comite *de Harrach*, in Carolinis mortuo. Occlusi vero orificii scirrholo tumore indicium est, catheteris plane negata admissio. Interdum etiam exterius circa ipsum vesicæ collum atque ejus ostium glandulosa surgit excrecentia, quæ urinæ effluxum & catheteris in vesicam ingressum plane impedit, inde abdomen attollitur, de quo videatur *Riedlinus obs. 2. Anno 1607. mense Februar.*

§. XXXVIII.

Quandoque scirrhosus tumor non vesicæ cervici ad-*In pro-*
hæret, sed in prostratis consistit. Hic plerumque ex *go-stratis.*
norrhæa male curata oritur, & non modo in urina emittenda difficultatem parit, sed & magnitudine increfcens, collum vesicæ ita comprimit, ut in totum urina supprimatur, quo casu neque catheter, neque remedia interna & externa, urinam prolicere possunt, sed vomitus & convulsiones supervenientes, fatalem diem arcessunt. Quod vero tumor in prostratis consistat, ex eo judicandum: si gonorrhæa præcesserit, ac ad radicem penis renitentia quædam observetur. Frequentissime enim accidit, a coitu impuro & fluxu seminis maligno, inter initia præpostera medicatione excepto, pessimum prostratas contrahere vitium, ac induratas in scir-

rum densari, qui demum saepe longe post exulceratur inque fistulam abit, partes vicinas exedentem, eoque facto, gonorrhea redditur inveterata ac rebellis, quæ Chirurgos æque ac Medicos, ipsosque potissimum ægros, miserrime exercet.

§. XXXIX.

*In me-
senterio.*

Porro mesenterium, in cujus centro copiosa exstant glandulæ, generandis ingentis magnitudinis tumoribus quam maxime opportunum est. Qui atrophia affliguntur, præter abdomen inflatum, quod subinde in pueris conspiciamus, obstructas & valde tumidas in mesenterio, testantibus id anatomicorum observationibus, delitescentes glandulas gerunt, quæ liberum iter ac transitum chyli impediendo, tabem & marcorem corpori inferunt, intestina humoribus replent, qui fluxuum & frequentium dejectionum causæ fiunt. Nonnunquam accidit, ut ingentis magnitudinis scirrhus, vel plures etiam, mesenterii membranis inhæreant, quibus venter in molem attollitur, ut vel ingravidationem, vel molam, vel hydropem mentiatur; reliquas vero partes corporis tanta sæpius absumit macies, ut ossa atque pellis videantur cuncta, qualia exempla passim in observationum medicarum scriptoribus leguntur. Tali in casu id tantum vitandum est Medico, ne in prognosi imprudenter delinquat suamque existimationem lædat. Differt enim ejusmodi tumor ventris, a scirrhusa glandularum mesenterii intumescenzia productus, a graviditate magnitudine ingenti & magis magisque crescente, reliquarum partium contabescenzia, & quod tumida moles non tam ad ilia & versus dorsum, quam potius ad medium abdominis sese extendat, nec non quod in prægnantibus motus infantis vividus persentiscatur. Ab hydropse autem distinguitur, dum huic tumores pedum œdematosi cum facie plumbea & lurida, urina pauca & rubicunda complicantur, aqua quoque in scrotum descendit & in abdomine impressi digiti vestigia relinquuntur, quæ in tumidis

dis mesenterii glandulis non conspicua sunt. Sed multo difficilius est, a mola, quæ ab auctoribus vocatur nutritionis, & quæ potius excrescentia fungosa utero adnata est, hunc tumorem in feminis discernere, nisi quod in ejusmodi carnosis molis magnum pondus in regione pubis percipiatur, alvi & urinæ fiat difficultas & humor peregrinus cum sanguine interdum ex poris & glandulis uteri exprimatur, quod mesenterio affecto non facile accidit.

§. XL.

Præterea scirrhusi tumores frequentius etiam duo illa in *In be-*
hypochondriis magna viscera sita, hepar & lienem, adoriun-*pate.*
tur, quia ob singularem venæ portæ structuram, dum vasis advehentis & arteriosi munere fungitur, infarctibus, obstructionibus, & ex iis pronascentibus scirrhis, quam maxime sunt exposita, quibus generandis adhuc eorum structura vasculosa plurimum velificatur. In hepate si consistit & magnam ejus partem occupat, gravativus in dextro hypochondrio percipitur dolor, sæpius etiam prædurus ac renitens tumor exterius conspicitur ac sub costis spuris & scrobiculo cordis tangi potest, præsertim si quis ventri incumbat. Ceterum color faciei flavus & luridus est, eademque cum oculis tumida, pedes quoque intumescunt, respiratio est difficilior, & compressione ventriculi post cibum, præsertim flatulentum, anxietas circa præcordia augetur.

§. XLI.

Quandocunque lien intumuerit, vel etiam in scir-*Liene-*
rhum abierit, in latere sinistro versus dorsum sub costis spuris gravativus & pressorius est dolor, qui usque ad præcordialem regionem sese extendit, cachexia quoque in facie conspicua, & ructus ac flatus molestant, languet appetentia & spiritus difficulter trahitur. Accedentibus doloribus & stridentibus, ex animi graviori affectu, vel aliis de causis, spasticis, vomitus cruentus nigricans, vel solus, vel ejusdem coloris dejectionibus conjunctus, quem morbum *Hippocrates* ni-

grum appellat, ut plurimum funestus nascitur: id quod læpius vidi in feminis adultioribus, sanguineæ complexionis diu mœrori indulgentibus, immo etiam post paralyfin sinistri lateris, post quam & atonia & infarctus lienis incessit. *Ac utero.* Scirrhum quandoque etiam uterum invadere, ita ut fere totus in illum mutetur, observationum fide constat, & de ejusmodi casu vid: *Misc. Nat. Curios. Cent. I. obs. 120.* Hæc vero adiunt symptomata, premitur vesica & intestinum rectum, hinc urinæ ardor, stranguria, alvi evacuatio, atque eximius dolor fixus & stabilis circa pubem & circa lumborum regionem, vomitum, cibi fastidium & præcordiorum anxietates excuscat.

§. XLII.

De poly-
pis.

Sed transeamus jam ad morborum alias causas, non ita quidem obvias, misere tamen & variis modis ægros torquentes, quin ipsum lethum inferentes. Hæ sunt massæ ex variis pelliculis & fibris concretæ solidiores, cordis & vasorum cavitatibus præcipue majoribus inhærentes, quæ Medicis polyporum nomine veniunt. Morbos, quibus sese jungunt, sive acuti sive chronici fuerint, perpetuo fere immedicabiles reddunt, & diligentior cadaverum morte sublatorum anatome nos facit certiores, vix tria cadavera occurrere, ubi non infesti hi hospites conspectui sese offerant. Domicilium vero suum maxime omnium in cordis thalamis, inque principio arteriæ pulmonalis & arteriæ aortæ, rarissime in vena pulmonali habent. Obversatur adhuc animo serenissimi Holsatiæ Principis, anno abhinc e vivis sublato exemplum. Hic quum de dolore comprimente fixo in sinistro thoracis latere supra papillam conquereretur, cum anxietate & angustia spirandi, pulsu inæquali, cordisque palpitatione, quibus oedematosa pedum accedebat intumescencia, ego per litteras in consilium anno ante obitum ascitus, polypum adesse prædixi & difficilem fore medicationem, quod præsagium sectio cadaveris confirmavit, dum quatuor poly-

pi, duo in dextro, unus in sinistro cordis ventriculo & quartus in arteria magna, inventi. Sinus cerebri quando a polypofo concremento obsidentur, atrocissimi affligunt capitis dolores, & ad hemiplexiam, quin apoplexiam, via panditur. Præterea polypi non modo subitæ mortis, ubi canalium alveos, præsertim dextro ventriculo appositorum, claudunt, sed & si pulmonalibus vasis inhærent, gravissimæ & sæpe funestæ hæmoptyses, catarrhi suffocativi, asthmatis convulsivi, nec non hydrops thoracis, causæ sunt.

§. XLIII.

Plurimum itaque interest, ut Medicus hos occultos, *Signa* insensissimos motuum vitalium hostes exploret ac detegat. *polypi.* In quo quidem scrutinio tenendum est: temperamentum sanguineum, & habitum corporis angustioribus vasis, fibrisque mollioribus donatum, vitæ genus laboris & motus expers, parciolem potum & usum eorum alimentorum, quæ glutinosum succum præbent facilesque sunt ad coagulum subeundum, liberaliorem usum vini acidi & spirituosorum, coenam quoque largiorem, ad generationem ingratorum horum hospitem symbolum conferre. Proximiora vero & manifesta indicia, e quibus ipsorum præsentia conjici & dijudicari debet, huc redeunt. Polypi initium arguit compressio pectoris & fixus circa cor dolor, si vero jam incrementum cepit, præter hæc frequentius, vel levi de causâ, recurrit cordis palpitatio, pulsus miris modis inæqualis & varius est, sæpiusque notabilibus intervallis intermittit. Tum a motu corporis fortiori, vel medicamento sanguinem exagitante sumto, aut ab affectu animi vehementiori, dispnoea & incredibilis cordis anxietas urget. Postremo, lipothymia frequentia, sine causâ evidente, vel quæ a certo corporis decubitu provenit, est in signis polypi præcipuis commemoranda, quibus accedit quod sanguis emissus in aquam calidam, mox instar gelatinæ concrescat & in filamenta alba mucilaginosa fatiscat.

§. XLIV.

§. XLIV.

*A polypis
uteri hy-
drops
uterinus.*

Nonnunquam ejusmodi carnosæ & membranosæ involutæ concretiones vasa uterina opplent, & hinc varia circa uterum & mensium negotium insolita pathemata occurrunt. Notum ex pathologicis est, certam hydropis speciem, quæ maxime inferiorem abdominis regionem petit, utero veluti causæ adscribi, neque male. Etenim si libera sanguinis per ejus vasa progressio impeditur, quod promtissime fit canalium alveis a polyposis massis obstructis, non potest non fieri, quin ingens feri copia secedens, aut in utero, aut in abdominis cavitatem, descendat. Cl. *Payerus in Hist. Anat. p. 127.* feminam tumore hydropico demortuam dissecuit, ubi uteri vasa copiosis molis carneis intus obfessa invenit. Ante aliquot annos femina generosa Berolini peculiari laboravit affectu: per aliquot nempe menses ex utero limpidissima aqua, quæ intra viginti quatuor horas interdum librâ æquabat, stillavit, ægra tandem marcere & febre confecta. Post sectionem uterus magna ex parte scirrhusus, ex parte etiam polypis quoad vasa obsessus, inventus fuit. Accidit etiam, ut serum in hydarides sive magnas vesicas concedat, quæ si fuerint intra uterum ruptæ, aqua ex orificio uteri exstillat, si vero exteriorem uteri substantiam obsident, humor in cavum abdominis funditur. Referenda huc est historia, quam *Vesalius Lib. V. de corporis humani fabrica Cap. IX.* de quadam muliere Augustana refert: se in ejus uteri cavitate serosæ materiæ supra sexaginta mensuras Augustanas reperisse, reliquis visceribus ab inundatione plane immunibus. Et *Mauritius Cordæus Comment. in Lib. I. Hippocr. de morb. mulier.* notabilem affert historiam mulieris hydropæ uteri laborantis, in cujus utero & reliquis corporis partibus, plurimæ vesiculæ aqua citrina plenæ, inventæ fuerunt.

§. XLV.

§. XLV.

Neque dubium est, quin polypi uterini causa pro-^{Hæmor-}
fusissimæ sæpius sint hæmorrhagiæ, non secus, ac qui vasa ^{rhagiæ}
pulmonum obsident, incoercibilem hæmoptysin proferunt. ^{uteri &}
Quæ frequenter abortiunt feminæ sanguine redundantes, iis ^{abortus.}
solenne admodum est, ut paullo ante abortum cum ingenti
lumborum dolore primo sanguinem, deinde massas carneas
ovi gallinacei magnitudine, numero plures, excludant.
Has enormis non raro cum animi defectione sanguinis effu-
sio sequitur, & paulo post embryo. Perperam autem hæ
massæ habentur pro molis, quæ nihil aliud sunt, quam po-
lyposæ ejusmodi a mucido stagnante intra venas uterinas san-
guine concretiones, quibus ejectis, ob vasorum nimiam di-
stentionem & apertionem, largissima sanguinis effusio sequi
necessario debet. Id tamen interdum accidit, ut aliquot
placentulæ abortivæ in uteri cavitate maneant, ibique au-
ctæ ac induratæ, varia symptomata producant, quorum
causâ mola a Medicis communiter dicitur & adstruitur, cu-
jus indicia sunt, si intumescit abdomen, tumor vero magis
ponderosus & durus est in ventre, nec versus umbilicum ex-
tenditur, sed in inguine subsistit, nullus se exserit motus in-
fantis, nec verus, nec calcitrativus, neque circa umbilici
regionem, nec exterius percipitur, sed interius debilis &
tremulus est; cui multæ præcordiorum anxietates cum ten-
sivis doloribus junguntur. Quandoque cum sævissimis
partus doloribus ejusmodi molæ, quæ nonnisi membrana-
cea concreta sunt, excluduntur, unde venter mox in totum
subsudet.

§. XLVI.

A polypis ad alias res fere leves & ludicras, nihilo-^{De calculi}
minus sævissimorum, quin lethalium, affectuum causas, nos ^{lis in re-}
convertimus, inter quas jure meritoque calculus ex materia ^{nibus.}
tartarea, terrea, mucida concretus, si infelicissime canales
vel cavitates eximias & notabiles obstruat, refertur. De
(III.) X renum

renum calculo illud perquam notatu dignum est, eum, quamdiu renum incolit substantiam, nihil molesti sensus creare, simulac vero incipit e sede sua moveri & uretherem ingredi, tunc protinus incredibilis se primo in lumbis, postea in lateribus circa ilia, secundum uretherum ductum se exserit dolor, quem ordinario fere nausea, vomitus, summa anxietas, extremorum frigus, stupor partis affectæ, ardor urinæ, calor præternaturalis, alvus constricta, contractio testiculi & vigilia, comitantur. Quandoque etiam atroces in ventre cruciatus complicantur, qui, si calculus subito per uretheres transit, atrocissimi fiunt, ut medentum imperitiores, & qui prima vice cum hoc malo conflictantur, morbum potius pro convulsiva & funesta colica, quam pro calculo, habeant. Neque inficiandum est, dolores ex calculo plura habere cum colica spasmodica communia, in eo tamen differentiam esse experientia docet, quod calculus subito & cum atrocia invadat, principium in lumbis habeat, ventriculum ad nauseam & vomitionem sollicitet & in urina crassius sabulum conspiciatur. Tandem nec hic prætereundum est, quod, si ren male affectus & prægrandibus calculis obsesus fuerit, flatus in intestino colo ejusdem lateris stagnantes, dolorem ibi satis molestum procreent, vel quod eum e sede sua dimoveant, vel quod mutuo contactu & attritione intestini flatibus distenti, & renis calculis expansi, dolor ille suscitetur.

§. XLVII.

In ure-
theribus.

At vero longe majores molestiæ sunt, quas calculus uretheribus firmius ac diutius incompactus, efficit. Dum enim urinæ liberum in vesicam fluxum intercipit, pertinax fit dysuria & feralis urinæ suppressio, quæ etiam pro diverso situ calculi certis suis notis ac indiciis dijudicanda est, quas hoc loco exponere, non erit incongruum. Ubi urina supprimitur & calculus uretheris cavitatem obstruit, vesica est vacua, catheter potest immitti, sed parum humoris elicit,

tantaque est doloris circa ilia atrocitas, ut spastica constrictione etiam alterum uretherem in consensum rapiat. Si vero calculus, vel etiam sanguinis grumus, circa orificium uretheris, ubi obliquo ductu per vesicæ membranas transit, hæret, vesica etiam ab urina vacua est & inmanis cruciatus in inguine sentitur.

§. XLVIII.

Deinceps sicut calculus in renibus, ita etiam qui in *In vesica.* vesica delitescit, & urinæ egressum impedit, certis dignoscitur indiciis. Videlicet ægri de tumore & dolore in pube conqueruntur, urina guttatim stillat, quandoque cum horrendo cruciatu, & sæpius crassum ac puriforme sedimentum deponit, permixtis moleculis, nunc carptam lanam, nunc vermiculos, referentibus. Interdum accidit, ut urina copiosissima reddatur, quandoque alvus & urina supprimatur, & abdomen ad lapidis duritiem, cum dolore circa pubem acutissimo & horrore molesto distendatur. Nonnunquam alvus subducitur cum flatu & larga lotii emissionem. Si atrox dolor adest, anorexia, febris & constrictione alvi urget, & urina pauca, pallida tamen, cum magno nisu & molestia excernitur. Hæc symptomata potissimum affligunt, si quando lapis scaber, non adeo magnus & figuræ complanatae ac ovalis, orificium tegit obstruitque, & ab asperitate & attritione dolorificus spasmus fit, qui tam atrociam gignit symptomata. Per intervalla vesicæ calculo laborantes, præsertim sub boreali aëris statu, item flatibus retentis, & alvo obstructa, graviori cruciatu & pondere laborant, mictio fit sæpius purulenta, in senibus jungitur tenesmus, membri pruritus & alvi cum urina suppressio est, quandoque etiam ipse anus procidit: pro situ vero corporis variante levamen accipiunt.

§. XLIX.

Quod attinet ad vesiculam felleam, neque hæc a calculosis concretionibus libera deprehenditur, sed sæpiusculis *De calculis vesicæ felleæ.*

calculi ingentis magnitudinis ejus cavitatem totam replent, interdum numero plures, variæ figuræ ac magnitudinis in ea delitescunt, & gravibus symptomatibus corpora affligunt, quæ tamen non eadem, sed diversimode comparata, prout vel ingens calculus vesicam ipsam male afficit, vel plures per ductum cholodochum transitum moliuntur. Quandocunque fellis vesica tota fere lapillis turget ac repleta est, pertinax cum gravativo & continuo dolore dextri hypochondrii icterus, omnium remediorum efficaciam eludens, corpus flavedine tingit, cui si diuturnior fuerit, morbus arquatus adjungi solet. Quibusdam continua nausea vel etiam ciborum vomitio, in aliis atrocissimus itchiadicus dolor & asthma diuturnum conjunguntur. Præterea quibus ingens in tellis vesicula, calculus est, ab iracundia insolentia symptomata patiuntur. Nam quando a vehementiori iracundiæ affectu spasmodica, ut ordinario solet, ductuum biliariorum constrictione fit, liber bilis in duodenum effluxus impeditur, ipsaque regurgitat ad vasa biliaria felleamque cystidem, inde efficitur, ut, quum calculis cystis jam repleta sit, a bilis copia ductus valde sensibiles distendantur, hinc ob consensum non modo acutissimus abdominis dolor, præcipue in dextro hypochondrio oritur, sed & tanta respirandi fiat angustia & difficultas, ut suffocationis periculum appareat, alvo simul adstricta & extremis refrigeratis.

§. L.

*Et per du-
ctus biliar-
ios ten-
dentibus.*

Si vero ipse calculus transitum per ductum cysticum & cholodochum, qui intra membranas duodeni fertur, affectat, fixus & intolerabilis circa eam regionem, qua ductus cholodochus duodeno inseritur, in dextro hypochondrio est dolor, cum molestissimo vomendi conatu, nausea, appetitus dejectione, colore cutis intenso flavo, membrorum lassitudine, alvi duritie: quæ symptomata una cum flavescente cutis colore, repente & ex toto solent remittere, excretis per anum calculis pondere levissimis, & tunc ipsa cutis nitorem suum

suum recuperat. Confirmatum hoc habemus notabili exemplo. Erat quippe honoratior quidam vir, sexagenario jam major, qui post diuturnum in dextro hypochondrio comprimentem ac obtusum dolorem, in spiritus difficultatem incidens, paulo post œdematoso pedum primum ac postea hydropico crurum, scroti & abdominis tumore afficiebatur & aliquandiu affligebatur. Huic præscribebat Medicus infusum purgans, cujus basis cortex medius sambuci, a quo efficaciter purgabatur & plures lapillos, planæ & acuminatæ sexangularis figuræ, nigricantes ac leves, plus quam viginti numero, per alvi secellum excernebat, quo factò, asthma disparuit, tumor subsedit & cum valetudine in gratiam redire visus est, quæ tamen, siue ob ætatem, vel priorem longum morbum attritis nimium viribus, minus constans erat, sed hydropi paullo post iterum implicitus, naturæ debitum solvit.

S. LI.

A calculis progredimur jam ad alias ludicras res, *De vermibus.* quæ tamen potentissimæ sunt ad corpora humana tam misere affligenda, ut non majora propemodum tormenta possint excogitari. Et hæ sunt varia ratione figuræ & magnitudinis infecta, siue vermes, qui maxime ventriculū & alimentorum magnum illum canalem inhabitant, ibique nidos & hospitia sua habent. Non eadem vero sed diversa pro locis, quibus insident, & prout variæ eorum sunt species, pathemata observantur. Si rotundi proboscide & pedunculis quasi totidem uncis instructi fuerint, graviter rodunt, lancinant, & interdum membranas perforant. Hi quando *In ventriculo.* ventriculū obsident, incredibilis ejus morsus cum inexpli-

cabili dolore, anxietate, inquietudine, nausea, salivæ fluxu infestat; foetidus ex ore vapor halat, vultus mox pallet, mox rubet, narium adest pruritus, vomendi cupiditas, sicca ac molesta tussis per intervalla affligit, animique defectio frequentius jungitur.

§. LII.

*In ileo**lumbrici.*

Si in intestinis, præsertim ileo, cui lubentissime insident, eo quod amarorem bilis minus ferre possunt, nidum suum habent, hæc sunt indicio symptomata: venter mirifice, præsertim in infantibus, distenditur, ut tympanitide laborare videantur, alvi subinde nimia jungitur dejectio, qua feces foetidæ coloris cinerei, stercori bubulo similes, secedunt, partes superiores tabescunt, ita prorsus, ut nonnisi ossa coherentia conspiciantur, licet multum appetant. Facies plerumque pallet & tumida est, & cum excrementis ramenta quædam, seminibus cucumeris vel cucurbitarum similia ejiciuntur. Lumbrici dicuntur hujus intestini incolæ, qui plerumque lati sunt & longi & mirifice se convolvunt, neque tam alacres sunt, quam rotundi, sæpius quoque ob tussim, febrem & lateris dolorem pleuritidem mentiuntur, quæ tamen a vermium symptomatibus, dolore sub costis spuriiis, febre acuta & tussi sanguinolenta distinguenda.

§. LIII.

*In crassis
ascarides.*

Quod attinet ad ascarides, neque hæc obscuriis indiis se produnt. Hospitium suum quam maxime in intestinis crassis quærunt, & frequentius ac copiosissime recto insident, similesque tineis sunt, & manipulatim sæpe alvo ejiciuntur, quin ex ano non raro prorrepere & muliebribus pudendis se insinuare solent, ut cum urina in matulam descendant, sæpiusque incautioribus Medicis imponant, ac si ex vesica prodissent. Utut vero multa cum reliquis insectis communia habeant, si inflationem abdominis, si maciem, si nauseam respiciamus; in eo tamen quædam est differentia, quod multus ac gravis pruritus in ano percipiatur, & alvus ad deponendum frequentius sollicitetur odoremque identidem foetidum excrementa exhalent. Hæc vermium species natu. etiam majores, præsertim feminas luxui & otio indulgentes, divexare solent.

§. LIV.

§. LIV.

Præter memorata hætenus e vermibus gravia sym-*Insolita*
ptomata illud adhuc notandum est, quod febres subinde *inde sym-*
eos invadere soleant, qui vermibus exercentur, quæ ex len-*ptomata.*
tarum & putridarum sunt numero & similes quotidianis,
nullumque servant typum, sed sunt erraticæ, cum pulsu in-
æquali, frequenti & obscuro. Neque dubium est, quin ex
vermibus in putredinem foetidam colliquescentibus exsur-
gant. Porro etiam non prætereundum, quod vermes præ-
fertim minuti, quos sex pedibus cum nigro capite instructos
vidimus, si nerveas tunicas intestinorum graviter lancinant,
arrodunt, mirabilia atque insolita, quæ ab imprudentiori
vulgo incantationibus solent adscribi, symptomata produ-
cant. Videlicet sunt inter exempla verminantes, quos con-
vulsivæ artuum ad stuporem usque tractiones, distensiones
& incredibiles circumgyrationes, miro torquent modo, mox
aphonia tentantur, mox aliena & male cohærentia cum men-
tis turbatione loquuntur, strident dentibus, in furorem agi-
tantur, dæmonia se videre asseverant; remittit tamen sæpius
hæc symptomatum sævitia, si nimirum vermes a rosione de-
fistunt. Tam valde gravis vero symptomatum violentia non
aliunde repetenda videtur, quam quod universum genus ner-
vosum, a vehementi rosione tunicarum intestinalium, mutua
consensione & communicatione in exorbitantes hos motus
rapiatur.

§. LV.

Neque in hac latentium causarum morbificarum con-*De flatu-*
sideratione silentio transmittendi flatus, qui utut res levissi-
mi momenti videantur, tantas tamen anxietates, cruciatus
& insolentia in disitis etiam partibus symptomata concitant,
ut vitam in summo discrimine positam credas. Causa ho-
rum ut plurimum est tenax & viscida copioso aëre plena mate-
ria, quæ a calore in halitus, quibus inest magna expansiva vis,
resolvitur; accedit tamen etiam atonia, sive paralytica quæ-
dam

*In ven-
triculo.*

dam resolutio, tunicarum ventriculi & intestinalium, qua fit, ut nimium a contentis vaporibus expandantur tunicae & fibrillae nervae, distorqueantur, præter naturam huc illuc trahantur demumque per consensum atroces passiones accedant. Discrepant tamen symptomata a flatibus pro differentia locorum quæ patiuntur. Ventriculus quidem ab iis inflatus & per omnem ambitum fortiter expansus, summas præcordiorum anxietates & spirandi ad suffocationem usque angustiam, cum faucium constrictione efficit, atque inferior ejus pars sub cordis scrobiculo versus latus dextrum, instar vesicæ turgidæ, ovi gallinacei magnitudine, sensibus & tactui sese offert, demum ructus superveniunt, quibus flatibus exitus conceditur & anxietatum fit allevatio. Et hæc ventriculi inflatio frequentissima est hypochondriacis, nec non hysterics, in quibus sæpe tanta, ut ea affectæ, ob interceptum diaphragmatis descensum, sine omni sensu & motu jaceant & respirationis successus vix observetur.

§. LVI.

Et intestinis.

Sæpius quoque intestina torquet flatuum proventus. Si quando accidit, ut tota intestinorum moles flatibus mirifice distenta, ingentem abdominis tumorem efficiat, dolores atroces cum alvi adstrictione exsurgunt, qui affectus colica flatulenta vocari solet. Quæ distensio ubi est diuturna, ob intestinorum quandam paralylin & viscidæ materiæ copiam intus hærentem, abdomen instar tympani expanditur; tandem jungitur cachexia & tabes, ac morbus vocatur tympanitis. Frequentius vero contingit, ut tantummodo partes quædam intestini, præsertim coli, flatu dolorifice diducantur, quod circa hypochondria utraque sæpissime obvium, quia colon ibi in flexuras curvatur, quæ impediunt, quo minus & flatus & alia contenta promte transeant, sed stagnent. Familiarissime id in hypochondriacis evenit, & perperam dolor ille tensivus sinistri lateris, pro tumore & inflatione lienis a Medicis anatomes ignaris habetur, eo quod

lien

lien in homine non in hypochondrio, sed in dorso, sub diaphragmate situm obtinet. Testatum etiam faciunt observationes, quod in osse ilei dextri ingens & dolorificus tumor quandoque diutius per intervalla affligat & a cibis flatulentis sumtis exacerbetur, hanc ob causam, quia principium coli satis capax & membranis robustis motricibus instructum, ut sursum excrementa propellere possit, hic constitutum, quod adeo ampliatur, ut cum exquisito dolore ipsa integumenta extrorsum urgeat, & periculum ruptionis sit, quod etiam quandoque factum observationes practicæ & anatomicæ confirmant. Ejusmodi vero flatulentos tumores exinde licet cognoscere, si ad emissionem flatuum vel ejectionem materiæ tenacis copiosæ, per vomitum aut secesum, tumores cum dolorum allevatione minuuntur. Dolores lumborum, pulium intermissio, dolores in osse coxendicis, tumores pedum œdematosi, sæpe solis flatibus intestina distendentibus & vasa vel nervos comprimentibus debentur, & datis carminativis ac clysteribus, conquelescent.

§. LVII.

Restat demum alia causa abstrusa memoranda, quæ in *De erosio-* ventriculo neque minus in intestinis consistit, rariusque anim-*ne ven-* advertitur, mortis tamen & gravissimorum morborum geni-*triculi &* trix est. Est hæc ventriculi vel etiam intestinalium tunica-*intestino-* rum erosio, quæ vel ab erodentium acidorum succorum copia in hypochondriacis, vel ab iracundia vehementi & frequenti, vel a sumto veneno, emetico vel purgante acriore accidit, vel etiam post cholera, dysenteria aut diarrheæ morbum relinquitur, & affectus est chronicus, ab inflammatione, quæ celerum passionum præcipua, distinguendus. Ventriculus & duodenum, quando erosa, continuus & fixus dolor est circa præcordia, tensivus, tractorius, interdum cum ardoris sensu, qui usque ad dorsum porrigitur, & summas anxietates circa præcordia parit, ipsum quoque jugulum peti-

tit; mirumque vires atterit atque nauseam & inclinationem ad vomitum suscitatur. Post omnem medicinam aut cibum aliquanto intemperatiorem, qui falsæ, calidæ, acidæ, spirituosæ, acris est naturæ, exacerbatur, ac inprimis a purgantibus atrocissimus redditur; demulcentia vero, humectantia atque emollientia, & optime medicamenta ex chamomilla & millefolio ferre potest, pulsu demum accedente celeri hecticico, res est conclamata. Quodsi in intestino quodam ejusmodi erosio fuerit, identidem dolores in abdomine ac dorso cruciant, qui semper assumtis calidis, falsis, acidis mirum exacerbantur, dejectiones alvi sunt creberrimæ & varia caloris & frigoris est in corpore vicissitudo, urina mox tenuis & aquosa, mox rubicunda & crassa mingitur, malum etiam admodum diuturnum est, vires depascit, corpus consumit, longum certe tempus & accuratam ac demulcentem diætam, plus quam medicamenta, præsertim activiora, desiderat. Et affectus senibus cessantibus hæmorrhoidibus non adeo rarus est.

CAPVT VIII.

DE

DAMNIS EX COHIBITA CVTLI-
CVLARI EXCRETIONE.

S. I.

Se & ex-
cretiones
sunt ne-
cessaria.

Q Vicunque artificiosissimam corporis nostri machinam partiumque in ea admirandam configurationem paullo curatius perlustrat, eandem ex numerosa organorum secretoriorum & excretoriorum congerie maxima ex parte coagmentatam esse animadvertit. Tanta enim secretionum & excretionum ad vitam cum sanitate tuendam

endam utilitas est atque necessitas, ut sine iis corpus nec vivum, nec sanum, nec robustum, nec ad exsequendas animæ actiones idoneum esse, neque etiam augescere & ad legitimum incrementum pertingere possit. Videlicet corruptibile est corpus humanum, nec a putredine immune durare potest, nisi perennis sanguinis omnisque generis fluidorum, mediante vigore systoles atque diastoles in solidis, progressivus motus libere succedat, cum quo simul intestina partium sanguinem constituentium calida agitatio augetur. Sub hoc autem progressu maximeque intestino mutuo attritu sanguinis, moleculæ alia figuram, texturam ac magnitudinem nanciscuntur, & a blanda temperata schesi desciscentes, salino-sulphuream, vel etiam viscidam, utramque vitæ adversam naturam, induunt. Quare opus est, ut succi intemperati, nutritioni & motibus vitalibus continuandis inutiles facti, a purorum connubio segregati proscribantur, ac in eorum locum temperati, blandi satisque fluidi, per congrua solida & liquida alimenta, denuo substituuntur. Quod quidem quum per saluberrimas secretiones atque excretiones perficiatur, earundem utique necessitas, neminemque diu sine cibo & potu vivere posse, luculenter patet.

S. II.

Deinceps hæ ingestiones atque egestiones reciprocae *Ac egesta* certa proportionē sibi respondere, in iis autem, qui legiti-*responde-* mam corporis firmitatem jam adepti sunt, æquales esse *re debent* debent. Hinc est, quod adultum corpus lance libratum, *ingestis.* elapsis octo diebus eandem gravitatem exhibeat, licet interea a robusto & laboribus operosis occupato, vel centum alimenterum libræ ingestæ sint; quin si pondus increvit, nec omne quod ingestum iterum egestum, restibile in vitio est ac morbus certo præstolatur. Etenim universa oeconomia animalis non solum certo numero, pondere & mensura, sed etiam debita proportionē, ac moderamine, tam ratione mate-
riæ,

riæ, quam motuum, maxime gaudet, ab omni autem excessiva qualitate & quantitate, motuum æque ac materiæ, sive humorum, læditur atque offenditur.

§. III.

*Quod a
Medico
observan-
dum.*

Quapropter ad sanitatem ipsamque vitam tuendam, plurimum utique refert, ut Medicus & ingestorum & egestorum curatam habeat rationem. Nam protecto optimum corpus a præmatura morte & morboris varii generis afflictionibus defendendi modum, in eo quam maxime versari cum *Hippocrate lib. de diæta*, censeo: ut mensura ingestorum ad vires, immo ad motum & exercitationem corporis, exacte accommodetur, tenendo, corpus quo robustius, quo magis viribus pollet, majora vasa firmioresque fibras obtinet, eo plus terre posse atque subigere. Ex ingestis autem quæ facilius solvuntur & vasa atque excretoria promte subeunt, aliis salubritate præstant; vicissim, quæ ægrius digeruntur minusque expedite emunctoria pervadunt, sed passim resistant, valetudini intensa, hæc interdicenda, illa suadenda. Quin, is demum, qui ex ingestorum & egestorum natura, indole ac mole, morborum causas & primordia derivare novit, prudens Medicus dicendus est atque peritus.

§. IV.

*Excerni-
culatunc
in finem
sunt va-
ria.*

Quum vero ea, quæ in pabulum assumuntur, non unius sint ejusdemque, sed admodum dissidentis naturæ & facultatis, alimenta quippe viscida, salsa, acria, acida, sulphurea, spiritiosa, textura quoque compactioris, excessivæ omnia indolis; sapientissima certe summi opificis providentia factum est, ut varia emunctoria in corpore fabrefacta sint, quæ singulorum genio cunctisque heterogeneis evehendis, apprime respondeant. Nimirum residuæ ex alimentis feculentia per alvum secedunt, ac cum his non solum scoriæ biliæ, plurimis salino-sulphureis recrementis refertæ,

sed

sed etiam mucus in glandulosa crassorum tunica secretus. Sero recrementitio, crassiōribus & terrestribus sulphureis moleculis onusto, urina dicto, renale dicatum est colatorium. Et copiosa aquea portio, tenuibus salino-sulphureis particulis imbuta, ex cutis spiraculis sub perspiratione, quæ sensibili & insensibili modo jugiter in corpore succedit, exhalat atque diffilatur. Tacemus mucida illa purgamenta, quæ in narium, palati & bronchiorum glandulosa substantia secreta & collecta, scretu & munitione rejiciuntur.

§. V.

Per omnia hæc organorum excernentium emissaria, *Perspiratio* recrementa jugiter e corpore eliminantur. Quod quemad-^{modum} modum si debito tempore & sufficienti copia perficitur, in-^{pressa} tegritatem corporis & functionum in eo fulcit atque tuetur; ^{maxime} ita vicissim si segniter minusque sufficienter succedit, plures ^{noxia.} & gravissimas, præsertim chronicas passiones, pullulare atque excludi prona elucescit consequentia. Quam grave autem detrimentum & saluberrimarum excretionum defectu in valetudinem redundet, speciatim & accurate in *tomo secundo Medicina rationalis systematica*, & quidem *Part. III. cap. 4.* de excretionum defectu præcipuo morborum fundamento; *cap. 6.* de perniciali eorum quæ excretionēs cohibent indole; *cap. 7.* de epidemicorum morborum origine ex transpiratione impedita, exposui. Quapropter ibi dicta hæc lubens mitto, & potius id maxime jam excutere ac demonstrare allaborabo: ex omnibus evacuationibus suppressis, vel deficientibus, nullam esse, quæ majorem noxam ac periculum corpori minetur & causa sit innumerarum passionum, quam perspiratio & insensibilis illa subtilissimarum sordium, per universi corporis corticem porulis pervium succedens emissio, si impediatur, cohibeatur materiaque excernenda in corpore remaneat, vel ad exteriora jam appulsa, ad interiora relabatur.

§. VI.

*Quia ex-
cretio-
num præ-
cipua.*

*Et sordes
maxime
pernici-
les eve-
hit.*

Enimvero depuratur in universali corporis emuncto-
rio, cute, universa sanguinis & humorum massa, & tam co-
piosa per istud contingit excretio, ut ex *Sanctorii* calculo,
omnes reliquas quantitate superet. Hac itaque suppressa
maxima recrementorum pars restitat, omnes corporis succi
sorditiem contrahunt, corrumpuntur, ad putredinem dispo-
nuntur, ut valetudo inde gravissime luat. Quod vero ma-
ximum est, ipsæ sordes quæ sub perspiratione exhalant, val-
de tenuis salinæ sulphureæ & æreo-æthereæ activæ indolis
sunt. Hæ enim in corporis penetralibus retentæ, vel ex cu-
tis tubulis retrocedentes, haud secus ac mortiferum vene-
num, quod exigua mole & summa partium tenuitate acri-
caustica pernicipalem vim in nervosis maxime partibus ex-
sequitur, ob penetrantem subtilitatem, promte per univer-
sum corpus infesta semina spargunt, intimæ ad partes exqui-
site sentientes sunt admissionis, easdemque atrocissime ado-
riuntur atque exagitant, ut vehementissimæ, immo lethales,
in nervosarum potissimum partium genere, oboriantur affe-
ctiones.

§. VII.

*Defectus
perspira-
tionis
caussa po-
tissimum
aër.*

Inter ea vero, quæ ad sufflaminandam saluberrimam
perspirationem faciunt, aër potissimum connumerandus.
Hic enim sicuti purus ac temperatus sanitati egregie patro-
cinatur; ita vicissim excessiva qualitate præditus, eandem
gravissime labefactat, hanc maxime ob causam, quod im-
mediate corporis corticem ambiat ejusdemque tonum varie
alterando, succedentem per substratos tubulos fordium ex-
cretionem dirigat ac moderetur, intendat, vel frequentius
cohibeat. Nimirum si nimis frigidus, nervis inimicus est,
succos coagulat & fibras rigidas reddit, unde non solum ad
affectus spasmodicos disponit, sed etiam cutis poros & vasa
nimium coarctans, ad interiora urget humores, stagnatio-
nem demum ac stasim concipientes. Nimis humidus tonum
soli-

solidorum laxat ac solvit, ut liquida languide circumagantur & ad emunctoria ipsosque subcutaneos tubulos non vegete ap-
pulsula fordescant, morbi que ex atonia & humorum impuritate
oriundi pullulent. Nihil calidus rarefacit & dissolvit corpo-
ris succos, ac intestinum motum augendo, acres & biliosos
reddit, licet perspirationis successui non officiat, nisi simul
humidus sit, & sic ad morbos malignos viam sternat. Potis-
simum autem cuticulari excretioni obest frigido-humidus,
quippe qui humores incrassando & fibrarum elaterem minu-
endo, efficit, quo minus succi spissescentes per minimos ca-
nales ad corporis corticem trudi, & remisso nimis colatorio,
sordium secretio atque excretio rite perfici possit.

§. VIII.

Insuper aëris tempestatumque insalubris constitutio unde
ac inde pendens in perspirationis successu mutatio, plurimum morbi
morborum causa est, qui certis anni temporibus, quando-^{anni tem-}
que etiam epidemice, grassantur. Sapienter hinc ab Hip.^{poribus}
^{pocrate lib. de humor. §. 7-} proditum est: *qualia sunt tempo-*^{familia-}
ra, tales etiam sunt morbi & constitutiones ex ipsis. Si tem-^{res.}
pora tempestive & ordinate se habuerint, morbi iudicatu faci-
les sunt. Vernaculi autem temporum morbi indicant mu-
tationes, & prout evaserit tempus, similes aut dissimiles
erunt morbi, qui in hoc tempore oriuntur. Qui vere enascun-
tur, ita sunt comparati, ut ob atmosphæram inæqualem
& mutabilem, elater fibrarum & maxime tonus cutis mirifi-
ce labefactetur, & retardato sanguinis circulo, exclusionē
quoque sordium per halitus diminuta, & plethora & impu-
ritas, proximæ morborum causæ, ingignantur. Æstatis
morbi non tam calori, quam potius aëri frigidiori & humi-
diori, qualis tunc solet esse nocturnus & matutinus, poros oc-
cludenti, debentur. Autumnus omnium morbosissimus est,
nullam aliam ob causam, quam quod ob crebriorem coeli ex
frigido in calidum, humido in siccum, & viceversa, mutationem,
æqualis sanguinis progressus & libera sordium exhalatio in-
ter-

tercipiatur. Et hiems ob frigus, tam siccum, quam humidum, transpirationem impedit, eaque propter variis morbis inducendis favet, quos unacum vernalibus, æstivis & autumnalibus figillatim recenset *Hippocrates Sect. III. aph. 20. sqq.* nec non *Celsus lib. II. cap. 1.*

§. IX.

Morbi
quoque
epidemii.

Inprimis autem nocent aëris tempestatumque vicissitudines, ac si diu durant sæpiusque repetunt, morbos, qui populares habent circuitus excludunt; eo quod æquabili cutis tono, sub quo maxime viget libera perspiratio, nihil magis adversum est eumque destruit, quam repentina mutatio aëris calidi in frigidum, vel humidi in nimis calidum. Hinc certa & constanti experientia in comperto est, quod si calefacto per fervidum vernum vel æstivum æstum corpore, & resoluta sub calore intestino motu intenso in excrementitias fordes humorum massa, tempestas postea subito aquilonaris frigida succedat, qua constrictis spiraculis fordes reprimuntur, accumulantur, mutuo quasi confermentantur, iisdemque nervosis ac membranosis partibus inhærescentibus, febriles, spastici & convulsivi motus, varii generis febres, sæpius exanthematicæ, variolosæ, morbillolæ, purpuræ, alvi quoque fluxiones plus vel minus cruentæ, oboriantur ac plures corripiant. Etenim id ceu perpetuum in genere est observandum: quo major materiæ impuræ salino-sulphureæ tenuis, perspiratione eliminandæ, in corpore proventus est ac copia, eo magis infestum & periculosum est, si ejusdem excretio impeditur, intercipitur vel cohibetur.

§. X.

Nec non
endemii.

Ex eodem porro fonte morborum, qui certis locis familiares sunt atque vernaculi origo arcessenda. Testantur quippe Medicorum commentaria, Hungariam & Italiam proferre febres pessimæ indolis acutas, cum vehementi cephalalgia & delirio junctas. Jam vero identidem constat:

eam

cām Hungarici cæli esse qualitatem, ut æstus diurnus sit ferventissimus, eundemque frigus excipiat nocturnum satis horridum. Huic itaque si corpus prius æstuans incautius, maxime ab iis qui in castris excubias agunt & sub dio morantur, committitur, perquam facile febris illa Hungarica dicta acuta accedit, quam perperam vulgo liberaliori vini Hungarici, quod stipendia merentes vix degustant, potui, tribuunt. In Italia autem, & maxime Romæ, idem febrium acutarum & malignarum genus sapius stragem edit, nullam pariter aliam ob causam, quam quod interdum æstus vehementissimus, & noctu algor regnet, cui si improvide sese exponunt incolæ, vel fenestras aperiunt, ut aer nocturnus, qui ob copiam insectorum atmosphæram incolentium, idemtidem valde insalubris, corpori allabatur, illico postero die mutatio in corporis functionibus & inclinatio ad febrem præsto est, quæ nisi præscinditur, vires sumit, & non raro funestum sortitur eventum.

§. XI.

Neque vero tantum acutas, verum etiam chronicas *Nec non* endemias passiones, interceptus cuticularis excretionis suc-*scorbutus.* cessus, affert. Certe genesis scorbutici mali, quod nonnisi maximus impuritatis gradus est, non aliunde quam ex hac origine repetenda. Quo magis enim in humoribus vitalibus crescit impuritas, ex incongruis & minus temperatis asumptis, eo plus vigere debet excretionum, inque primis perspirationis negotium, eoque sufflaminato, eo gravior metuenda est noxa. Jam vero in confesso est, in regionibus maritimis & borealibus incolas crassiori victu uti, copiosius carnibus ac piscibus salis, infumatis ac induratis vesci & densa, frigida ac humida atmosphæra frui. Sub hac itaque coeli victusque ratione, non modo crudi & multum male cocti succi ingignuntur, sed & ob perspirationem segniorem, quamplurimæ excrementitiæ salinæ viscidæ fordes in corpore remanent, quæ simul alia emunctoria obstipant & occludunt,

dunt, præsertim si vita sedentaria motus expers, animi crebrior perturbatio & mœstitia accedit, quo demum fit, ut humores benigni, serum & lymphæ, a miscela particularum varii generis salinarum inquinantur, putidi fiant, corrumpantur, & pro diversa corporum & temperamentorum conditione, vel vappescant ac lente putrescant, vel etiam summam fixam & volatilem acredinem contrahant. Et hac ex sentina, omnia pathemata scorbuticis solennia manant, oris fœtor, maculæ lividæ, gingivæ putridæ, ulcera fœtida ichorosa, inclinatio ad sphacelum, artuum dolores fixi & vagi, spasmi & convulsiones, tormina ventris, tremores & contracturæ artuum aliaque id genus plura.

§. XII.

*Febres &
defluxio-
nes ca-
tarrha-
les.*

Quæ omnia sicuti vitam in grave discrimen adducunt; ita quid subitanea aëris ac inde facta excretionis per cutis poros mutatio, ad sanitatem labefactandam valeat, quotidianis adhuc experimentis confirmatum habemus. Nimirum quando ex conclavi valde calefacto, vel ex lecto calido, in auram frigidiorē subito concedimus, horrore corpus e vestigio corripitur, & suppressa perspiratione, materia acris excrementitia in interiora maximeque glandulosas tunicas faucium, oris, narium & bronchiorum vergens, tussim, coryzam, defluxiones & febres catarrhales conciliat. Pariter frequenti experientia edocemur: nihil ad ingenerandas acutas passiones & febres magis conferre & aptius esse, quam si quis graviore iræ affectu, vel liberiori spiritus vini potu, aut fortiori corporis exercitio æstuans, in auram humidam & frigidiorē, præsertim vespertinam, delatus, paulo diutius in ea versatur; quandoquidem hoc facto, facilis admodum in febres, & intermittentes, & acutas inflammatorias, est lapsus.

§. XIII.

*In Caroli-
nis febres
ab occlu-
sis poris
gignun-
tur.*

Nihil vero est, quod subitam febrium generationem ex perspiratione cohibita clarius demonstrare & illustrare pot-

potest, ac intempestivus & imprudens thermarum Carolina-
rum usus externus in balneo. Nam si quis corpore paulo
pleniori & impuriori, ante sanguinis missionem vel debitam
aliam præparationem, descendit in balneum nimis calidum,
& aliquandiu in eo commoratur, non tantum inde experi-
tur insignes cordis tremores, languorem & cephalalgiam,
verum etiam febrem intermittentem plerumque, nonnun-
quam continuam, cum præcedente horrore, dolore dorſi &
anxietate summa.

Quod vero hoc balneum præ aliis id
singulare habeat, quod tam facile, atque ex tempore quasi
suscitet febres, hæc vera mihi videtur subesse ratio: tum
quod nulla alia tam fervidi caloris thermalis aqua reperia-
tur, tum etiam quod largiorem quam ulla alia terræ mar-
tialis ochreæ & calcariæ adstringentis, in lapidosas concre-
tiones pronæ, copiam in sinu foveat, quo fit, ut usu exter-
no subito tumores oedematōſos intrō repellat & abigat, diu-
turna ulcera consolidet, pustulosas & ulcerosas cutis defœ-
dationes & erosiones ficcet, & sic efficacem poros & tu-
bulos subcutaneos constrictivam facultatem luculenter pro-
dat. Si quis itaque in balneum hoc nimis calidum corpus
immittit, ab externo calore sanguis exæſtuatur & in ma-
gnam intestinam agitationem, præsertim si jam copiosus &
impurus, abripitur, exterius vero ob constrictos poros par-
ticulæ aëreo-sulphureæ non exhalare possunt, sed eadem
insultantes in partes nervosas, arterias ipsumque cor, systo-
les & diastoles motum valide intendunt, & ita febrem ac-
cendunt.

§. XIV.

Præterea excretionis per cutis poros rite succeden-
tis utilitatem, & suppressæ noxam luculenter testatur, quod
qui impura habent corpora, siue humores excrementitiis
partibus refertos, ut sunt podagrici, arthritici, æstivo tem-
pore, quo liberius & copiosius sordes per subcutanea spira-
cula diffilantur, a paroxysmis & symptomatibus immunes
degant;

*Atranspi-
ratione
cohibita
exacer-
bantur
morbi ex
impuri-
tate.*

degant ; brumali autem & autumnali, gravius affligantur, quia aëre circumfluo denso atque compresso, perspiratio imminuitur, sordesque excrementitiæ magis retinentur, gravius detrimentum corpori certo allaturæ. Eadem ratio sub-
Et senibus familia- res gi- gnantur. est, quare senes, quum ob cutis poros & vasa minima stri- ctiora, non tam liberam & copiosam per cutis poros expe- riantur evacuationem, quam viri & juvenes, ab impuritati- bus resistentibus morbos ætati senili infestos incurrant, ut sunt maxime scorbutus, calculus, ulcera vesicæ, scabies, tormina intestinorum, diarrhææ, stranguriæ, oculorum & aurium vitia.

§. XV.

De da- mnis a repulsa materia perspi- randa.

At vero licet magni & graves morbi a prohibita per- spiratione & remanentibus intus sordibus originem ducant: longe sæviora tamen & quæ plus periculi habent pathemata pullulant, si quando materia excrementitia, a connubio san- guinis jam tum separata & ad cutis peripheriam tubulosque subcutaneos salutariter propulsa, foras non ejicitur, sed ibi subsistens ac ad interiora recedens, cum succis vitalibus de- nuo nupta fuerit. Hæc enim certe materia veneni vim & na- turam obtinet, ac licet mole valde exigua, dum tamen sub penetranti & adversa subtilitate partium valde heterogenea- rum, in partes nervosas sensibiliores agit, truculenta instar veneni symptomata excitat. Id quod ut jam ulterius excu- tiamus & luculentis fide dignis exemplis ac observationibus confirmemus, operæ certe erit pretium; quo rerum medi- carum cultores perspiciant, plures & sævissimorum affectuum causas, non tam in mole & quantitate nimia, vel intemperie crassa sanguinis & humorum, quam sæpius in parva & exilis molis materia, nervosis tamen partibus summopere infesta, esse quærendas.

§. XVI.

Ex acho- ribus ti- nea, favis &c. re- pulsis.

Ut itaque ab ipso capite ordiamur, sæpius obser- vavi, eos qui capillamentum gestare sueverunt, demto im- pro-

provide operculo, exquisitum capitis dolorem, cum tinnitu aurium, nec non vertiginem incurrisse; alios vero his malis afflictos, tecto falsa coma capite, ab iisdem liberatos. Nihil porro frequentius in infantibus visitur, quam a crusta lactea, solo frigore repulsa, febrem continuam excitari, quæ desinente illa revertitur, quæ quoties repulsa fuit, toties de novo febrem accensam annotavimus. Nihil quoque periculosius est, quam in tineæ capitis improvide exterius unguenta vel lavamenta applicare. Repulsa enim materia corrupta acri ad cerebrum ejusque membranas ac nervorum principia, epilepsiæ, præsertim in infantibus, aliique graves capitis morbi, accidunt. *Amatus Lusitanus Cent. I. obs. 36.* in puella undecim annorum, obesa & sanguinea, a capitis lotionē apoplexiam, elapsa nondum hora, supervenisse, memoriæ prodidit. Ex capitis ulceribus obsessi lotionē, surditatem concitatam, *Misc. nat. cur. Dec. III. An. III. obs. 9.* commemorant. Et nos a linimento tineæ capitis præpostere adhibito, in infante decem annorum oculi dextri inflammationem observavimus, quæ in suppurationem & perfectam demum cæcitatem transiit. Vidi quoque ab achoribus & favis linimento inconsulto siccatis, asthma convulsivum subortum, ad quod abigendum, vesicatorium in nucha insigni cum levamine applicatum.

§. XVII.

Singulare etiam salutaris & criticæ in capite excre-
tionis genus est, plica sic dicta Polonica, qua serum excre-
mentitium viscidum cum sanguine ad caput copiose dela-
tum, ex poris capitis exsudans ac per crinium tubulos de-
scendens, capillos in cirros conglutinat inexplicabiles, per
quos tanquam peculiare organon excretorium, vitiosum se-
rum eliminatur, non sine summo levamine & sanitatis emo-
lumento. Quod si vero plica molesta abscinditur, graves,
immo mortiferi morbi, corpus impetunt. Hoc enim factò,
atroces capitis dolores, insultus epileptici, convulsivi, item
phre-

phrenitis, mania, melancholia, vertigines, oculorum lippitudines & gutta serena, consequi solent. Interdum ad alias inferiores partes serum excrementitium retentum defertur, & dolores arthriticos aliaque symptomata luis venereæ naturam æmulantia excludit. Quin nonnunquam pleuritis, peripneumonia, hæmoptysis ac phthisis inducitur.

§. XVIII.

*Ex scabie
siccata
graves
capitis
morbi.*

Scabies foedum quidem est atque molestum malum; corpus tamen a falso, acri & corrupto humore liberat, & præpostera medicatione repulsa, vel quo minus efflorescat impedita, gravi damno maciat, quod differt, prout maligna interiora repetens materia, diversas impetit partes in iisdemque sedem figit. Quod si enim ad caput defertur, periculosissimi morbi ibi suscitantur, apoplexiæ, epilepsiæ, vertigines, sopores sensuumque vitia. Sic *Misc. nat. cur. Dec. I. An. I. obs. 58.* ex scabie imprudenter abacta, lethalem apoplexiam annotarunt, quod etiam *Mabius instit. pag. 65.* testatur. Cæcitatem exinde profectam identidem *Misc. nat. curios. D. II. A. VIII. pag. 255.* & *Sennertus prax. part. 3. s. 2. c. 44.* fidem faciunt. Et *Riedlinus in lin. med. ann. 1696. mens. Mai. obs. 1.* narrat de ancilla, quæ fordidissima scabie laborans, post inunctionem, bis factam, in epilepsiam incidit, cui assurgit quoque *Sennertus l. c.* Potissimum in infantibus perniciosum est conamen scabiem abolere, quandoquidem hoc facto, præter suffocationem aliosque gravissimos morbos, sæpius epilepsiam succrevisse, auctor est *Hildanus Cent. III. obs. 10.*

§. XIX.

*Asthma-
ta.*

Quando scabiosa materia relabitur ad pectus, periculosum asthma oboritur, quod in juvene viginti annorum a scabie intempestive & empirice externis inunctionibus deleta, vidit *Hildanus Cent. III. obs. 39.* ubi ægrotus tanta pectoris angustia affectus est, ut vix spiritum trahere posset & pul-

pulsus vix apparet, tandemque catarrho suffocativo extingueretur. Frequentissime vero a retrocedente scabie febris continua in corde & genere vasculoso accenditur, cum magna virium prostratione. Vidimus, hac cessante, septimo die scabiem rursus ad habitum corporis salutariter fuisse propulsum. Senes scabies, maxime sicca, infestat, quæ si reprimatur, quartana fieri potest: & porrigne rursus apparente, hæc cedit. Hinc *Langius in Epist. 16. Lib. 1.* inquit: *ego scabiem & crurum oedemata, cum post aliarum febrium, tum præcipue quartanæ febris crisi obortam, sponte exolescere, citra omne medicamentorum subsidium plus centies vidi.* *Febres.*

S. XX.

Sæpius virulenta scabiei materia e cortice corporis ad interiora retrula, tumores oedematosos, hydropicos & tympaniticos, in pueris præsertim cum tumore scroti, quod aliquoties observavi, affert. Notavit etiam idem jam *Hippocrates in epidemicis*, idque luculento exemplo confirmat. *Erat, inquit, Athenis homo quidam fœdissima scabie laborans, atque ut sanaretur accessit Milos, ubi calide sunt thermæ, quarum usu convaluit a scabie, sed paullo post incidit in hydropem & exinde mortuus est.* In intestinorum membranas si recumbit, gravia ventris tormina vel etiam dysenterix fieri possunt. Notabile hac de re exemplum exstat in *Riverio Cent. III. Obs. 85.* ubi arthriticus, ab usu aquarum medicatarum, magnam stomachi refrigerationem passus est, ac deinceps scabies pruriginosa, admodum molesta, totum corpus invasit, quæ confestim curata est unguento quodam-mercuriali, carpis manuum & plantis pedum admoto, quam inunctionem mox secuta est ingens diarrhea, per viginti dies perseverans, cum gravissimis ventris tormentis, ita, ut ab iisdem alvi fluxus dysentericus apparuerit. *Hydropici tumores.*

S. XXI.

§. XXI.

*Ex conso-
lidatis
antiquis
ulceribus.*

Quemadmodum igitur scabiosæ cutis defœdationes præpostere topicorum usu deletæ, ob acrem causticam materiam, internas nobiles partes repetentem, plures perniciales morbos adducunt; ita pariter, ulcera antiqua subito consolidata, eandem ob causam detrimento sunt & quandoque exitio.

Epilepsia. Nam *Misc. nat. curios. Dec. III. An. II. obs. 29.* ulcus in crure sanatum epilepsiam induxisse, perhibent. Et *Tulpius obs. lib. I. cap. IIX.* binos infantes per manantia capitis ulcera ab epilepsia liberatos, iisdemque improvide siccatis, diris iterum nervorum tractionibus correptos esse, testatur. Neque minus ex ulcere in crure consolidato, epilepsiam accessisse, eodemque rursus aperto cessasse, consignatum legimus ab *Amato Lusitano Cent. II. hist. 6. Bartholino Cent. III. hist. 20. Hildano Cent. II. obs. 10. Misc. nat. curios. Dec. III. An. II. obs. 29. Lentilio miscell.*

*Oculorū
vitia.*

Part. I. pag. 3. Pedes quoque ulcerosos præsanatos guttam serenam adduxisse, auctor est *Timeus in oper. posth.* item *Forestus lib. 1. obs.* Et *Hildanus Cent. III. obs. 39.* vetus purulentum apostema coalitum, atrocem capitis dolorem & cæcitatem induxisse, putrida materia tussi rejecta, prodidit.

§. XXII.

Pleuritis.

Idem porro auctor *l. c.* præter alia adhuc exempla memorat: quod vir sexagenarius, quum ulcus quod per plures annos gestarat, ab Empirico ad consolidationem perductum fuisset, post aliquot menses in sinistro latere pleuritide, cum maximis doloribus & punctiōibus correptus sit, talemque saniem sputo rejecerit, qualis ex ulcere antea manarat. Nec non *Cent. V. obs. 91.* historiam narrat: quod

*Veneni
sympto-
mata.*

quispiam curato per thermarum usum veteri ulcere, in maximam virium prostrationem non modo, sed & nauseam & frequentem eructationem inciderit, ac iisdem pathematibus, quam si venenum sumisset, attentatus sit. Nobis inter

*Tormina
ventris
&c.*

exempla inprimis est vir generosus, Principi a consiliis, qui quum

quum singulis fere annis, verno maxime tempore, falsam acrem defluxionem cum excoriatione circa malleolum dextri pedis experiretur, molestiæ pertæsus, ex Chirurgi consilio, ut applicato camphorato vini spiritu reprimeretur, permisit, sed non ita multo post ingentia tormina & dolores in hypochondrio sinistro, cum lenta febre, inquietudine, anxietate & alvo pertinacissimè obstipata, eundem invaserunt, quæ tamen tandem pulverum cinnabarino-nitrosorum & infusi usu, cessarunt. Et quum fonticuli sint quasi ulcera artificialia, quæ *Ex fonticulis co-* ad impuram noxiam materiam nervosis maxime partibus sub-*trahendam* in capitis morbis egregii usus: hinc quoque iisdem *lith.* occlusis, priores morbos rediisse, vel novos accessisse, multarum observationum fide constat, quæ evolvi possunt in *Misc. natur. curios. Dec. II. An. III. obs. 213. An. VI. obs. 201.* nec non apud *Pechlinum lib. II. obs. 30.*

§. XXIII.

Dum etiam adhuc de noxa, quæ post efflorescentias *Exanthema-* & exulcerationes in corporis cortice præpostera per topica *matum* medicatione exceptas, in corpus redundat, sermo est: adun-*retrocedentium* genda iisdem etiam sunt exanthemata, quæ in acutis mor-*noxa.* bis comparent, quippe quæ, si ad interiora retrocedunt, eo deteriora magisque funesta mala invehunt, quo magis materia repulsa virulenta est ac putrida. Sicuti enim vigorem naturæ indicat prompta ad partes externas variolarum, morbillorum, petechiarum, purpuræ & bubonum, sive carbunculorum, in peste secessio; ita res periculi plenissima est, si deficiente hoc robore, vel non prodeunt, vel relicta in cortice statione, redeunt. Contingit id facillime a refrigeratione, a potu frigido, terrore, animi affectu, vel erecto corporis situ, in corporibus præsertim, quæ viribus destituta, & ubi pulsus ac renisus cordis, arteriarum & motus a centro ad peripheriam languescit. Et plerumque hanc fatalem repulsionem funesta consequitur mors; eo quod maligna materia ad meninges cerebri, vel ventriculi & intestinorum membra-

nas, aut præcordiales nervos si transfertur, harum partium inflammationes, spasmi, vel convulsiones, imbecillia jam a morbo corpora adoriuntur. Quod vero materia exanthematica repulsa majorem quam antea virulentiam exserat, hæc videtur subesse causa: quod quamdiu humor, sive putredine, sive caustica natura alienus, succis & sanguini immixtus est, involutus & quasi coërcitus ingenti noxa vacet, quando autem sui juris factus & ab involucro sanguinis liber, tunc naturam suam perniciosam prodat & veneni similem in corpus edat effectum. Accedit etiam quod hæc materia, dum in glandulis cutis diu hæret, sub mora, ob perpetuam & incessantem fluidi ætherei agitationem & transfluxum, subtilior & malignior reddatur, ut postea repulsa, penitus respuat illud quod ante habuit cum lymphæ & sanguine connubium, & potius instar veneni subtilis, nervosis sese partibus insinuet ibique spasticas atroces stricturas efficiat.

§. XXIV.

Quam testatur experientia.

Jam si experientiam consulimus, nihil certe frequentius, quam quod post inconsultam lintheaminum frigidorum & loturam adhuc redolentium, corpore sudore diffuente mutationem, nec non ægris in alium perfrigeratum lectum translatis, exanthemata, variolæ, morbilli, petechiæ ac purpura dispareant, & rebus extemplo conversis, in pejus abeant symptomata, anxietates, inquietudines, deliria, tremores & convulsiones accedant, quin ipsa paullo post mors subsequatur. Inprimis etiam crebrioris observationis est, ægros, acutis exanthematicis morbis laborantes, post diuturniorem erectum in lecto, vel etiam extra illud situm, mox in virium languorem, animi deliquium, extremorum refrigerationem & cutis horrorem cum pulsu debili incidere, ac evanescentibus in cortice efflorescentiis, delirio, convulsione vel epilepsia correptos, interire. Rarius quidem, quod mirandum, hoc phænomenon a Practicis annotatum, ratio tamen effectus in proclivi: quandoquidem dejecto in ejus-

modi

modi morbis robore, cordis etiam systole minuitur, & sanguis corpore erecto difficulter ad superiora maxime & caput expulsi, cor obruit, segnius quoque per cerebrum ejusque membranas fertur, & hinc tam truculentorum symptomatum origo. Huc quoque referenda memorabilis observatio, quam *Alpinus de Medic. Aegypti. pag. 76.* consignavit, memorans: feminam in peste tumore inguinis laborasse, quo minuto, delirium accesserit, & per cucurbitulas iterum revocato, cessarit.

§. XXV.

Idem periculum, eademque, si non major, noxa est *Ex erysipelate*, quando in affectu arthritico, in podagra vel *et-pelato* iam erysipelate, materia, quæ in vitio est, corrupta vel *repulso*. acris, ex habitu corporis, vel ex artubus, ad interiora repellitur. Ac de erysipelate quidem sapienter *Hippocrates Lib. VI. aph. 25.* pronunciat: quod malum sit foris introverti. Novimus senem fere septuagenarium, qui erysipelate totam *Lethar-* tibiam & femur occupante correptus, applicatis exterius *gus*. saturninis & camphoratis epithematibus, in lethargicum affectum incidit, quem quum Medicus calidioribus cephalicis & balsamicis interius & exterius adhibitis exciperet, febris accensa est, cum magnis maculis purpureis, accessit delirium ipsaque mors. Vidi quoque accessionem erysipelatis, *Ventricu-* quæ cum horrore & subsequente intenso æstu contingere *li inflam-* solet, in viro erysipelaceis inflammationibus crebrius ob- *matio*. noxio, Medico impoluisse, ut paroxysmum intermittentis esse putaret, & ad eandem præscindendam postera die vomitorium porrigeret, quo oblato, æger quidem strenue vomuit, sed sequuta est inflammatio ventriculi, quinto die lethalis.

§. XXVI.

Frequentioris observationis est damnum, quod im- *Ex ar-* prudens medicatio per topica in morbis articularum & ar- *thritide*, thritidis speciebus, arcessit. Quam gravia autem quamque *et-podagra* *&c. re-* mul- *pulsa sym-* promata.

multiplicia pathemata morboſa inde reſultent, compendioſe, graphice tamen, arthritidis vagæ ſcorbuticæ exemplo tradit *Dravvixius* in vernacula lingua ante C. jam annos de ſcorbuto, conſcripto libello, verbis pag. 62. ſeqq. latine redditis fic habentibus : *maxima cautione opus eſt, ne dum dolores leniuntur atque ſedantur, gravius & magis pernicioſum malum ingruat: quod quidem inprimis facile contingit, quando volatile ſcorbuticum ſal in corruptione ſua eo proceſſit, ut virulentam indolem contraxerit. Hoc enim ſi factum fuerit, arthritis ſcorbutica maximam cum eryſipelate induit convenientiam, & haud ſecus quam in eryſipelate, levi tantum repercuſſione, virulentum volatile ſal ad interiora corporis recedit, ibique longe periculoſiorem ſtatum, quam in externis artubus inducit. Nimirum quando hoc ſal inteſtina adoritur, exquisita ventris tormina, quin ipſa paſſio iliaca, non facile deerunt. Si ad cerebrum ſcandit, ager vertiginem, epilepſiam, apoplexiam alioſque truculentos capitis morbos incurrit. Ubi cor opprimit, illico lipothymia adeſt, vel ſubita plane mors ſequitur. Ad diaphragma & pleuram quum vergit, periculoſus pleuriticus ſeſe exſerit morbus. Ad pulmones delatum, ſpirandi anguſtiam, anxietates præcordiorum, ferinas & ſuffocatorias tuſſes, hæmoptiſes &c. affert. Verbo: quæcumque perniciem in genere alias venenum in internis corporis partibus ſuſcitare valet, eandem etiam peſſimum hoc & virulentum ſal creare aptum eſt. Novi etiam, ſi ſponte recedit, aut incongruis medicamentis exterius exceptum fuit, quod totum corpus brevi horarum ſpatio cum omnibus partibus ſub magno cordis angore intumuerit, eodem modo ac in Hungarica febre aliſque ex corruptis ſuccis oriundis morbis nonnunquam contingere ſolet.*

§. XXVII.

Epilepſia.

Mala itaque, quæ metaſtaſin materiæ arthriticæ conſequentur, ſunt plura, & tantum pro natura corporum ægrotantium & partium, quas illa invadit, & periculo & indole

val-

valde differunt. Quando enim ad supremam capitis regionem vergit materia retropulsa, perquam facile suscitatur epilepsia, sicuti hac de re egregium exemplum prodidit *Riverrius Cent. III. Obs. 85.* ubi quidam, doloribus arthriticis cessantibus, correptus fuit insultibus epilepticis, qui per stata intervalla redibant, & post exactum biennium, prorsus desinuerant; cum eodem tempore dolores arthritici reverterentur, qui per totum illud tempus, quo insultus epileptici saeviebant, omnino delituerant. Ex podagra emanante apoplexiam fieri, auctor est *Wepferus in Lib. de apoplexia pag. 2. xia.* & 3. Et *Simon Pauli in Quadrip. Botanico p. 215.* refert historiam, ubi quidam in levicula podagra, spiritibus medicamentis internis, repellentibus usus est, ubi mox de dyspnœa conqueustus & cordis palpitatione ac lipothymiis correptus est, insequente epilepsia, quæ tandem in apoplexiam lethalem abiit.

§. XXVIII.

Ubi arthritica materia intempestive retroagitur & pe-
tus invadit, convulsivum asthma excitatur, quod a linimenta.
to alias egregio, ex camphora, opio, spiritu vini rectificato composito, vel solo etiam camphoræ pulvere exterius applicato, in cachecticis non semel observavimus; accessit quippe præcordiorum anxietas & summa spirandi difficultas atque angustia, ut strangulari sibi ægri viderentur, quibus postea tumor pedum successit & hydrops. *Crato in Consiliis pag. 1015. Consil. 367.* ex abusu narcoticorum & stupefacientium podagram transisse in asthma refert. Et *Trincavellius de rat. cur. part. hum. corp. Lib. XII. Cap. 1.* scribit: nihil gravius est, quam usu adstringentium & repellentium, præcavere in podagra consuetam fluxionem, inde asthmate gravissimo cum febre continua duo nobiles Veneti affecti, cum tremore totius corporis & omnium sensuum stupore. Id quod etiam pluribus exemplis docui in dissertatione de podagra retrocedente in corpus pag. 12.

§. XXIX.

*Cardial-
giæ, sin-
gultus,
stomachi
inflam-
mationes.*

Eadem vitiosa materia incumbente ventriculi membranis, singultus, cardialgiæ, lipothymia & lethalis ventriculi inflammatio sæpissime sequuntur. Ita *Cramerus Diss. de podagra* memorat: quendam podagricum nudos pedes ventis frigidis exponentem, continuo & lethali affectum esse singultu. *Mænichen in Obs.* 8. pag. 245. prodidit; dolore arthritico per frigida repulso, cardialgiam & lipothymiam accidisse, & post frictiones & vesicantia genubus applicata, cessasse. Et in *Misc. Nat. Curios. D. III. A. VII. Obs.* 147. casus affertur, de quodam, qui frigida aqua pro potu dolores arthriticos suppressens, emetico assumpto, integro mense enormes vomitus expertus est, intercurrente singultu, appetitu abolito, siti aucta, febre continua, urina suppressa, post mortem ventriculus inflammatus repertus. Anno abhinc & quod excurrit accidit, ut femina generosa quinquagenaria podagrica, ipso in paroxysmo ad levandam dolorum atrociam, pulverem ex camphora & minio dolenti parti applicans, discusso dolore, illico incideret in maximam virium jacturam, cum æstu febrili, appetitu prostrato, ingenti anxietate circa præcordia, vomituritione & inquietudine, quam tamen propinata emulsione ex semine papaveris & amygdalis dulcibus, oblato quoque pulvere nitroso cinnabarino, adjuvante Deo ex ancipiti levavi, repetente simul pedes podagra. Sic quoque novi malum ischiadicum balneis adstringentibus repulsum, ventriculum & pectus invaluisse, & cardialgias, febrem lentam, hæcticam & tussim siccam, tandem lethalem, suscitasse.

§. XXX.

Calculus.

Neque minus multiplici compertum est experientia, materiam arthriticam tartaream, in senibus præsertim, sæpius ad renes & urinarias vias transire, & sic arthritidem in calculum mutari. Unde *Solenander Sect. I. conf.* 20. perite, qui uno, inquit, laborat ex iis, alterum vix effugere potest, &

pauci arthritide affecti sunt, qui non in renibus calculum ingenerant. Et *Stiſſerus in Tr. de podagra* testis est, podagricos dolores in nephriticos, colicos æmulantes, hos vero, vice versa, in arthriticos & podagricos, non semel abiisse. Facilis quoque arthritidis vel podagræ retropulsæ in acerbum colicum dolorem est transmutatio. Non materia arthritica, *Colica*, propter affinitatem texturæ & ad stricturas dispositionis, quam ligamenta articularum nerveo-tendinosa ac glandulosa, cum membranis intestinorum invicem alunt, expedite ex articulis ad intestina, & ex his rursus ad articulos, promptissime transfertur. Meminit hujus metastaseos jam *Hippocrates Lib. VI. epid. Part. IV. text. 30.* scribens: qui articulari morbo detentus intestini dolore vexabatur, quietior erat, hoc autem curato, magis dolebat. Quod etiam *Solenander in Consil. pag. 77.* confirmat, dum inquit: femina arthritide semper laborabat, quando a doloribus coli libera erat, & cessantibus coli doloribus, misere ex juncturis afficiebatur. Et *Raygerus in Misc. Nat. Curios. D. I. A. VI. & VII. Obs. 208.* scribit: notus est mihi quidam, qui colica immani torquebatur, superveniente autem podagra, nihil penitus sentiebat. Et quæ plura adhuc exempla memoriæ prodita sunt in *Miscell. Nat. curios. Dec. II. A. IV. obs. 42.* item a *Dravvizio in Tr. de scorbuto pag. 244.*

§. XXXI.

Quandoque etiam accidit, ut podagricum recremen-
tum, in senibus, vel fracto per varias animi afflictiones aliis-
que de causis corporis robore, ad exteriora salutari motu
propelli nequeat, sed restitet ac partibus nervosis insidens,
capitis dolores, ingenii ac memoriæ debilitatem, virium &
appetitus prostrationem, anxietates, spasmos ac dolores va-
rios, stranguriam & crebriorem ad urinam stimulum cieat.
Ejusmodi exemplum notavimus in primario hujus civitatis
viro quinquagenario, qui tamen externo & interno Caro-
linarum usu, relegata ad pedes iterum podagrica materia,
per-

perfecte curatus fuit. Hinc ex vero *Hoffmannus instit. lib. III. pag. 107.* scribit: *videmus podagricos mori tum, si humores influentes repellantur ad viscera, aut si viscera tam sunt debilia, ut humores ad superficiem pellere non possint.*

§. XXXII.

*Vel in
tempesti-
vam ve-
nae sectio-
nem re-
tentæ,*

Pariter a sanguinis missione in corpore minus plethorico intempestive administrata, podagram repressam novi, & res certe magnæ prudentiæ medicæ est, venæsectione recte uti posse, in morbis quos salutaris quædam & critica ad cutim excretio stipat. Nam uti nimia sanguinis redundantia quandoque vires naturæ opprimere & expulsionem materiæ ad corporis corticem impedire potest: ita etiam, si sanguis non redundans præpostere exantlatur, pariter naturæ robur infirmatur, ut excrementitiæ sordes ad minima vâcula cutisque poros pelli nequeant, sed retentæ gravissima cieant pathemata. Quare perite *Io. Langius Lib. I. epist. 16.* inculcat: ne, quando natura, per habitum corporis materiam peccantem ut propellere velit, intenta est, phlebotomiam administremus, aut pharmaca exhibeamus, ne ingens inde periculum enascatur, nec per eas venas, per quas materia morbi expulsa fuit, rursus ad interna viscera retrahatur. Quod quidem monitum inprimis nostro hoc ævo probe observandum, ab iis, qui tam prompti & liberales in sanguine mittendo, quasi vero tantum non omnes morbi a plethora, & hæmorrhoidum vel mensium fluxu imminuto, aut deficiente, ortum traherent.

§. XXXIII.

*Sudoris
axilla-
rum &c.
critici.*

Præterea saluberrima in quibusdam sudoris foetidi in pedibus & sub axillis succedit excretio: qua quum corpus pædore teste ab exitiali & putrido humore liberatur; patet utique sanitati maxime obesse, si imprudenti consilio eadem supprimatur; licet id frequentius limatura ferri, aurichalci & terris calcareis ustis inspersis, perficiatur. Novimus enim inde vertiginem aut capitis gravitatem, aurium tinnitum,

diffi-

difficilem respirationem, ventris tormina atque vagos artuum dolores subortos, nulla arte nulloque consilio expugnabiles. Id quod etiam *Simon Pauli quadripart. boran. pag. 215.* memorabili exemplo confirmat, narrans: quendam deleto pedum foetido sudore, in gravem primum cordis palpitationem, ac postea atrocem & nodosam podagram incidisse. Eadem ratio est critici quorundam nocturni sudoris, quem per multos annos largiter cum singulari valetudinis commodo manasse, postea vero vel ob naturæ debilitatem retentum, vel præpostero consilio ficcatum, atrocia pathemata, affectus soporosos maxime cum sensuum & memoriæ debilitate, rheumaticos affectus, erysipelata, asthmata, febres lentas & languores, invexisse, experientia compertum habeo, neque symptomata prius cessarunt, quam saluberrima hac excretionē integre restituta. Eundem adhuc in censum referendi diuturni pe- ^{Nec nov-}
dum tumores, variis artificii compressi & ad interiora coacti. ^{tumorum}
Hoc quippe factō, asthma & catarrhum suffocativum, dia- ^{repulso-}
betem & febrem lentam, summa cum virium prostratione ac- ^{rum}
cidisse, aliquot exemplis confirmatum habemus. ^{noxa.}

§. XXXIV.

Accedunt pathemata, post conceptum inquinamen- ^{Bubones}
tum venereum, præpostera medicatione tractatum & intro ^{repulsi.}
coactum, conspicua. Nimirum bubones venerei, ubi glandularum ductus tenaci caustica lymphā infarcti sunt, quando imprudenter a Chirurgis vel Medicis adstringentibus & repellentibus excipiuntur, humor ex mora & stagnatione virulentior redditus, & cum lymphā ad vasa lymphatica translatus, universam ejus massam inquinat, ut hinc non modo ulcera & pustulæ in facie efflorescant, sed & atrocissimi dolores in perioestio aliisque sensu exquisito præditis partibus suscitentur. Idem fit, quando gonorrhœa impuri ^{Et gonor-}
coitus soboles, nimis cito adstringentibus cohibetur. Ad- ^{rheā sup-}
stringentibus enim miasma venereum corpore expellendum ^{pressa}
(III.) Bb ^{re-} ^{quid no-}
ceant,

reprimatur; acrioribus autem, calidis sudoriferis & balsamicis intestina agitatio suscitatur, & fibrillæ stringuntur, quo fit, ut virulenta materia agilior reddatur, non tamen eliminetur: & sic utroque modo universus lymphaticus latex inquinatur, corrumpitur atque maximus huius luis gradus inducitur. Hinc sæpius certe vidimus, gonorrhææ malignæ, nimio balsami Peruviani, vel de Copaiva usu cohibitæ, pustulas in facie, ossium dolores & in inguine bubones successisse.

§. XXXV.

*Mala ex
coryza
repressa.*

Denique non prætereundum est damnum, quod ex turbata & intercepta feri vitiosi per glandulosa emunctoria, præsertim in naribus & faucibus existentia, in coryza & catarrhis, in feminis vero sub fluore albo per uteri & vaginæ glandulas evacuatione, in sanitatem redundat. Quod si enim coryza a frigore incautius admissio reprimatur, serosa materia in capite obhærescit & dolores acutos ac vehementes circa radicem nasi in ossibus frontis parit, cum vertigine & aurium tinnitu, ac lassitudinem totius corporis, torporem & febrem lentam adducit. Vel si etiam per assumpta purgantia successus turbatur & ad intestina acre serum allicitur, dolores & anxietates ventriculi, cum inappetentia, abdominis tormina & incompefcibiles diarrhææ subsequuntur. Pariter a fluore muliebri per suffimigia mercurialia sublato, pathemata hypochondriaco-hysterica, asthmatica observavi, vidi quoque febrem cum purpura, repetente, hac sanata, albo fluore. Et *misc. nat. curios. Dec. I. An. II. obs. 331.* a fluxu albo per balnea vitriolacea suppresso, phthisin insanabilem sequutam referunt. Quæ certe omnia, quam grave damnum excretionum, & maxime cuticularis suppressio, iungat, conspectius testantur.

*Et fluore
albo co-
bibito,*

CAPVT IX.

DE

VITIIS EX TVRBATIS SAN- GVINEIS ALIISQVE EVA- CVATIONIBVS.

§. I.

ITa comparatam esse artificiosissimam corporis nostri stru-^{Nimia}
cturam, ut boni laudabiles & alimentares succi per varia ^{succorum}
organa ad usum secernantur, inutiles vero, effoeti atque ^{copia}
corrupti per tot valorum excernentium emissaria, in vitæ sa-^{sanitati}
nitatisque tutelam jugiter eliminantur, antecedenti capite ^{inensa.}
pluribus est assertum. Potissimum tamen & rationibus & ex-
emplis evictum dedimus, eam sordium excretionem, quæ
per corporis corticem succedit, esse omnium saluberrimam;
sustaminatam vero plurium & gravissimorum morborum caus-
sam. Quum autem non solum perversa qualitas, sed etiam
quantitas, naturæ microcosmicæ adversa sit: sæpius contin-
git, ut ipsi benigni, temperati & utiles succi, ut lympa &
sanguis, nimia copia delinquentes & solidorum tono, motui
ac systole ipsique progressui fluidorum mole sua obfistentes,
perniciem intendent, & cacochymiam ingignendo, vasa &
viscera obstruendo, ac spasmos in nervosis partibus suscitando,
sanitatem gravius labefactent. Quod ne eveniat, pro-^{Hinc}
videntissimo idemtidem consilio, in machina animali ejusmo-^{excer-}
di organa ac viscera fabrefacta sunt, quæ redundanti maxime ^{nenda.}
cruori diverticulum præbeant, donec nimis demum in iisdem
accumulatus, per aperta arteriolarum oscula, sufficiens & quæ
redundabat copia exsolvatur.

§. II.

*Quod fit
per men-
sum flu-
xum.*

In sexu quidem sequiori, a decimo quarto ad quinquagesimum usque ætatis annum, ordinaria ejusmodi superflui sanguinis evacuatio singulis mensium periodis succedit per uterum. Hujus enim ea fabrica est atque textura, ut ex fibris mira expansili & contractili virtute prædita, numerosissimis quoque tortuoso ac serpentino ductu excurrentibus vasis, penitus coagmentatus sit, eamque ob causam eximiam cruoris copiam recipere & recondere possit. Increcente autem successive nimis mole, sanguis in curvatis venarum alveis tarde progreditur, moram nectens latera extrorsum in varices quasi urget, donec demum appulsus semper per arteriolas, præcluso in venas transitu, distentos canales perrumpit, & sola mechanica ratione, sine concursu principii interni dirigentis, cruor superfluous ex apertis osculis manat.

§. III.

*Quo sup-
presso in
aliis locis
oriuntur
hæmor-
rhagia.*

Hæc critica atque solennis sanguinis excretio, si sufficienter & rite succedit, nimium quæ in vitio est molem evehendo, sanitati egregie patrociniatur: contra vero quando vitium capit, & vel excedit, vel deficit, vel etiam perperam cohibetur, damno maculat gravissimo, quod ut testatius patefcat, luculentas nonnullas adducemus observationes. Et primo quidem multiplici experientia constat, menstruum sanguinis profluvium, quacunque ex causa suppressum, insolitas quærere vias & facile in alias insuetas hæmorrhagias transire. Nam *Horstius in præfat. ad Part. II. obs. Schenckii lib. IV. pag. 698.* sanguinem a mensium regurgitatione ex auribus, & *Hollerius Comment. in lib. II. Sect. II. Coac. §. 18.* nec non *Jo. Rhodius Cent. III. obs. 51.* ex gingivis & dentis alveo, critice excretum testantur. Inprimis frequentioris observationis est, sanguinem, qui per uterum eliminari debebat, per vomitum, ruptis ventriculi venosis vasis, brevibus dictis, rejectum fuisse, quod *Hippocrates lib. I.*

de morb. §. 32. Forestus lib. XVI. obs. 25. Panarolus Pemecost. I. obs. 6. Rodericus a Castro de morb. mulier. lib. I. cap. III. Hæbsterus obs. Dec. II. cas. 7. Stalpart van der VViel Cent. II. obs. 17. alique plures passim exemplis confirmant. Neque adeo rarum est, sanguinem præcluso per uteri vasa exitu, majori vehementia ad pulmones delatum, perruptis ibi vasis tussi rejici, sicuti ejusmodi casus Holterius lib. I. de morb. intern. cap. 29. Rhodius Cent. III. obs. 30. Salrnuthus Cent. II. obs. 18. narrant. In feminis quoque annosioribus, quando menstrua cessat purgatio, cruenta non raro oboritur mictio, ita prorsus, ut exempla prostent, ubi singulis mensium periodis cum urina, sanguis partim fluidus, partim grumofus, redditus fuit.

§. IV.

Quisque vero peritior Medicorum redundantis sanguinis per hæc minus congrua loca exclusionem, non adeo tutam, sed ancipitem & haud levi discrimini expositam esse facile judicabit. Quo enim pars corporis nobilior & vitæ tuendæ aptior magisque necessaria, eo perniciosior est ejus læsio eoque plus periculi alit. Quare si pulmonum vitale viscus a sanguine stagnante labem accipit ac laceratur, facile ulcerosa pulmonum affectio phthifica nascitur. Exstat de hac noxa dignus memoratu locus in Alpini medic. method. pag. 273. dum ait: ob immoderatam sanguinis evacuationem, vel diuturnum morbum menses supprimuntur, quod si diu durat, mulieres in graves morbos incidunt, aliqua in sanguinis spurum, ex quo deinceps phthisi intereunt, quod proximo anno Aemilia nobili virgini accidit, cui quum menstrua purgationes ex mærore assiduo defecissent, cum spuito sanguinis & assidua tussi orta est febricula, qua paucos post menses interiit. Et Hippocrates lib. I. de morb. mul. §. 6. eandem in rem egregie scribit: quibusdam mulieribus menses bimestres in uteris existentes ad pulmonem recedunt, & ubi recepti fuerint, omnia patiuntur, qua in tæbe dicta sunt. Si vero in ventriculi ex-

quisitissimi sensus membranas forte subsistit cruor & ibi corrumpitur aut coagulatur, periculosa ejus inflammatio, vel hectica febris emergit. Aut si etiam erumpit, vasa tamen brevina nimium ante distenta, tam enormi laceratione, inprimis si lien male affectus, dehiscunt, ut iterum coalescere nequeant, & vomitus copiosus saepiusque repetens mortem interat.

S. V.

Alia damna ex suppressis mensibus.

In capite.

His non minora, sed longe graviora ac plura sunt mala, quæ si sanguis neque per uterum, neque alia loca exsolvitur, pullulant; quæ tamen non tantum pro diversa corporum natura, verum etiam partium, quibus restagnans cruor incumbit, discrepant. Nam quâviscunque ad caput sanguinis impetus vergit, atroces, quin funesti, in eo morbi subsequuntur, hemicrania, vertigo, cephalalgia, melancholia, mania & apoplexia. Ipse Hippocrates mentis turbas inde cieri testis est, & lib. de virgin. morb. S. 120. quando, ait, sanguis in uterum confluit & osculum exitus non fuerit apertum, tunc non habens effluxum, præ multitudine resilit ad cor & ad septum transversum, & quum hæc repleta fuerint, cor satium fit, deinde ex saturnitate torpedit, ex torpedine delirium. Epilepsiam quoque ex retentis mensibus describunt Misc. nat. cur. Dec. I. An. I. obs. 85. Et obstinatam inde inductam oblivionem Acta Hassniensia Vol.

Pectore.

II. obs. 78. memorant. Quando porro ad thoracem regurgitans sanguis cor & pulmones opprimit, syncope, cordis palpitatio, polypi, asthmata, pectoris angustia ejusque hydrops producuntur. Ubi in visceribus abdominis viscerum sanguinis copia restagnat, inde fit malus habitus, ictertia, tumores pedum œdematosi ipseque dirus hydrops, prout maxime auctor est Hildanus Cent. V. obs. 41.

S. VI.

Aliisque corporis partibus.

Quod si autem ad ventriculum & intestinorum canallem sanguis congeritur, exsurgunt inde anxie & molestæ ven-

ventriculi inflationes, cardialgiæ & spasticum ac flatulentum gravissimum malum, quod totum genus nervosum exagitat, & hysterica passionis nomine innotuit. De hac luculenta sunt Hippocratis verba lib. I. de morb. mulier. §. 5. *quum uteri, (per quos menses intelligit) ad stomachum qui nervosus est allapsi fuerint, & ad ventrem irruerint, dolet spina & totum dorsum, & lingua ipsius refrenatur & hanc non claram habet, & animi deliquium adest, aliquibus etiam vocis privatio, & stomachus mordet, & flava bilis urget & amara est, & jactat se & ardet.* Ipse quoque uterus a cohibitis mensibus subinde gravem patitur labem. Sic eundem hæc de causâ hydropæ inundatum in *Misc. nat. cur. Dec. II. An. I. obs. 79.* relatum legimus, pariterque ingentes uteri tumores, eosque scirrhosos, cum exulcerationibus succrescere, experientia edocemur. In serosioribus etiam & phlegmaticis retentus mensium fluxus, crebrius in copiosum feri albi stilicidium transit. Neque denique sufflaminata saluberrima uterina purgatione, externæ partes a vitiis immunes manent, sed easdem sæpius scabie, elephantiasi, furunculis, erysipelaceis affectibus, vel scirrhis tumoribus infestari, experientiæ testimonio constat.

§. VII.

Quæ omnia truculenta pathemata, sicuti suppressam *Ex emanante mensium fluxu.* in junioribus menstruam evacuationem pressio subsequuntur pedè: ita pariter nihil frequentius in artis exercitio obvium, quam quod subsistente penitus ob ætatis rationem critico hoc fluxu in annosioribus, eadem afflictiones ingruant. Ego certe multiplici experientia compertum habeo, post annum quinquagesimum, feminas, præsertim quæ sanguineæ & largius alias profluvium expertæ sunt, vitam præterea sedentariam, otium & unctius vivendi genus sectantur, a sanguinis tamen missionibus abstinere, dolores cardialgicos, cum summo circa præcordia ad dorsum usque & scapulas excurrente æstu ac dolore, noctu præsertim, incurrere. Alias phlogosi,

gosi, doloribus artuum & erysipelaceis febribus correptas, alias nephritidi cum lumborum tormentis, in calculosas concretionem desinenti, implicitas vidi. Nonnullas post sexagesimum annum mictio cruenta, vel incompscibilis mensium fluxus, qui demum in hecticum calorem concessit, infestavit. Quasdam, inprimis diuturno moerore confectas, incessit dolor sinistri hypochondrii, cum anxietate & æstu præcordiorum, qui postea in vomitum cruentum enormem, sive morbum sic dictum nigrum Hippocratis funestum, erupit, ubi lien, dissecto post mortem cadavere, magnus & putridus, vasa brevia ventriculi mirum diducta & late hiantia, sanguis quoque vasis elapsus in ileo comparuerunt. Nonnunquam & haud ita pridem in serenissima persona, a cessante quinquagesimo tertio anno menstrua purgatione, continuas anxias vomitiones annotavimus, per dimidium anni affligentes, quibus successit tumor pedum & manuum; quæ tamen sanguinis missione aliisque congruis præsidis fortunante Deo egregie levata.

§. VIII.

*Ex lochiis
retentis.*

Est vero præter menstruum sanguinis fluxum, alia adhuc sanguinea evacuatio feminis propria atque solennis, quæ sub partu & post eum succedit, lochialis nempe. Hac quum pariter sanguis, sub graviditate in uteri vasis mirum distentis collectus & impurus factus, utilissime exsolvatur, non potest non ejus suppressio maximum inferre damnum, ita prorsus, ut plures inde occumbant. Etenim quo major in puerperis, ob graves partus labores superatos, totius corporis, maximeque generis nervosi debilitas; eo gravius periculum a stagnante lochiali sanguine & metuendum est & expectandum: licet symptomata, prout regurgitans cruor varia loca variasque partes occupat, vel ipsa corporis natura differt, diversimode incendant. Videlicet quando impurus ab utero sanguis ad caput ruit, vertigo, paralytis & apoplexia præsto est, uti præ aliis *Fornius in Respons. lib. I.*

*Capitis
& pectoris morbi.*

pag. 25. confirmat. Quando ad pectus concedit, anxietas, spiritus difficultas, lipothymia accedunt, vel tussis, phthisis & totalis pulmonum exulceratio inducitur.

§. IX.

Nihil tamen frequentius accidit, quam quod gravia pathemata hysterica, febre stipata, lochiorum suppressione^{Malum hysteri- cum.} consequantur, quando nempe congestus in abdominis visceribus & mesaraicis vasis sanguis, nervosos ibi plexus moleste afficit & ad spasmos sollicitat. Notabilis imprimis hanc in rem est observatio *Binningeri Cent. II. obs. 45.* de puerpera, quæ paucis a partu diebus, mediocriter a lochiis purgata, lectum deseruit & rigido se commisit cælo, ex quo penitus suppressis uteri purgamentis, diversa pro differentia partium accesserunt symptomata: in capite ejus gravitas & ad somnum propensio, in thorace sputum sanguineum, subflavum, pituitosum, notu maxime longis intervallis cum levi tussi ægram exercens. In collo quasi suffocantis globi sensus fuit. In corde & universo vasorum genere febris continua, cum pulsu debili & celeri ac siti inexhausta nec non animi deliquio, excitata. In abdomine alvus dura & laboriosa facta. In partibus externis dolor lateris dextri & scapularum pungitivus ac vagus concitatus. Post sanguinis vero missionem alvi solutionem & assumpta antihysterica, omnia hæc pathemata conquieverunt. In nostris quoque regionibus nihil frequentius accidit, quam^{Febris & purpura.} quod lochiis non rite fluentibus, sub alvo præsertim duriori, febres continuæ, cum purpura rubra & alba mali moris, accendantur, magna certe circumspectione tractandæ; quandoquidem si retrocedit purpureum exanthema, vires penitus dejicit non modo, sed & in dispositis sæpe hecticam febrem ciet & universum sanguinem in excrementa pituitosa & salsa, quæ copioso sputo, urina crassa, sudore multo & alvo laxiori ejiciuntur, sensim convertit.

§. X.

*Excretio
hæmor-
rhoidalis
salutaris.*

Verum enim vero quum non solum in sexu feminino, sed etiam virili & nobiliori sæpe eveniat, ut sanguis & benigni laudabiles succi nimium copia increscentes, vitæ ac sanitati perniciem intendent; admirando pariter divinæ providentiæ beneficio in acceptis ferendum, quod in viris etiam via pateat, quæ cum egregio valetudinis emolumento, superfluis & noxam minitans sanguis ejici queat. Videlicet dictum est huic saluberrimo negotio vas peculiare abdominis venosum, portæ vena dictum, quod venæ pariterque arteriæ munus explet, & sanguinem a plurimis abdominis visceribus, non modo revehit, sed & postea in hepatis viscus adducit. Quia enim hæc vena manifesta systole & diastole, sive pulsus, destituitur, eamque ob causam sanguinis trajectus per hepar, ejusdemque regressus ex liene, pancreate, mesenterio & intestinis admodum tardus ac difficilis est: non potest non fieri, quam ut ex mechanica & hydraulica necessitate, ob restagnantem in alveis ramorum hujus venæ cruorem, & maxime in vena splenica ejusdemque propagine hæmorrhoidali, in qua ob situm perpendicularem & a corde longius remotum, difficilior adhuc redditur regressus, major appulsio ad minimas arteriolas earumque extrema fiat, ac demum accedente sub alvi egestione nisu, in tunicis intestini recti canales dehiscant & cruorem effundant.

§. XI.

*Præter-
naturalis
tamen
nec uni-
versalis.*

Dici solet hic fluxus hæmorrhoidalis, & ordinarie non per externas, sed internas venas hæmorrhoidales succedit, sique non est nimius, vel symptomaticus, a multis morbis ex plethora oriundis defendit, ac salutaris est; unde etiam non sine ratione germanico idiomate vocatur *die guldene Ader*, quasi auro æquiparandus, vel non redimendus fluxus. Interim licet hæc sanguinis evacuatio, a natura per sensibiles quosdam præcedentes motus in abdomine, ossæ sacro & cruribus perficiatur: tamen non secundum, sed præter

ter naturæ rationem & ordinem contingit, & ut plurimum tantum in iis viris obvius est, qui spongiosioris, laxioris & plurimis exilibus vasculis donati, adeoque muliebris corporis habitus sunt, qui motu, labore ac sudore secundum universale & primum præceptum nimium sanguinem non consumunt, sed desidiosam in luxu agunt vitam, sanguinemque copiosum gignunt, qui præterea in puerili ætate largas per nares experti profusiones & in adolescentia hæmoptica molimina passi. In his inquam ætate demum virili per sedis venas, idque frequentissime, redundans sanguis exsolvitur salutari modo.

§. XII.

Neque etiam ipsæ feminae, quæ eandem vasorum ^{Femina} abdominis & venæ portæ conformationem habent, ab hoc ^{etiam} sanguinis per sedales venas profluvio sunt plane immunes, ^{quandoq;} sed frequenti experientia compertum est, naturam, inprimis ^{accidit.} in suppressis mensibus, sæpe per hæmorrhoidalia loca abundantem sanguinem emittere. Observavit id ipsum Hippocrates in Coac. & lib. IV. epid. cap. 20. exemplo confirmat: filia, inquit, *Aedilis mensibus non prodeuntibus per duos annos hieme habuit hæmorrhoides.* Et Heurnius comment. in aph. 10. lib. VI. disertis verbis scribit: *novi mulieres, quæ mensium vice hæmorrhoides fundebant.* Pariter in gravidis sanguineis, ubi menses resistant, sæpius vidimus hæmorrhoides salutariter vel fluxisse, vel protuberasse in ano, quin in puerperis quandoque cum ipsis lochiis manasse. Commemorabilis hanc in rem est Hollerii de morb. intern. lib. I. cap. 55. observatio, ubi mentionem facit duarum feminarum gravidarum, quibus salutariter stillarunt hæmorrhoides, partu consequuto saluberrimo, & quod mirum, si sanguinis per ani venas fluxus tempore graviditatis substitit, pessime habuerunt, eodemque erumpente, mirifice allevatæ sunt. Mihi quoque plurimi suppetunt casus, quod feminae sanguineæ, & menstruo, & hæmorrhoidali fluxu, obnoxia fuerunt, quæ

subsistente per hæmorrhoides profluvio, symptomatibus hypochondriacis & hysteriis afflictæ sunt, licet sanguis per menses largiter exsolveretur.

§. XIII.

*Cur hæ-
morrhoi-
des jam
adeo fa-
miliares.*

Quamvis vero hic hæmorrhoidum fluxus non omnibus naturis, sed sanguineis potissimum & vitæ sedentariæ addictis solennis, quin secundum Hippocratem de aer. & locis cap. IV. §. 7. meridionalibus magis locis familiaris, in borealibus autem rarior sit; nostris tamen temporibus in hisce aquilonariis etiam regionibus, longe familiarior est & frequentior, quam olim, ut ipse testari possim, perpaucos, quum ante quadraginta annos medicinæ exercendæ manum primum admoverem, sanguinis per ani venas stillicidio, vel moliminibus ad istud, fuisse affectos. Si in causam inquirimus: mea quidem sententia culpa potissimum rejicienda in vitæ genus, ex operoso ac laborioso, ob perditos hominum mores, in desidiosum ac otiosum mutatum, quo non solum major quam par est sanguinis copia ingignitur, sed etiam ipsum corporis robur languescit, ut non mirum sit, effeminato corpori femineum quoque accidere sanguinis fluxum. Deinceps hæmorrhoidum profluvium, teste experientia, hæreditarium & hinc certis familiis solenne est, quumque sic hæmorrhoidibus obnoxius hæmorrhoidarium gignat filium, propagatur latius dispositio & plures fluxum experiuntur. Accedit & hoc, quod nostro tempore Medici in omnibus fere morbis hæmorrhoidum anomalias subesse, perperam putent, & crebriori pilularum, præsertim aloëticarum, usu, sanguineum fluxum proritare, etiamsi natura ad eundem plane non inclinēt, nitantur. Recte enim jam Fossæ tom. I. cons. 57. censet: quod & tumor lienis, qui Italis familiaris, & multiplex purgantium & aloëticorum usus, sit frequentissima fluxus hæmorrhoidalis causa, & adjicit: *ca-
veat quisque omnino a pilulis de aloe, aloe enim aperit ora*

vena.

venarum & hæmorrhoides adeo inducit, ut ex centenis his pilulis mentibus, nonaginta hæmorrhoidibus laborent.

§. XIV.

Quemadmodum itaque in iis, qui dispositi sunt ad hæ-Hæmor-
rroides, nihil salubrius est eorum fluxu, si rite succedit: rheidum
ita vicissim nihil perniciosius, quam si deficiunt, vel plane turbæ de-
perperam cohibentur; quod argumentum jam paulo uberius trimen-
excutere placet. Memoratu certe dignus hanc in rem est tosa.
Celsi lib. VI. cap. 13. locus, in quibusdam, inquentis, hæmor-
rroidum fluxus parum tuto supprimitur, qui sanguinis profluvio
imbecilliores non sunt, habent enim purgationem hanc non mor-
bum, ideoque curati quidam, cum sanguis exitum non haberet,
inclinata in præcordia materia, subitis & gravissimis morbis cor-
repti sunt. Nam quando sanguis superfluous, & qui vitali-
bus conservatoriis motibus, nempe circulari & liberiori se-
cretorio & excretorio, remoram injicit, per solennes has vias
minus excluditur, ejus regurgitatio vel metastasis fit in varias
alias corporis partes, cum summo vitæ ac valetudinis discrimi-
mine. Quandoque concedit ad caput, & maniam, melan-
choliā vel etiam apoplexiam parit. Nonnunquam in pectus
dilabitur, & pleuritidem, peripnevmoniam, phthisin vel
asthma inducit. Sæpius hepatis incumbit, & scirrhum ac
hydropem durum producit. Sæpius quoque in vasis mesa-
raicis & intestinorum membranīs sanguis crassior & impurior
congeritur, ibique spastica & hypochondriaca flatulenta sym-
ptomata & atroces dolores colicos ciet. Si porro ad renum
viscus sanguis hæmorrhoidalis suppressus regurgitat, nephritis
& calculus, mictus quandoque cruentus, nascuntur. Et
quando denique in habitum corporis impetuose protruditur,
ibique subsistit, phagedæna & mali moris ulcera exoriuntur.

§. XV.

Quæ quod ita sint, passim auctores luculentis testimoniis Quod te-
ac observationibus confirmant. Et quidem Hippocrates hæmor-
rhoi-
crates.

rhoidum in melancholia & mania salubritatem disertis verbis asserit, *lib. IV. aph. 26.* inquit: *melancholicis*, id est, si qui sine febre insaniunt, *si varices aut hæmorrhoides superveniunt, insaniam solvunt.* Et *aph. IV. com. 25.* hæmorrhoidum moderatum fluxum maniam prohibere, dicit. Porro etiam ad curandam nephritidem hæmorrhoides, ceu summam medicinam commendat, dum *lib. VI. aph. 11.* ait: *nephriticis hæmorrhoides supervenientes magnam opem ferunt.* Præterea & *lib. de humoribus* earum fluxum ad præservationem pleuritidis & morborum, qui cutim defœdare solent, dilaudat; potissimum *epid. lib. VI. Sect. III. text. 37.* scribit: *mariscis laborantes, neque morbo laterali, neque pulmonario, neque phagedæna, neque furunculis, neque thermitis fortasse, neque alphis laborant.* Utilem quoque ad sublevandam molestissimam illam hypochondriorum tensionem idem gravissimus autor in *Coacis* dijudicat: quibus, inquit, *dolores hypochondriorum, oris ventriculi, hepatis & partium circa ventriculum sunt, hi sanguine per inferiora excreto, sanantur.* Et quæ plura ejus huc referri possent effata.

§. XVI.

Aliique
auctores.

Neque deficiunt aliorum gravissimorum Medicorum auctoritates, quæ idem adstruunt. Sic *Galenus lib. VI. can. 29.* qui clausis hæmorrhoidibus in insaniam inciderunt, sæpe referatis his venis, ab iisdem evasisse perhibet. Et *lib. III. de humor. com. 26.* melancholiam ex suppressis hæmorrhoidibus ortam, annua evacuatione curatam, refert. *Hildanus Cent. VI. obs. 28. pag. 531.* ita differit: *ego sincere scribere possum: experientia me comprobasse, eos rarissime apoplexia, epilepsia, aut vertigine, aut oculorum inflammatione, correptos fuisse, quibus hæmorrhoides fluebant; immo apertione hæmorrhoidum gravissimos sublato esse morbos, & in aliis & in me ipso sum expertus.* Porro *Ronsæus de scorbuto pag. 72.* non paucos, ait, novimus, quos profusio sanguinis ex hæmorrhoidibus a scorbuto præservavit. Petrus Monavius de

se ipso ad *Crationem Epist.* 236. conqueritur: se a suppressis hæmorrhoidibus, quæ antea fluxerant, arthritidem incurrisse. *Forestus lib. XXIII. obs. 4.* ab arthritico dolore quendam erumpentibus hæmorrhoidibus liberatum; & alii cardialgia laboranti cum commodo easdem apertas esse, testatur. *Amatus Lusitanus Cent. V. conf. 3.* hæmoptysin referatis his venis curatam, memorat. Et *Alpinus in medicin. method. lib. II. pag. 371.* hæc præclara de hæmorrhoidibus habet: *in melancholia incipiente sapius hæmorrhoids profuisse visa est, & perfectam quoque sanavisse: contra, si cohibeatur, homines in gravissimos morbos labuntur. Solet in hepate ac liene fieri scirrhusitas & refrigeratio caloris nativi, unde aqua intercus, præterea verriginosi ac melancholici fiunt, quibus dicta vena cohibentur. Illustrissimus Senator Venetus, proximo anno a suppressis hæmorrhoidibus, quas multos annos habuit, in affectum scotomaticum incidit.*

§. XVII.

Quandoque etiam suppressa vel deficiens in senibus *Et obser-* hæmorrhoids in nephritidem vel mictum cruentum concedit. *vatores.* Quare non sine ratione *Mercurialis in Praxi lib. III. cap. 31.* & *Sennertus instit. lib. III. P. I. S. III. c. 5.* mictum cruentum renum hæmorrhoides appellarunt. Et certe prostant exempla, ubi in senibus sanguis singulis mensium intervallis cum urina partim fluidus, partim grumofus redditus fuit, qui equitatione vel vini generosi potu facile prolectus est. Ejusmodi sanguinolentam mictionem *Hildanus in sene Cent. II. obs. II.* obiervavit. Idem confirmat *Heurnius comment. in aph. X. L. VI. vidi*, inquit, *qui, cum hæmorrhoidibus tentari solebant, cum urina sanguinem effundebant cernis spariis, sine noxa.* Interdum fit, ut loco sanguinis liquor albus viscosus & albumini ovi similis per anum prodeat, non secus ac menstruus fluxus quandoque in fluorem album concedit, ut hinc recte *Platerus* albas has hæmorrhoides cum menstruis albis mulierum comparaverit, de quibus pluribus videatur *Fernelius lib.*

lib. VI. pathol. c. 10. & Sennertus in praxi lib. III. Part. II. Sect. II. cap. 12. nec non Misc. nat. curios. Dec. I. An. I. obs. 75. Et mihi nota complura sunt exempla, quosdam tubercula in ano gestasse, quæ ob exquisitum dolorem totum corpus in consensum pertraxerunt, sponte autem rupta. aliquot cochlearia feri acris corrosivi fuderunt, quo evacuato, pathemata conquieverunt.

§. XVIII.

*Nec non
notabile
exem-
plum.*

Nobis quoque in proclivi foret, plura de noxa suppressarum hæmorrhoidum in confirmationem adducere exempla, sed instar omnium esse potest illud, quod ante aliquot annos notavimus. Nimirum generosus quidam vir fere quinquagenarius, ex suppressis per potum aquarum salubrium frigidum & balnea hæmorrhoidibus, podagram & malum hypochondriacum spasticum sibi contraxerat, & huc cum familia concedens, me in consilium ascito, fortunante Deo multum levabatur, ut etiam hæmorrhoides, quæ diu subsisterant, redirent. Quum vero paulo largius fluerent, enixe a me petiit, ut profluvium compescerem, quod tamen constanter renui, ac potius ut sibi gratularetur & in sinu gauderet de redeunte fluxu, regeffi. Sed æger inde magnum periculum ac debilitatem metuens, moniti immemor, ab extraneo Medico, me inconsulto, medicinas fluxum suppressantes, quibus opiata & martialia immixta, impetravit, iisdemque crebro usus est. Jam pulcherrime omnia succedere videbantur, fluxus quippe tertio die subsistebat, æger obambulabat sanus nihilque damni metuebat, ac residua pharmaca per quatuor adhuc dies ingerebat; sed nocte concubia lethalibus opprimebatur symptomatibus, ac incredibiles primum præcordiorum anxietates, inquietudinem & atrocissimos ventris dolores sentiebat, cum arctissima alvi constrictione, quæ nec clysteres admittebat tantaque erat vis morbi, ut omnia antispasmodica, einnarbarina & clysteres oleosos eluderet, ac tertio die, posteaquam

quam æger adhuc ira correptus esset, aphonia, delirio & convulsionibus funestum fortiretur eventum. Facta post-ridie sectione, vidimus cum stupore, non modo intestinum rectum, sed & totum coli tractum in sinistro latere ita constrictum, ut digiti crassitiem vix superaret, ventriculum inflatum & in quibusdam locis inflammatum, ejusque cavitati ferum sanguinis putridum innatans, reliqua omnia viscera optime constituta. Neque dubium est, quin, si capitis fuisset apertio concessa, celeris mortis causa ibi detecta fuisset, videlicet sanguinis extravasatio, aut inflammatoria stasis, quia fortissima intestinorum & nervosarum partium strictura, sanguis ad membranas ventriculi & cerebri delatus, hanc funestam catastrophem procul omni dubio induxit.

§. XIX.

Quare sicuti nunquam hæmorrhagia, licet fuerit e-^{Hinc} normis, quando a causa interna proficiscitur, fortiori me-^{nunquam} dicina styptica reprimenda est: ita multo magis id in hæ-^{valide} morrhoidibus nimium fluentibus observandum, siquidem non ^{compri-} modo secundum allegatum *Hippocratis* testimonium, inde ^{menda} hydropis vel tabis metus, sed & aliorum gravissimorum affe-^{hæmor-} ctuum, de quibus supra facta mentio, periculum nascitur, ^{rhoides.} idque eo magis in iis accidit, qui jam per ipsum copiosum fluxum, vel aliis ex causis imbecilliores facti sunt. Etenim hanc regulam practicam quisque Medicorum, ut curæ cordique habeat, vehementer optarem, videlicet, nihil ad perniciem magis perducere, quam valde debilitatis corporibus adstringentia, opiata vel alia fortiora remedia adhibere. Neque corporis humani natura a validiori sanguinis effusione unquam tantum patitur, quantum damni ab importuna sistente medicina accipit. Deinceps & illud utile monitum prudens Practicus inde capere debet, quod in ejusmodi affectibus, qui retentis hæmorrhoidibus supervenire solent, nihil prius antiquiusque habeat Medicus, quam ut iis aperiendis,

(III.) Dd five

five per interna, five per externa, ut hirudines, invigilet. Præclara sunt, quæ hac de re prodidit *Baglivus in praxi Lib. I. pag. 124. plurima*, ait, adducere possem exempla, quam utilitatem, non obstante sanguinis circulatione, aperitio venarum hæmorrhoidalium, præ aliarum venarum aperiione, asferre soleat iis, qui hypochondriorum morbis, doloribus scilicet, caloribus, lumborum gravitate, flatibus, tensionibus, borborygmis laborant. Quandocunque vero harum venarum aperiitio non succedit, aut difficulter perficitur, tum naturæ institutum in ejusmodi morbis Medicis imitandum & sanguini in inferioribus, pertusis pedum venis, exitus parandus. Ita novimus ischiadicum dolorem, ex hæmorrhoidibus suppressis, aperta in pede vena, protinus ex toto sublatum fuisse, neque minus recordamur, in atrocibus, totum abdomen, ob male fluentes hæmorrhoides, affligentibus doloribus, venæsectionem in pede institutam, pariter & nitrosa atque emollientes clysteres, omne curationis punctum tulisse.

§. XX.

*Hæmorrhoidiarum
consideratio
necessaria
quidem.*

Jam itaque non quidem negandum, sed constanti experientia, inde a primis artis medicæ initiis confirmatum habemus, sanguinis & menstrui, & hæmorrhoidalis fluxum saluberrimum, tam valetudini conservandæ, quam avertendis plurimis morbis prodesse, eumque in assuetis turbatum, vel imprudenter cohibitum, multas & graves ægritudines pro diversitate corporum & locorum, quæ a sanguine redundante & refluxu occupantur, progignere, quæ ad debitum successum reducto sanguinis stillicidio, si non ex toto tolluntur, tamen multum minuuntur ac levantur. Neque etiam inficiandum, *Cl. Stablium*, collegam meum honorandum, non mediocrem laudem mereri, quod in scriptis suis, ut Medicus maxime omnium in pathologicis menstrui & hæmorrhoidalis fluxus rationem habeat, serio ac crebro inculcarit, & sic vetustissimum hoc ac verissimum dogma, a recentiorum tot potentiis chymicis salino-sulphureis penitus fer-

me obscuratum, postliminio quasi revocare & pristino nitori reddere connixus sit. Interim tamen neutiquam celeberrimi ^{Non ta-} hujus viri, vel potius affectatorum ipsius placitis assensum præ- ^{men ad} bere possum, qui hanc doctrinam nimium & abusive exten- ^{omnes} dunt, ac universam fere morborum genealogiam primario ^{morbos} ex plethora, & inde enata sanguinis spissitudine, ac prohibi- ^{exten-} ta ejus per uterum vel sedis venas excretionem, arcescere, ac ^{denda.} operosa quidem, sed frustranea contentione, vel spissis voluminibus conquirere, sibi sumunt. Neque injuriam fecero, si hanc hypothesin, modo ita eam dicere liceat, ex insufficienti minusque attenta experientia, sive observationum circa morbos, præsertim chronicos, defectu, enatam esse dixero.

S. XXI.

Quod ne gratis vel gravius dictum videatur, exemplo ^{Nec ma-} sit frequentissimum illud nostro tempore malum sic dictum ^{lum hy-} hypochondriacum. De hoc multus quidem ubique apud ^{pochon-} eos est sermo, ejusque natales unice ex stagnatione sangui- ^{driacum} nis hæmorrhoidalis in ramis venæ portæ petendas esse, ac- ^{earum} ter contendunt. At vero si- ^{suppres-} curatius paulo in primam hujus ^{sioni.} morbi originem inquirimus, ejusque genesin ubi numerosa confluit misera hypochondriacorum cohors, ad fontes nempe soterios, rimamur; clarissime patet: pertinacem hunc ^{sed imbe-} affectum esse non plethoræ, sed imbecillis naturæ prolem, ^{cillitati} solennem ac proprium iis, qui naturam corporis sui & syste- ^{naturæ} ma nervosarum partium, imprimis ventriculi vim digesti- ^{tribuen-} vam, tonum ac robur, variis de causis graviter labefactarunt. Videlicet instituto coram a me scrutinio, alii vitam ^{dum.} sedentariam, diuturnum moerorem, terrorem & vehementem iram, ingestis paulo post desuper cibus aut potu frigido, incusarunt; alii in nimias mentis per intempestiva studia & lucubrationes fatigationem, potionem largam vel frigidam, sudanti corpori ingestam, abusum purgantium, opiatorum nec non acidorum & vinorum, culpam rejecerunt. Qui-

dam neglectum sub usu fontium mineralium, vel post purgantia aut emetica, regimen, febris intermittens, diarrhæa aut dysenteria perperam institutam medicationem, aut præposteram sudoris foetidi resiccationem, primam morbo occasione dedit, confessi sunt. Quæ certe omnia ita sunt comparata, ut robur naturæ atterant nervosisque partibus maximam inducant debilitatem, tantum abest, ut sanguinis, virium custodis, abundantiam arguant.

§. XXII.

Unde sæpe
fluentibus
hæmorrhoidibus
affligit.

Et licet tantisper largiamur, deficientem vel suppressum per animi pathemata, frigus & imprudentes medicationes menstruum aut hæmorrhoidalem fluxum, quandoque causam atque originem hypochondriaco malo posse suppeditare: eandem tamen non semper subesse causam ex eo luculenter patescit, quod crebrius inter exempla sint, qui largiter & sufficienter etiam fluentibus hæmorrhoidibus, hypochondriacis tamen excruciantur pathematibus, utut interdum eorum vehementia inde decrescat. Notabilis profecto hanc in rem est observatio, quam habet *Sennertus in praxi lib. III. Sect. II. cap. 23. novi*, inquit, *feminam nobilem, constitutione sanguineam, affectioni hypochondriaca obnoxiam, qua singulis mensibus ordinario, & quidem die post menstruum fluxum decimo quarto, hæmorrhoides patiebatur.*

§. XXIII.

Et hæmorrhoides spasmos hypochondriacos.

Accedit & hoc, quod firma & irrefragabili experientia in comperto sit, adolescentes, juvenes ac viros, qui nunquam antea vel levissimum fluxus hæmorrhoidalis indicium observarunt, subito malum hoc incurrere spastico-flatulentum, & demum si diutius eodem detinentur, dolorem dorsii, in abdomine circa hypochondria & stagnationes experiri sanguinis, qui intercepto per spasmos libero per viscera abdominis motu, per ani venas exitum molitur, eodemque denegato, atrociora suscitatur pathemata; ut adeo pateat, tam fluxum hæmorrhoidum, quam molimina adeum, effectum

& productum esse, mali hypochondriaci. Quin innumera *Vel fini-*
 memoria teneo exempla, quod affectio illa ventriculi & ge-*stram*
 neris nervosi spasmodico-flatulenta, quæ malum hypochon-*medica-*
 driacum audit, in homine perfecte sano nunquam antea hæ-*tionem*
 morrhoidibus vel moliminibus ad eas obnoxio, ex animi af-*sequun-*
 fectu, & maxime ab ira, cui mox subjuncta medicamenta *enr.*
 sudorifera calida, aut cibus vel potus super ingestus, enata
 sit, quam demum copioso, ut fieri assolet multiplicium pur-
 gantium & pilularum polychrestarum, quæ aloen recipiunt,
 usu, a Medicis tractatam, ejusmodi motus, sive sic dicta
 molimina ad hæmorrhoides, dolores nempe in lumbis & osse
 sacro exceperunt. Quumque Medici fluxum importunius
 iisdem medicamentis & venæsectionibus in pede proritare ni-
 terentur, factum quidem, ut nonnunquam aliquot guttæ san-
 guinis stillarent, crebrius vero humores viscidii albi, instar
 albuminis ovi, sapius magna copia, excernerentur, sed sine
 ullo pathematum levamento. Et in his quidem crebriori
 purgantium ului merito tribuer dum esse censeo, quod pro-
 pter spasmus ab iis sub operatione inductum, & relictam
 postea in intestinis atoniam, libera impedita sit circulatio,
 & in melsaraicis ac hæmorrhoidalibus vasis stagnationes atque
 decubitus contracti.

§. XXIV.

Deinceps novæ & καλ' ἐξοχῆς, ut perhibent, veræ pa-*Calculus*
 thologiæ conditores, id volunt & urgent, & calculum, & po-*quoque*
 dagram, ex hæmorrhoidali fluxu deficiente, vel minus rite & *podag-*
 succedente, exclusa omni acri, falsa, tartarea intemperie ac *gra hæ-*
 humorum dyscrasia, pullulare. Utut autem non negandum *morrhoi-*
 sit, quod quandoque hi affectus chronici a retento hæmor-*dum ano-*
 rhoidum, vel in mulieribus mensium fluxu, primam petant *malis*
 originem, eaque propter observante etiam Hippocrate, prod-*non de-*
 eunte sanguinis profluvio mitigentur: ex eo tamen minime
 sequitur, ergo semper ab hac causa dependent; quandoqui-
 dem a particulari causa ad universalem nullam plane valere

Neque
insania.

consequentiam, notissimum est philosophicum axioma. Ego certe sapius vidi, succedente etiam, quin sub ipso hæmorrhoidum stillicidio, & calculum, & podagram, tyrannidem suam exercuisse, de quo quidem omni dubitatione majus est exemplum *Cl. B. Dolæi*, qui sapius per litteras apud me conquestus est, quod per viginti annos, licet hæmorrhoides fluxerint, mire calculi & podagræ doloribus divexatus sit, a quibus tamen diætâ lactea utens, per biennium liber egit, sed ad pristinum victum & potum postea concedens, incidit in dysuriam, demum funestam. Tacemus, plerumque podagram & calculum esse morbos hæreditarios, ac illam maxime ab immodica venere, bacho & ira, & generari, & foveri. Neque semper insanix a plethora vel hæmorrhoidum fluxu suppresso incunabula trahunt, sed pariter affectibus hæreditariis accensendi sunt, & uti mania plerumque a continua præsertim cohibita ira ac impensis desideriis venereis accedit, ita melancholia a terrore & diuturno mœrore excluditur, vel etiam ab usu narcoticorum & stupefactivorum contrahitur, sine plethoræ concursu. Et sic etiam de aliis morbis, quorum ortum ad plethoram & retentas sanguineas evacuationes hujus theoriæ assertores unice referunt, sentiendum.

§. XXV.

Nulla etiam dantur hæmorrhoides certo morboventia medica-
menta.

Denique quo magis hi tam magni hæmorrhoidum patroni earundem successum urgent, & eodem sanitatem & conservari, & amissam revocari, confidenter asserunt; eo magis certe mirandum, ipsisque objici potest, quod nulla adhuc idonea, congrua remedia excogitarint ac norint, quibuscum potissimum hoc therapix suæ momentum conficere, ac mensum, vel hæmorrhoidum fluxum, cum certa ratione procurare, promovere, vel moderari queant. Nam intuta profecto, fallax & sæpe frustranea est hirudinum appositio, neque ab omnibus admittitur. Elixirium quoque proprietatis, cum, vel sine acido, & pilulæ quæ aloen capiunt,

piunt, vel balsamicæ ad mentem Becheri concinnatæ, licet certo commoveant, non tamen eadem ratione sanguinem emoveant ac intentioni respondent. Et suppositoria, pediluvia & venarum sectiones, pariter spem atque expectationem destituunt, vel dubiam saltem ostendunt. Quid? quod magis mirandum, vel potius dolendum est, dum impentius frustraneo plerumque labore hæmorrhoidum fluxum proritare nituntur, ea remedium genera, quæ interceptum liberum sanguinis per abdominis viscera progressum restituant & afflicta nervosas partes solantur, thermas videlicet, acidulas omnesque foterios fontes, salia volatilia oleosa, martialia bene præparata, lactis quoque asinini, vel feri lactis & infusorum theiiorinium uium, balnea aquæ dulcis cum mutatione aëris, vel plane negligunt, vel oscitanter spernunt, vel non satis pro dignitate commendant.

§. XXVI.

Post mensium ac hæmorrhoidum saluberrimam evacuationem, sunt adhuc aliæ criticæ, tam sanguinis redundantis, quam aliorum superfluum ac inutilium humorum infusæ sæpe atque extraordinariæ excretiones, eum omnes in finem a natura institutæ, quo sub exquisita æquabilitate atque proportionem, corporis integritas illibata servetur. Videlicet in puerili ætate ante pubertatis annos, quin etiam adhuc adolescentiæ ætate, valde familiares & salutares per narium venas sanguinis profusiones succedunt, quæ interdum satis crebræ & largæ sunt, solennes maxime iis, qui mollioris texturæ, succulenti & spongiosi corporis habitus sunt, multumque sanguinis generant, quos sanguineæ vulgo dicunt complexionis. Hæc saluberrima redundantis sanguinis diminutio, ubi subsistit vel compescitur, protinus capitis gravativi dolores, cum oculorum ardore, facie inflata & rubicunda, oris & narium siccitate atque æstu, vasorum circa tempora forti pulsatione, accedunt, eo quod sanguis exitum moliens, in vasis capitis congeritur ac distensionem

ne & compressione, ejusmodi dolorificam sensationem excitat, sanguinis autem e naribus stillicidium, vel sponte factum, vel arte prolectum, mox gravem istum dolorem solvit atque discutit; id quod conceptis verbis etiam *Hippocrates Sect. III. aph. 10.* testatur, eaquepropter, quando non sponte procedit sanguinis fluxus, *Sect. V. aph. 68.* venam in fronte secandam jubet.

§. XXVII.

Oculo-
rum de-
fluxiones.

Quando porro sanguis segniter per caput cursum conficit ac in venarum alveis stagnat, neque per vasculorum in naribus oscula stillat, in pueris decem annorum graves, diuturnas ac valde acres dolorificas oculorum defluxiones, cum rubore & æstu, quæ lippitudinem & suffusiones inducebant, sæpius vidi, juncto interdum etiam aurium tinnitu, memoriæ stupore, quæ prius non evanuerunt, quam per largam hæmorrhagiam, aut alvi fluxum, sponte vel arte pro ductum, aut etiam per velicatorium, non capiti, sed dorso ad revulsionem applicatum, id quod in vitio erat discessit. Sæpius quoque a me observatum, virgines sanguineæ complexionis & floridi vultus, ante annos pubertatis non tantum capitis doloribus tentatas, sed & subito in terram collapsas & convulsionibus epilepticis, non raro sævissimis, esse correptas, quæ tamen omnibus aliis frustra tentatis, prolecto per intrusum in nares stilum largiter sanguine, mox conquieverunt, & utut rursus aliquot vicibus recurrerent, penitus tamen, erumpente circa annos pubertatis mensium profluvio, cessarunt.

Epileptici
motus.

§. XXVIII.

Leviore
apople-
xia.

Simili ratione novi, virginem, quæ primis ætatis annis largas narium hæmorrhagias experta, crescente post pubertatis annos sanguinis copia, eademque non sufficienter per menses diminuta, non modo capitis dolorem, sed & cum sensuum turbis & aponia, levem quasi insultum apoplecticum incurrisse, quo discussa, mansit loquela suspensa, sangui-

nis autem in pede missio egregiam tulit opem. Neque in-
frequentem in adolescentibus summum capitis dolorem, cum *Mentis*
somnia phantasmatibus pleno, auditus difficultate & perversa
phantasia annotavi, nullam aliam ob causam, quam quod *turba.*
sanguis redundans & per nares non exsolutus, tardius per ce-
rebrum vasa trajiciatur eademque nimium oppleat, hinc secta
postmodum circa æquinoctia vena in pede, adhibitis pedilu-
viis & alvo laxiori reddita, disparuerunt penitusque pathema-
ta sublata fuerunt.

§. XXIX.

Novi magni nominis Theologum, sanguinea comple-
xionis, qui non modo in juventute, sed & adulta ætate, ma-
xime circa æquinoctia, largas passus est hæmorrhagias na-
rium, eaque propter meo ex consilio bis per annum admisit
venæsectionem. Hinc autem alio concedens, a Medico ut
sanguinis missionem omitteret induci se passus est, quo fa-
cto, subsistente pariter narium stillicidio, in capitis dolores,
vertiginem, tinnitum aurium & surditatem paulo post inci-
dit, cum præsentaneo insultus apoplectici metu, ad quem
præscindendum venam aperiri suasi, qua etiam, licet surditas
non sublata, apoplexia tamen discussa est. Aliquot etiam
elapsi anni, quum ab honestissimo viro, aliquot abhinc mil-
liaribus degente, antea sano, vegeto ac robusto, quinquaginta
aliquot annorum, constitutionis sanguineæ, in consi-
lium asciscerer. Hic quum currente puerili ac juvenili æta-
te, liberales sanguinis profusiones expertus esset, postea-
que singulis annis semel vel bis sanguinem utiliter emitti cu-
rasset, verno tempore idem omittens, circa exitum Martii,
post corporis refrigerationem & ingestos largiter difficilio-
ris solutionis cibos, præter omnem opinionem sensu & mo-
tu privatus, nullius rei conscius concidit, emissio autem post
aliquot horas e vena brachii per amplam aperturam sangui-
ne, mox ad se rediit quidem & paulatim loquelam, sensum
ac motum recepit, capitis tamen ingentem imbecillitatem &

memoriæ defectum ab hoc insultu passus est, adeo, ut ex moderato etiam vini usu valde offendatur.

§. XXX.

*Apople-
xia.*

*Phreni-
tides.*

Nonnunquam tamen a sanguine in alveis canalium cerebri nimium congesto, subtiliora plexus choroidei vascula disrumpuntur, & propter immedicabilem extravasationem, funesta consequitur apoplexia. Et certe plura in observatis Medicorum consignata sunt exempla, quod post hæmorrhagiam suppressam apoplexiæ lethales abortæ, ubi post mortem sanguis e naribus largiter manavit, uti *Hildanus Cent. III. obs. II.* perhibet. Aliquot porro exemplis confirmatum habeo, circa annum vigesimum primum, qui etiam est climactericus, retento narium stillicidio, post stagnationem sanguinis in cerebri vasis, qualis sub leviori apoplectico insultu esse suevit, phrenitidem accessisse, ad quam diicutiendam laudatissimum effectum præstitit larga sanguinis in brachio subtractio. Dignum est quod huc referatur a *Bohnio de offic. Med. dupl.* adductum exemplum de jüvene, qui phrenitide laborans, forti inflicta alapa, & facto post eam larga sanguinis e naribus profluvio, sanatus. Denique frequentioris etiam observationis est, cohibita narium hæmorrhagia, sanguinis impetum in asperam arteriam ruere illumque tussi rejici; quod vero, si paulo major est copia, non sine mortis periculo contingit, quale exemplum a *Gabelckovero Cent. IV. curat. 37.* annotatum.

§. XXXI.

*De salu-
bri jeri
vitiosi ex-
cretionē.*

Tam grave, varium & multiplex est damnum, quod ex suppressa sanguinis redundantis evacuatione in corporis integritatem redundat. Jam quum serum etiam, plus vel minus impurum, & maxime quidem in corporibus quæ complexiones phlegmaticæ, vel sanguineo-phlegmaticæ, magis quam par est increſcat & sanitati insidias struat: pariter egregie pro sanitate est, si quando a natura, per quam nihil aliud quam admirandum istud corporis ejusque partium stru-

ctura

ſturæ artificium, ad vitalem ſanguinis circulum cum excretionibus perficiendum, a divina providentia deſtinatum, intelligo, a nimia ejus copia, etiam præter & extra ordinem per inſuetas excretiones, corpus liberatur. Videlicet præter *Per ſu-* eam vitioſi ſeri diminutionem, quam in quibusdam per ſpon- *dores.* taneos largos nocturnos ſudores utiliter ſuccedere, & cum præſentaneo detrimento compeſci, ſupra jam meminimus: in plurimis adhuc utriuſque ſexus hominibus obvium eſt, ſingulis fere annis, vere & autumno, per tuſſim & coryzam, *Tuſſim & coryzam.* cum levi febricula ſeroſum humorē rejici. Contingit hoc maxime a perſpiratione tum ſuſſaminata ſapiusque ab aëris injuria interturbata, nec non poſt ingeſtos multos incongruos cibos, ac tanta ſæpe, in ſenibus potiffimum, tuſſis eſt vehementia ac pertinacia, ut per aliquot menſes corpus quatiat & incredibilis humoris viſcidi copia, cum virium languore, inappetentia, inquietudine ac interno æſtu eliminetur; quod tamen, ſi non imprudenter ſiſtitur, ſed leniter temperantibus & laxantibus tractatur, egregie cedit in ſanitatem; quum contra adhibitis pectoralibus, dulcibus ac reſolventibus, tuſſis exaſperetur longiusque extrahatur. Quibusdam quoque mucidæ ſordes in puerili ætate largiter per nares expurgantur cum valetudinis commodo; ſi autem increſcentibus annis retinentur, oculi hebeſcunt, deſluxionibus acribus tentantur, dolor capitis gravativus cum vertigine adeſt, nec non torpor, quæ omnia reſtituto muci debito effluxu, diſcutiuntur.

§. XXXII.

Porro ſolenne eſt, ut ſerum acre bilioſum redundans, *Copioſe* ſæpe ſalutariter admodum per ductus biliarios, glandulas *diarrhea.* inteſtinorum & tunicas glanduloſas, ſub crebris dejectionibus, quæ in ſenibus ob perſpirationem imminutam & copiam ſeri excrementitii interdum diutius durare ſolent, eliminetur. Quæ quando largius & paulo longius ſuccedunt, infirmant quidem; egregium tamen poſtea commodum af-

Urina
largius
proflu-
vium.

ferunt, præsertim si vitæ victusque exquisita habeatur ratio. Vera enim *Celsi* de ventris fluxu *lib. IV. cap. 19.* est sententia, uno, inquit, die fluere alvum sæpe pro valetudine est, atque etiam pluribus, dum febris absit, & intra septimum diem id conquiescat. Purgatur enim corpus, & quod intus læsurum erat utiliter effunditur. Quando vero hæc salubriter instituta evacuatio imprudenti consilio adstringentibus sistitur, vel nimis calidis balsamicis compescitur, magna excipit virium imbecillitas, inappetentia & febricula quædam, ipsumque profluvium, licet aliquandiu subsistat, repetit tamen, cum tenuissimo, borborygmis ac torminibus. Interdum etiam, ut perite *Sanctorius* meminit, per urinæ largius profluvium, quandoque singulis mensibus, superfluum & quod naturæ oneri erat eliminatur, dum *Sect. I. aph. 65.* scribit: corpora quoque virorum sana & moderatissimo victu utentia singulis mensibus sunt solito ponderosiora, unius scilicet duarumve librarum pondere, & redeunt ad consuetum pondus circa finem mensis ad instar mulierum; sed facta crisi per urinam paulo copiosorem, vel turbidioram. Ipse quoque compluries observavi, quod citra causam externam, quibusdam urina effuse prodeat, alvo segniore & perspiratione imminuta.

§. XXXIII.

Ac p. n.
per insoli-
tas vias.

Quandoque evenit, ut excretiones succedant insolite & præternaturales feri falsi acris per varia loca, ut per ulcera circa malleolum pedis, per glandulas axillares, per scrotum, vel oculorum glandulas, per herpetem & impetiginem in manibus ac pedibus; statis anni temporibus redeuntem, vel etiam per fonticulos; cum egregio sanitatis emolumento, quæ si remanent, aut improvide medicamentis præsertim externis, cohibentur, non modo ingens lassitudo, anxietas & inquietudo corpus corripit, sed & sæpe dolores ac spasmi artus ipsasque internas partes, præsertim intestina, infestant, non sine periculo. Memorat *Riedlinus lin. med.*

an. 1696. pag. 133. Ex hæmorrhoidibus fistulam ani natam & ultra septimum annum fluentem, postea vero desiccata, in quodam mercatore primum respirationem difficilem & pedum tumorem cum levi exulceratione, deinceps ardorem ventriculi dorsi que cum alvi obstructione & febre, tandem lethalem induxisse apoplexiam. Eandem quoque in rem aptissime facit exemplum nobilis cujus *Timæus a Guldenklee de aff. capit. cas. 28.* meminit. Hic enim quum ab ulcere, quod multos annos gestarat, paucos intra dies consilio vetulæ liberatus esset, elapso mense, incidit in tam vehementes capitis dolores, ut de vita desperarent, ac paulo post occæcatus est. Horis autem matutinis a somno multum viscidæ ac flavescen- tis foetidæque materiæ frequenti expuitione citra tussim reje- cit, ac conquestus est, se quamdiu jejunos esset, eundem foetorem in ore percipere, quam qui ex ulcere pedis spirarat.

§. XXXIV.

Quæ quum ita sint, quis jam dubitabit, valetudinis *Conclusio.* integritatem excretionum successu maxime niti atque foveri, easdemque licet extraordinariæ ac insuetæ sint, si tamen diu cum sanitatis emolumento successerunt, non sine periculo supprimi. In quo quidem maximopere cavendum non so- lum ab omnibus animi affectibus, præsertim terrore ac ira, medicamentis constringentibus ac sopientibus, sed etiam ab intempestivis evacuationibus & sanguinis missionibus, qui- bus ex facili evacuationes turbantur, vel minimum cum dis- crimine alio divertuntur. Quod si vero natura in perfici- endis saluberrimis omnis generis excretionibus vacillare aut deficere videatur, medentis est, eas quavis ratione promo- vere earundemque successum levare, quem in finem egre- giæ sunt utilitatis venæsectiones, laxantia, lenia diaphoretica, curationes sic dictæ vernaes & quæ reliquis fere omni- bus hac in re præripiunt palmam foteriæ aquæ, tam ther- mæ, quam acidulæ, vernali & autumnali tempore pruden-

ter usurpatæ, quibus non solum gravissimi morbi præscinduntur, sed etiam pertinaces atque rebelles expugnantur ac abiguntur. Sin autem subito interceptam aut cohibitam esse excretionem quandam contigerit, minime cunctandum est, sed prompta ope annitendum, quo revocetur, priusquam quod retentum in nobilioribus sedem figat, latius noxam diffundat & difficilem ancipitemque medicationem faciat.

CAPVT X.

DE

GENERATIONE MORBORVM
EX MORBIS.

§. I.

Imbecillitas ex præcipuis morborum causis.

QVum vera & rationalis therapia, sive medendi morbis scientia, maxime omnium accurata morborum diagnosi eorumque ex causis suis ortus ac incrementi cognitione nitatur, atque etiam a nobis in prioribus de earum ægritudinum genesi actum sit, quæ a mole & qualitate humorum perversa eorumque evacuatione deficiente, vel cohibita, originem trahunt: nunc porro ad earum contemplationem accedendum, quæ a solidorum vitio, virtute ac robore dejecto, sive imbecillitate, quam maxime præcedentes morbi relinquunt & ingignunt, incunabula trahunt; quo sic manifesto dilucescat, non modo fluidorum, sed & solidorum vitiosam ac præternaturalem constitutionem, ad gignendos morbos magnæ virtutis, eaquepropter a perito Medico magnopere esse considerandam. Nam quandocunque plenas & accurate consignatas morborum historias paulo accuratius lustramus, animadvertimus, non robustos, firmos

mos & valentes, sed maxime eos, qui vel natura imbecilliores sunt, vel ob adversam præcedentem valetudinem tales redditi, cum morbis conflictari & medicam opem poscere, difficulter tamen sanationem recipere, atque etiam summa cum circumspeditione prudenter & lenissime esse curandos. Hinc quanto minus sani & robusti, diæta ad leges sanitatis exquisitè composita, Medico aut medicina egent: tanto magis certe debiles & imbecilles eadem desiderant: ut adeo verissimum sit sanctissimi Salvatoris edictum: non firmos, sed languidos Medico indigere; eo quod, ut rectè pridem observavit *Celsus*, lib. I. cap. 3. omnibus morbis obnoxia est infirmitas.

§. II.

Quæ quum ita sint, haud postremus Medici certe labor eo dirigendus, quo corpora valentia & firma, ab infirmis & minus valentibus, probe distinguere discat. In quo quidem rectè perficiendo, tenendum, quod quemadmodum in universâ rerum natura omnis vis, virtus & robur ad efficaciam motus referri debet: ita quoque robusta natura corpusque firmum haberi debet illud, ubi efficacia motus, tam in actionibus naturalibus, quam vitalibus & animalibus, vivida sese exserit. Vigent autem animales functiones in iis, qui mente & corpore duos etiam labores ac diuturnas fatigationes sine noxa sustinere possunt, ac vitales & naturalent vigent in iis, qui pulsu gaudent magno, pleno ac robusto, bene appetunt, digerunt ac egerunt, & solida habent corporis membra, neque facile animo moventur, aut a causâ quadam externa læduntur. Quæ omnia in languidis ac debilibus secus eveniunt, utpote qui, & facile fatigantur, & a levi animi affectu, intemperie aëris, aut vitio in diæta commisso, offenduntur, vel a quadam medicina purgante aut alterante facile moventur aut læduntur, verbo, qui sunt, ut ita loqui liceat, sensibilissimæ naturæ, perquam facile in mor-

morbos incidunt, diu cum iis conflistantur ac tardius vigorem pristinum recipiunt.

§. III.

Et solidorum dispositione dijudicanda.

Deinde quoad ipsam naturalem partium solidarum dispositionem & structuram, robore & viribus præ aliis valent morbisque minus obnoxii sunt, qui majora obtinent vasa, strictiores fibras carneas, robusta ligamenta, nervos & tendines magnos; imbecilliores vero & morbidum merito habentur, qui obesi, laxioris & spongiosioris sunt carnis, tenuia & exigua gerunt sanguinis vasa, exiles nervos tenerasque membranas. Nam sub robore solidorum, quæ fluida impellunt, & canalium amplitudine, longe majori facilitate & promptitudine contenti humores circumaguntur, & secretiones utilissimorum ad vitam succorum, & excretionem inutilium, longe melius vigent, quam sub copia ac exiguitate vasorum, fibrarum laxitate & nisu ac renisu languido; & hinc omne id, quod lædit ac morbos efficere aptum est, promte removetur ac eliminatur, & illibata servatur corporis integritas. Neque male huc referri poterit *Hippocratis* aphorismus, *Sect. II. 44.* quo perhibet: spongiosos natura & obesos, magis cito mori, quam graciles & strictioris habitus.

§. IV.

Ad imbecillitatem facit sexus.

Ætas.

Jam quum sexus femininus ordinario ejusmodi molli, laxo, tenero & succulento corporis habitu incedat: in proclivi est judicare, eundem longe imbecilliozem, morbis quoque magis afflictum esse, quam virilem nobiliorem, quin, si menses, qui pro valetudine feminarum sunt, non rite manant, *Hippocratis* effato, omnem morbum bis pati. Deinde ratione ætatis infantes & senes maxime omnium imbecilles variisque morbis obnoxios esse, difficilius etiam convalescere ac facile succumbere, experientia constat. Nimia enim fibrarum in infantibus est laxitas, adeoque quam maxima ad stagnationes & decubitus humorum proclivitas: in senibus

bus vero magna fibrarum rigiditas, pororum strictura & vasorum capillarium angustia, quo fit, ut utiles succi difficiliter fecernantur, & inutiles minus sufficienter ejiciantur. Pariter *Et hæreditaria dispositio.* id crebriori observatu in comperto est, firmos & robustos corpore ac animo parentes, valentes ac sanos; imbecilles contra, valetudinarios, senes quoque & ebrios, debiles, teneros ac morbidos gignere infantes. Nam certe præcipuæ atque difficiles quæ homines affligunt, Medicisque plurimum negotii faceffunt ægritudines, sunt hæreditariæ, & non tam a fluidorum, quam potius congenitis solidorum vitiis dependent. Inter capitis quidem affectus, maniam, melancholiam, apoplexiam & epilepsiam, inter pectoris morbos, hæmoptylin & phthisin, quoad partes in imo ventre contentas, affectum hypochondriacum spasmotico-flatulentum, renum & vesicæ calculum, anomalum fluxum hæmorrhoidalem, in feminis malum hystericum, & quoad partes externas, dolores rheumaticos & arthriticos, in liberos per natiuitatem transire, constantis semper & perpetuæ fuit experientiæ.

§. V.

Præter hanc, quæ ob sexus, ætatis & natiuitatis rationem accedit imbecillitas, sunt adhuc aliæ causæ, quæ corpus tantum antea ac robustum infirmare & solidarum partium virtutem, tonum ac robur imminuere, frangere atque prosterne-*Inprimis etiam morbi diuturni præcedentes.* re, corpusque ad graves morbos ingenerandos disponere possunt. Horum in censum, præter diuturnos & graves animi affectus, immoderatas mentis in studiis fatigationes atque meditationes, abusum quoque veneris & bacchi, dietam pravam, assiduas vigilias, & duros labores, maxime omnium referendi morbi, præsertim, si ægrorum culpa longius extrahuntur, vel ob Medicorum errorem perperam tractantur. Ea enim est motuum morbosorum ac inprimis febrium indoles, ut non solum succos vitales absument atque totam sanguinis & humorum massam vitient & corru-

ptam ac impuram reddant ; sed etiam solidis partibus omne robur motusque potentiam subducant, quo ex facili denuo stagnationes, stases & corruptiones conciliantur, morbique contrahuntur. Inprimis tamen ingens ventriculo & intestinis accidere solet imbecillitas, unde aucta post morbum ciborum appetentia, digestionem autem vacillante, alvinæ sordes retinentur, cruditatum sentina colligitur, quæ si non repetita evacuatione, subjunctis ventriculi tonum roborantibus, tempestive submovetur, nova morborum minera conflatur, quæ sensim sanitatem subruit, tandemque ipsa mora vel prima data quavis occasione, in graves morbosas afflictiones conspectius transit.

§. VI.

De damnis ex debilitate universalis, per hæmorrhagias.

Hæc ut eo testatius pateant, per classes & varias caussarum series eundo, morborum ex morbis generationem dilucide evolvam. Et primo quidem loco nihil frequentius evenit, quam quod post enormes & tantum non incompossibiles hæmorrhagias, e. c. in abortu, puerperio, gravi vulneratione, aut etiam post largius menstrui vel hæmorrhoidalis sanguinis profluvium, frigidi sic dicti morbi, ut cachexia, pedum œdemata, anasarca & aliæ funestæ hydropis species, vel etiam atrophia, summus virium languor, febris lenta & hæctica, enascantur aut præcedentes morbi longe pertinaciores reddantur. Nimum enim exhausto virium, & fluidi, quod motum ac robur solidis foenerat, fonte, sanguine, ventriculi & canalis qui vitali machinæ alimentum conveniens parat, actio atque digestio non modo minuitur, sed & robur quo solidæ partes gaudent, & quo inutile ejicitur, utile vero intime permiscetur & ad usum servatur, admodum labefactatur, ut non possit non ingens & cruditatum in primis viis, & impurorum succorum in venis, fieri proventus, quem urinæ copiosæ, plus minus turbidæ & albæ, luculenter manifestant. Accedit quod ob languidum humo-

rum

rum circuitum & interceptam sordium exclusionem, passim in visceribus stagnationes, obstructiones & stiles gignantur, & vitales corporis succi inquinentur, eoque pacto, tam ad longas, quam acutas & periculi plenas afflictiones, via sternatur. Quæ omnia non solum & majora & deteriora fiunt, si animi perturbationes complicantur, vel in diata committitur vitium, aut impensior corporis refrigeratio contingit, sed etiam eo certius funestum fortiuntur eventum, si medentes ejusmodi infirmos, validiori & crebriori evacuatione adhuc exercent, aut nimis calidis exagitant.

§. VII.

Deinceps ex omnibus quæ universi corporis firmitudi- *Et puer-*
nem atterunt, idque ad morbos suscipiendos præparant, vix *perium*
quicquam efficacius est, quam puerperium; utpote quod *inducta.*
multas varias, easque graves affectiones, non raro inducere observatur. Vidimus post illud spasticas hypochondriorum & diurnas hystericas passiones; vidimus multas in melancholiam, hemicraniam, abdominis perpetuam flatulentiam, tumorem, cachexiam, delapsas; annotavimus sterilitatem, fluorem album, corporis languorem, cum lento calore, & quæ plura alia sunt. Præterquam enim quod cum sanguine largius ex fauciatas vasis effluente multum virium effundatur, ipsi graviores partus labores corpus admodum exhauriunt ejusque partes vigore ac robore privant, quibus accedit, quod ipse uterus perquam facile labem patiatur, ut excluso foetu, post tam ingentem extensionem, naturali tono non redditus, sanguis per contorta ejus vasa minus expedite trajiciatur, sed passim sublisat universumque corpus inde graviter luat. Et hinc omnia illa quæ memoravi mala subnascuntur, quæ mirum quantum gravior animi ex affectibus commotio accelerat, frigidus autem potus, improvida corporis refrigeratio, prava victus ratio & valentiora pharmaca pariter advocant, augent & exacerbant.

§. VIII.

*Ex parti-
culari de-
bilitate
per apo-
plexiam
paralyfis.*

Neque vero tantum universalis corporis ex morbo debilitas, ad novas & alias concipiendas agritudines aptissima existit; verum etiam saepenumero a morbis quibusdam peculiaris & certæ cujusdam partis imbecillitas, alium morbum invehens, remanet. Atque ut ordiamur a capite; multiplici idemidem observatione constat, quod discussa apoplexia, dextri vel sinistri lateris paralyfis relinquatur, ubi brachium & pes, resitante quidem debiliore sensu, motu privantur, conjuncta oris tortura & linguæ balbutie. Ratio hujus effectus & modus quo generatur tam grave malum in expedito est. Scilicet in apoplexia meningum vasa a sanguine copiosius eo ruente, admodum expansa & distenta sunt, ut intercepto ejus libero itinere, serosa pars secedat, in posticam cerebri partem & spinalis medullæ principium descendat, unde fluidi quod nervi vehunt influxus sufflamatur & membra subjacentia pristinam tensionem pristinumque ad motum & sensum necessarium vigorem amittunt. Quin immo quia cerebri & medullæ oblongatæ fibræ, exuberante serosi humoris copia ita persusæ, nimium flaccescunt, fit, ut intercidente earundem debita tensione, apoplecticum insultum ut plurimum stupiditas, ingens memoriæ debilitas, somnolentia & ad obeundas actiones summus languor consequatur.

*Et stupor
animi.*

§. IX.

*Post epi-
lepsiam
oculorum
vitia.*

Epilepsiam cerebrum ac nervos præsertim opticos mire debilitare, vel ex eo clarum atque perspicuum fit, quod hanc ipsam in repentinam cæcitatem transiisse *M. N. C. Dec. I. An. III. obs. 161. it. Cent. I. An. II. obs. 130.* fidem faciant. In graviore enim epilepsia sanguis cum impetu, ob fortes spasticas in abdomine stricturas ad caput urgetur, ubi tardius circumactus & stagnans, serum dimittit, quod in anteriora cerebri & nervorum opticorum thalamos destillans, eas obstruendo, guttam serenam producit. Et quia in pa-

roxy-

roxyfmis epilepticorum nervi, qui oculis motum præstant, simul distorquentur, oculorum situs interdum pervertitur, unde strabismus, quem *Segerus* in *M. N. C. Dec. I. An. III. obs. 162.* in infante ex paroxysmo epileptico se observasse memorat.

§. X.

Maniæ in melancholiam, ac vicissim melancholiæ in *Post maniam*, faciem admodum fieri transitum, crebra testatur *maniam melancholiam* experientia; quandoquidem in utroque affectu meningum *lancholia* vala visceri sanguinis copia infarcta sunt, cujus in melancholia *& vice versa.* tardior & difficilior, celerrimus vero in delirio maniaco est progressus, propter auctam meningum strictionem, sanguinis citatiorem cursum efficientem. Quemadmodum vero fortior spasmus semper fere ejusdem partis atonia & flaccidus languor excipit: ita etiam cessantem, quæ in paroxysmo maniaco præsto est, nimiam membranarum & vasorum cerebri constrictionem, eorundem relaxatio & debilitas subsequitur, qua postea sanguinis difficilior & tarda per has partes fit progressio; ex qua melancholicorum phantasmata sua trahunt incunabula.

§. XI.

Ex febre acuta, caput & nervosum genus occupant. *Ex febre* te, cujus generis solet esse sic dicta Hungarica, quam delirium, vel stupor quidam, aut acerbissima cephalalgia comitatur, sæpenumero surditas, vel minimum difficultas auditus, resultat, quæ per totam quandoque vitam persistit. Non quidem malum alias indicium, sed salutaris criseos notam præbet, si in acutis febribus, circa critica tempora, hebetudo auditus accedit, neque sine ratione. Nam si crisis perfecta est, strictione solidorum, quæ tamdiu quam febris impetus durat, remittit, eoque facto, pulsus celeritas & durities minuitur, sordium per urinam, alvum & cutis tubulos reddit evacuatio, & meatus jam magis patuli facti, non tantum tenuem serosum humorem, verum crassiores etiam foeculentias

dimittunt. Verumtamen quia in acutis capiti infestis febribus, laxato meningum spasmō, fibris remissioribus tactis, sanguis tardius iter conficiens serum deponit, quod ad principium nervorum acusticorum descendens, difficilem auditum producit; is neglectus, ex facili in perpetuam & immedicabilem surditatem transit. Quippe si caput tum improvide frigori exponitur, vel medentes discussione stagnantis humoris per convenientia cephalica & sudorifera minus invigilant, partium cerebri, quæ ad auditus organum pertinent, a subsistente sero fit compressio, corruptio aut magna læsio.

§. XII.

*Post hæmoptysin
phthisis.*

A capite, ceu suprema corporis regione, ad mediam nempe thoracem, progressum facturi, deprehendimus multos esse pectoris morbos, qui magnam imbecillitatem vastissimo pulmonum visceri inferendo, illud ad varios affectus morbosos disponunt. Nihil enim frequentius in praxi observatur, quam quod hæmoptysin, præsertim perperam curatam, pressō pede phthisis insequatur, idque eo magis, quando nimis celeriter exitum affectans sanguis, adstringentibus vel narcoticis, vi quasi cohibitus fuit. Videlicet quemadmodum veræ omnium hæmorrhagiarum causæ non aliæ sunt, quam fortes spasticæ vasa simul comprimentes in abdomine aut remotis aliis partibus strictione, quibus liber sanguinis circuitus intercipitur, ita ut is coarctatus alibi meatibus, in alias partes cum impetu ruat, ibique perrumpat: ita pari ratione si ad pulmones ejus appulsus urgetur, eorum vascula, quæ hiant in tracheam, mirum distenduntur & ingens ejus in hanc fit effusio. Quod si igitur neque spasmorum, neque inæqualis circuitus ratione habita, adstringentia præpropere dantur, sanguis tenuis ac floridus crassescit, in coagulum abit & effluere nescius, vel putredinem concipit, vel secedens serosus humor tubercula ingenerat, ut vomicæ vel ingens exulceratio oboriantur. Etenim quando ob humoris acrimoniam, vel distendentem nimis ejus copiam minutissimæ pulmonum vesi-

vesiculæ disrumpuntur, ex pluribus una, vel plures amplæ cavitates resultant, extrema vero vasorum capillamenta exesa magis patula redduntur, ut multum succi chylosi in cavernulas influat, qui ob hiantia capillaria & lymphatica vasa non reforptus, sed stagnans, lentorem contrahit, spissescit & turbidus ac glutinosus fieri, ac si longius moram necit, foetere incipit.

§. XIII.

Pleuritidem in abscessum vel empyema transire, dudum *Ex pleu-* gravissimus auctor *Hippocrates*, passim in monumentis suis tra-*ritide* didit, inprimis *aph. 8. & 15. Sect. V.* perhibet: pleuritidem in *abscessus* empyema, (quo nomine, ut auctor est *Galenus*, quamlibet *pulmo-* in pus mutationem insignit) degenerare, si purulenta non in-*num.* tra quatuordecim dies excludatur materia, & quando hæc in empyemate non desinit, intra quadraginta dies fluere, phthisin fieri; id quod etiam experientia confirmatur atque expedita ratione nititur. Nam in pleuritide vera haud absimili ratione ac in peripnevmonia, ipsius pulmonis exterior substantia, non vero quæ tantum costas succingit membrana, inflammatorio & dolorifico ex sanguinis stasi tumore est affecta. Hæc itaque inflammatio si penitus dissipatur, morbus perfecte sanatur; ac si discuti renuit, in purulentam abit materiam, e pectore rejiciendam. Quod si vero intra quatuordecim dierum intervallum nec febris decedit, nec puris excretio sequitur, tunc justa est suspicio, materiam inhærentem formare vomicam, qua demum rupta, si puris scretus intra quadraginta dies non cessat, phthisis præstolatur: certum quippe tunc est indicium, vomicam ulterius serpere & acre pus totam pulmonum substantiam in exulcerationem trahere, unde tabes & phthisis.

§. XIV.

Et certe pleuritis longe facilius in empyema cedit, Quod te- quam quidem peripnevmonia, quia recte monente *Cælio Au-* stimonio *reliano p. m. 420. peripnevmonia est tumor in toto pulmonum* *Aurelia-* *cor-* ni.

corpore, pleuritis vero tantummodo in ejus parte, vel potius, pleuritis est inflammatio magis superficialis, peripnevmonia vero altior & profundior: in hac sanguis magis serosus, in illa cruor crassus itagnat. Quare sicuti sanguinis chylosi & gelatinosi facilis est in purulentam materiam transitus: ita cruor crassus difficilior in pus mutatur, sed magis in corruptionem vel sphacelum abit, aut vasa obturat: & hinc peripnevmonia est morbus valde acutus, qui nisi intra paucos dies discutitur, funesta sphacelatione vel suffocatione perimit.

& exemplis confirmatur. Dignum videtur quod hic interferatur exemplum Mindæ Westphalorum olim a nobis observatum, de viro, qui superata pleuritide incidit in tussim, maciem, febrem, inquam & spirandi angustiam, exactis autem sic duobus mensibus, præter omnem expectationem, pus album & congelatum, sed minime foetens, ad aliquot libras, trium circiter hebdomadum spatio, rejecit, eodemque evacuato, pectoralis balsami & lactis usu, perfecte sanitati redditus est. Neque minus commemorabilis est casus in dissertatione *de rarissimo succi nutritii ex thorace stillicidio*, expositus, ubi pleuritis tandem in empyema, sinistrum totum pulmonis lobum, teste sectione, consumens, degeneravit, erosio simul & apertis ductus thoracici ramulis, quia succus chylosus, sapore dulcis, aspectu lacteus, odore spirituosus, cujus ego locuples *αὐτόντης* testis sum, per multos annos ad aliquot uncias quotidie, ex thoracis apertura, quæ ad empyematis exclusionem acu facta fuerat, stillavit.

§. XV.

Causa saepe venæ sectio vel nimis parca. Quod vero tam sinistre pleuritis curatio nonnunquam succedat, in culpa sæpissime est imprudens & præpostera medentum methodus, qui in sanguine detrahendo vel nimis parci sunt, vel interdum nimis liberales & effusi. Utrumque malum. Recte enim *Verzascha obs. 8.* confirmat, ex neglecta venæsectione empyema facillime subsequi, præsertim in spongiosi habitus corporibus. In cujus confirmationem

Heur.

Heurnius comment. super aphor. IIX. Sect. V. sequentem affert historiam: vidi, ait, juvenem triginta annorum succi sanguinisque plenum, qui, cum ruri esset, humi dormivit ac in pleuritidem incidit. Tarde huic a Medico parumque sanguinis detractum fuit, dolor perseverabat, decimo quarto in empyema versa fuit malum, dein expuratum, tandem cum fœda multa expectorasset ac extabuisse, obiit. Idem tamen evenit & empyema vel largignitur, quando vicinim nimium sanguinis, per iteratas missiones evocatur, eo quod his repetitis puris rejectio supprimitur. Hinc perite Ballonius lib. I. epid. pag. 226. prodidit: revera graviter ab iis peccatur, qui in pleuritide naturam multo detracto sanguine exinaniant. Et hæc quoque dubio procul causa fuit, quare in juvene viginti annorum, in quo decies phlebotomia celebrata, pleuritis in empyema concessit, teste Riverio Cent. I. obs. 79.

§. XVI.

Porro ingens humorum decubitus ad pectus, in iis *Ex humo-* præsertim, qui pituita abundant & mali habitus sunt, diuturnum de-
nam humidam tussim cum spirandi angustia suscitatur; qua de-
bitu ad
bitu ita læditur pulmonum substantia, ut copiosissima ma-
pectus
teria purulentæ & chylosæ contingat rejectio. Tono nam-
tussis, dy-
que vasculorum & membranarum pulmonalium destructo, spneæ &
humores ibi cum sanguine congesti hærent, & aciores red-
puris
diti, distendendo & erodendo ingentes cavitates efformant, *secreatas.*
ad quas perpetuus succorum est affluxus, stagnatio & extra-
vasatio. Quam vero difficile sit hunc humorum motum a
pectore ad alia loca divertere pulmonumque deperditum to-
num restituere, ii norunt, qui in artis operibus cum solertia
versantur. Non vero solum Medici imprudenti medela, sed
etiam ipsi ægrotantes, perverso victus regimine, sæpenume-
ro multum conferunt, ut humida diuturna tussis, tandem
in phthisin, vel etiam asthma & hydropem, concedat. Pes-
simus enim Practicorum mos est, ut in tussi, cujuscunque ge-
neris, vel originis fuerit, dulcia, incrassantia, emollientia li-
(III.) Gg berali

berali manu propinent, quibus tam pulmonum, quam ventriculi & intestinorum robur amissum plus adhuc dejicitur; cui potius convenienti stomachica & balsamica medicina erigendo, & superfluis humoribus evacuandis, in curatione unice intenti esse deberent.

§. XVII.

Ex asthmate tumores ac hydrops.

Ex spirandi angustia atque difficultate, quæ orthopnoæ, vel asthmatis nomine insignita tumores oedematosos & hydropes, tam thoracis, quam abdominis, progigni, in praxi sæpe sæpius animadvertitur. Et quo magis asthma urget, ut est spasmodicum & convulsivum, eo facilius funestum thoracis hydropem, vel etiam ipsum ascitem producit: sicut contra lentum & diuturnum asthma, paulatim cachexiam & oedemata pedum conciliat. Qua vero ratione horum affectuum generatio procedat, explicatu non adeo arduum est, quandoquidem vel ob spasticam vasorum pulmonalium angustiam, vel ob meatuum non infrequenter a polypo obstructionem, sanguis ex uno cordis ventriculo ad alterum ægerrime per pulmones traducitur, sed ad cavitatem dextram & hinc ad universum venarum genus, propter obicem positum, regurgitat. Et quia tardissimus inde fit sanguinis ex venis in arterias transgressus, hinc serosi humores quam facile in venis repletis secedunt inque porosam maxime inferiorum partium substantiam ingrediuntur. Longe vero celerior hæc feri a sanguine secessio tam in pericardium, per auriculæ dextræ poros, quam in thoracis cavum, per aperta vasa lymphatica peragitur, ubi vel polypo vasa pulmonalia infarcta sunt, vel convulsivum, longiori temporis spatio affligens asthma, liberum sanguinis iter per pulmones intercipit; quippe tunc feri per meatus patulos in cavitates expressio urgetur ac promovetur.

§. XVIII.

Malum hypochondriacum

Nunc a media corporis regione ad infimam descendendum est, ubi eos morbos, qui ex visceribus abdominis a præ-

præcedenti morbo debilitatis, prodeunt, spectabimus. Ex
 iis vero, qui in ventriculo ac intestinis sedem suam atque do-
 micilium habent, vix ullus frequentior est, quam spastico-
 flatulentus, multis & variis pathematibus conspicuus, quem
 nostro ævo mali hypochondriaci, vel hysterici, si feminas
 affligat, nomine efferre solent. Nam quando universus, a
 faucibus usque ad anum elongatus nerveo-membranaceus
 exquisitissimæ sensationis canalis, a morbo præcedente læsus
 fuerit, adeo ut ejus tonus ac motus peristalticus destructus,
 vel crusta villosa, quæ colatorii munere fungitur, obstructa,
 aut glandulæ, quæ solventem & fermentalem succum præ-
 bent, obstipatæ fuerint, aut bilis quæ chymi correctorium
 & optima veluti medicina est, intemperata evaserit: nihil
 aliud efficitur, quam ut abolita digestionē & fecum debita
 expulsiōe, multi humores crudi, visceri, corrosivi ibi con-
 sistentes, nervosas partes exagitando, spasmos, convulsiones
 & flatus proferant. Quæ cuncta ob consensum generis ner-
 vosi, anxietates, dolores, inquietudines maximasque mo-
 lestias in capite, thorace, hypochondriis & abdomine cre-
 ant. Jam vero diligenti & attenta observatione practica *ab inter-*
 constat, hypochondriacum hunc morbum non frequentius *mittenti-*
 ingenerari, quam ab intermittētib, præsertim tertianis, *bus male*
 male curatis. Nam si ante correctionem vel evacuationem *curatis.*
 materiæ, quæ febrilis commotionis causa est, paroxysmi va-
 riis artificiiis constrictoriis nimis propere reprimuntur, ea in
 visceribus & ductibus excretoriis remanet, & ex mora de-
 terior facta, alias periculosiores stricturas & meatuum ob-
 stipitationes, cum offensione ventriculi & intestinorum, effi-
 cit: idque eo magis, si diætæ vitium aut intemperantia af-
 fectum, quibus in passionibus spasmodicis concitandis ni-
 hil potentius est, accedat. Intermittentes enim febres quum
 fomitem & mineram suam in ductibus biliariis, pancreaticis
 atque etiam ventriculi ac intestinorum valvulis, plicis atque
 flexuris habeant, in exquisitè sentiente hoc canali suam po-

tentiam, quæ vix ullis aliis quam spasticis tensionibus absolvi-
tur, exserunt.

§. XIX.

*Ex alvi
fluxibus
tabes &c.*

Simili ratione diarrhææ & dysentericæ neglectæ, vel per-
peram tractatæ, immedicabilem sæpe in intestinis erosionem
ac læsionem relinquunt. Nam quid frequentius est, quam
quod ab intempestivo adstringentium in hisce morbis usu, vel
vita periclitetur, vel diuturna fere insanabilis tabescentia,
lenta febris, cachexia, vel spasticus hypochondriacus rema-
neat morbus, qui mala diætæ & inordinatis animi affectibus
multo pertinacior fit & ingravescit. Laborabat ante annum
honestissima foemina post male curatam dysenteriam acerbæ &
graviter variis symptomatibus, inappetentia, macie, phlo-
gosi, atroci dorso, lumborum & abdominis rosione, cum in-
genti anxietate & alvi segnitie, quam nonnunquam copiosis-
sima dejectio sequebatur, hisque malis ultra sex menses eadem
cruciabatur, tandem, divina aspirante gratia, antispasmodi-
cis, roborantibus & leniter evacuantibus, a me curata, per-
fecta sanitate jam fruitur.

§. XX.

*Ex quar-
tana hy-
drops.*

Deinceps ex intermittentibus diuturnior quartana, ple-
rumque infimi ventris viscera, ut hepar, lienem & pancreas,
adeo lædere solet, ut funestus hydrops subsequatur: liqui-
dem hæc febres altius ut plurimum fomitem suam in viscerum
tono destructo, eorumque a sanguine crasso infarctu, repo-
sitam habent, unde etiam magnam prudentiam, & sufficiens
quoque tempus ad sanandum, desiderant. Nisi enim ob-
structio illa viscerum expediatur & sanguini ac humoribus
per vasa abdominis venosa liber circulus restitatur, superva-
canea, vel plane noxia, omnis febrilem impetum sistens medi-
cina est. Tum quoque nihil est inconsultius, quam posthabi-
ta sanguinis missione, vel viscerum obstructorum reseratio-
ne, aut alvi subductione, specificis sic dictis, ex quorum
numero sunt cortex chinæ, fraxini, radix tormentillæ, plan-
taginis,

taginis, alumen & vitriolacea, motus febriles reprimere. Hæc enim incrassando & coagulando humores, infarctum & indurationem viscerum adaugent, quo fit, ut ibi, intercepto sanguinis cursu, serum in vasa lymphatica magna copia secedat, unde in hydatides abeunt, quæ postea disruptæ, serum in abdominis cavum funesto effectû effundunt.

§. XXI.

Optime hunc generationis hydropis modum, jam olim *Quod te- Galenus in Cap. VII. aph. 55. & Lib. IV. aph. I I.* tradidit dum in-*stimoniis* quit: si aliquando contingit, hydatides, sive vesicæ hepatis aqua *con-*fir-*plenas* disrupti, effunditur aqua ad locum membranæ abdominis *matur.* interioris, epigastrio respondentem, in quo etiam hydropicorum aqua congregatur. Idem gravissimus auctor *Lib. III. in loc. as-*fect. *Cap. III.* de hydropo, quartanis male curatis succedente, conqueritur, dum ait: quartanæ male curatæ hydropem accedere crebro vidimus, præsertim si agrotus in victu aberraverit & intempestivo frigido potu caloris levamen quasiverit, quo humores incrassantur, obstructions & scirrhus in hepate ac liene pariuntur, & tum præcipue, si dejecti in paroxysmo particulari, caloris putridi exhalationem externo quasito frigore cohibuerint: qui impulsus, utrumque hypochondriorum viscus adurit & indurat. Et *Joh. Langius in epist. 48. pag. 175. & epist. 39. pag. 142.* hunc in modum differit: nisi in febribus putridi humoris copiam ademeris, tum non modo tantam crudi humoris copiam calor naturalis concoquere non poterit, sed præcipue in statu & morbi declinatione resoluta per calorem febrilem & sudorem subtili humorum substantia, sæculentior pars (*Germ. der Fieber-Kuche*) derelicta, fungosam ac raram epatis ac lienis substantiam ita infarciet & obstruet, ut tandem, utroque viscere, vel altero scirrhus obfesso & indurato, hydrops aut crurum œdema febrem excipiat. Quod tum maxime accidet, si alterantibus frigidis, citra evacuationem lenitivam aut evacuativam, usus fueris, quæ materiam plus ingrossant, quam resolvunt. Qua-

re, ne in febribus interpolatis nimis diu frigido potu uraris, diligenter caveo.

§. XXII.

Et renum
debilita-
re inflam-
matio,
calculus,
ulcera
&c.

Præterea renes a præcedente morbo debilitati, tono eorum destructo, non modo facile inflammantur, exulcerantur, sed & ad calculorum generationem proni ac dispositi evadunt. Evenit id maxime in plethoricis, vel quibus redundans sanguis per uterum aut ani venas non expurgatur, vel vacuari cessat, hinc ipse, circa vasa in lumbis stagnans, gravativum ibi dolorem æstumque efficit, quem dolorem, si imprudenter Medici calculo adscribunt & calidiora, quæ urinam movent & calculos pellunt, propinant, gravia dicta renum vitia pleno scaturiunt alveo. Nam renalium glandularum & vasculorum tono, ob nimiam distensionem, destructo, tardius procedit urinalis laticis secretio & descensio ad vesicam, ut in syphunculis urinariis stagnans, tartarum, qui calculi est materia, sponte deponat. Deterior adhuc res est, si inflammatio, & ex hac apostema, aut ulcus, generetur. Quam optime autem hi renum morbi arcentur matura sanguinis missione, quam etiam *Riverius Cent. II. Obs. 15*, item *Grælingius in praxi Tr. de calculo pag. 16*. ad hunc scopum obtinendum magni faciunt. Et hæc quoque est ratio, quare hæmorrhoides supervenientes nephriticis, ceu salutiferum remedium summopere *Hippocrates aph. II. Lib. VI.* dilaudat. Hoc itaque naturæ consilium in avertendis his morbis Medici merito imitari debent, & vel hæmorrhoides ad fluxum perducere, vel pedum venas aperire.

§. XXIII.

Et calculo renum vomitus.

At si calculus diutius & firmitus principio uretheris impactus hæret, nec ex sede hac dimovetur: nervosas has partes perpetuo vellicando, ingentem in ventriculo nauseam & ad vomitionem suscitatur irritationem, adeo, ut si quando nec natura, nec ulla arte peregrinus hic hospes cedere velit, perpetua ventriculi subversio, cum anxietate, inappetentia, ma-

macie & tandem mors subsequantur; quale triste exemplum non ita pridem in præclaro hujus urbis Medico conspeximus. Nam magnum & arctius est renibus cum ventriculo consortium, hinc *Langius in Epist. 45. pag. 168.* scribit: *plures calculo renali affectos, plusquam annuo ciborum fastidio tabescere vidi, nec unquam esurisse: in quorum cura alii Medici ventriculi imbecillitatem, alii venarum mesenterii & hepatis vel splenis obstructiones, incusarunt.* Spasmus quoque a calculo suscitatus, usque *interius* ad ventriculum, & sæpe etiam ad duodenum, propagatus, molesta constrictione hujus peristalticum motum validissime invertit, unde patet etiam ratio, quare calculosi facile fiant icterici. Neque prætereundum est, quod crebra ex calculo *colica,* afflictio ita ventriculi atque intestinorum tonum ac robur imminuere ac labefactare possit, ut colica tormina & flatuum proventus calculi obnoxios levi data occasione vel causa graviter exercent. Ex renali vero calculo, si quando in vesicam prolapsus, ob magnitudinem non foras ejicitur, continetur *calculum.* nua tartari urinalis accretione, calculum vesicalem generari, extra dubitationem est. Igitur periti est Medici, calculum qui ex renibus in vesicam descendit, quantum fieri potest comminuere, ejusque exclusionem per urethram omni modo promovere, cui scopo obtinendo diuretica utique proficiunt.

§. XXIV.

Ex utero quoque male antea affecto plures prodire non *Ex uteri* vos morbos ac vitia, longa experientia ac usu compertum *vicio ha-* perspectumque est. Observantius id maxime post abortum *morrh-* vel partum, quem varia mala, quibus virgines non obnoxie *gie abor-* sunt, insequi solent. Quid enim frequentius visitur, quam *tus &c.* post puerperium, vel abortum, enormia sanguinis vel feri viscerum albi fieri profluvia, & abortus, nulla etiam comparente causa, de novo facile contingere, unde in mentem mihi redit aurea illa nunquam satis laudandi senis *Lib. V. aph. 45.* sententia: *quæcumque, corpore bene constituto, bimestres ar-* *gæ*

que etiam trimestres abortiunt, nulla incidente abortionis causa, his sane coyledones, i. e. venarum ac arteriarum orificia, plena mucoris sunt, & non possunt expandere fœtum, sed disrumpuntur. Causa tam frequentis abortionis sine ulla externa occasione nulla alia est, quam intermissa sanguinis detractio, vel alvi ductio neglecta. Hinc ante ingravidationem, vel etiam commodis mensibus, purgatio ex lenioribus, quæ veteres ob eximium usum benedicta vocarunt, vel temperate aloëticis balsamicis pilulis, instituatur. *Matrona* inquit, *Heurnius in Comment. ad hunc aphorism. quædam sæpius abortierat & pituitosa natura erat, cum vero medicinarum (puta) laxantium usum iniiit, feliciter gestationem perfecit.* Suadeo igitur cum *Platero in Obs. Lib. I. pag. 86.* ut puerperæ post partum bene purgentur, ne graves fiant morbi. Neque tantum purgandum est, sed etiam convenienti diætæ vitæque regimine & aliis internis & externis roborantibus pristinus utero tonus reparandus: quo salvo ac vigente, & mensium fluxus recte & ordine procedit, quo destructo, inordinati fiunt menses, & inde universa corporis œconomia detrimentum patitur.

§. XXV.

Ex gonorrhea male curata bubones &c.

Ad partes quod attinet genitales, & hæ facile vitium contrahunt ab antecedente morbo, quod ad nova mala suscitanda idoneum est. Animadvertimus id frequentius in gonorrhea, cui, siue malignæ, siue benignæ, si nimis cito adstringentibus cohibetur, multa ac varia mala superveniunt. Ex intempestivo enim constringentium usu, tam lacunæ glandulosæ urethræ, quam glandulæ, quæ prostatae appellantur, & genuinam gonorrhææ sedem constituunt, facile indurantur, exeduntur atque exulcerantur, hinc continuo foetida sanies profluit & insanabile laticis ex urethra fit profluvium. Et quia hæc subtilis acredinis materia conterminas partes, vesicæ nempe sphincterem, non raro simul afficit, unde successive ejus

ejus fit erosio, quæ ægre consolidata, perpetuam fere ischuriam & dolorificam stranguriam caussatur.

§. XXVI.

Neque postremo loco prætermittendum est, quod do-^{post do-}lores, si atrociore fuerint & diu perseveraverint, universum ^{lores} nervorum genus adeo debilitent & tono suo partes sensui & ^{atroces.} motui dicatas exuant, ut paralytici, vel alii nervorum affectus, etiam epilepsiæ, inde propullulent; cujus rei clarissimum documentum edit gravis intestinorum dolor, qui colica communiter convulsiva vocatur, cui non raro paresis succedit, ^{paresis.} quemadmodum id per experientiam uberius constat & multi auctores observationibus idem confirmant. Inprimis egregius hanc in rem exstat locus in *Paulo Aegineta lib. III, pag. 251. Colica*, ait, *affectio pestifera cujusdam luis modo est grassata, ex qua plerique in morbum comitalem, alii in artuum resolutionem, sensu incolumi, nonnulli in utrumque sunt prolapsi, ac eorum qui in comitalem morbum inciderunt, plures interiere, ex iis vero, qui in resolutionem, plures evaserunt.* Sequitur autem gravem colici dolorem resolutio paralytica, quia ordinario post nimiam partium spasticam constrictionem, postea atonia & debilitas excipere solet, ad quam promovendam multum valent opiata, quæ ad infringendos dolores, larga & repetita sæpius dosi, Practici propinare consueverunt, quum periti Medici horum usum serio & sedulo dissuadeant, & præsertim *Baglivus in praxi med. Lib. I. §. 1. de colica* apposite ita scribat: *nihil familiarius colicæ supervenit, quam paralytis, cave igitur ne opiata copiosius in ea exhibeas, solet enim post opiata magnus sudor supervenire & exinde paralytis.* Hanc ob causam quoque *Raygerus Obs. 50.* in crudeli intestinorum dolore pilulas *Wildegansii* rejicit, quia facile in somno sudor & paresis succedit. ^{Epilepsiæ.} Epilepsiæ fiunt, quando ob vehementem intestinorum spasmus & vasorum constrictionem, sanguis urgetur ad caput, & spasmus quoque ad meninges penetrat, hinc *Thomæus Cent. II.*
(III.) Hh Obs.

Icterus.

Obs. 3. idemtidem post colicam notavit epilepsiam, & quod omnia duplicata conspecta fuerint: humore crySTALLINO quasi e fede sua dimoto. Colicis vero & calculosis, vel etiam tertianis, quod facile icteri superveniant, ratio est, quia spasmus in his morbis ad duodenum & vasa biliaria pertingens, ea valide constringit, ut bilis liber ad intestina descensus amplius fieri nequeat, sed ipsa per vasa lymphatica resorpta & sanguini insinuata, foedum calorem inducat.

§. XXVII.

*De morbi
ex prio-
rum reli-
quiis te-
stimonis.*

Vidimus hactenus morborum aliis supervenientium primordia atque origines, quæ potissimum destructo partium quibus insedit morbus tono, debentur. Jam propositum est breviter strictimque ea considerare vitia, quæ ex morborum reliquiis proveniunt. Primum vero placet hanc in rem divinum nostrum senem audire, qui *aphor.* 32. *S. IV.* hunc in modum scribit: *quibus a morbo restitutis quippiam est infirmum, ibi abscessus fiunt.* Quem aphorismum *Heurnius* optime sic explicat: quando post morbum infirmitatis aliquid superest, quæ ex lassitudine & imperfecta crisi judicatur, ita, ut supersint materia febrilis reliquia, aut, si liberalius se potu & cibo ingurgient, quam immutata ventriculi actio, temperamentum & habitus perferre possunt: tunc in discrimen venit homo, quia partes internæ & externæ labefactate sunt, hinc, si non accurata diætâ accesserit, hepatis & lienis scirrhi, vel cephalææ, vel foras in artus, si ibi imbecillitas, abscessus effunduntur. Quare, ne quid coacervetur, dentur pilule aleopbanginæ, mastichinæ, vel Rusi, vel tale quid. Spectat huc quoque *Aph.* XII. *Sect.* II. morborum reliquia, quæ a crisi supersunt, reciduos morbos parere consueverunt. Fit hoc maxime, quando ob fractam naturæ virtutem, sicut rursus bene id explicat *Heurnius*, materia morbifica non tota fuerit exclusa, neque in declinatione alvus purgante sollicitata. Nota vero inquit, reliquiarum morbi sunt oris siccitas, inappetentia, agrypnia, languor. Quare recte concludit idem auctor: ple-
rumque

rumque jubemus, ne fiant recidivæ, ut quinto vel sexto die, cum jam convalescunt, assumant tres vel quatuor pillulas de hiera cum agarico, vel mastichinas, vel syrupum laxativum, aut pillulas Ruffi, vel aliquid rhabbarbari, aut passularum purgantium.

§. XXVIII.

Profecto cedro digna sunt hæc saluberrima monita, quæ *Quæ pro-*
inculcant, ut quiescente nunc morbo, omne, quod adhuc no- *pterea*
xium & morbificum est, sive in ventriculo, sive in venis substitute- *submo-*
rit, excludatur, & corpus ab omni perniciali & excrementitio *venda.*
succo liberetur, eo, quod hic facile pabulum ac fomentum re-
cidivæ subministrare, vel novum morbum inducere potest.
At vero in hoc & graviter & communiter Medici peccant,
quod in fine morbi, ægris convalescentibus ac morbofo spa-
smo remittente, noxias reliquias, neque evacuantibus, neque
sudoriferis, educant, neque robori naturæ atque ventriculi
per congruam dietam & proba stomachica debite succurrant.
Nam, quo languidius medentis auxilium est in impetu & sta-
tu morbi, eo certius & efficacius in ejus principio atque in de-
clinatione; & quidem ineunte morbo, ut natura adhuc va-
lente obstacula removeat & materiam quæ in vitio est extur-
bet. Verum quippe est Hippocratis effatum; *aph. XXIX. Sect. II.*
ita differentis: *quum morbi inchoant, si quid videtur movendum,*
move; quum vero consistunt ac vigent, melius est quietem habere.
Sub declinatione vero ejus opera necessaria est, quo corpus
debilitatum rursus confirmet, vires fractas erigat, quod re-
stat adhuc noxium expellat & hac ratione novi morbi, ple-
rumque deterioris, generationem impediat.

§. XXIX.

Si vero ullo in morbo, certe in variolis & morbillis, *De da-*
reliquiæ morborum ut expellantur necessarium est, quod si *mnis ex*
non perficitur, gravissima symptomata & morbi succrescunt. *variola-*
Inprimis etiam per experientiam constat, lympham peccan- *cum &*
tem, acriorem, in variolis & morbillis, nervis pnevmonicis *morbillo-*
rum reli-
ma- *quis.*

maxime esse molestam, teste tussi, quæ indivulsus utrorumque plerumque est comes, & morbillos sigillatim subinde catarrhum excipere suffocativum. Relinquitur enim in hoc viscere, fracto morbi impetu, magna atonia, ob quam coacervati viscidum humores ibi hærent, & suffocationem, nisi cita ope succurramus, inferunt. Porro quemadmodum in his morbis lymphæ universi corporis, veluti fermento quodam maligno, inquinata, corrupta, vappescens & corrosiva redditur: ita multo magis id accidit, si dissipata per antecedentem æstum sulphurea & balsamica sanguinis portione, fermenti virulenti portio restitat, quæ tam acrem ac corrosivum reddere potest lymphaticum laticem, ut non modo in externis, etiam ossibus partibus, sed & in visceribus, præsertim pulmonibus, ingentes erosiones, exulcerationes vel etiam apostemata fiant. Recte hinc ac perite *Derebecque obs. 104.* perhibet: *quotquot variolis siccatis non purgati fuerunt infantes, in graves morbos inciderunt, hydropem, tabem, scabiem, phthisin, cæcitatem, os- sium cariem & alios innumeros.*

S. XXX.

Testimo-
nia.

Uberius certe hanc ex variolarum maxime reliquiis noxam testantur Medicorum observationes, quarum ut nonnullas adducamus haud abs re erit. Sic *Hildanus Cent. VI. obs. 82.* post variolas non exacte curatas cornuæ erosionem, tubercula & apostemata circa juncturas vidit. Catarrhos suffocativos & aphoniam notavit *Albrecht in Misc. Nat. Curios. Dec. III. A. III. Obs. 126.* memorans: quosdam post variolas, indolentibus tumoribus, qui postea in abscessus fistulosos ipsi osmium compagi haud parcentes, mutati sunt, in tibiis & brachiis affectos esse, & scite addit: *hoc fateri cogor, vix iis, qui reliquias morbi purgantibus, præsertim mercurialibus, sedulo everrebant, vel earum virus aliis idoneis presidiiis destruebant, tale quid obvigisse.* Pariter quanta corrosio lymphæ, post variolarum morbum non bene curatum, sit, variæ observationes docent, de quibus *M. N. C. Dec. III. A. IV.*

Obs.

Obs. I. consulantur. Vidi, scribit *Franckius*, qui per variolas in *russina ferinam*, in tabem, hecticam & phthisin inciderunt, vidi qui in ophthalmias, cæcitatem, varia ulcera, scabiem malignam & abscessus inciderunt. In filio *Bregensi*, post variolas, *pedarthrocace* in manibus, pedibus & spina dorsi ac tandem mors. Et horrenda ulcera post variolas emergentia *Tulpius* Cap. 52. & 54. quam optime describit. Ulcera mala, pus acerrimum fundentia, notata quoque sunt a *Collectoris Actorum Vratislav.* anno MDCC. p. 6. Phthisica quoque ulcera & apostemata, post variolas relicta, & nos in praxi annotavimus, & tristissimo exemplo & casu *Serenissimi Saxonie principis*, ante aliquot annos hic placide defuncti, id confirmatum habemus: ubi in thorace aperto integer pulmonis lobus, vasorum ramificationibus relictis, penitus corruptus & consumptus, foetidissimo & copiosissimo pure in thoracis cavitatem effuso, visus fuit. Quin in virgine nobili, quæ, sine evacuatione, post variolas nimis cito corpus frigido aëri exposuerat, omnium partium contracturam, eamque insanabilem, conspeximus.

§. XXXI.

Deinceps, vix unquam tam utiles ac necessariae pri-
marum sic dictarum viarum evacuationes sunt, quam in pu-
erperis. Nam non modo tempore gravidationis, sed & perarum
ipso in puerperio, magna colluvies impurorum humorum purgatio-
colligitur, quos nisi cito & clementer subtrahas, complura
mala, non sine periculo inde nascuntur. Pessima itaque & pura.
& detestabilis nostris temporibus opinio invaluit, puerperas,
præsertim primis septimanis, plane non esse purgandas, sed
ab omni evacuatione abstinendum. Verum magna damna hinc
subinde experiuntur, nam exanthema illud, quod purpura
vocatur, & in nostris regionibus puerperis familiarissimum
est, vix ulli alii causæ, quam neglectæ primarum viarum re-
purgationi & lochiorum defectui, adscribi debet. Nam
impuri ex venis affluentes ad intestina humores biliosi &

salivales diuturna mora putrescunt, qui, rursus delati ad sanguinis massam, exanthemata purpuracea hæc, vel quandoque erysipelacea, efficiunt. Ad quæ præcavenda nihil consultius est, quam altero vel tertio a puerperio die, posteaquam omnia rursus sedata sunt; balsamicas pilulas singulis tribus diebus exhibere, qua methodo non modo lochiorum fluxus promovetur, sed & a purpura aliisque gravioribus damnis puerperas immunes persistere, indubitata & creberrima experientia confirmati sumus.

§. XXXII.

*Nec non
omissa in
acutis
purgatio.*

Ejusdem exanthematis purpuracei malum, in nostris oris, compluribus acutis morbis, ut variolis & morbillis, febribus continuis, etiam malignis, in declinatione, non sine summo vitæ discrimine, sæpius supervenire solet. Rationem vero nullam aliam invenio, quam quod pessima opinio apud nonnullos Medicos usque eo regnavit, alvi subductionem dictis in morbis periculi esse plenissimam, unde per quinque vel sex dies & ultra, ægrotantes sine hac relinquunt, quod non potest non pessime cedere. Nam perpetuus quum sit succorum in morbo e corpore ad intestina affluxus, non potest aliter fieri, quam ut, si non excludantur, mora & æstu plane alienam & malignam naturam induant. Hinc aliorum morborum fomitem præbent, eoque magis, ubi sudorifera calida adhibentur, quæ exagitatione putredinem humorum auctam intimius corporis penetralibus insinuant. Quare saluberrimum consilium est, alvum nunquam diu adstrictam retinere, sed enematis vel blandis vacuantibus eam liberam servare. Recte enim *Riverius in praxi med. Lib. XVII. Cap. I. de variolis* præcipit: enemata, non solum in morbi principio, sed etiam toto morbi decursu, usurpanda esse, si alvus sponte non fluat, idque singulis vel alternis diebus; & hoc præclarum præceptum merito in omni febrium curatione locum invenit ac servandum est.

§. XXXIII.

§. XXXIII.

Quemadmodum itaque ex reliquiis superati morbi & *De reci-*
debilitate ab eodem solidis inducta, novæ passim succrescunt *divis*
morbosæ passiones: ita frequentius quoque accidit, ut mor- *morbo-*
bus jamjam sanatus recidiverit ac denuo repetat, quando vide- *rum.*
licet prior pariter non perfecte a natura judicatus vel curatus
fuit, neque materia morbigica, Medici aut ægrotantis culpa,
penitus educta, vel nova mox ingenita. Nam quicumque
morbus subito sine ratione & bonis signis discessit, is plerum-
que revertitur; ita tamen, ut quo citius redeat, vel quo vi-
res debiliores sint, eo plus periculi alat, eo quod natura a pri-
mo morbo fatigata, secundum vix sustinere potest. Hæc
autem morbi reversuri sunt indicia, si convalescens manet im-
becillis, nec cibum appetit, nec rite concoquit, sed multa
nausea & ructu nidoroso vel acido afficitur, si spiritus male
olet, præcordia inflata sunt & facies livida, si interior
cum siti percipitur æstus, quippe quæ depravatam ventriculi
coctionem arguunt, qua præsentem morbus adhuc vel intus de-
litescit, vel nova ad eundem resuscitandum colligitur minera.
Interim tamen minori discrimine stipatur recidiva, quæ ex
mala victus ratione post morbum, quam quæ ex relicto vitio
excluditur.

§. XXXIV.

Inprimis autem facillime febres intermittentes rede- *Februm*
unt, tum maxime, quando febriles motus, antequam mate- *intermit-*
ria quæ in vitio est, penitus correctæ & eductæ, nimis cito *tentium.*
adstringentibus supprimuntur, quandoquidem hoc facto, ex
facili in disposito adhuc ad spasticas commotiones nervorum
ac fibrarum genere, denuo strictionis & motus pristini recru-
descunt. Nihil vero ad inducendam febris recidivam tam
promptum paratumque esse observatur, quam si superata illa,
quis ventis borealibus corpus objicit, aut in loca frigida hu-
mida, subterranea aut templorum concamerationes conce-
dit, quo illico horror, dolor dorfi, languor ipsaque febris
con-

& acutatum.

contrahitur. Forte quoque purgans quam facile, si reliquiae febriles adhuc in penetralibus corporis latitant, febris reditum proritare potest; nullam aliam ob causam, quam quod subtile illud acre virus redolens eorum principium spasticas in genere nervoso provocet constrictiones. Acutas etiam, praesertim inflammatorias febres, saepius magno cum vitae discrimine redire, experientia constat, id quod facile accidit, si convalescentes nimis cito ante primarum viarum repurgationem iusculis nutrientibus, ex carnibus & ovis, nimis se replent, aut liberalius vinum ingurgitant, vel gravioribus animi affectibus indulgent.

§. XXXV.

Capitis morborum.

colica &c.

calculi arthritidis.

Vix quoque ullus tam facile repetit morbus quam gravior capitis, ut apoplexia, paralysis, epilepsia, hemicrania & insania, eo quod hi morbi in parte affecta ingentem imbecillitatem & pravam dispositionem relinquunt, quae accedente animi affectu, immoderata refrigeratione, admissa ebrietate, vel gravi alio in diæta vitio, eundem subito ciet ac denuo concipit morbum. Pariter observavi abscessus pulmonum, hydropem abdominis & pectoris, nec non colicam, eos, qui vix ab iisdem liberati, vitae victusque ratione minus valetudinem curarunt, denuo corripuisse. Longe frequentius & crebrius renum calculus, podagra & arthritidis resultant, ob maximam, quam partibus quibus incumbunt quosque dolorum atrociam delassant, inducunt laxitatem ac debilitatem, ita prorsus, ut qui semel iisdem affectus, saepius eorum insultus experiatur, ac rarius, vel plane non, ab iisdem penitus liberetur. Haud postrema itaque Medici cura eo dirigenda, quo abacto morbo, ejusdem recidivam avertat, eumque in finem cum valetudine in gratiam redeuntibus exactas leges ac regulas diæticas praescribat, has ut observent serio inculcet, & congruis laxantibus ac roborantibus, aut etiam decenti sanguinis missione, imminens periculum prudenter arceat atque praescindat.

CAP.

CAPVT XI.

DE

RATIONALI PVLSVVM EXPLI- CATIONE ET IVDICIO IN MORBIS RECTE EX IISDEM FORMANDO.

§. I.

IN superioribus potiora fundamenta & capita veræ & rationalis pathologiæ, quæ resolvendis morborum historiis apprime inserviunt, concise quidem, sed satis solide, ut arbitror, tradidi: nunc ad doctrinam a Veteribus maxime semper habitam & celebratam veniam, quæ ad penitorem morborum diagnofin & ipsam quoque prognofin neceffaria, ad certitudinem artis, exiftimationem & famam apud doctos & vulgus Medico conciliandam, maximum utique confert momentum. Utut vero inter Veteres, antiquiffimus noſtræ artis parens *Hippocrates*, in hac Medicinæ parte admodum diffufus & operofus fuerit, ut plures etiam de prædictionibus, prænotionibus & prognoficis libros confcripferit; nihilominus tamen permulta, ut ingenue fatear, in iis comprehenduntur, quæ in noſtris præcipue regionibus, uſu & applicatione carent. Nam regulæ iſtæ & aphoriſmi prognofici magna ex parte particulares ſunt, ad certos caſus & peculiareſ circumſtantias, quæ tamen deficiunt & non adjectæ, reſtricti, tantum abeſt, ut perpetuæ ſint obſervationis & applicationis. Quumque in diagnosticis & prognoficis vix ulla ſit excellentior magisque neceſſaria doctrina de pulſibus; mirandum certe eſt, in *Hippocratis* monumentis nullam, vel plane exiguam, ejus reperiri mentionem, quum tamen in diſquiſitione de urinis, plus quam par

(III.)

Ii

eſt,

est & usus exigit, diffusus sit atque occupatus. Quam breviter vero & concise ipse *Hippocrates*, tam late & prolixè *Galenus* de pulsibus sermonem fecit, quippe qui innumerabiles fere pulsum finxit differentias, quæ nec mente concipi possunt, nec reipsa, ut recte animadvertit *Montanus*, observantur. Hunc postea, ceu ducem, cæco studio plures ejus asseclæ sequuti sunt, & fideliter tam numerosas, confusas, vix explicabiles & conceptibiles pulsum species in scripta sua transtulerunt, quæ nonnisi ad ingentem tironum Medicinæ confusio- nem facere possunt.

§. II.

*Quos re-
centiorū
quidam
perperam
sequun-
tur.*

Veteribus quidem facile condonandum, quod in pulsum dignotione & evolvenda eorundem natura atque origine, tot hallucinationes admiserint, eo quod sanguinis circuitum, veram & genuinam pulsum causam, ignorarunt; quo utique factum est, ut verum usum pulsum, nec in diagnosi, nec prognosi, tam in statu sano, quam præternaturali, cognoscendo, recte intellexerint. Recentioribus vero, qui nobilissimum hoc inventum norunt, merito vitio vertendum, quod multi adhuc eadem chorda oberrent, & ex tanta a Veteribus conficta pulsum multitudine & multifaria denominatione, velut ex labyrintho, cum certa ratione sese extricare nequeant. Si causam quærimus; hæc præcipue subest: quod plerique hanc de pulsibus doctrinam non ad mechanicam scientiam, sive regulas motuum, ad quam tamen proprie spectat, examinaverint. In quo quidem doctrinæ genere *Bellino* melius versatus est nemo, quem si inspexissent quibus mechanica fordent, perspicuum sane conceptum de arteriarum & sanguinis per eas motu adepti essent; sed qui præjudiciis occæcati sunt, nunquam volunt discere, quæ nunquam didicerunt.

§. III.

*Qui sy-
stalticum
arteria-*

Quod vero magis adhuc mirandum, adeo quidam in luce caligant, ut dubitent, num in arteriis systole, sive mo-

motus contractorius succedat, cujus beneficio sanguis ex
 ipsis in venas, & ex his versus cor refluus propellatur? Sed
 quis putarit, hoc ipsos ignorare, motum tonicum, de quo tam
 frequens ipsis sermo est, in reciproco motu constrictionis &
 relaxationis consistere, & hunc non tantum musculis & fi-
 bris, sed maxime omnium canalibus, qui ex tunicis nervosis
 & fibrosis elasticis conflati sunt, omnibus esse proprium, ad-
 eo, ut nullum quod fluidum vehit in corpore animali vas hoc
 ipso sit destitutum. Deinceps nostri utique scire debuissent,
 quod horum simplicissimorum motuum vere vitalium ea sit na-
 tura ac indoles, ut unus semper alterum sequatur atque prori-
 tet ita quidem, ut systole suscitet diastolen, & diastole rursus
 systolen, unde motus exsurgit perpetuus, & cor in machina
 animali recte dicitur perpetuum mobile, quod argumentum la-
 tius in *tomo primo medicine rationalis systematice* deduximus &
 illustravimus. Tum apud omnes in confesso est, pulsus, qui
 tactu in arteriis percipitur, esse nonnisi expansionem & ele-
 vationem arteriarum, a contractione cordis, qua sanguinis
 portio in alveos intruditur, productam; nisi itaque arteriæ
 post expansionem iterum in priorem statum & dimensionem
 se restituerent sub contractione, neque nova receptio san-
 guinis & iterata ampliatio, neque etiam progressus in vasa
 reducentia, posset contingere. Porro systolen sive activam
 laterum contractionem, licet tactu vix perceptibilem, in ar-
 teriis vigere, apertius testatur, sanguinis per arterias vulne-
 ratas vel abscissas saliens effluxus, ita succedens, ut in diasto-
 le quiescat, in systole vero cum impetu elidatur. Tacemus,
 quod figura & structura valvularum semilunarium idem lucu-
 lenter arguat, quippe quæ orificiis arteriarum e corde egre-
 dientium admirabili artificio eum in finem appositæ sunt, ne
 sub systole arteriarum, quæ diastolen sequitur, sanguis ad cor
 refluat ac reprimatur. Neque denique sublata arteriarum
 systole, sive potentia elastica, quæ dilatatione & reciproca
 contractione absolvitur, intelligi potest, quo modo tota non

solum sanguinis, sed etiam humorum universi corporis massa, quæ exacte posito calculo, pro diversitate individuorum, in grandi corpore & robusto ad LXX. vel LXXX. libras accedit, intrusa una vice a corde in principium arteriæ ad summum sanguinis uncia, possit dimoveri & in circulum agi. — Et certe neutiquam sufficit dicere, arteriosa vasa cum venosis reducens non esse continua, sed arteriarum extrema in porosam partium substantiam sanguinem a corde advectum fundere, & effusum mediante motus tonici vi ac potentia in venas & per has ad cor trudi, sicque cruorem in motu progressivo refluxu eximie adjuvari. Nam supposita illa humorum in poros & interstitia fibrarum extravasatio, commentum & haud levis error anatomicus est, cui partium & totius corporis mere vasculosa, exceptis filamentis fibrosis, compages, uberrime illustrata & confirmata, artificiosissimis *Ruysschii* injectionibus, quibus etiam docemur, nutritionem corporis nonnisi insigni expansione substantiæ vasculosæ partium a contentis succis fieri, apertissime repugnat.

§. IV.

*Nec non
qui mul-
tas pul-
suum spe-
cies nu-
merant.*

Eandem censuram meretur quorundam sententia, qua nostris temporibus, quum a sagacioribus Medicis jam dudum istæ multiplices & inexplicabiles pulsuum Galeni species exploræ, antiquum recoquunt & tantum non omnes illas ad fastidium usque inculcant. Videas nonnullorum scripta, in quibus pulsus fortis, vehemens, magnus, plenus, longus, brevis, durus, mollis, parvus, vacuus, debilis, humilis, frequens, rarus, celer, tardus, serpentinus, vermicularis, formicans, caprizans, tremulus, undulatorius, myurus, serratus, dicrotus, manifestus, obscurus, intermittens, inæqualis, ceu vere & distincte existentes supponuntur, ex variis mentis præfigurationibus explicantur, & ad prognosin formandam sterili plane molimine applicantur. Quo quidem nihil aliud faciunt, quam ut pulsuum disquisitioni tenebras inducant, & vel suo exemplo effatum, quod ipse *Galenus lib. I.*

de pulsum doctrina pronunciare non veritus est, confirment: tantam in pulsibus solis addiscendis esse difficultatem & obscuritatem, ut tota hominis vita illi cognitioni atque exercitationi tribuenda videatur.

S. V.

Ego potius hoc loco pulsum scientiam ac differentiam *Ad motus* secundum mechanicas rationes & leges breviter proponam, *essentiam* quo liquido appareat, quam paucae pulsum sint & revera existant species, unde suam petant originem, & quam eximum *quatuor tantum species pulsus pertinent* usum eorum exactior notitia in praxi medica obtineat. Quemadmodum itaque in mechanicis nonnisi duae simplices & genericæ motuum species dantur, motus nempe magnus & celer, cui parvus & tardus opponitur: ita etiam duo tantum in genere pulsus, magnus scilicet & celer, hisque oppositi tardus & parvus, præsto sunt. Magnitudo & parvitas in motu, de mole quæ movetur, magna, vel parva, dicitur; celeritas verò & tarditas, de spatio, quod mobile longiori, vel breviori tempore, emetitur. Pulsus igitur magnus is appellandus, quando ab insigni copia sanguinis, a contractione *magnus & parvus*, cordis in arterias intrusa, arteria amplius diducitur ac elevatur; parvus vicissim, ubi ab exigua portione immissi cruoris non adeo ampliatur. Et celer pulsus is dicendus, quando *celer & tardus* brevi temporis spatio arteriæ dilatatio perficitur, tardus contra, si longior temporis intercapedo ictus intercedit. Deinde *Et ex his* ex binis his speciebus compositis alia emergit, vehementia *compositus vehementis & debilis*, nempe atque debilitas, ita quidem, ut celeritas cum magnitudine conjuncta vehementiam, parvitas verò & tarditas, debilitatem constituat, quod motuum genus utique etiam in pulsibus locum habet.

S. VI.

Frequentia verò & raritas, item æqualitas & inæqualitas, non sunt essentialiter affectiones motus, eo quod non de singulis motibus, sed tantummodo de successu & serie eorundem prædicari queunt, & frequentia quidem de numero *Reliqui vel non ad essentiam motus pertinent.*

*vel fictitii
sunt.*

majori, raritas de minori, æqualitas & inæqualitas, item intermissio, de ordine & successu motuum. Neque etiam durities & mollities de essentia motuum est, sed tantummodo dispositionem corporis, quod movet, vel movetur, denotat. Reliquæ omnes pulsuum species sunt fictitiæ, quæ revera non dantur, neque mente concipi, neque explicari possunt; licet minime negandum, diversos magnitudinis & parvitat, item celeritatis & tarditatis, vehementiæ quoque & debilitatis, esse gradus. Proinde vehementer utique ii errant, qui discrimen comminiscuntur inter pulsum parvum, humilem, contractum, obscurum, latentem, vacuum, angustum, concisum, profundum, quum nonnisi una species sit, & a parva elevatione arteriæ proveniat, & si quidem distinctio facienda, parvus, minor & minimus, rectius dicetur. Ejusdem notæ est discrimen, quod nonnulli inter magnum, plenum, amplum & manifestum pulsum, nec non vehementem, impetuofum, robustum, fortem & valentem esse volunt, utpote priores denominationes omnes nonnisi magnam vel majorem arteriæ expansionem, & posteriores amplam cum celeritate factam dilatationem, produnt. Illi vero Galenicorum pulsus myurus, formicans, vermicularis, tremulus, caprizans, ferratus, dicrotus, nonnisi species sunt pulsuum magis vel minus inæqualium, qui pro varia mixtione, ordine & successu variant, ita, ut mox parvus, mox magnus, post celer & tardus ictus, percipiatur.

§. VII.

*Pulsus
celer &
frequens
separatim
percipi
nequit.*

Majoris momenti quæstio est: num pulsus celer & frequens, tardus & rarus, inter se differant? an vero pro uno eodemque haberi possint? Nolo hoc loco repetere, quam acrem contra omnem expectationem mihi celeberrimus vir moverit olim controversiam, quum celerem & frequentem pulsum in praxi medicâ pro uno pulsu haberi posse scripto assererem. Is enim hanc meam assertionem suâ de febribus doctrinæ directe adversari putans, quod ingens inter pul-

pulsus celerem & frequentem intercedat discrimen, propugnare & integro scripto defendere sibi sumsit. Ego vero in *dissertatione de pulsum natura & usu*, nec non in schiediasmate apologetico clarius, & quod sciam primus, detexi: celeritatem quidem & frequentiam in motibus mirum differre, dum illa de intensiōe & tempore motus, hæc vero de numero motuum prædicatur, qui tamen proprie non spectat ad essentiam motuum. Quandocunque vero sermo est de motibus, ubi semper unus alterum una serie sequitur, ut fit in pulsibus, hæc est quaestio: annon frequentia a celeritate singulorum motuum oriatur? & annon hæc ipsa certus index sit celeritatis singulorum? quod ego quam maxime merito affirmavi. Etenim nulla certe alia suppetit ratio, singulorum ictuum celeritatem, vel tarditatem accurate, ratione temporis dijudicandi ac determinandi, quam ex frequentia & repetita vibratione, ita quidem, ut si e. c. eo temporis spatio, quod vocant minutum, in uno centum pulsus numerentur, & in alio quinquaginta, priores duplo majori celeritate quam posteriores contigisse, demum constet. Quapropter nec pulsus celer, nec frequens, mente, multo minus reipsa, ullo in morbo ut distinctus demonstrari potest, nisi pulsus, qui fit in arteria dura & constricta, celerem dicere velimus.

§. VIII.

Et hanc eandem de imaginaria pulsus celeris & frequentis differentia sententiam, Medicorum celeberrimi profitentur. *Quod te-*
Diferentis sane verbis *Sylvius prax. lib. I. cap. 26. celeritas, auctores.*
ait, *pulsui adscripta, mente quidem concipi potest, non item digitis tangi ac percipi.* Id quod etiam confirmat acutissimus Medicus & Mathematicus *Bellinus in tr. de pulsibus pag. 75. celer,*
inquiens, *pulsus, quia digito minimo temporis persistit, in statu a naturali parum recedente, vel non datur, vel tactu distinguere non potest, quum naturalis motus extrorsum arteria vix punctum temporis duret, multo minus in statu praternaturali*
id

id sensibile erit.

Egregie quoque eandem in rem scribit Schelhammerus de pulsibus pag. 73. pulsuum frequentem non citra celeritatem observari. Et hinc etiam est, quod nunquam in observationibus medicis, pulsus tardus & frequens, celer & rarus, conjuncti deprehendantur. Non sine ratione itaque in consideratione medico-practica celeritas pulsuum pro frequentia, & frequentia pro celeritate, ponitur. Et quia unius ictus celeritas tactu per se non potest dignosci atque percipi, eo quod vix temporis punctum complet, consultius est, numerum ictuum beneficio horologii quod minuta secunda monstrat, metiri atque determinare, quali instrumento insigni cum fructu in artis exercitio usque eo usus sum.

Ideoque
sine erro-
re unus
pro alte-
ro poni-
tur.

§. IX.

Pulsus
durus ac
mollis di-
citur re-
spectu ar-
teria.

Longe aliter de pulsu duro ac molli sentiendum. Hic enim licet ipsius motus essentiam non tangat, sed tantum talis dicatur respectu ipsius arteriæ, prout nempe ea plus vel minus tensa, renitens, dura, vel flaccida, mollis & relaxata est; nihilominus tamen multum sane refert nosse, qualis sit constitutio & dispositio instrumenti mobilis & moventis, ratione texturæ strictioris, vel laxioris, adeoque num constrictæ, vel laxæ sint cordis fibræ & arteriarum tunicæ, utpote quo major solidorum tensio & constrictio, eo major est nifus, intensio, renifus ac renitentia in motibus, & contra. Hæc vero tensio & durities arteriarum & fibrarum universi corporis nervearum & carnosarum, deprehenditur vel in statu naturali, a conformatione nativa in ætate juvenili, cholericis, item senibus, ubi arteriarum pulsus valde tensus ac durus est, mollior vero textura in sanguineis, phlegmaticis, item in pueris, vel obvia etiam est in statu præternaturali, & nil nisi spasmiquædam species est, quæ quam maxime tangit tunicas arteriarum, ex fibris nerveis & musculosis compositas. Et quoniam sic ipsa dispositio arteriarum, ceu instrumenti motus, plurimum confert ad pulsuum mutationem, in proclivi est

ratio, quare non semper unus idemque pulsus teste *Ballonio*, in utroque brachio observetur, id quod etiam nos in hemiplexia aliquoties observavimus. Et apprime huc facit luculenta observatio *Raygeri pag. 20.* qui scribit: *in quamplurimis militibus sauciatis & male curatis, notabilem differentiam inter pulsum sani & lesi lateris observavi.*

§. X.

Supereft adhuc in pulsum classe is, qui maxime omnium *Nec nov* memoratu dignus, convulsivus meo quidem iudicio merito *convul-* dicendus. Hic pariter non a sanguine arteriosum alveum per-*sivus.* labente, sed potius ab ipsa nervoso-musculosa ac membranosa arteriæ substantia proficiscitur, & tractorio ac tremulo subsultorio motu, quasi arteria ad superiora raperetur, sese prodit, atque in febribus acutis mortis præsagium præbet, ea-que propter recte dici potest pulsus morientium, cui plerumque inæqualis vel intermittens jungitur. Nam sicut circa mortis confinia in toto systemate nervorum & nervosarum partium, confusio & irregularitas motuum cum convulsione percipitur; ita etiam id ipsum contingit in arteriarum tunicis nervosis, & tactu sentitur.

§. XI.

Constitutis sic pulsum differentiis & genuinis spe-*Pulsum* ciebus, evolvendæ sunt eorundem causæ, inquirendo ma-*caussa* xime, quomodo iidem pro diversitate corporum, atque etiam rerum non naturalium usu, differant. Ad pulsum itaque *cordis* causas quod attinet: originaliter iidem a cordis motu systal-*motus sy-* tico & diastaltico deducendi sunt. Hic enim cordis motus *stalticus.* maxime omnium dici debet vitalis, & cor primum movens ac ultimum moriens. Scilicet cordis structura ex fibris quamplurimis firmis, tensis, expansilibus & contractilibus, sive elasticis, longe artificiosissime est contexta, & ex harum vi ac potentia, validam contractionem, seu motum activum, sortitur, qui a sanguinis aëreo elastici valde spirituosius (qualis fit ex brevissimo illo circulo ex cordis substantia in pulmo-

nes, & ex his in hanc, dum portio sanguinis ex pulmonibus subtilior facti, per substantiam cordis musculosam transit, & mox rursus beneficio arteriæ pulmonalis ad pulmones fertur, tenuior rediturus) per vasa coronaria transeuntis influxu animatur, & potentia ac virtute fluidi subtilissimi quod ex pari octavo & intercostali nervorum affertur, magis augetur.

§. XII.

Et diastalticus a sanguine appulso.

Deinde quum motus cordis non uno illo contractorio, sed reciproco altero diastaltico absolvatur, posterior quidem respectu cordis, quod patitur dilatationem, dici solet passivus, nihilominus tamen hic quoque motus dilatatorius, qui fit a contractione arteriarum & impulsu sanguinis in venas, necessarius est ad systolen sive vim elasticam contractoriam. Etenim quia corporum elasticorum ea natura est atque conditio, ut post dilatationem sese rursus contrahant, & post nimiam contractionem iterum amplient ac in pristinum statum restituant: in corde quoque tanquam parte mira elastica virtute instructa, post expansionem ejus contractio de novo suscitatur, ita, ut experimentis constet, quo major & quo crebrior diastole & expansio, eo majorem fieri systolen & consequenter pulsus arteriarum. Confirmatur hoc luculenter ex eo, quod affluente copiosius & velocius sub motu laboriosiori, vel ascensu scalarum, intensiori & longiori sermone, ad cor sanguine, non modo ejus motus intendatur, sed & pulsus major & crebrior micet & corpus plus incalescat; contra vero si debita sanguinis quantitas cordi vel per largiores hæmorrhagias, vulnerationes, aut venarum incisiones subtrahitur, systoles ejus cum pulsu & sanguinis circulo vel valde imminuitur, vel penitus perit ac vita intercidit. Notavimus paucis abhinc diebus ejusmodi exemplum in femina, quæ, cur nescio, subito enorme sanguinis experta est profluvium, ut animo primum deficeret, demum tamen refocillaretur. Sed quum e lecto cruore con-

spur-

spurato levaretur & paullo diutius erecta federet, subito exanimis concidit atque extincta est, nullam aliam ob causam, quam quod sanguine ob situm perpendicularem cordi detracto, systoles periit & sic totus sanguinis circulus substitit, qui forsan prompto revocari potuisset auxilio.

§. XIII.

Sicut itaque æquabilis & moderatus influxus sanguinis *Hinc cor-* in vasa coronaria, & conveniens ejus quantitas in cordis thalamis effusa, motum cordis naturalem, æquabilem & moderatum efficit; ita pariter æqualis & temperata sanguinis in arterias propulsio, & ipsi cordis motui respondens, a moderato sanguinis & fluidi elastici in arteriarum tunicas appulsu dependens arteriarum renisus ac systole, pulsum facit naturalem, vicissim præternaturalem, quando hoc temperamento recedit. Et pulsus quidem magnus, sive ampla arteriæ dilatatio, indicat copiosorem sanguinis ad cor affluxum & similem etiam in arterias effusionem. *dis motui respondet pulsus ac fit.* Parvus vicissim parciolem sanguinis in cordis ventriculos confluum & exiguum ejusdem diastolen, idemque in arteriis contingere denotat. Quando porro arteriæ celeriter micant, citatiorem sanguinis ex partibus ad cor succedere refluxum indicio est, si tarde, tardum. Vehemens pulsus adest, ubi celerius ingens sanguinis copia ad cor per venas appellitur: debilis contra, quum pauca quantitas tardo. *celer vel tardus. vehemens ac debilis.* Inæqualis vero arteriarum pulsatio, sive mox magna, mox parva, mox celer, mox debilis, intermittens quoque fit, quando liber sanguinis transitus per vasa coronaria, vel etiam ventriculos cordis, a quodam obstaculo impeditur, ac vel sanguis grumefactus crassus in vasis coronariis, vel fibrosum aut polyposum concrementum in auriculis vel cavitatibus ventriculorum vel vasorum cordis hæret, vel etiam fit, quando sanguis crassus & copiosius celeriter ad cor truditur & systolen ejus ad tempus opprimit. *vel inæqualis ac intermit-*

§. XIV.

Major
quam
vulgo pu-
tatur
succorum
in corpo-
re est
quantita-
tas.

Jam quum pulsus cordis & arteriarum vitalem illum sanguinis circulatorium motum regat ac tueatur, ac is vicissim ab hoc sustentetur; quæstio disquisitione haud certe indigna incidit: quoties una hora universa sanguinis & humorum massa mediante illo perpetuo circulo per cor transeat. In hac autem decidenda, ingens inter Medicos est sententiarum divortium, dum non solum in determinanda sanguinis & humorum quantitate in universo corpore, sed etiam ea, quæ uno ictu e corde ejicitur, mirum discrepant; ita quidem, ut omnem humorum in corpore sano, adulto ac robusto apparatum, alii ad XXX, alii ad XXIV, XX, & XVI. libras accedere autument; pondus autem cruoris, una systole e corde pulsæ, quidam unam unciam, quidam dimidiam, pondere æquare, censeant. Verum mihi certe vehementer errare videntur ii, qui tam exiguum molem & portionem humorum per cor & vasa omnia ferri affirmant, & in eo plerumque decipiuntur, quod tantummodo sanguinis rationem ineunt, quasi ille solus circumagatur, quum tamen longe major sit quantitas lymphæ, feri, chyli & succi alibilis, quos omnes humores innumera vascula & tot canaliculi, e quibus maxima ex parte compages corporis nostri ejusque partium coagmentata est, continent, & qui pariter non subsistunt, sed jugi etiam motu circumaguntur, id quod etiam de succo cerebri, medullæ spinalis ac nervorum dicendum. Deinde illi quoque admodum falluntur, qui quantitatem omnem sanguinis ex ejus per vasa aperta effluxu metiuntur, eo quod, hic tamdiu tantum, quam cordis & arteriarum motus, succedit, hoc autem, post interceptum a subtracto sanguine ad cor affluxum & sublatam diastolen, pereunte, subsistit, restitante adhuc in vasis minoribus & inferioribus magna cruoris copia.

§. XV.

Et major
fluidorum

Proinde alia potius via ac methodus excogitanda, qua proportio liquidi ad solidum in corpore humano clare & cer-

certius possit detegi : id quod mea quidem sententia commo-^{quam se-}
dius perfici nequit, quam si fluidarum æque ac solidarum par-^{lidorum.}
tium nonnihil lance prius libratum calori exponitur, quo hu-
midum aufugiat, & exsiccatum postea rursus ponderatur, vi-
dendo, quantum perdiderit ponderis, & inde calculum sub-
ducendo. Varia hunc in finem institui experimenta, & sæ-
pius quidem cum sanguine e vena misso, ac deprehendi, qua-
tuor ejus uncias, facta exsiccatione, unam ut plurimum unci-
am solidæ materiæ reliquisse, ut adeo tres sint fluidæ, & una
tantum solida in cruore portio. Deinde frustum carnis bubu-
læ recentis, duodecim unciarum pondere, in clibano non adeo
acri & vehementi calore siccavi, & aridæ substantiæ uncias
quatuor obtinui, reliquis octo unciis, partim sub vaporum
forma difflatis, partim cum pinguedine liquefactis & exstillatis.
Ossa quoque, quæ sunt solidissimæ & maxime compactæ par-
tes, decoxi ad aliquot horas cum aqua, exemta postea are-
feci, & dimidium ponderi eorundem decessisse compertum
habui. Licet autem pondus & quantitas tot membranarum,
cartilaginum omniumque solidarum partium in corpore huma-
no, exacte determinari nequeat; illud tamen ex hac compu-
tatione recte elicitur: fluidam corporis substantiam in genere
longe superare solidam.

§. XVI.

Ponamus itaque corporis molem attingere CLX. ^{Inde eli-}
libras, minimum LXXX. libræ humoris in eo erunt. Po-^{ciendum}
namus porro, quod etiam fere semper in sano homine ^{quoties}
evenit, quod uno in minuto septuaginta pulsus, adeo-^{sanguis}
que in hora, quæ sexaginta minutis absolvitur, quater ^{circule-}
mille & ducenti pulsus numerentur, & quod ea sit arteriæ
magnæ cordi concretæ amplitudo in robusto isque diame-
ter, ut quovis cordis ictu, unciam unam sanguinis quam
commode recipere possit, calculo subducto, patebit, mini-
mum ter intra horæ, ac septuagies & bis intra XXIV. horarum
spatium, humorum microcosmicorum pelagus cursum confi-
cere & cor in circulum abeundo perlabi. Et tam crebra
liquo-

liquorum corporis per cor & omnia vasa circulatio, eam maxime ob causam necessaria est, quo succus ille, qui ex ingestis esculentis & potulentis extrahitur, ac in mediocriter robusto & non valde agili vitæ genere minimum ad sex libras accedit, cum sanguine intime misceri, ad minima vascula per universam compagem pelli, iterumque per subcutaneos maxime & urinarios tubulos exire possit; quandoquidem observationibus staticis liquido constat, corporis adulti idem semper fere manere pondus, & egesta æqualiter respondere ingestis.

§. XVII.

De causis quæ pulsum immutant.

Quidem sexus.

temperamentum.

corporis habitus.

Ut autem ad pulsus eorumque causalem disquisitionem redeamus, probe tenendum est, pulsum tam quoad celeritatem, quam magnitudinem, non in omnibus omnique tempore unum eundemque observari, sed ratione magnitudinis cordis & vasorum, copię & temperiei sanguinis, nec non virtutis elasticę canalium, multum differre, & hinc quoque pro ratione sexus, ætatis, temporum anni, aëris, motus, victus, somni, vigilię, animi pathematum admodum discrepare. Si sexum spectemus, viri plerumque mulieribus pulsum majorem & citatiorem, feminae tardiorē & debiliorem obtinent, quippe viri, corde majori & ampliori, cui, ut ego in quamplurimis sectionibus observavi, semper vasorum amplitudo respondet, firmioribus quoque fibris & sanguine magis calido turgescēte, quam feminae instructi sunt, quæ vasa habent exiliora, laxiora & copiosiora. Deinceps in cholericis & sanguineo-cholericis, arteriæ validius & celerius micant, quam in iis, qui phlegmatici & melancholici sunt temperamenti. Nam cholicorum sanguis majori copia partium sulphurearum, quæ fons & matrix motus intestini calidi & orgastici sunt, scatet, hinc tenuior, fluxilior magisque coccinei coloris est, citatius rursus conficit & excretionēs promptiores facit. Quoad corporis habitum macilentiores & qui fibras strictiores & ampliora vasa habent

præ obesis, qui laxis fibris dotati, vasaque gerunt angusta, majorem & validiorem arteriarum pulsationem experiuntur; unde etiam saniores, robustiores ac ad perferendos labores aptiores sunt illis.

§. XVIII.

Porro ætas multum ad modificandum arteriarum mo-

Ætas.

tum confert. Nimirum infantes insignem succorum copiam ad alimoniam & incrementum necessariorum alunt, unde crebriores fiunt diastoles & pulsus, qui tamen ob fibrarum teneritudinem & laxitatem, molliter tangentis manum feriunt. In juvenibus ac viris maximus corporis vigor, sanguis calidus & fibræ strictiores, & hanc ob causam in iisdem pulsus strictior, major & vehementior observatur. Senes vero fibras gerunt rigidiore, & sanguis ob cessantem nutritionem redundans, angustatis nimium minimis canaliculis, in majoribus vasis ipsoque corde majorem dilatationem, adeoque pulsus magnum & quodammodo durum facit, qui tamen ob cruorem, deficientibus particulis calidis sulphureis, crassum ac spissum, tardior est. Labor, motus *Labor.* & exercitatio corporis, & pulsus, & circulum sanguinis, & excretiones, præsertim perspirationem, augent; quies autem *quies,* & otium & tardiores, & debiliore, sanguinis progressum, adeoque etiam arteriarum motum, efficiunt. Eundem cum mo- *Sermo* tu præstat effectum respiratio, per sermonem excitatum, vel *intensius.* ascensum acclivium intensior facta, qua sanguis non solum velocius per pulmones, sed etiam universi corporis canales agitur, ac pulsus magnitudine & celeritate increfcit. A vigilia *Vigilia.* evidentior arteriarum percussus sentitur, in somno vero tardior & languidior est. Post potum sumtum calidum v. g. in- *Potus ca-* fusi Cofée & Thée, vel etiam aquarum thermalium, statim *lidus.* frequentiores vibrant pulsus, nec non post ingestum cibum, adeo ut sæpius experimentum ceperim, & quum ante prandium in minuto arteriæ septuagies, in quibusdam sexagies quinquies pullarent, post illud ad LXXV. vel LXXX. quin C. pul-

*animi
affectus.*

pulsus ascenderent. Nihil vero tam subito pulsum cordis & arteriarum mutare valet, quam animi affectus; & a terrore quidem pulsus fit inæqualis, parvus & contractus, a gaudio frequens & magnus, ab ira celer ac durus, a tristitia tardior, minor, profundior ac debilis, & post impenias meditationes, languidus ac debiliior, neque dubium est, quin in desideriiis & affectibus venereis crebrius pariter turbetur.

§. XIX.

Aër.

Quam eximia præterea aëris circumflui ac tempestatum sit efficacia ad sanguinis per arterias motum earundemque percussum conturbandum, quotidianis experimentis inclarescit. Inprimis experientia compertum habemus, quod simulac post diu in atmosphæra regnantes zephyros, vel austrós, aquilo, vel eurus flare incipit, mox major tensio arteriarum fiat, major quoque vigor & magnitudo in pulsibus, quod etiam observatur, quando argentum vivum in barometro situm suum humilem mutat & ad superiora scandit. Contra ea, si atmosphæra est densa, humida, pluviosa & diuturna austrina ejus constitutio, sub vita præsertim sedentaria, longiori somno, & autumnali tempore, languescit pulsus & minor redditur, simul quoque sanguinis circuitus cum excretionibus, inprimis perspiratione, impeditius succedit.

*Anni
tempora.*

Ex eodem fonte derivandum, quod pulsus in arteriis pro anni temporibus mirum variet. Vide licet vere medio, ut Maio mense, maximus vigor corpori inest, & pulsus magnus, interdum vehemens, percipitur. Æstate media arteriæ celeriter, sed debiliter, percutiuntur, quoniam ob æstum major intestinus & calidus partium sulphurearum fit motus, spirituosæ autem elasticæ exhalant. Autumno pulsus tardi, molles & debiles percipiuntur; & hieme duriores ac majores micant.

§. XX.

Accedunt medicamenta, quibus identidem peculiaris *Medicavis* atque virtus inest, motum cordis & arteriarum pulsum *menta* variis modis immutandi. Etenim quotidianæ observationis *purgantia & emetica.* est, a drastico sumto purgante, quod spasmis ventrem exercet & plures dejectiones movet, pulsum duriorem, citatiorem & debiliorem, cum virium languore reddi, qualis effectus etiam assumpto fortiori emetico sequitur. Medicamen- *martia-* ta ex marte parata id servant singulare, quod sulphure suo *lia.* metallico egregie fibrarum & canalium elaterem firment atque intendant; unde eorum usu pulsus major & robustior percipitur, color faciei vividior conspicitur & calor corporis adaugetur, quæ si observantur phænomena, indicium sunt boni a medicamento dato effectus, ad expediendas maxime obstructions in corpore cachectico. Quumque Lauchstadienses medicati fontes eximiam martialis elementi copiam in sinu foveant, exquisita utique ratione nititur, quod sæpius expertus sum, ab eorum potu pulsum languidum antea & minorem, in sexu potissimum sequiori, majorem & frequentiore redditum fuisse. Idem quoque ab *cortic.* usu corticis Chinæ in intermittentibus adverti: quippe die *china.* vacuo, quo arteriarum percussus solet esse valde tardus, parvus & debilis, hoc propinato, vegetius & robustius micare ceperunt, indicio, auspiciatam hujus remedii ceteris paribus esse operationem.

§. XXI.

Pharmaca, quæ fale volatili acri & oleoso turgent, *Volatilia* ut essentia & spiritus bezoardici, alexipharmaci, ordinario amplificant & exaugent pulsum, atque cordis & arteriarum diastolen, ob principium sulphureum volatile, expansivum orgasticum; & quia sanguinis circuitus inde promovetur, non modo perspiratio, sed & debito adhibito regimine, sudor largior subsequitur. In enormi virium defectu & imminente *Anale-* animi deliquio, arteriarum motus languidus, tardus & par- *ptica.* *vus,*

vus, vix interdum perceptibilis observatur, adhibitis autem interius & exterius balsamicis & spirituosis aromaticis, mox immutatur & augetur, qualem effectum etiam vinum generosum præstat. *Acida & nitrosa.* Acida vicissim & nitrosa, peculiari ratione sulphur sanguinis, a quo intestinus ejus calidus motus dependet, figendo & refrenando, corpus refrigerant & simul semper reddunt arteriarum motum pacatiorem; quare etiam eorum usus, ubi pulsus ratione magnitudinis & celeritatis nimium est adauctus, ut in æstu febrili, præsentissimæ est efficaciæ.

§. XXII.

Soporifera & narcotica.

Quæ sulphure quodam vaporoso, naturæ adverso, ut sunt, quæ somnum inducunt, ex opio potissimum parata pharmaca, multo magis quæ narcotin & stuporem conciliant, quo nomine hyoscyamus maxime & ex eo concinnata celebrantur, imbuta sunt, pulsus percussum valde parvum & debilem efficiunt ac vires prosternunt. Et mirandum certe est, quam subito hæc ipsa medicamenta, exigua etiam dosi oblata, vires dejiciant, elaterem solidorum & potentiam motricem minuant, nullam aliam ob causam, quam quod principio suo subtili, sulphureo, valde expansivo, intima nervorum penetrent, & liquidum quod vehunt purissimum, magnæ ad movendum efficaciæ, adverso suo vapore contaminent; eodem modo ac versa vice, quæ amico, fragranti sulphure scatent, motum cum viribus erigunt atque adaugent. *Greenena corrosiva.* ter experientia constat, ab assumtis aliis venenis corrosivis, quorum notissimum arsenicum, pulsus minorem, contractum, durum atque frequentem fieri, qui ante mortem aliquot horis deficere solet, ut percipi plane nequeat.

§. XXIII.

Venasæ.

Si ob nimiam sanguinis redundantiam & ampliorem alveorum diastolen, cordis systoles non sufficienter respondet, & pulsus eapropter minor fit ac deprimitur; facto per sufficientem san-

sanguinis missionem spatio, arteriæ vegetius & celerius saliant, ipseque sanguinis progressus promptior fit atque liberior. Et quia mensium vel hæmorrhoidum fluxus sæpe ob nimiam plethoram supprimitur, evenit, ut post sectam venam, ob celeriolem sanguinis cursum, brevi tempore post insigni valetudinis cum emolumento restituatur. A balneis tam siccis *Et bal-* & vaporosis, quam humidis, pulsum vehementer augeri *nea.* *clissimum* est, adeo, ut si paulo calidius adhibeantur, febris evadat, quem universi corporis æstus, cordis palpitatio & capitis dolor sequitur. Etenim in ejusmodi balneis a calore externo humido major sanguinis & humorum proritur expansio, quæ, si nimius balnei æstus est, tantopere augeri potest, ut systolen cordis nimia resistentia suspendat, & lipothymia balneantibus, ut crebrioris observationit est, accidant. Quin pediluvia tantum, circa lecti introitum recte usurpata, & sanguinis & arteriarum motum intendere, multiplici constat experientia.

§. XXIV.

Hæc itaque omnia uberius hætenus excussa, *eviden-* *Magna-* *tissime* confirmant: magnam ac præsentaneam rebus *itaque* *exterioribus* corporeis, quibus ad vitam tuendam quotidie utimur, *rerum* *esse* facultatem, cordis motum & arteriarum pulsum, adeo *corporearum* *vitalium* *que* universam actionum vitalium, naturalium & animalium *vitalium* *oeconomiam*, in melius, vel deterius mutandi. Quibus certe effectibus, quasi totidem argumentis, apertissime erroris convincuntur, qui physicis hîc rebus omnem omnino in corpus agendi illudque movendi potentiam denegant, & principio cuidam rationaliter & moraliter agenti, motuum causam & directionem modo plane non intelligibili tribuunt. Quumque adeo pulsus multis variisque causis mutari possit, *At pul-* *periti* omnino Medici est, ut easdem curate expendat omnes, *sum mu-* *ne* in promendo ex iis iudicio fallat ac fallatur. Nam pul- *tandum.* *sus* quidem certum signum & index motus cordis & circuli sanguinis est, sed si solus is spectetur, & non aliarum simul

Ll 2

cir-

Hinc cau-
tum ju-
diciū.

circumstantiarum, vel causarum externarum, ratio habeatur, in judicando admodum decipere potest. Exemplo sit pulsus intermittens. Hic plerumque pro periculi pleno, quin lethali, habetur quidem; experientiæ tamen fide constat, eundem sæpe in sanis, frequentius in hysteris nec non colica, sine exitio, observari. *Riverius Cent. III. obs. 3.* intermittentem pulsum notavit a lumbrico, quo excreto, arteriarum motus ad naturalem statum rediit. Idem auctor *Cent. II. obs. 77.* pulsum diu & sæpe, ob polypum, superstiti longius vita, intermittentem, se tetigisse, testis est. Et *Kerkringius in spicileg. obs. 78.* systolen cordis interceptam adeoque pulsum sufflaminatum, sine funesto eventu, se vidisse confirmat. Flatus quoque pulsum suspendere, *Pechlinus lib. II. obs. 8.* confirmat exemplo cujusdam, cui flatuum exsurgentium copia mirifice cor constringebat & inturbabatur pulsus, statim vero ac copiosi ructus exirent, liberabatur cor & intermissio- nis pulsus imminutus sequebatur. Et *lib. II. obs. 7. pag. 214.* disertis verbis testatur: se pulsum subinde intermittentem in scorbuticis, in feminis junioribus male menstruatis, sine ullo majori incommodo spectasse.

§. XXV.

Testimo-
nia.

Quare egregium *Fernelii* est monitum, quod *lib. III. de puls.* pag. 160. inculcat, quotidiana, inquit, corporis affectiones pulsus immutant, sine quarum animadversione, non certo potest pulsus percipi, nec quantum per morbos a naturali distet. Eandem quoque in rem quam maxime commemorabilis *Celsi* locus *lib. III. cap. 6.* & dignus, qui totus transcribatur, dum ait: *venis maxime credimus fallacissime rei, quia sæpe ista lentiores celerioresve sunt, & ætate & sexu, & corporum natura.* Et plerumque satis sano corpore, si stomachus infirmus est, nonnunquam etiam incipiente febre, subeunt & quiescunt: ut imbecillus is videri possit, cui facile laturo gravis instat accessio. Contra sæpe eas concitat & resolvit sol, & balneum & exercitatio, & metus, & ira, & qui-
libet

libet alius animi affectus, adeo ut, cum primum medicus venit sollicitudo aegri dubitantis, quomodo illi, se habere videatur, eas moveat. Ob quam causam periti medici est, non protinus ut venia, apprehendere manu brachium: sed primum residere hilari vultu, percunctarique, quemadmodum se habeat; & si quis ejus metus est, eum probabili sermone lenire; tum deinde ejus carpo manum admove. Quas venas autem conspectus medici mover, quam facile mille res turbant!

§. XXVI.

Atque hæ sunt causæ, quæ arteriarum motum varia-De pulsio
re & multis modis in statu naturali mutare possunt: proximi-
mum nunc est, ut quomodo quibusque rationibus, pulsus
præter naturam in variis morbis immutationem subeat ex-
ponamus; quo Medicus ex hac pulsuum dignotione, ad co-
gnitionem causarum internarum & effectuum eo melius
pervenire, & sic ex iisdem, & morborum, & causarum
morbificarum, signa atque indicia cum certa ratione petere
possit. Quum vero ex omni morborum classe præcipuus, & qui-
immo quasi universalis sit febrilis, qui nulli ætati, sexui & dem fe-
temperamento parcat, plurimis morbis sese complicat, mul-
tos etiam interimit ipsisque Medicis plurimum negotii in cu-
rando & observando faceffit; maxime omnium e re fore ar-
bitror, ut paullo accuratius dispiciamus: an certo pulsu, &
quonam, febris, cujuscunque sit generis, certo dignosci
possit? sive quinam pulsus signum pathognomonicum febris
præbeat? Jam quidem non levem hac de re inter Medicos quarum si
tam veteres, quam recentiores, vigere dissensum, videmus, quum
dum alii pulsus celerem, alii frequentem, alii cum Galeno frequen-
pulsus celerem & frequentem simul, pro pulsu febrili, sive
febris genuino signo, venditant. Ego vero jam su-
pra clarius ostendi, controversiam hanc nullius fere esse
momenti & facile hac ratione dirimendam, si ex vero po-
namus: frequentiam proprie non esse de natura nec mo-
tuum, nec pulsuum, celeritatem autem singulorum pul-
suum non posse dijudicari & exquisite determinari, quam

per ictum numerum frequentiorem, sive sapius repetentem. Hinc quando quæstio est de pulsu febrili, celer quidem proprie is est, qui febribus jungitur easdemque indicat; quia tamen frequentia a crebrius repetita vibratione magis in sensus incurrit, & celeritatem comprehendit, rectius utique ii Medicorum sentiunt, qui pulsuum frequentem pathognomonicum febris signum esse asserunt.

§. XXVII.

Quod restantur
auctores.

Et sane quamplurimi ex recentioribus quoque non infimi subsellii Medici, hoc assertum calculo suo comprobant. Audiamus Sylvium, qui in *praxi lib. II. pag. 460.* ita disserit: *hoc unicum feberi omni soli & semper competens signum est, adeoque pathognomicum, pulsus scilicet præter naturam frequentior, quo præsentem, febrem adesse, absente autem, abesse, certo pronunciari queat. Nec enim aliud signum quod competat omni feberi innotuit Practicis, reliqua enim signa omnia, non tam febrem, quam febris speciem, gradus & tempus indicant aut demonstrant.* Sylvio assurgit diligentissimus observator Etmüllerus, in *tomo pract. p. m. 248. pulsus*, inquit, *naturaliter frequentior recte statuitur signum pathognomicum febrium a Sylvio, tam in dissertatione de natura febrium, quam in praxi, quicquid in contrarium scribat Deusingius, Tract. disquisitione Anti-Sylviana.* Idem confirmat clarus Belgarum Practicus Deckerus, in *notis ad Barbette p. 102. ubicunque*, scribens, *pulsus præter naturam frequentior observatur, ibi febris est.* Et Schelhammerus in *tr. de puls. p. 47.* frequentem in omni febrium genere nunquam non sese offerre scribit, & cum calore earum esse signum pathognomonicum.

§. XXVIII.

In febribus quoque adest pulsus durus.

Monendum vero est, quod licet in omni febre pulsuum præsto sit frequentia, minime tamen ex eo concludere liceat, ubi pulsus frequens, ibi febris. Nam superius jam in causarum evolutione ostensum est, in pueris & cholerica tem-

temperaturæ viris esse, & a motu fortiori corporis in balneo, assumpto sudorifero, ab animi pathematibus, post epilepsiam & vinum potum, naturalem arteriarum motum fieri frequentiore; quum tamen febris absit. Quapropter hæc cautio a Medico, ne decipiatur, adhibenda est, ut prius studiose exploret: an forsan a causâ externa hæc pulsuum frequentia fuerit orta; ac deinceps ut inquireat: num etiam alia febris essentialia signa, ut horror & refrigeratio extremorum, adsint. Porro etiam probe notandum id, quod a paucis notatum, quod scilicet in febribus omnibus frequens non modo sit pulsus, sed & simul ob tensionem arteriæ, plus renitens & naturali durior. Nam certe paucissimæ sunt febres, in quibus pulsus non solito durior observatur, exceptis modo quibusdam vere malignis febribus sudoriferis, e quarum numero maxime sudor sic dictus Anglicus & colliquativus, quæ potius undoso pulsu ac summa virium dejectione indicantur. Febris quippe, secundum nostram rationalem demonstrativam explicationem, est affectio systematis nervosi & vasculosi, universali spasmo quodammodo constricti, qui non modo nervosas & musculosas fibras, sed & ipsa arteriosa vasa eorumque tunicas, quæ ex fibris nervosis & musculosis conflatae sunt, afficit. Et ab hac tensione & constrictione partium, quæ sic proprie de essentia febris est, dependet non modo tensio & durities, sed & frequentia pulsuum aliaque symptomata feberi juncta; quandoquidem spastica hæc fibrarum strictura, dum vasa capillaria nimium angustat, angustia celeritate compensatur, & sanguis citatori mutuo attritu incalescit; a priori frequentia, a posteriori, corporis æstus.

S. XXIX.

Ut autem paullo specialius innotescat, quomodo in *Varia* variis febrium generibus pulsus sit comparatus, primo tenendum est loco: eundem quoad tempora decursus morbi *pro tem-* febrilis, eximie differre. Nimirum in principio continuæ, *ore fe-* *bri.* *vel*

qui ma-
lus?

vel paroxysmo intermittens, plerumque tensus esse solet, parvus & frequens, deinde augefcit & paullo major fit, tum in statu, five vigore æstus, in magnitudine adhuc crescit & vehementius ferit, & tandem circa declinationem & tensio & celeritas remittit, simulque secretiones & excretiones in cute, perspiratio nempe & sudor succedere incipiunt. Malum contra indicium est, si in febribus continuis, circa dies criticos, septimum scilicet, nonum & undecimum, cum horrore & refrigerio extremorum, pulsus fit parvus & celer, vel etiam celer & vehemens, cum urina aquosa & tenui, eo quod spasmos in extremis augeri & sanguinem impetuose ad caput agi, ob fractum robur ibi exitialem phrenitidem inducturum, nunciat. Pessimi autem prælagii est, parvus, frequens & debilis, quippe qui, virium summam prostrationem & internam inflammationem in sphacelum concedere subindicat, cui si complicatur inæqualis & intermittens, mortis periculum prodit.

§. XXX.

De pulsu
in variis
febrium
generi-
bus.

Deinceps in principio quartanæ, pulsus parvus, durus, frequens & inæqualis esse suevit, & in statu tertianæ, item ardentis, vehemens. In febre synocha magnus quoque & celer arteriarum percussus, qualis maxime venæsectionem indicare solet. Ante eruptionem exanthematum in variolis & morbillis, arteriæ quoque frequenter pulsant, post eruptionem autem, & tensio & frequentia expirat, tempore vero suppurationis rursus pulsus frequens fit sub febre sic dicta secundaria, & sub declinatione iterum successive redit ad statum naturalem. In malignis & petechialibus frequens quidem parvus & debilis, sed contractus micat pulsus, cum magna virium prostratione, qui si in mollem & undosum transit, cum multo sudore & urinæ sanorum simili, non remittentibus symptomatibus, mortem prælagit. In febribus inflammatoriis, & ubi dolores juncti sunt, ut peripneumonia, ordinario durus & frequens, quandoque etiam magnus

gnus percipitur. Et catarrhales denique febres ipsasque lentas, pulsus vesperti ingravescent & celerius succedens stipat & indicat.

§. XXXI.

Ad reliquos porro morbos quod attinet & ad pulsus in *In aliis* iis habitudinem, in his quidem qui caput obsident, ut mania, *morbis ut* phrenitide, melancholia, multum quoque variare solet, & *capitis.* modo celer, modo tardior, modo languidus, modo robustus, nonnunquam inæqualis, tangitur, plerumque vero in his morbis intra caput fortiter arteriæ pulsare solent, a sanguine copiosius ibi congesto, cum dolore tractorio & lancinatorio, luculento indicio, multum ad cordis & arteriarum ipsiusque sanguinis motum turbandum conferre cerebri membranarum & nervorum constitutionem. In aliis, ut epilepsia, apoplexia & hemiplexia, præsertim si major sanguinis copia præsto fuerit, durus plerumque & frequens, quandoque etiam magnus, deprehenditur. Vicissim ubi resolutum genus nervorum viresque prostratæ, in lethargo, sopore & dispositione ad syncopen, mollis, rarus & languidus tangitur, qui, si demum adeo gracilescit, ut vix percipi queat, corpus interea frigido sudore perfunditur, lethalem ingruere catastrophem per ipsam constat experientiam. Quando pectus & par-*pectoris.* tes in eo contentæ vitales patiuntur, pulsus ut plurimum trequens, languidus & inæqualis esse solet; qualis potissimum deprehenditur in cordis palpitatione, nec non in asthmato convulivo, ubi tamen plerumque intermittens jungitur, præsertim si uterque morbus a polyposo concremento, intra cor vel ejus vasa, foveretur.

§. XXXII.

Quod si porro sanguis redundans exitum moliri incipit *Hæmor-* v. c. per menses aut hæmorrhoides, creber, parvus & quo-*rhagiis.* dammodo durus arteriarum est motus, ob spasmos, quibus sanguis ad locum excretorium congeritur; quum vero per-rumpit, increbescit & in magnitudine augetur, affectus
(III.) Mm sp-

Spasmodici & doloribus. spasmodici, hypochondriaca & hysterica pathemata, dolores coli & calculi, nec non qui caput aliasque externas quoque partes infestant, sub pulsu crebriori ac duro, affligunt, qui, si mollescit & amplior fit, spasmos in systemate nervosarum partium conquirere & sanguinis motum ad naturalem ordinem redire portendit. In dysenterico alvi fluxu ut plurimum arteriarum pulsatio frequens & parva; ubi vero febris complicatur, frequentia magnitudo jungitur. Lues denique venerea, scorbutus, cachexia & hydrops, pulsu languente ac debili stipantur.

§. XXXIII.

Conclusio cum morbis.

Atque hæc sunt, quæ de pulsibus & iudicio recte ex iisdem formando, in amplissimum usum breviter dicta sunt. Interim tamen quia hæc doctrina ita comparata est, ut apprimè in eandem quadret, quod *Celsus* de Medicina generatim edixit, plura esse, quæ nec dici possint, nec scribi, monendi utique sunt artem exercituri, ut experientia duce eandem maturatione addiscere laborent, & exquisito studio in cognoscendis ac dijudicandis pulsibus versentur. Mirandum autem certe est, nostros Medicinæ practicos ad ægrorum lectos accedentes pro more tantum pulsuum contrectare, tam levi brachio, ut vix duos ictus expectent, quum tamen sæpenumero post decem demum vibrationes, inæqualitas vel intermissio percipiatur, maxime, quando sanguis inæqualiter mixtis partibus refertus cordis penetralia pertransit. Neque etiam sufficit, pulsuum in uno tantum carpo tangere, sed in utroque id faciendum, quin in collo quoque & temporibus; eo quod experientia testatur, discrepare sæpius pulsuum in manuum carpis, & in uno loco commodius quam in altero explorari. Quumque non minus multum intersit, ut pulsuum numerus atque celeritas exacte distinguatur ac determinetur; apprimè ex usu esse poterit ad normam horologio, quod minuta secunda indicat, singulos ictus accurate numerare ac definire.

CAPVT XII.

DE

IVDICIO EX SANGVINIS INSPECTIONE ET EXAMINE RECTE ELICIENDO.

§. I.

Vix ulla datur disciplina, quæ tanto iudicio opus habet, *In Medicina* ac ipsa medica, ita prorsus, ut omne Medici officina iudicium in recto & sano iudicio consistere videatur. *dicio*

Nam ad corporis ægrotantis naturam pernoscendam, ad morbi *opus.* genium, causas ejus, progressum, successum & eventum indagandum, ad congrua quoque remedia inveniendaeque certo ordine & tempore applicanda, itemque si ad valetudinem tuendam, & morbosas varii generis, pro differenti corporum natura arcendas afflictiones, consilium, quæ salubria, vel insalubria sint, promendum, exquisito semper maxime opus est iudicio. Hinc certe quo magis Medicus perspicaci iudicio excellit, eo melior merito habendus est. In nulla tamen *maxime* Medicinæ parte, si famam & existimationem suam tueri *in semio-* velit artifex, tam caute & circumspecte se gerere debet, & *ticis.* attentiori omnium circumstantiarum pensitatione ac perita deliberatione sua perficere, quam in ea, quæ semiotica dicitur, & in dignoscendis morbis eorumque successu atque eventu prædicendo occupatur.

§. II.

Quemadmodum vero omnes prænotiones & prædi- *Prognosis* ctiones certis quibusdam signis atque indiciis nituntur; ita *optime* prognosis pariter medica nec hisce est destituta. Certissima *ex san-* tamen ac optima ad rectam ac fidam prognosin formandam *guminis* ratio est, qua Medicus ex eo fundamento, quo vita & inte- *circulo* *desumi-* *gritas* *tur.*

gritas omnium actionum continetur, tanquam optimo criterio, judicandi rationes petit atque elicit. Jam vero omnium consensione progressivus ille & vitalis sanguinis & humorum, beneficio motus solidorum succedens circulus, uti universæ Medicinæ, ita etiam Semiotices, principium est atque fundamentum. Ex quo quidem liquido primum patescit, pulsuum exactiorem doctrinam & rationalem explicationem, quam antecedenti capite persequuti sumus, Medico scitu maximopere esse necessariam.

§. III.

Per pul-
sam &
inspectio-
nem san-
guinis.

Quumque adeo sanguis princeps ille humor sit, a quo vita, seu observatio corporis nostri vitalis & omnium functionum integritas, item secundum Hippocratem prudentia ipsius mentis, dependet, & sine quo anima nihil efficere potest: post pulsuum, sive sanguinis per cor & arterias motus disquisitionem, in quaestionem merito cadit: annon ex ipso sanguine ejusque examine & inspectione, de integro vel morbooso corporis statu indicia promi, & remedia quoque, quæ utilia, vel noxia, desumi queant? Vulgus quidem ea in opinione versatur, & a Medico æque ac Chirurgo quam maxime urget, ut ex sanguine e vena missio, de statu sanitatis vel morbi, judicium proferat. Neque desunt Medici, qui multa & mira ex inspecto sanguine hariolantur, quo morbo nempe æger laboret, quæ causa morbi sit, & quibus remediis ad sanguinem emendandum utendum. At vero utut non penitus hanc doctrinam repudiare aut rejicere velimus; multis tamen eam difficultatibus laborare & admodum infidam esse, non sine ratione profitemur.

qua ta-
men fal-
lax.

§. IV.

Quia san-
guinis
bonitas
non evi-
detur & in
omnibus
una.

Videlicet nondum res inter Medicos confecta est, quanam optimus habendus sit sanguis, dum alii tenuem, fluidum & rubicundum, alii talem qui mox post emissionem in gelatinam rubram concrevit, quidam, qui coagulum crassum in fundum deponit, & fluidam in superficie mediocrem feri

quan-

quantitatem monstrat, pro optimo agnoscunt. Quisquis vero optimus sit, illud tamen certum, vitalem hunc purpureum liquorem ratione ætatis, ratione victus & vitæ generis, ratione regionum & anni temporum, etiam in sanitatis statu magnopere variare, adeoque universali normæ penitus non esse locum. Deinceps corpora quæ integro & gelatinoso nitide rubicundo gaudent sanguine, ut sunt sanguineæ complexionis hominibus, multis & gravibus sæpe morbis attentari, non facile quispiam peritus Medicus negabit, multo minus ii, qui sanguinis abundantiam pro frequentissima morborum causa æstimant, dubitabunt.

§. V.

Tum etiam hoc per experientiam curiosiorem obscurum esse nequit, sub sanguine, qui aspectu pravus videtur, ^{aspectu} nihil tamen incommodi percipi; & vicissim optimum quoad ^{sæpe ma-} sensum sanguinem, ex ægro & graviter decumbente corpore ^{lus in sa-} extrahi. Notatu hanc in rem digna sunt quæ prodidit ^{nis &} *Ballonius obs. II. Ephemerid. pag. 91.* dum ait: *plurimis im-* ^{vice} *purus sanguis detractus, quibus moriis & sectis, partes inte-* ^{versa.} *græ deprehense; aliis purus, quibus viscera & pulmones pu-* *res sunt inventi, & formosissimis mulieribus semper fere impu-* *rus detrahitur.* Idem testatur *Mauritius Hoffmannus in in-* *stin. diff. VII. impurus,* inquiens, *sanguis, sæpe præ puro vitam* *diutius promover, & in quibusdam corporibus optimus ad sensum,* *pesimus est.* Ego quoque sæpius observavi, in scorbuticis, hæcticis, sanguinem eleganter rubicundum ac fluidum emitti, in sanis vero & robustis corporibus, densum, glutinosum, nigrum & facile coagulabilem. Inprimis Westphali, qui duriori & falso victu cum pane grossiori utuntur, citra incommodum quoddam, multo minus morbum, sanguinem valde densum alunt, & qui crebrius, si refrigerat, in superficie serum instar glutinis concrefcens & variegatum exhibet. In apoplecticis pariter, paralyticis, item morbis spasmodicis, convulsivis, sæpe optimum ratione coloris &

consistentiæ deprehendi sanguinem. Quin vidi, ex arteriis in virulento carcinomate disruptis, sanguinem fluidum & nitide rubicundum stillasse, qui exterius nihil plane vitii habuit.

§. VI.

Et tum
demum
nocet,

quando
extrava-
satur.

aut sub-
sistit.

Fallax itaque atque infidum omne judicium, quod ex sola sanguinis inspectione arcessitur; unde etiam procul dubio factum, quod antiquissimi artis nostræ antistites, *Hippocrates & Galenus*, qui omnes sanguinem ceu vitæ thesaurum agnoverunt, de judicio in morbis ex ejus aspectu ferendo parum admodum prodiderint. Sane sanguis, etiam si vitiosus, quamdiu promte & expedite per corporis meatus movetur, non facile lædit; & optimus contra, si vel stagnat, vel firmiter impactus hæret, aut extra vasa effunditur, non modo morbi, sed & ipsius interitus causa fit. Nam qui morborum & symptomatum genealogiam probe callet, is facile perspiciet, eorum originem, non tam a crasi vitiosa fluidorum, quam potius a vitio solidorum, vitio loci maxime & motus, esse arcessendam. Optimæ certæ notæ sanguinis portio, quando vasis elabitur, putrescit & funesta excitat symptomata, in cerebro apoplexiam, febrem, convulsionem epilepticam & lege consensionis vomitum in ventriculo: intra cavitatem thoracis, vel abdominis paullo majori quantitate effusus, in foedam & lethalem abit putredinem. Si vasis adhuc contentus cruor membranis cerebri firmitus impactus hæret, phrenitidem, in tunicis ventriculi & intestinorum funestam inflammationem, in sphacelum abeuntem, ciet. In cordis thalamis & vasis majoribus ubi congrumatus hæret, syncopen vel subitam mortem producit. In substantia musculorum quum firmam concipit stasim & in motu progressivo sistitur, in sphacelum, sive mortiferam concedit putrilaginem.

§. VII.

Neque ullum amplius præterire poterit, viscerum a sanguine vel sero infarctum, obstructionem & indurationem, gravissimas chronicas passiones, cachexiam, hydropem, hæmorrhagicam ingignere, in quibus sæpe sanguis e vena missus vitio carere videtur. Et sicuti venenum datum exigua mole sanum & qui integrum sanguinem habet cito necare valet; ita etiam miasma in peste & aliis contagiosis morbis, vel materia in podagra, arthritide, & scabie retropulsa, sævis spasms, citra vitium in sanguine, homines perimit. Quin licet pluribus nostro tempore solenne sit, in affectibus chronicis spasmodicis, qui in viris mali hypochondriaci, in sequiori sexu hysterici nomine veniunt, sanguinis spissitudinem ceu causam accusare; nihilominus tamen sanguinem hoc morbo affectis e vena consistentia & colore bonum ac laudabilem detrahi, crebriori experientia convincimur. Nam spasmi tam universales, uti sunt febriles, quam certarum partium, gravissimorum symptomatum auctores quidem sunt; rarius tamen a denso & crasso sanguine, sed potius ab ejus copia, nimia expansione, vel etiam subtili in eo latente acrimonia, exsuscitantur.

§. VIII.

Quamvis autem ex sanguinis aspectu præsagium admodum fallax & plurimi morbi ex eodem plane non deduci queant: ejus tamen inspectio & paullo curatius examen non plane usu caret, qui vero plus ad præsciendos, quam ad sanandos morbos, pertinet. Placuit mihi quam maxime hanc in rem insignis locus Celsi lib. II. cap. 10. ita differentis: *e vena sanguis cum erumpit, colorem ejus habitumque oportet attendere. Nam si is crassus & niger est, vitiosus est, ideoque inutiliter effunditur. Si rubet & pellucet, integer est, eaque missio sanguinis adeo non prodest, ut ea noceat, proinusque est supprimendus.* Gravis hic auctor sanguinem tenuem & rubentem, integrum, crassum vero & nigrum, vitiosum

sum pronunciat; quod licet non sit perpetuum, magni tamen hoc monitum in administranda venæsectione usus est. Nam quum ejusmodi crassus, niger & mox in coagulum abiens sanguis, ægre admodum per minima & capillaria partium vacula cursum absolvat; facile ibi hæret, & obstructions, quæ foecundæ chronicarum passionum matres sunt, excitat. Vel si quando ejusmodi sanguis, fortiori corporis aut animi commotione, aut intenso frigore, aut etiam propter dolorificas & spasmodicas internarum partium contractiones, vi & impetu quodam in minima vacula, quæ secundum naturam non sanguinem, sed tenuiorem lymphaticum humorem vehunt, truditur, ibi quam facile firmitus impactus hæret, & graves ac funestas inflammationes conciliat. Id quod etiam quotidiana fere docet experientia, dum in pleuritide vera, peripnevmonia, semper fere sanguis, cui serum instar glutinis tenax innatat, e vena emittitur. Igitur quam maxime salutare est, talem sanguinem ubi offenditur, ad pessima mala avertenda detrahere, quo reliquus deinde cruor eo melius subigi, circulari & congruis eum in finem adhibitis alcalinis, volatilibus, diluentibus, aqueis, aquis salubribus attenuari & subtilisari possit.

S. IX.

*Sanguis
floridus
nimis vi-
tiosus.*

Sanguis vero nimis tenuis, floridus, coccinei coloris, non semper boni quippiam præfagit, præsertim si sero sit destitutus & in fundo nullum obscuri coloris coagulum ponat. Nam talis color vel a salibus largiter admixtis alcalinis, in arthriticis & scorbuticis, gignitur, vel nimium intestinum calidum motum arguit, ut in lentis & hæcticis febribus, vel etiam partium sulphurearum exuberantem copiam, a liberaliori vini & aromatum usu, præsertim in cholericæ constitutionis hominibus, subindicat. Nonnunquam tam tenuis ac floridus sanguis observatur, quando viscera, imprimis sanguinea, crassiore cruore infarcta sunt, quandoque etiam a spasmodicis convulsivis partium internarum motionibus, qua-

lem

lem nos sapius in ejusmodi spasticis & convulsivis motibus vidimus. Hac igitur consistentia & colore præditus sanguis, pro diversitate causarum quibus ortum debet, magis vitiosam qualitatem corrigentia, ut gelatinosa, mucilaginoso, nutrientia, acrimoniam tenuem salino-sulphuream temperantia, vel etiam acidula, calorem exstinguentia & sedativa, quam evacuationem & imminutionem desiderat. Digna est quæ hic inferatur *Paullini* observatio in *M. N. C. Dec. II. An. VI. obs. 64.* de juvene febre maligna correpto, cui sanguis e vena missus, valde roseus elegantissimi coloris, sed sero maxime destitutus, subsequente morte. Et nos sapius annotavimus, motus & insultus epilepticos aliosque spasmodicos morbos, evacuato tali sanguine fuisse exacerbatos. Unde utique *Celsi* præceptum, quod raro, præsertim copiose, ejusmodi sanguis mittendus sit, exquisita nititur veritate.

§. X.

Porro vitiosus merito is censendus est sanguis, qui *Quid in-*fero nimium redundat & exiguum massæ rubicundæ por-*dicet se-*tionem in complexu fovet, eo quod læsam sanguificationem *rosus ni-*& parciorem perspirationem, imminutum quoque urinæ flu-*mis*-xum prodit, ac utique cachexiam & tumores oedematosos hydrôpicos minatur. Quando serum intenso flavo colore *sero flavo* tinctum est, ut linteamina inficiat, biliosa recrementa, aut minus a sanguinis connubio segregari, aut propter obstructos biliarios ductus a lymphaticis vasis resorberi, indicio est. In scorbuto, scabie, cachexia & mensium suppressio-*livido*ne, serum plerumque variegatum, lividum atque cæruleum colorem monstrat, plus minus turbidum vel albicans, vel tunica spissa, lactea candescente obductum est, & in ipso coagulo subsidente grumi & color niger cum bruno intermixto comparent. Si in lue venerea & scorbuto con-*& limoso*summato sanguis emittitur, serum ut plurimum supernatat *imbutus.* copiosum, limosum ac turbidum. In febribus ardentibus

ac non
concre-
scens.

parum feri dimittit, ac ut sæpe spectavi, color est coccineus cum magna spuma. In variolis, morbillis, item acutis & continuis febribus, sanguis fluidissimus comparet, plane non in coagulum concrelescens; eo quod vehementi illa intestina calida motione omnis gelatinosa substantia absumitur & salinum principium quasi in alcali convertitur, quod omne coagulum arcet. Confirmat hoc *Vesperus in histor. apoplect. XVI. in schol.* fidem faciens, se sanguinem in cordis ventriculis & vasis majoribus fluidum, nec post obitum grumescentem, in cadaveribus febre continua defunctorum reperisse.

§. XI.

De san-
guinis ex-
amine
pondera-
tionem.

Et exsic-
cationem.

Et hæc sunt potiora quæ ex sanguinis aspectu probabili conjectura præfagire licet; quæ tamen ita sunt comparata, ut neutiquam universalialia sint, sed pro circumstantiarum & individuorum ratione discrepent. Jam etiam de diversis modis sanguinem humanum examinandi nonnulla adjicienda. Sunt hi varii, & primo quidem is, quo ejus gravitas specifica respectu aquæ simplicis exploratur. Perficitur hoc instrumento statico, quo ego etiam urinam, lac, falsos & medicatos fontes, ponderare soleo. Tum quidem immissa, sanguini oblongo vitro excepto, lance, patet, ejus libram, tantundem aquæ pluvialis, unius & dimidiæ tantum uncie pondere, specifica superare gravitate. Alter sanguinem examini subjiciendi modus est, quo proportio solidi & fluidi indagatur; quando nimirum calori exponitur, quo siccescat & in pulverem fatiscat, quo, uti superius meminimus, constat: tres fluidæ substantiæ partes, & unam solidæ, in sanguine sani hominis contineri.

§. XII.

Sanguis
de quo
judican-
dum in
patinam.

Porro solenne mihi est, si judicium de sanguine ferendum, ut jubeam, quo portio ejus, sive e vena brachii, sive pedis, educatur, in patinam, & alia in aquam immittatur. Is enim qui in patellam effusus, copiam & coagulum sangui-
nis

nis ac feri exhibet, simulque affusis variis liquoribus chymicis tentari potest. Tum quippe conspici licet, quam promte a spiritu acido, salis nempe vel vitrioli, coagulum subeat, qualis consistentia, admixto saturato corticis chinæ decocto, eidem inducatur; tum quoque jucundo comparet spectaculo, ab affusis liquoribus alcalinis, fixis & volatilibus, cruorem fluiditatem recipere & rubedinem ejus mirum intendi, quum contra instillata aqua forti, serum lactescente, & cruor gryseo colore, inficiatur. Pariter sapius experimentum cepi, & nitri pulverem, vel potius ejus solutionem, sanguini addidi, ac eundem inde semper fluidiorem redditum & coccineo colore imbutum vidi, ut hinc satis mirari nequeam paradoxon assertum, quod in clarissimorum virorum scriptis, qui nitri virtutem in morbis summis concelebrant encomiis, me aliquoties legisse memini, sanguinem scilicet a nitro inspissari potius & coagulari.

S. XIII.

Ex illa vero portione quæ in aquam profiliit, variæ *Et aquam* sanguinis & feri substantiæ optime cognoscuntur. *Nimimittendus.* rum pars sulphurea, quæ matrix coloris est, aquam rubedine inficit, & hac ex tinctura, prout magis vel minus saturata est, copia sulphuris, aut tenuioris, aut crassioris, recte colligitur; ubi tamen notandum, quod quo diutius aqua sanguinolenta in libero aëre stet, eo magis color austerus ac brunus reddatur. Deinde hac etiam ratione non solum in conspectum veniunt partes nutritiles chylosæ, quæ instar flocculorum fundum petere solent, sed sapius etiam ingens portio gelatinæ, ut manibus eximi possit, quod sapius conspexi in plethoricis sanguineæ complexionis, præsertim feminis spongiosi habitus, quibus labor, abstinentia a largiori & lauto cibo, potissimum in cœna, maximo est præsidio. Denique hoc modo commode indagari potest, num sanguis sit fibrosus? hoc est, multis filamentis & quasi fibris carnis refertus, quæ mutuo coeunt & in superficie spariæ hærent.

Talem sæpe vidi in epilepsia, palpitatione cordis & anxia pectoris oppressione laborantibus, & certum polypi, vel præsentis, vel futuri, præbet indicium. Qui ut corrigatur & noxa arceatur, sæpe sæpius insigni cum emolumento crebriorem usum medicamentorum fontium, præsertim Selteranorum, qui purum alcali vehunt, suasi, interdicens penitus potum frigidum, spirituosum, crassum & acidum, & injungendo potum dilutum largum, cum motu & exercitio corporis.

§. XIV.

Idem sanguis scarificatione & V.S. extrahitur.

Ultimo loco dum de sanguine educto sermo est, subiungenda adhuc quædam sunt de vulgari illa, sed erronea sententia, ac si sanguis, sub scarificatione per cucurbitulas extractatus, longe tenuior ac fluxilior sit eo, qui e vena brachii vel pedis mittitur. Ego certe sæpius periculum feci, & sanguinem scarificando evocatum siccavi, ac deprehendi, tres pariter tantum fluidi partes aufugisse & quartam restitasse solidam, modo cautio adhibeatur, ne dum spongia madida sanguis abstergitur & cucurbitulæ eluuntur, aqua cruori admisceatur. Et sane quum unus idemque sanguis per minima & magna vasa feratur, incisis quoque minoribus in cute, idem consistentia & indole, quam qui maioribus effluit, necesse est. Porro etiam non levis sed crassus error est, quem Chirurgi, ut imperitiam velent, de industria sæpe admittunt, dum, si vena minus rite pertusa, sanguis non effluit, cruorem crassum, qui incisionem obstruat, inculant, quum tamen is per exilissimos & capillares innumeros in corpore canales transire possit. Et licet non inficiandum, a terrore quandoque, præsertim in pedibus, cutem constringi & fluxum quodammodo retineri posse; remittente tamen strictura, sanguis postea liberaliter manat, operatione autem sinistre administrata, plane non effluit.

§. XV.

§. XV.

Et hæc de iudicio ex sanguine brevibus dixisse sufficiat; *Conclusio.* quæ tamen, quum non ex speciose incrustatis fictionibus, quas in arte nostra quam maxime detestor, sed attenta, sincera atque multiplici experientia scripta sint: eximio ului fore iis, qui in artis operibus dextre ac perite versari nituntur, certissime confido. Sæpius autem cum tædio profecto conspicio, in libris sic dictis practicis & semioticis, citra experientiam, dogmata proferri, quæ veritati minus sunt consentanea, atque ex luxuriante imaginatione, vel minimum possibili speculatione, fluunt, quasi vero omnes morbi ex sanguinis inspectione cognosci & curandi indicationes inde elici queant.

CAPVT XIII.

DE

IUDICIO IN MORBIS EX VRI-
NA ALIISQVE EXCRETIS RITE
FERENDO.

§. I.

QUum vitalis corporis nostri conservatio & omnium *Excreta* ejus functionum integritas, non modo in perenni *quoque* sanguinis & humorum circuitu consistat, sed & ma- *indicia* xima ex parte a debito excretionum successu depen- *Medico* deat; Medicus utique non tantum ex pulsu, qui genuinus cir- *præbent.* culationis index est, atque etiam ex ipsius sanguinis aspectu & subtiliori indagine, verum etiam ex iis quæ quotidie per varia emunctoria foras e corpore secedunt & evacuantur, status tum sani & ordinati, tum morborum & præternaturalis,

signa & indicia petere, atque ex istis iudicia ac prædictiones formare debet.

§. II.

*Inprimis
urina.*

Utut autem multa & varia, e corpore ad tuendam valetudinem proscribantur; nullum tamen est, quod magis sensibus manifestum & commodius aspici & tractari possit, quam urina. Quo etiam factum est, ut ab antiquissimis artis nostræ auctoribus, *Hippocrate* præsertim & *Galeno*, nulla in semioticis doctrina tam cumulate & diffuse in relictis monumentis excussa deprehendatur, ac ea, quæ de urina, & petendis ex ea signis, quibus sanitas & periculum prædici possit, tractat. Quin non modo plebem, sed & alios non indoctos, constans tenuit opinio, ex solius urinæ inspectione, universum corporis & ejus partium internum statum ejusque integritatem, vel vitia, quam optime cognosci posse ac detegi; qua erronea credulitate, plures ex idiotis & lucripe-tis Medicastris, ad decipiendum miserum & ad judicandum ineptum vulgus, hodiernum pessime abuti solent. Quia autem multa in Medicorum, tum antiquiorum, tum recentiorum, monumentis tradita prostant, quæ veritati & experientiae minus respondent, ratione & fundamento carent, neque intelligi aut explicari possunt, plura quoque ad urinam, tam sani, quam ægroti hominis, penitus cognoscendam deficiunt: utilissimum fore duxi, si hoc argumentum, in praxi scitu necessarium, paullo curiosiori indagine perquirerem, hanc de urina doctrinam in meliorem & rationalem ordinem redigerem, a confusione & obscuritate liberarem, atque adeo eam magis intelligibilem & explicabilem efficerem.

§. III.

*Urina
superat
omnes
excretio-
nes.*

Prius vero quam ad præternaturalem urinæ in morbo affectis constitutionem atque naturam indagandam accedamus; e re fore existimo, ut urinam sani hominis, quoad suam essentiam, elementa, originem & quantitatem, curatio-

ri examini subjiciam. Primo igitur sciendum est, ejus originem & materiam ab assumtis potissimum liquidis esse repetendam, quæ quo majori copia hauriuntur, eo plus lotii reddi perpetuæ est experientiæ. Deinde & hoc observatu dignum, quantitatem urinæ, in nostris præsertim regionibus, reliquorum, quæ perspiratione, alvo aliisque egestionibus educuntur, quantitatem & pondus excedere. Nam licet secundum *Sanctorii* calculum & assertum, communis fere usque eo invaluerit opinio, materiam quæ distillatione perpetua e cute exit, reliqua omnia excrementa copia superare, atque etiam in Italia & locis præcalidis id fieri non negandum sit; accuratiori tamen, a me etiam instituto examine, in nostris his frigidi oribus ad septentrionem magis vergentibus oris, hoc non ita contingere patet. Notavit idem quoque *Jacobus Keil* in *tentamin. physico med. pag. 173.* qui multa experimenta statim eum in finem adornavit, ac deprehendit: urinam unius diei, vel viginti quatuor horarum, esse duarum librarum & unciarum fere sex; perspirationis autem quotidianæ pondus tantum ad uncias triginta plus una assurgere, & quod per alvum excernitur in uno die, esse communiter ponderis unciarum quinque.

§. IV.

Ego veritatis cupidus, quæ non ita pridem in pro-*Experi-*
prio corpore eum in finem feci experimenta & quid obser-*menta*
varim, fideliter communicabo, quæ certe non sine usu & fru-*instituta,*
ctu erunt. Per duos nempe hebdomades diebus singulis certam potus & ciborum portionem assumsi, & exeuntem postea urinam ponderavi. Videlicet cerevisiæ Lœbejunensis tenuioris, cujus libra teste hydrometere drachmas quinque & dimidiam solidæ materiæ continet, duas quotidie mensuras, quæ minimum quatuor civilium librarum pondus æquant, bibi; deinde mane decocti caffè quinque pocula, quorum unumquodque duas capit uncias, adeoque decem uncias, sorbillavi; jusculorum porro in prandio & cœna, decem

cir-

circiter, & vini Hungarici in prandio quinque assumi uncias, quibus demum accedunt uncia circiter sex liquidi cum solidis cibis apparatus ingesti: ut adeo subducto calculo, sex minimum liquorum libras corpus quotidie subiisse pateat. Solidorum autem, panis nempe, carniū & obsoniorum pondus, quotidie non facile libram excessit. His ita assumtis, urina interdū & noctu emissa ad libras quatuor, interdum aliquot uncias plus, interdum minus, accessit. Alvi excrementa, aspectu iudice, non facile octo unciarum pondus excefferunt. Adeoque quum ex septem ingestorum libris, per urinam & alvum circiter libræ quatuor & uncia duodecim secefferint, superest pondus librarum duarum cum quatuor uncis, quod corpore non graviore interea facto, per cutis spiracula, halitum oris, mucum narium, faucium & salivam, procul dubio rejectum.

§. V.

Observata tamen variare possunt.

Hæc per aliquot hebdomades capta tentamina & eadem quotidie fere a me observata, quum in eodem vitæ genere & corporis agilitate mense Decembri domi me continerem: neque tamen dubium est, quin in aliis, pro diversitate temperamentorum, motus & exercitationis, anni etiam temporum, pro diversa quoque qualitate & indole assumtorum, variare possint, adeo, ut vel perspiratio auctior urinæ quantitatem minuat, vel alvus etiam solutior reliquas omnes excretiones modificet. Id vero minimum in genere valde verosimile, nostris in regionibus, nisi extraordinariæ aliæ causæ externæ accedant, urinæ copiam in sanis quantitatem materiæ perspirantis superare.

§. VI.

De quantitate solidi in urina.

Deinceps ad accuratiorem huius doctrinæ notitiam pertinet etiam, ut Medicus perspectum habeat: quantum solidæ materiæ in libra una lotii sanorum contineatur. Quemadmodum vero ad explorandam specificam gravitatem fluidorum, sive quantitatem solidi in fluido contentam, nihil aptius

aptius est, cylindri statici hunc in finem artificiose confecti usu; ita etiam Medicus commodissime ejusmodi instrumento non modo ad contenta liquidorum quæ ingeruntur, ut cerevisiæ, vini, aquarum & lactis, sed & urinæ, uti potest; de quo tamen nemo fere hactenus cogitavit. Altum enim de ponderatione urinæ in scriptis medicis est silentium, ac de ejus quantitate, colore, sedimentis, item an turbida, vel pellucida sit? sermo duntaxat habetur; quum tamen nihil solidi deglutiamus, cujus partes non quotidie ex massa sanguinis secedant & cum urina eliminentur: in quo etiam maxima in statu sano & præternaturaliprehenditur diversitas. In genere vero id perpetuæ observationis est, quod quo major est in corpore perspiratio & interior calor, quo minus fluidi aquei, quo plus potus spirituosus assumitur & corpus motu agitur, eo gravior semper est urina, levior vicissim, si hæc dicta contraria sunt. Ego itaque per aliquot septimanas memorata victus *Per ponderationem & exsiccationem cognoscenda.* ratione utens & tempore brumali domi degens, sanus ceterum & valens, emissam posteaquam surrexissim urinam ad lancem hydrometricam exegi, ac notavi, libram ejusdem minimum unciam dimidiam, interdum etiam drachmas quinque, complecti, & facta aliquoties evaporatione, pariter ex libra dimidia drachmas duas, vel dimidiam adhuc, obtinui. Eandem quoque solidæ in urina substantiæ esse quantitatem notavit *Antonius de Heyde obs. 89.* qui ex urinæ uncis tribus, per evaporationem drachmam unam materiæ siccæ eduxit.

S. VII.

Ut vero porro ad penitiorem & uberio rem materiæ *Experimenta cum re-siduo instituta.* ab evaporatione relictæ cognitionem pertingerem, commenta plura institui curiosa experimenta, quæ hoc loco recensere cum rehaud abs re erit. I. Vel solus aspectus testatum facit, materiæ ex urina restibilem, penitus differre ab ea, quæ exhalata cerevisia restitat, ex quo utique conficitur, liquidum quidem ex potu transire in urinam, sed non solidum, quod ma-

gis ortum suum ex humoribus interioribus vitalibus, sanguinis & feri massa, trahit. II. Massa post urinæ exhalationem relicta non facile ad siccitatem constantem deducitur, sed quantumvis arida in aëre tamen liquescit, haud secus quam omnia salia neutra, quibus multæ particulæ oleosæ sulphureæ admixtæ sunt, ut terra foliata tartari & salia vegetabilium essentialia. III. Drachmæ hujus cramatissimæ affudi unciam unam spiritus vini rectificatissimi, qui promte extraxit tincturam ex bruno-rubicundam, saporis salis paulisper amaricantis, relicto in fundo scrupulo minimum materiæ gryseæ spengiosioris terreæ, quæ nec aqua calida, nec spiritu amplius poterat dissolvi. IV. Essentiam sive potius tincturam hanc in cochleari argenteo admovi flammæ candelæ, & post evaporationem remanet instar mellaginis magma falso-amaricans, cui aliquot guttulas olei tartari per deliquium plenius saturati instillavi, & mox odor volatilis urinosus, instar salis ammoniaci, nares feriit. V. Eandem tincturam accendi, & deflagrato primum vini spiritu, postea flamma successit, plane alius coloris atque naturæ, instar ignis, qualis emergere solet, quando oleum destillatum in spiritu vini solvitur, & deflagratione instituta, post vini spiritum combustum, oleum ardet. VI. Partem magmatis ab evaporatione urinæ relicti miscui cum oleo tartari per deliquium, & penetrans urinosus, volatilis foetor mox distillatus est. VII. Ejusdem massæ nonnihil igne cremavi, & cineres relicti sunt nigri, qui saporem salis communis linguæ imprimebant. IIX. Cineribus his affudi quicquam aquæ, ut sal in se reciperet, & liquamen instillavi solutioni lunæ, unde facta præcipitatio. IX. Alii hujus residui portioni in vitro affudi oleum vitrioli, & vehemens facta est turgescencia & ebullitio, cum denso & albo ascendente vapore, odoris penetrantissimi, qualis solet emergere, quando oleum vitrioli admiscetur salii communi, vel salii ammoniacali. Denique hisce a me institutis tentaminibus addere placet ea, quæ *Barchussen* adornavit & in
pyro-

pyroſophia recenſet: uncia nempe ſex urinae ſani hominis, deſtillatione dederunt uncias quinque & drachmas ſex phlegmatis, reſidui in cucurbita ſcrupuli quinque & ſcrupulus ſemis, ulterius igne rite tractati, ſalis volatilis drachmam ſemis, olei empyrevmatici ſcrupulum ſemis, tantundem ſalis fixi & terræ grana octodecim præbuerunt.

§. VIII.

Ex hiſce commemoratis experimentis facillimum jam *urina* erit, genuina urinae elementa eruere ac liſtere. Hæc inter *elementū* primum & potiſſimum locum obtinet aqua, quam ex ingeſto *continent* maxime potu accipit, & cujus partes triginta ad unam partem *aqueum* ſolidi remixtæ deprehenduntur. Poſt humidum urinae prin- *& ſali-*
cipium commemorandum ſal, quod triplex in ea hoſpitatur, *num.* culinare nempe, acidum & volatile. Et culinare quidem cum alimentis ad maſſam ſanguinis tranſit, ac per renes, ceu congruum ſalium emunctorium, cum urinoſo ſero colatur. Quod vero ſal urinae ad communis naturam accedat, ex eo pateſcit, quod non ſolum urina inſpiſſata cum oleo vitrioli ſpiritum & vaporem ſalis communis volatilem in auras emittat, ſed etiam lixivium ex cineribus combuſti reſidui cum aqua factum ſolutionem argenti præcipitem det, itemque per deſtillationem, quod ſæpius a me factum, ſal enixum culinari in omnibus quoad effectus ſimile, educi queat. Alterum in urinoſo latice comprehenſum ſal, eſt acidum, quod etiam per alimenta, quæ multum acidi ſovent, in ipſius connubium tranſit. Hoc autem purum obtineri nequit, ſed partim cum particulis terreis alcalinis, partim cum tertia ſalis in urina ſpecie, volatili nempe urinoſo, quale in ſanguine largius hoſpitatur, ſeſe miſcet, & ſalis ammoniacalis genium habet. Hinc enim eſt, quod addito oleo tartari per deliquium, acidum figatur & ſpiritus volatilis urinoſus avolet, cujus ortus non ex alimentis, ſed ex ipſius ſanguinis maſſa derivari debet.

§. IX.

*Oleofum
ac ter-
restre.*

Accedit oleum, quod urina in complexu fovet; duplex iterum, temperata nempe pinguedo & oleum valde subtile calidum. Illa ex alimentis & chylo, quæ multum pinguis substantiæ complectuntur, ortum trahit, & si largius immixta, non modo innatat urinæ, sed etiam matulæ parietibus adhærescit, uti sæpius fit in nimio æstu, qui pinguedinem colliquat; hoc verò valde tenue, evaporabile & inflammabile, ex intestina partium sanguinis sulphurearum agitatione gignitur, & in destillatione oleum empyrevmaticum largitur, ac in tincturam redactum, post deslagrationem spiritus vini, instar olei ardet. Quod enim urina ex sanguine recipiat particulas sulphureas, calidas, oleosas, ex eo patet, quia e suaveolentibus oleosis, ut oleo juniperi, ligni sassafras, nucis moschatae, balsamo de copaiva, urina suaveolentem & quasi violaceum odorem; inficetum vero ac foetidum ab allio, balsamo sulphuris, asa foetida acquirat. Quartum elementum est ipsa terra, quæ rursus vel tenuis valde, vel crassior & fixior est. Fixior & crassior, cum alimentis, præsertim aqua, quæ semper multum calcariæ fixæ terræ continet, corpus subit, ac præcipuum fundamentum tartari qui matulis accrescit, nec non concretionibus calculosis præbet, & instillato oleo vitrioli, effervescentiam suscitatur. Tenuior sanguinis soboles est, & cum aqua & oleo pingui mixta, mucilaginem constituit, quæ instar nubeculæ descendens oculis conspicitur, vel etiam, si ejus major quantitas, in fundum secedit, nec vini spiritu, nec vitrioli oleo, solvitur.

§. X.

*Color
urinae
unde?*

Color urinæ dependet maxime ab oleo calido subtili, quod, quo magis cum salibus miscetur, eo saturatior fit color; eo quod ea omnium salium natura, ut principium sulphureum, quod matrix coloris & odoris est, mirifice exaltando eum intendat. Et licet oleum & terra alias non be-

ne &

ne & intime misceantur: fit tamen hoc in urina, tam cum neutro, quam alcalino volatili. Quumque adeo salinum elementum cum sulphure & oleo intime permixtum sit, patet ratio, quare illud a purissimo vini spiritu, qui consortium puri salis alias respuit, sulphure autem admixto amat, absorbeatur, haud secus ac videmus in tinctura sulphuris, scoriarum antimonii & antimonii acris, item quando spiritu vini rectificatissimo nitrum artificiale valde sulphureum, ex aqua forti & sale ammoniaco, plene solvitur.

§. XI.

Et hæc omnia ita observantur in urina humana: dispar *urina jumentorum* autem urinæ jumentorum est ratio. Ita non semel evaporamento-jussi urinam vaccinam, quæ reliquit magma valde salinum flavum, amaricantis saporis, cui infudi spiritum vini purissimum & extraxi tincturam flavam, instar bilis amarissimam, eoque facto, remansit sal, cui affudi aquam pluvialem & solutionem filtratam rursus coagulavi, ita obtinui sal tartariforme neutrum, instar salis plantarum essentialis, quod originem suam ducit ex ipsis herbis quibus vescuntur, nullum vero vestigium fuit salis communis. Ex quo etiam apparet ratio, quare urina vaccina tempore verno collecta, & interius ad aliquot hebdomades, quotidie ad majorem quantitatem ascendendo, pota, sæpius, uti aliquoties Berolini maxime apud Gallos vidi, mirum effectum in affectibus chronicis, maxime cachecticis, ictero, principio hydropis & mensium suppressione, præstiterit. Discimus etiam exinde, partes in urina sulphureas multum affinitatis habere cum iis, quæ in bile continentur.

§. XII.

In conspectum sic ductis genuinis urinæ humanæ in *Præfugia* statu sano elementis; faciliiori nunc & leviori modo in phænomenorum, quæ in lotio ægrotantium subinde præsto *ex urina* sunt, meliorem explicationem & notitiam, unde proveniant *tenui aquosa* & quas causas agnoscunt, pervenire poterimus. In quo

quidem perficiendo, ordinis & brevitatis causa, observationes, quas in praxi subinde per crebriorem experientiam annotavi, & quæ regulæ vim habere possunt, proponam & rationes postea subjiciam. Et primum quod attinet ad urinas pondere leves, consistentia tenues, instar aquæ sæpe pellicidas, eas quam maxime in gravioribus internarum & membranarum partium spasmodicis, pathematibus hysteriis, hypochondriacis atrocibus, in cardialgia, affectione calculosa, nephritica, colica convulsiva, apparere, crebriori edocti sumus experientia. Pariter in gravioribus capitis morbis, ejus nempe doloribus, in vertigine, phrenitide, mania, melancholia, epilepsia, valde tenues & leves emitti urinas, idemtidem perpetuæ est observationis. Idem contingit in gravioribus nervosarum partium affectionibus, quæ a caustico veneno, vel a vermibus tunicas intestinorum rodentibus, in convulsionibus, concitantur. Et quod probe notandum est, tenues & aquosæ ejusmodi urinæ non modo in ipso statu & exacerbatione horum morborum prodeunt, sed & aliquot dies ante, ac paroxysmos imminentes nunciant. Unde non mirum est, quendam apud *Tulpium lib. II. obs. 19.* ex tenui lotio, triduo ante præfagire potuisse cordis palpitationem.

§. XIII.

Quid portendat in urinæ febris. Tenues quoque, aquosæ & perpetuo albæ ejusmodi urinæ in diuturnis morbis difficulter judicant & securæ non sunt; in vigore autem febrium si copiosæ fluunt & ante dies criticos, multum alunt periculi & phrenitidem imminentem præfagiunt, teste jam *Hippocrate sect. II. aph. 22. sect. IV. aph. 70.* qui *lib. epid. sect. II.* id confirmat exemplo ægri, qui secundo die furvus, circa meridiem deliravit & quinto die mortuus est, & alius *sect. III. ibid.* qui quarto die obiit phreniticus. Idem auctor sæpenumero etiam observavit: easdem urinas, si in inflammationibus gravioribus internis, uteri, pulmonum, ventriculi comparent, nunquam periculi esse exper-

res præsertim si creber stimulus sit ad matulam & copiosissimæ ac tenues reddantur. Nam dilutæ ejusmodi aquosæ, pondere leves, omnis sedimenti expertes & quæ paucillum solidi habent urinæ, a nimium per spasticas strictureas coarctatis & angustatis ductibus renum secretoriis & excretoriis proveniunt, & luculentum totius generis nervosi spasmis affecti testimonium ferunt, quum lege consortii & consensio- nis, renes etiam & ductus urinofi simul compatiuntur. Albæ *Debetur* autem prodeunt & pellucidæ hanc maxime ob causam, quod *spasmis.* stricteiores tubuli, plerumque nonnisi id quod valde tenue est & diametro canaliculorum respondet, admittunt, unde crassæ & sulphureæ moleculæ remanent. Et copiosæ ut plurimum profluunt, quia in affectibus spasmodicis, ob tubulos subcutaneos constrictos, parum humidi perspirat, sed ad renes eo copiosius fertur ac urinæ insinuat. Quod vero in acutis morbis ejusmodi tenues & aquosæ urinæ inflammationem, vel jam præsentem, vel certo futuram, in ventriculo aut capite, subindicent, hæc subest ratio: quia ob spasticas strictureas, sanguinis impetus urgetur ad interiora ac superiora, quo fit, ut is in tunicis cerebri & ventriculi, præsertim viribus jam fractis, firmitus impactus subsistat & inflammationes præcipitis periculi pariat.

§. XIV.

Monendum tamen est, quod tenues, aqueæ, plus *Aliisque* minus turbidæ urinæ; non semper a spasmis ortum trahant, *caussis.* sed aliam etiam agnoscant causam, & vel vires valde fractas, vel partium sulphurearum in sanguine, a quibus & eorum motu calor & spiritus ascentia dependet, defectum, vel vim ventriculi digestricem imbecillem, vel etiam sanguificationem læsam & copiam cruditarum, tam in primis viis, quam massa sanguineæ admixtarum, prodant. Quare qui novissime a morbo diuturniori convaluerunt, v. c. a dysenteria, a febre acuta exanthematica, morbo Hungarico, variolis, si nimium præsertim indulgent appetentiæ, ex defectu calo-

caloris & spiritualescentiæ in fluidis, facile multas colligunt cruditates aqueas, quæ quum minus commode per cutem distillari possint, subsistunt, intus remanent & per urinam secedunt. Et hæc utique est ratio, quod etiam in cachexia, leucophlegmatia, enormibus hæmorrhagiis, in principio anasarcae, in chlorosi virginum, in mensium suppressione, tales urinae crudæ, turbidæ, pallidi, subviridis, vel tenuis citrini coloris, copiose mingantur. Notavit hoc jam Hippocrates, qui ejusmodi urinas tenues & aqueas spleneticas appellat, quia in iis, quibus facies coloris luridi est & lien laborat, observantur. In fluore quoque mulierum albo, qui soboles ut plurimum cachexiæ & mensium suppressarum, plerumque urina etiam pallida & turbida, quandoque cum sedimento squamarum instar visitur.

§. XV.

*Urinæ ru-
sa sine se-
dimento
unde?*

Porro in omni calore præter naturam aucto & æstu febrili, urinae pauciores & coloratiores, flavo & rubro colore plus minus saturato tinctæ, profluunt, eo quod internus accensus calor, partes sanguinis sulphureas, a quibus color, valde exaltat, auget & humidum insensibiliter consumit ac dissipat. Tales urinae febricitantium plus minus rubicundæ, vel tenues & leves, vel crassæ & pondere graves, tam in intermittibus, quam etiam continuis, manant. Scilicet ipso in paroxysmo, siue motuum febrilium, & intermittentium, & continuarum, exacerbatione atque vigore, urinae redduntur tenues, perspicuæ, sine sedimento, uti obvium est in tertiana continuæ aut intermittens paroxysmo, in ardente, item cholericæ febre, ubi ordinario urinae pellucidæ, sed flammeo colore, qualis in destillatione spiritus nitri apparet, tinctæ conspiciuntur. In intermittentibus vero, aliquot horis post intermissionem & die a febre vacuo crassiores secedunt, & quam facile, si quiescunt, vel levi tantum frigori exponuntur, sedimentum dimittunt, quod etiam si fit in febribus continuis, circa dies præsertim criticos, febrem solutam & salutem portendit.

*Post paro-
xysmum
subsident.*

§. XVI.

§. XVI.

Hoc sedimentum pro copia & diversa conditione ac *Sedimen-*
 temperie partium in sanguine, parcius vel copiosius, & *dis-*
 ferentis quoque coloris esse solet. Si color est roseus & pur-
 pureus, sanguinis copiam peccare, uti obvium in febribus
 synochis sive continentibus, indicio est. Quando *sedimen-*
 tum intense flavum, bilem, fusci autem coloris & atrii, co-
 piam bilis atræ, sive secundum Recentiorum explicandi mo-
 dum, copiosas sulphureas calidas particulas, acido terreis in-
 tine per calorem immixtas, designat, quale in febre scorbu-
 tica purpurata, in quartana etiam, minus fausti est ominis.
 Si id quod subsidet admodum copiosum, magnam viscido-
 rum & crudorum humorum copiam in corpore prodit, atque
 in corporibus repletis, obesis, spongiosioris habitus, febris
 intermittens pertinaciam portendit. Et recte hinc scribit
Galenus; lib. 1. de cris. cap. 12. qui ex otio & repletionem febricitant,
si sanitati restitui debent, necessario in urina subsidet.

§. XVII.

Quemadmodum vero boni ominis signum, si urinæ *si nullum*
 febricitantium crassiores fiunt & sedimentum ponunt: ita *sedimen-*
 contra quæ in febribus intermittens extra paroxysmum *tum ma-*
 nullam exhibent subsidentiam & pellucidæ diu stillant, nec *lum*
 frigoris accessu in fundum quid deiciunt, pejoris sunt notæ. *omen.*
 Inprimis crebriori experientia compertum habeo, quando
 in tertiana vel quartana febre, finito paroxysmo, urina
 non turbatur & crassamentum rejicit, pessimi esse prælagii,
 præsertim si ab imperitis Medicis improvide tractetur iis
 remediis, quæ motus febriles intempestive supprimunt &
 sufflamant. Non semel enim sed aliquoties hac ratione in
 pueris ingruente paroxysmo lethalem epilepticum insultum ac-
 cessisse vidi: senes autem non facile convalescunt, sed de-
 mum viribus fractis, sub frigore & spasmis, nullo succedente
 calore intereunt. Quod si porro in febribus inflammatoriis
 (III.) Pp pleu-

pleuritide, peripnevmonia, inflammatione ventriculi, mē-
 ſenterii, uteri, urina vel tenuis perſpicua & purpurei coloris,
 vel bruno & auſtero colore imbuta exit, cum ſpuma, ſine omni
 ſedimento, non fauſtum præbet ſignum. Antiquiſſimum
 hanc in rem Hippocratis eſt teſtimonium prænot. §. XI. ita diſſe-
 rentis: *ſi in febris urina ſulva eſt & tenuis, materiam incoctam*
ſignificat, ſi vero diuturna fuerit talis, periculum eſt, ut homo
ſuſtinere poſſit, niſi concocta fuerit. Pariter id etiam perpe-
 tuum eſt, turbidam in febre continua urinam, quæ nec igne,
 nec quiete clareſcit, aut ſedimentum ponit, multum periculi
 minari: malum tamen etiam eſt indicium, quando in conti-
 nuis urinæ primis diebus craſſeſcunt, reliquis vero & maxime
 criticis, tenues & ſine ſedimento manant.

§. XVIII.

*Cur ſit
 malum?*

Ratio vero quare in febris aſtuofis urinæ claræ tam
 ancipitis & periculi pleni ominis, contra quæ multum coctæ
 materiæ deponunt in fundum ſalutiferæ putentur, in procin-
 ctu eſt. Nam tenues ejusmodi & ruſæ urinæ magnum aſtum
 & vehementem partium internam agitationem, ſimul etiam
 ſolidarum & nervoſarum partium ſpaſticam ingentem affectio-
 nem ſignificant, quæ ſpaſmorum diuturnitas atque vehemen-
 tia multum certe periculi alit. Craſſior vero urina ſi prodit,
 certum præbet ſignum, ſpaſmi tam nervoſarum, quam vascu-
 loſarum partium, vehementiam remittere, ampliari ductus
 ſecretorios & excretorios & excrementa craſſioris ſubſtantiæ
 transmittere, quo fit, ut non ſolum urina cum ſedimento co-
 pioſior fluat, ſed & totum corpus æquabiliter ſudore, idem-
 tidem craſſo, foetido ac viſcido perfundatur & alvus antea ad-
 ſtriſta ſolutior fiat. Ex quo quidem dilucide patet, multum
 intereſſe, ut Medicus critica illa in morbis tempora, quæ
 Veteribus coctionis dicuntur, ex urinæ inſpectione cognoſcat,
 & ſic cum certa ratione verax de morbi eventu judicium inter-
 ponere queat.

§. XIX.

In declinatione febrium catarrhalium, item variolarum & morbillorum, urinæ in vigore morbi & febre pellucida & aquosæ, crassiores etiam & coloratiores cum sedimento secedunt, certo indicio, morbum, id est spasticas constrictiones partium, solvi atque remittere, ut ductibus urinarum iterum patulis redditis, impuritates salinæ sulphureæ viscidæ feri, quæ ipso morbi tempore progenitæ, liberum jam habeant ingressum atque exitum. Quandocunque vero post phthisicum aut alium vehementem ac diuturnum morbum, urina diutius fertur crassa, pauca, saturate & obscure rubra, cum copioso sedimento, pinguedo supernatans vitri urinarii parietibus adhærescit corpusque interea tabescit; morbum in febrem lentam & hecticam concessisse testatur, qua rarissime æger fervatur, eo quod corrupta ex læso viscere materia sanguini & lymphæ intimius nupta, instar fermenti motu intestino calido mixtionem & crasin sanguinis temperatam dissolvit, & optimum etiam alibilem succum in excrementitias falso-sulphureas sordes convertit, simulque pinguedinem corporis colliquat. Idem metuendum periculum, quando in hydropicis urina hecticorum similis profluit. Nam parcum ejus stillicidium, lympham ex ruptis vasculis lymphaticis in cavitationem vel porosam partium substantiam secedere, & color obscure rubicundus crassiusque sedimentum, partim motum intestinum calidum sanguinem dissolutorium, partim etiam obstructum hepatis emunctorium, quo sordes biliosæ separari solent, arguit.

§. XX.

Dantur tamen etiam in morbis chronicis, citra febrem & calorem internum auctum, urinæ crassiores, valde saturato colore rubicundo bruno tinctæ, pondere admodum graves, adeo ut interdum libra una, teste cylindro statico & evaporatione, uncias tres, vel quatuor, solidescens materia in complexu foveat. Obvium hoc est quam maxime in

*In scor-
butico.*

scorbuto confirmato, in arthritide & paralyfi scorbutica, senectute extrema, quandoque etiam in passione nephritica, conquiescentibus dolorum tormentis, nec non in ictero flavo & atro. Lasam autem in ejusmodi urina esse proportionem elementi aquosi & salino-sulphurei, exinde patescit, quod affusa sufficienti aquæ solius simplicis copia, ad naturalem tincturam reduci possit. Crassities quippe & color ille fuscus ab excrementitiarum salinarum & sulphurearum partium in sanguinis & humorum massa hospitantium copia, ortum trahit, quæ propter hepatis obstructionem, a succorum vitallium connubio non rite segregantur. Nam jecoris viscus, cum in omnibus chronicis morbis, tum maxime in scorbuto patitur, ut etiam *Willisius* in *tr. de febribus* fidem faciat: se plurima scorbuto defunctorum cadavera secuisse, & observasse, quod in culpa fuerit in nonnullis hepar prorsus exsangue & instar uberis vaccini exsuccum, in aliis vesica biliaria, aut vacua, aut lapidibus obfessa, aut amurca minime amarescente repleta.

§. XXI.

*Ictero
flavo &
nigro.*

Quando porro ejusmodi crassiores mirum austeri coloris urinæ, (*wie dickes braunes Bier*) crocea tinctura immersa linteamina inficiunt, certum est indicium, bilem propter obstructos, vel spasmo constrictos ductus hepaticos & cysticos & denegatum in duodenum influxum, per vasa lymphatica regurgitare ad sanguinis & lymphæ massam, & icterum adesse. Ubi vero color in atro-brunum vergit, icterum designat nigrum, qui non tam a bile reflua, quam potius ab ejus secretionem in hepate plane impedita nascitur. Nigredo autem acido admixto tribuenda; eo quod ob defectum bilis, quæ alcalino suo elemento, acorem qui ingestis inest, temperat atque obtundit, succi acetosi ad sanguinis massam trans-eunt, ibique sulphureis, oleosis ac biliosis particulis unitæ, atrum excludunt colorem, haud secus ac videmus, acido liquore bili affuso, post digestionem eandem primum viridescere

scere ac deinde nigrescere. Quumque in provectiori sene-^{seneſtute.} ſtute, ob anguſtationem, contractionem & collapſum tubulorum excretoriorum in hepate, nec non in cute, multæ ſalinæ ſulphureæ & viſcidæ ſordes, retineantur: urinæ ſolenniter in ætate gravibus craſſiores, graviores magisque tinctæ redduntur, præſertim ſi paullo liberalius vino utantur, inprimis ſpirituoso, ut Hungarico, quod oleoſum eſt multum atque ſulphureum.

§. XXII.

Nonnunquam redduntur urinæ copioſa materia pingui ^{Quid in-} imbutæ, ſive oleoſæ, quæ ſine ſtrepitu mittuntur, in ^{dicent} ſuperficie ^{oleoſæ} cutem variegati maxime cæreuli plerumque coloris exhibent, ac vitri urinalis parietibus tam firmiter adhæreſcunt, ut nonniſi lixivioſo liquore detergi poſſint. Origo harum procul dubio calori interno nimio, ipſam pinguedinem colliquanti tribuenda, quæ liquefacta & poſtea in ſanguinem recepta, ſeſe miſcet cum ſanguine & ſero, ac humore ſalſo muriatico demum diſſoluta, per renum colatorium in urinam deſertur. Annotavit *Sylvius* exemplum feminæ juvenculæ, cujus urinæ tam copioſa innatavit pinguedo, ut in perfrigeratæ ſuperficie butyri inſtar aut olei frigidi conereti comparuerit. Et memorabilis quoque eſt *Fernelii lib. III, cap. 2. de urina* hiſtoria, de bibulo quodam optimi corporis habitus, qui diebus circiter octo, ex ingenti corporis mole ad ſummam gracilitatem, citra ullam morbi vim, traductus eſt. Potiſſimum tamen tales pinguiſculæ urinæ in conſumtione corporis, atrophia, phthiſi, hectica obſervantur; quinimmo in omnibus febribus, urinæ quando profluunt craſſioris ſubſtantię, multum pinguedinis ſecum evehunt, quæ eo copioſior eſt & diutius durat, quo corpus eſt pinguius.

§. XXIII.

Supra quoque cum de analyſi urinæ naturalis actum ^{Tartaro} fuit, mentio facta eſt, quod ſal acidum, cum alcali, ſive vo-^{reſerta.} referta, latili, ſive fixo mixtum, ſive neutrum & tartariforme, ordina-

rium sit urinæ ingrediens, quod dubio procul ab excessivo acido per alimenta ingesto & in sanguine contento, oriatur. Hoc autem sale tartareo si urinæ nimium refertæ sunt, quod cognoscitur, quando matulæ parietes & fundus copioso tartaro incrustantur, indicium est dispositionis ad calculum renum & vesicæ. Majoris periculi est, ubi crassum, rubrum & friabile sabulum, mox emissæ urina, fundum petit, quippe quod morbum nephriticum adesse, plane evincit. De quo luculentum Hippocratis suffragium aph. 79. Sect. IV. quibus perhibentis, in urina subsident sabulosa, iis vesica calculo laborat. Interdum quoque crystalli micantes fulvæ copiose sese apponunt lateribus matulæ, quæ doloris arthritici, rheumatici, plus minus fixi vel vagi, indicium præbent. Quando urina mingitur mox cruenta, mox ob puris miscelam lactescens, interdum glutinosa, crassa tenaci materia mali odoris onusta, quæ fundo adhæret, nec vitri agitatione dissolvitur, certum exulcerationis renum vel vesicæ documentum præbet. Quin ipse in calculo & ulcere vesicæ sæpius lotium tam tenax vidi, ut instar albuminis ovi co hæserit, nec guttatim aut per vices potuerit effundi, sed inclinata matula, omne simul massæ instar elapsum sit. Eandem quoque in rem facit notabilis observatio, in M. N. C. Dec. III. A. IIX. obs. XI. consignata, de urina crassa glutinosa, quæ ad ulnæ longitudinem potuit extendi, & filtro imposita, ne guttulam transmissit.

§. XXIV.

Qualis in
gonor-
rhea.

vesicæ
scabie.

In gonorrhæa, præsertim chronica & maligna, non solum prostratæ, sed plerumque vesica etiam exulcerationem patiuntur; unde urinæ turbidæ & crassæ, *vrie Kraut-Lacke*, emittuntur, quæ sedimentum copiosum rejiciunt mucosum, quod exsiccatum & carbonibus injectum, foetidissimum odorem spargit. Alias semen purum, propter levitatem, urinæ innatat. Pariter sæpissime in calculo vesicæ, hæc ipsa vel ejus sphincter erosus est, ac tum urina crassa furfuracea min-

gitur,

gitur, cum exiguis carunculis & fibrillis, quæ a vulgo pro vermibus habentur, id quod confirmat Hippocrates *sect. IV. aph. 66. 67.* quibus, inquit, in urina crassa existente, caruncule parvæ, aut veluti capilli, aut fursuracea quadam, simul ex-eunt, his vesica scabie laborat. In stranguria crebrius ad min-strangu-
gendum est stimulus, sed parum mittitur, idque turbidum, ^{ria} valde salum & acre, cum filamentis, identidem fundum pe-
tentibus, & tum sphincter plerumque spasmodici quippiam patitur. Si sanguis lotio est admixtus, instar loturæ carnis, & mictu
seu vini rubri comparet, sed postea cruor ima petit, & pur-
pureum calorem, quando ex renibus, atro-fuscum vero, ubi ex adapertis vesicæ venis prodiit, refert. Talem sanguino-
lentam urinam in sene vegeto octogenario, qui jugiter dolo-
rem pressorium in regione pubis sentiebat, quotiescunque e-
quitabat, vidi.

§. XXV.

Ex hisce quæ jam attulimus, liquido elucescere arbi-
tror: uroscopiam & uromantiam haud exiguæ utilitatis esse ^{Uroman-}
in praxi medica, nec ceu inutilem & fallacem floccipen-
dendam, multo minus despectui habendam, eo quod non ^{tia utili-}
modo fluidorum, sed & solidorum conditio, habitus & sta-
tus hoc ipso adminiculo perspicui potest ac erui. Nam ex ^{tas in pa-}
urina levi ac tenui, præternaturaliter & spasmodice affectum ^{thologi-}
esse nervosarum partium systema patet; ex crassiori vero & ^{cis.}
ponderosa, ductuum urinariorum nimis relaxatus tonus, seu
atoniam elucescit. Deinceps hoc subsidio depravatam esse
sanguinis mixtionem, sive ejus dyscrasiam & impurarum sa-
lino-sulphurearum partium copiam, optime cognoscimus,
maxime in morbis chronicis & qui a cacochymia nascuntur.
Porro viscerum sanguinis depurationi inservientium, præser-
tim hepatis, constitutionem lotium prodit. Tum propor-
tio & vinculum feri ac sanguinis, quale sit in morbis, sive
acutis, sive chronicis, inde elici potest. Præterea gradus
interni caloris, sive intestinæ partium sanguinis sulphurea-
rum

rum commotionis, hac ratione paullo clarius, præsertim in æstu febrili, dignoscitur. Defectum quoque caloris naturalis, virium ac spiritaliscentiæ, quæ ad digestionem ingestorum & mutationem in succum & sanguinem necessariæ sunt, inspecta urina quadantenus comperimus. Maxime vero urinae solertiori consideratione & examine viarum & ductuum urinariorum ac seminalium, ut renum, uretherum, vesicæ, ejus sphincteris, urethræ, vesicularum seminalium & prostratarum dispositio ac constitutio manifestatur. Neque minus in febribus, tam continuis, quam intermittentibus, urinae inspectio eximio pollet usu, eo quod ex hac non modo massæ sanguineæ conditio, sed & an materia febrilis cocta vel incocta sit? an crisis morbi completa vel incompleta? qualis spes valetudinis? num funesti quippiam immineat? an recidivæ vel alius morbi metus? planum fit ac innotescit.

§. XXVI.

*Et therapev-
pevcticis.*

Tandem urinae etiam consideratio in therapevticis haud spernendum præstat usum. Quia enim vera pathologia sive exquisitior cognitio status morbi, quem uroscopia patefacit, basis est rationalis therapiæ: multum utique adjumenti ad hanc dextre suscipiendam ac perficiendam illa asferre videtur. Et aquosa quidem urinarum tenuitas si præsto est, probe inquirendum, num a spasmis? an vero defectu virium & spiritaliscentiæ ortum trahat? Ubi hoc, spirituosa, analeptica, balsamica, aromatica quæ balsamum sanguini foenerant, adhibenda; si illud, fugienda sunt hæc, & potius leniora diaphoretica, cum antispasmodicis, nitrosis, cinnabarinis permixta, locum inveniunt. Quando porro in febribus intermittentibus tenues, leves & flammeo colore apparent, nihilque deponunt, a cortice chinæ & quæ parem cum ipso, maxime constipandi & febriles motus supprimendi facultatem habent, penitus abstinendum est, quorum usus, quum urinae crassiores secedunt, prævia evacuatione alvina, tutissimus est. Intensiorem urinae colorem in febribus, hume-

stantia, acidula, nitrosa exposcere, quisque judicabit; crassas vero & rubicundas, quæ citra calorem in affectibus chronicis minguntur, diluentia, inque primis emunctoriorum tubulos obstructos referantia, aquarum mineralium, acidularum, thermalium & martiatarum convenientem, nec non feri lactis dulcis usum, exigere. Ubi ex viarum urinariorum vel spermaticarum vitio urinæ turbidæ, & larga crassa mucosa tartarea substantia foetæ redduntur, nil præsentius & efficacius est fontibus medicatis temperatioribus, ut aquis Spadanis, Wildungenfibus, Selteranis, thermis Piperanis & Emsenfibus, ad eluendas ac detergendas fordes, acrimoniam diluendam & partes afflictas consolidandas, adjunctis simul exterius balneis temperatis. Calculosa tartarea concrementa & mucidum ex ulcerata renum substantia prodiens lotium, apertius omnium efficaciter diureticorum, salinorum, ipsarum quoque Carolinarum, quæ propter calcareum salinum elementum fortiter nimis pellunt, usum interdicut, & potius traumatica, leniter roborantia & demulcentia injungunt, ut sunt emulsiões seminum quatuor frigidorum, dauci cum lycopodio, infusa, vel decocta ex hederâ terrestri, equiseti, virga aurea, fragaria, veronica, radice althææ, aliisque id genus pluribus.

§. XXVII.

At vero non solum ex urina, sed etiam ex aliis ex-*Ex sud-*
cretis, inter quæ subtiles excretionis cuticularis fordes po-*re quoque*
tissimum fere locum tenent, de statu integro nec non vitia-*signa pe-*
to, ac præcipue de salutari, vel infausto morborum eventu, *tenda.*
Medicus tanquam ex certis signis indicium petere debet. Veteres, ut refert *Jo. Langius in epist.* tam in cognoscendis, quam dijudicandis morbis, plus sudoris calorem, odorem & saporem, quam lotii differentias observarunt: quare etiam moris fuit, sudores in balneo strigili exceptos & olfacere & degustare. Sudor enim, ut *Galenus de salubr.* ait, omnium humorum per universam corporis compagem in-

dex est: urina vero tantum eorum, quæ in conceptaculis venarum continentur. Neque hæc assertio fundamento destituitur. Nam urina potissimum potui, cui etiam proportionalis est, materiam debet; & crassiores aqueas, & maxime varii generis salinas, quæ per alimenta assumptæ fuerunt, atque in ipso sanguine progenitæ sunt, recrementitias materias e corpore evehit; quandoquidem renes & viæ urinariæ congruum salium emundatorium constituunt, quin omnis generis salia, sive alcalina, sive acida, sive neutra, volatilia, sive fixa fuerint, vel etiam caustica, item nitrosa, singulari plane ratione ad renale illud vasculosum cribrum feruntur, & urinam quoque movendi facultate pollent. Per fibrosam vero ac poroso-tubulosam cutis texturam, corpus magis a partibus aqueis tenuioribus, & maxime sulphureis, sub forma vaporis, vel madoris, expurgatur.

§. XXVIII.

Perpirationis & sudoris differentia.

Diligenter tamen hoc loco observandum est: ingentem inter perpirationem & sudorem intercedere differentiam. Scilicet perpiratione, insensibilis halituum e corporis cortice succedit diffusio, adeoque tantummodo particulæ tenuissimæ aqueæ & sulphureæ salinæ magna quotidie in copia in auras mittuntur, linteaminibus corpori circumvolutis ficcis remanentibus: in sudore vero particulæ aqueæ & sulphureæ magis crassiores, peculiaris saporis & odoris, vel foetoris prodeunt, quæ cutem & indusia conspectius humectant, adeo, ut interulæ interdum post sudorem quinque vel sex uncis graviore quam antea deprehendantur, quum contra in perpiratione, pondus indusii per hebdomadem gestati vix uncia una increseat, ob materiam mucidam oleosam crassiorem in poris obhærescentem. Deinde observamus, perpirationem in robusto, sudorem vicissim magis in imbecilli corpore fieri, & plus etiam materiæ excrementitiæ illa, quam hoc excludi, ut hinc probe notante *Sanctorio in aureo de Medicina*

dicina statica libello, corpus a perspiratione longe agilius & levius, a sudatione vero debilius & gravius reddatur. Porro saluberrima illa minus in sensus cadens fordium per corticem corporis excretio magis a vegetiori sanguinis progressivo motu & circulo, & vigore motus cordis & arteriarum oboritur; sudor autem potius a calore & motu intestino partium sulphurearum, quæ in mixtione sanguinis continentur, & a fibrarum & tubulorum cutaneorum majori relaxatione, provenit. Tum frequenti constat observatione, sub constitutione aëris sicca & ventis ex euro & borea flantibus, expansiva elastica reddita, & scandente altius in barometro argento vivo, insensibilem in corpore perspirationem quam maxime vigere: contra vero sub aëre levi & rarefacto, humido, flante potissimum zephyro & austro, nec non lapsu mercurii, corpus ad sudationem mirum dispositum esse. Quin ipse multiplici observatione confirmatum habeo, quod sub debilitate, a morbo potissimum relicta, & atmosphæra existente admodum levi, humida & pluviosa, sudores ex cutis tubulis largiter profluant, cum urina simul crassiore, multum sedimenti ponente; inducta autem per mutationem ventorum e contraria plaga spirantium aëri alia constitutione, protinus sudores resiccentur & cohibeantur, urina quoque largior & tenuior secedat, corpusque longe agilius, somnus quietior, animus ad labores magis dispositus & erectior reddatur. Ex quo satis clare intelligitur, tam insignem atque conspicuam esse fluidi aërei & ætherei ad mutandos excretorios in corpore motus potentiam, ut supervacaneum & sterile molimen foret, ad occultum quoddam & vere imaginarium principium motus in corpore, in explicandis hisce phænomenis, tanquam ad asylum confugere.

§. XXIX.

Hæc autem materia, quæ per subcutaneos tubulos ex *Sudoris* intimis corporis penetralibus foras amandatur, quod valde *materia* sulphureæ naturæ, & cutis præcipuum sulphuris excremen- *sulphureæ* *indolis* *titii* *est.*

quod
testatur
odor

titii, haud secus quam renes salini excrementi, sit emuncto-
rium, plura evincunt. Etenim sudor peculiarem & odorem,
& colorem, & pinguedinosam quoque substantiam, quæ phæ-
nomena, secundum Chymicorum doctrinam, principii sul-
phurei soboles sunt, exhibere solet. Et mirum certe, quam
eximie effluvia, quæ e corpore halant, immo etiam ipse su-
dor, pro ratione ætatum, temperamentorum & ingestorum,
differant. Nimirum qui allio & cepis frequenter utuntur, in-
ficetum dispergunt odorem, contra vero quibus suaveolentia
balsamica, item moschus & ambra, in frequentiori usu, gra-
tum spirant. Sic etiam odor sudoris ratione anni tempesta-
tum discrepat, ac æstate potissimum acidum, sæpe instar ace-
ti vini penetrantis, redolet. Peculiarem quoque sudor in
nonnullis morbis & specificum quasi obtinet nidorem, ut in
scabie, lue venerea, variolis, morbillis & maxime omnium
purpura, adeo ut vel solo odore, ægrotantes ejus præsentiam
dignoscere queant. Quod quidem quemadmodum de odo-
re in propatulo est, ita pariter observationibus constat, quod
sudor indusia vario colore tingere soleat. Placet in hujus con-
firmationem quædam in *Miscellaneis natura curiosorum* consigna-
ta recensere exempla, dum *Dec. I. An. VI. pag. 20.* atrii, *Dec.*
II. An. III. pag. 83. sub axillis miniati *An. IV. pag. 203.* cæru-
lei *An. VI. pag. 45.* cruenti *An. IV. pag. 329.* crocei. *An. VI.*
pag. 5. rubicundi, *pag. 29.* viridis, *Dec. I. An. VI. & VII. pag.*
110. lutei sudoris, mentionem injiciunt.

§. XXX.

Sudor
quoque
varius &
quoad lo-
ca disse-
rens
arumpit.

Maxime omnium tamen illud notatu dignum, quod
sudor non unius ejusdemque naturæ ubique e corpore ma-
net, sed pro diversitate partium varius. Ita specifici odoris
est, qui profluit ex capillitio, & peculiaris odor percipitur,
quando regio pone aures digito asperius fricatur. Sub axil-
lis graveolens sæpe offenditur ex sudore nidor, nec non in
inguine, item in scroto & osse sacro gravem & discrepantem
spirat pædorem, qui adhuc differt ab eo, qui inter digitorum

pedum interstitia prodit. Ipse quoque sudor copiosior in una, quam in altera corporis regione manat. Nam in partibus superioribus, ut capite, collo, dorso & pectore, item in posterioribus liberalius, parcius vero in inferioribus & anterioribus, erumpit. Jam quidem mirum videri posset, qui ex uno fonte & materia, sanguinis nempe sinu, tam diversus & alius sudor secedat; sed mirari desinet, qui considerabit, ita comparatam esse corporis ubique machinam, ut vel viginti, quos facile numerare liceret, diversæ indolis, qualitatis & virtutis succi utiles atque inutiles, ex una sanguinis massa, secernantur & excernantur: haud secus ac in nutritione vegetabilium, ex sola aqua pluviali, pinguiuscula terrestri materia foeta, diversæ formæ, saporis, coloris, virtutis, consistentiæ germina, ut folia, cortices, flores, fructus, succi, gummata generantur ac producantur. Quod mirabile naturæ tam in regno vegetantium, quam animantium negotium; non, ut quidam somniant, spiritui peculiari architectonico, plastico, aut alii omnia moraliter & rationaliter dirigenti, vel peculiari partium virtuti attractrici, splendidis certe ignorantiae terminis, in acceptis ferendum, sed a sola diversa mechanica structura, flexura, magnitudine & figura minimorum tubulorum, quæ apparet maxime in glandulis, duci ac derivari debet. Neque ea propter est quod dubitemus, quin sola tubulorum structura & ductu, ita motus fluidorum dirigantur, ut crasis, mixtio & unio partium corpus constituentium mutetur ac invertatur, & ex emergente inde nova combinatione & unione partium, alius formæ virtutis & qualitatis substantiæ gignantur.

§. XXXI.

Jam si porro in causam sudoris & largioris & frequentioris, sive præternaturalis, inquirimus, illa duplex merito asserenda. Prima est partium sulphurearum, quæ mixtionem sanguinis ingrediuntur, intestina valde agitata commotio & evolutio, qua ipsa massa sanguinis & feri tandem

in excrementitium salino-sulphureum humorem dissolvi incipit. Altera est tubulorum subcutaneorum nimia relaxatio, sub qua humores serosi facile secedunt a crassioribus sanguineis, ac sensim protrusi eliminantur. Quibus jam positis, facile apparebit ratio, quare omnia ea, quæ ad intestinum partium sanguinis sulphurearum motum augendum faciunt, ad sudorem movendum aptissima sint. Horum in numerum referenda cholericæ corporis constitutio, ætas juvenilis, macilentus corporis habitus, tempus æstivum, paullo vehementior corporis motus, aer calido-humidus australis, vini, præsertim oleosi & spirituosius, ut Hungarici, potus, & medicamenta, quæ oleo subtilissimo evaporabili imbuta sunt, quo nomine nota sunt ex vegetabilibus radix enulæ, petasitidis, ostrutii, levistici, angelicæ, imperatoriæ, crocus, flores sambuci, ex animantibus, omnes spiritus & olea destillata, ex mineralium classe flores & lac sulphuris, regulus antimonii medicinalis, sulphur antimonii, nostro modo præparatum & fixatum. Vicissim in procinctu quoque erit ratio: quare infantes, senes, obesi, humoribus repleti, otio & somno nimium indulgentes, parum ad sudorem dispositi sint, quippe qui spissos non modo & viscidos in vasis humores, qui difficiliter per minimos cutis tubulos feruntur, alunt, sed & imminentam agitationem.

§. XXXII.

*Et cutis
dispositio
laxior,*

Requiritur vero etiam ad proliciendum sudorem certa dispositio in cute, quæ consistit in convenienti ejus relaxatione & pororum ac tubulorum apertione, ut sudoris materia sufficienter adduci & secerni queat. Nam si in ulla corporis parte vis expansiva & elastica eminens est, certe in ipsa cute conspicitur, quæ, ut gravidæ & hydropici testantur, mirum sese diducere atque expandere, iterumque in pristinam dimensionem contrahere potest. Et elastica hæc cuti propria virtus, non aliter quam in omnibus inanimatis

elasticis corporibus, ut chordis, funibus, tabulis ligneis, comparata est, ac non modo pro diversa aëris constitutione, ut humidi & levis, remittitur, sicci vero & frigidi iterum adducitur, sed & a causis internis, fluidi tenuissimi, quod est in sanguine ac nervis, motu, varie in relaxatione & constrictione modificatur. Hinc enim est, quod in omnibus gravioribus doloribus, in affectibus spasmodicis, ira, nimio sanguinis fervore, cutis plane sicca, aspera & arida ostendatur, adeo ut facilius sit e pumice aquam, quam ex ejusmodi corpore sudorem elicere. Secus vicissim fit & facillima ad sudorem proclivitas, in declinatione paroxysmorum febrilium, spasticorum, item in imbecillitate virium a morbis restitante, ab atmosphæra humida & calida, pluviosa, balneo vaporoso, vel a medicamentis quæ dolores ac spasmos sistunt ac sedant, ut nitrosis papaveraceis assumtis, præsto est, eo quod hæc omnia mirifice relaxant & ampliant cutis poros ac tubulos. Quin diuturnus etiam animi moeror peculiarem hunc pariter exserit effectum, quod cutis, præsertim pedibus inductæ, tonum solvat ac remissiorem reddat, ut hunc, quod sæpius observavimus, sudore largiter diffuant.

§. XXXIII.

Postquam igitur causas, viam & modum, quo cuti sudores
 ularis excretio perficitur, paullo curatius pervestigavimus; boni omi-
 haud difficile nunc erit, ex sudoris naturæ atque eliminatione
 in statu morbofo & præternaturali, præsertim febribus, ra-
 tione eventus indicium & judicium desumere. Quum vero
 vetustissimus artis nostræ parens Hippocrates passim in scriptis
 suis, maxime aphorismis, prænotionibus & coacis, multa exi-
 mia & veritati apprimè consentanea præcepta & axiomata
 prognostica, ex sudoris naturæ & modo excernendi petita
 proposuerit: hæc in pauca conferre & sic in compendio ex-
 hibere, operæ duxi pretium. Affirmat quippe hic Medico-
 rum princeps, boni omnis sudores esse, qui circa dies criti-
 cos, ut dimidium quartum, septimum, undecimum, decimum
 quar-

quantum, decimum septimum, vigesimum primum erumpunt, qui porro per universum corpus, nec in una tantum parte, nec parce & interrupte, sed copiose & sufficienter manant, quos alleviatio symptomatum & virium erectio sequitur, & qui cum signis coctionis in urina, alvi secessu, vel præcedente, vel comite, succedunt. Nos maxime illos judicamus salutiferos, qui fiunt quando pulsus præter naturam celer, vehementer, vel durus, in molliorem & sedatiorem transit.

§. XXXIV.

Qui
malis?

Contra vero omnes sudores, qui in febribus statim in principio & extra dies criticos contingunt, symptomata non levant, sub alvo constricta, cum urina tenui sine sedimento, ac pulsu præternaturali nec immutato prodeunt, a docta antiquitate, cui etiam experientia firma & constans suffragatur, semper pro malis & symptomaticis merito habiti fuerunt; eo quod ingentem virium imbecillitatem, partium solidarum atoniam, mixturæ sanguineæ dissolutionem atque etiam causam morbi adhuc nobilioribus nervosis partibus firmiter insidentem produnt, & multiplici experientia constat, plures sub & in ejusmodi sudore occumbere. Infausti etiam prælagii sunt, qui tantum unam corporis partem occupant, & recte utique Hippocrates sect. IV. aph. 38. prodidit: *quæ parte corporis sudor manat, morbum illius partis arguit.* Nam in morbis capitis, apoplexia, phrenitide, affectibus soporosis, caput sæpe totum sudore diffluere, pedibus frigidis, observamus. In asthmate convulsivo, catarrho suffocativo, peripneumonia, pectus multo sudore perfunditur, & plerumque omnes, qui in peripneumonia primis mox diebus citra levamen sudant, pereunt, ac sphacelosa plerumque subest inflammatio, vel in suffocativo asthmate polypus absconditur. Quin id quoque observatione compertum est, quando symptomata post sudorem non levantur, plerumque subsequi recidivam, vel morbum diu extrahi. Quam in rem egregium est Martiani in comment. ad coac. testimonium: *si sudor non tol-*

in febrem, sed hac remanet, tunc symptomaticus est, & morbi recidiva, vel ejus longitudo expectanda. Omnium tamen pessimi sunt frigidi, præsertim quando interiora ex inflammatione ardent; unde Hippocrates Sect. IV. aph. 37. it. in prognost. cap. 2. frigidos sudores cum febre acuta mortem indicare affirmat, in mitiori autem morbo ejus longitudinem.

§. XXXV.

Porro quotidiana docet experientia, ipso in paroxy-Sudor in
sino & vigore febrium, item dolorum & motuum spasticorum, paroxy-
in gravi cephalgia, cardialgia, dolore intestinorum, coli-smis nul-
ca, epilepsia, in nimia etiam feri profusione per alvum, sali-lus.
vam aut urinam, vel etiam nimis hæmorrhagiis, cutem ari-
dam, siccam & frigidam esse, ac sudore penitus destitui, si-post eos
mulac autem sæva hæc pathemata de vehementia remittunt, largus.
vel penitus intermittunt & morbus est in declinatione, sudor
protinus ex toto corpore evocatur, id quod maxime obvium,
in declinatione intermittentium. Incidit quoque sæpius, ut sæpe ni-
post febres, tam acutas, quam chronicas, curatas, ingens-mius.
dispositio & habitus corporis ad continuos & largos sudores
remaneat, qui etiam facili de causa, levi externo calore, vel
si oculos claudant & somnus obrepat, provocantur. Causa
hujus largæ sudationis vel ex regimine in sudoribus criticis
minus curate ab ægris servato repetenda est, vel quod nimis
cito auræ frigidiori se committant, ut remanens intus excre-
mentitia quæ sudore diffatur materia, mixtionem sanguinis
ad dissolutorium quendam motum disponat, vel etiam quod
superato morbo avidius & largius cibum ingerant, qui ob im-
becillio rem a morbo redditam digestivam ventriculi & intesti-
norum vim, non bene solvitur & subigitur, unde copiosus &
crudus chylus sanguini affusus, non bene cum eo miscetur,
sed quam facile per emunctoria ab eo secedit,

§. XXXVI.

*Maxime
in pur-
pura.*

malignis.

hecticis.

*scorbu-
ticis.*

In nullo tamen morbo profusiores manant sudores, quam in purpura, sive rubra scorbutica, sive alba cum febre juncta; certo indicio, a fermentali quodam impuro succo totam sanguinis & humorum massam in colliquativam dissolutionem esse coniectam. In malignis morbis, quorum causa interna partium sphacelatio, cum summa virium jactura, sub pulu sæpe debili & minus frequenti, urina quoque non adeo colorata, sed sanorum simili, manant sudores copiosi, foetidi, sæpe frigidi, & lethales, qui de putrida sanguinis resolutione testimonium exhibent. Solennes quoque sunt hecticis & ubi partes nobiliores abscessum vel ulcus alunt, copiosi & valde debilitantes sudores, qui in scholis medicis colliquativi vocantur, & idemtidem a materia purulenta corrupta, quæ sanguinem in intestinum fermentativum motum ciet, proficiuntur. In scorbuticis quando ex hepatis vitio & sub deficiente biliosarum partium separatione, lymphæ multis sulphureis excrementitiis scatet partibus, sudores etiam nimii valde molestant, præsertim si alvus simul obseratur.

§. XXXVII.

*Quomodo
resiccandus?*

Et in hac quidem effusa nimis sudatione, perquam utilia deprehendi alvum laxantia ex manna, tamarindis, item serum lactis dulce, cum pulvere nitroso præcipitante datum. In aliis autem longis & largis sudoribus, quorum causa nimia cutis atonia & interna partium sulphurearum in sanguine resolutoria commotio, egregie ex usu fuerunt analeptica, cum roborantibus & leniter constringentibus, item acidula, quippe quæ non modo partium solidarum tonum ac robur firmant, sed & unionem ac mixtionem partium sanguinis vinciunt & servant, quorum classem liquor meus anodynus mineralis, spiritus salis dulcis, spiritus sic dictus regius Michaëlis, ex spiritu rosarum, salis dulcis, cum moscho, ambra & confectioe alkermes paratus, tinctura ro-

larum

§. XXXVIII.

§. XXXIX.

Rr 2

cri-

cribrum, a recrementis salinis & sulphureis liberaliter depuratur, his rite & sufficienter secedentibus, non illico noxa metuenda, licet faeces crassiores aliquandiu in longo & amplo intestinorum tractu moram neccant, modo tonus hujus canalis non adeo sit labefactatus, ut flatibus cedat, sed iisdem elidendis ac demum scybalis egerendis sufficiat. Et certe complura in observatis Medicorum commemorantur exempla de diuturna alvi obstructione indemni, ut apud *Rhodium Cent. II. obs. 81. Mænicen observ. 3.* nec non in *M. N. C. Dec. I. An. III. obs. 25. Dec. II. An. III. obs. 83.* quo etiam referenda, quæ *Listerus in comment. ad Sanctorii Medicin. static. pag. 150.* memorat, de sene quodam, octogesimo & sexto ætatis anno adhuc perfecte sano, qui, licet multum cibi carnesque pariter subcrudas ingereret, a pluribus tamen annis rarissime, & nonnisi semel per hebdomadem, alvum deposuit.

§. XL.

Hinc re-
cte ex ea-
dem judi-
cium pe-
tendum.

Nihilominus tamen ex solennioribus ac eminentioribus excretionibus est alvina, ac non solum vitali corporis conservationi, sed etiam morborum solutioni, quæ nonnisi evacuatione absolvitur, quam maxime inservit. Quare ejusdem consideratio, utique tam ad sanum, quam morbosum corporis statum cognoscendum, ac ferendum de eo judicium, utilis admodum est atque necessaria. Potissimum tamen ex eorum quæ alvo secedunt copia, habitu & modo excernendi, Medicus non tantum de alimentorum digestionem & chyli elaborationem, nec non de humoris biliosi ac pituitosi secretionem atque excretionem, verum etiam de motus intestinorum peristaltici, immo totius generis nervosi constitutione, indicia sumere ac certior reddi potest.

§. XLI.

Excre-
menta al-
ba bilis
defectum
indicant.

Jam itaque quum feces colorem flavum naturalem ab admixta bile mutentur; his albis, vel grysea tantum tinctura infectis secedentibus, in proclivi est judicare: biliosi humo-

humoris in intestinis esse defectum. Hic autem defectus, vel ab obstructis, aut constrictis biliferis ductibus, ut in ictero, proficiuntur, vel ab exuperante acidorum succorum prima in regione copia, qua bilis obtunditur ejusque color extinguitur, ortum trahit, uti obvium est in senibus, hypochondriacis, infantibus, si lac in ventriculo coacescit, omnibusque, qui paullo largius potum, multum acidi in complexu foventem, ingerunt. Ac tum quidem candescentes feces, minus foetentes, cum doloris sensu, praesertim in recto, ac tenesmo secedunt. Quandoque etiam eandem ob causam difficilius est ac tardus alvi secessus & varia in abdomine accidunt pathemata ac tormina, inprimis tamen molesta nauseabunda circa praecordia adest censatio, quam nostri *das Uebel-seyn* appellant, quae mane potissimum & absoluta digestionem percipitur. Ac in his quidem omnibus nullum praesentius datur remedium pulvere acidum absorbente, cum diluente & leniter carminativo vehiculo assumpto. Cessant quippe hoc facto dolores & alvus ad officium redit. Quod vero absorbentia & sic dicta praecipitantia, quo etiam referenda magnesia, nec non pulveres bezoardici terrei, sedes, uti crebrioris observationis est, moveant, haec utique subest ratio, quod alcali terreum acidis prima in regione succos imbibens, convertitur in sal neutrum, nerveas intestinorum tunicas ad excretionem sollicitans. Notabilis hanc in rem est observatio *Schelhammeri* in *M. N. C. Dec. II. An. V. p. 30.* de puero, qui convulsivis motibus simulque alvo pertinacius obstructa laborans, propinata ex aquis refrigerantibus cum absorbentibus mixtura, & purgatus est, & convaluit.

§. XLII.

Vicissim quando scybala austero, bruno, vel fusco colore infecta alvo feruntur, largius in sanguine progigni & copiosius ab eodem separari biliosas fordes, indicio est. Excluduntur autem biliosa ejusmodi excrementa solenniter tem-

Rr 3

Fusca & bruna bilis copiam.
pora

pora æstivo, quo ob vehementem calorem multum bilis generatur & ad intestina fertur. Observantur quoque in cholerica constitutionis hominibus, nec non in iis, qui corpus crebrius motu exercent, vini ac spirituosorum potui nimis indulgent & in iram proclives sunt. Potissimum tamen in febribus biliosis, cholericis, tertiana continua & intermittente, febre quoque ardente sive caufa, fordes alvinæ multæ, bile largiter refertæ, maxime sub declinatione & perfecta morbi solutione, secedunt. Quia enim hi morbi partim ab ipsa bile stagnante & corrupta natales ducunt, partim etiam sub ipsis per motum intestinum calidum adauctum largus bilis est proventus: ratio utique patet, cur tam biliosa egerantur scybala, ac remittente demum sub declinatione febre spasmo, copiose, insigni tamen cum emolumento, prodeant, ipsumque morbum solutum haud raro indicent. Pariter in melancholia hypochondriaca, mania, cachectico morbo & hysterico malo, alvus non solum segnis est & tarda, sed fœces etiam duræ ac intensius flavo ac fusco colore, quin nigricante conspicuæ, exsolvuntur, nullam plane aliam ob causam, quam quod ob acidi uberiores in canale alimentorum proventus, adstringitur excretio, ac bilis acido commixta, ob diuturnam moram, nigredinem contrahit.

§. XLIII.

*Viridis
excre-
mentorum
color
etiam
a bile.*

Ex eodem fonte, bilis nempe constitutione, viridescentium excrementorum origo repetenda. Sunt hæc quam maxime familiares infantibus lactentibus & plerumque atrocibus ventris torminibus, inquit, jactatione corporis, febre, insequente crebro convulsione epileptica, stipantur. Mali igitur sunt indicia, & lac acidum factum & cum bile quasi confermentatum, viridem colorem & corrosivam indolem contraxisse, produnt. Excluduntur tamen interdum etiam in adultis virides per alvum fordes, ut in passione cholericâ laborantibus, præsertim quando post vehementem iram co-

piofa

piofa bilis ad tenuia intestina, acidis succis referta, propellitur. Neque minus in hypochondriacis & hystericis, sæpius non solum per vomitum, sed etiam alvum, viridia, sub gravissimo pathematum spasmodicorum insultu, excernuntur. Sæpe etiam ipsa natura per biliosas & copiosas dejectiones, sponte repurgat corpus a redundantibus salino-sulphureis scorriis, quæ ætate nimis fervida progenitæ, cohibita, ab ære frigido & humido, ineunte maxime autumno, perspiratione, partim ad hepar, partim etiam ad glandulosas intestinorum tunicas relabuntur, ac demum in ipsum canalem delatæ, molesta tormina & spasmos excretorios producant. Quod si tamen acres hi succi diutius per intestina feruntur, tonus non solum eorundem nimium destruitur, sed ipsæ demum etiam tunicæ exeduntur, ut atrophia, hæctica, tormina continua, affectus hypochondriacus flatulentus, tumores œdematosi ipseque hydrops, accedant.

§. XLIV.

Ut color, sic quoque foetor excrementorum bilis iis- *Fætor ex-*
dem immixtæ plerumque debetur, quæ quo partius inest, ut *cremen-*
albis, eo minor est nidor, eo gravior, quo largius. Quod *torum*
si igitur fæces mirum foetent, aut cadaverosam plane pædo- *unde?*
rem diffilant, indicium est vel bilis copiosæ & corruptæ, vel
sphacelosæ in intestinis corruptionis. Hinc quando in malignis
vel dysenteria scybala foetidissima secedunt, putredinis
lethiferæ ipsiusque mortis præsagium præbent. Putent tamen
etiam sæpius scybala infantum a vermibus, si in putrilaginem
fatiscunt, ac tum simul adsunt vagi in abdomine dolores &
corporis æstus cum virium languore. Ubi vero alvus foetida
non solum, sed etiam spumosa, crebra & varii coloris fertur,
cum ardente dolore & continuo ad desidendum stimulo, ut
in dysenteria, humores valde acris & corrosivæ naturæ ad in-
testina ferri, & talem quoque rodentem & recti glandulas
amandari, haud fallax suppeditat indicium.

§. XLV.

§. XLV.

*Fæces
mucida
quid in-
dicent?*

Porro sæpius contingit, ut fæces admodum mucida, pituita crassa tenaci scatentes, exsolvantur. Ex his de imbecilli ventriculi & intestinorum digestrice virtute, nec non de alimentorum crudorum ac difficilioris solutionis, potus quoque minus salubris usu, judicandum; id quod sæpius obvium est in iis, qui novissime a morbo convaluerunt & avidius cibos ingerunt, in senibus ac his, qui vitæ genus agile, cum otioso, & victum calidum, cum frigido, commutant. Quando vero major mucii pellucidi, vel qui albumini ovi similis est copia, cum tenesmo ac molestissimo recti dolore excernitur, certo ut plurimum argumento est, sanguinem exitum molientem in fine recti obhærescere, ac mora in glandulis largiter deponere mucum, pressione vero dolorem cum tenesmo ciere.

§. XLVI.

*Rexcre-
menta li-
quida &
copiosa.*

*dura ni-
mis unde*

Nonnunquam etiam excrementa liquida prodeunt & copiosa, appetitus simul viget, corpus tamen emaciatur magis, quam increfcit. Quod si contingit, exiles villosæ in intestinis tunicae ductus mucos obfessos & inviscatos esse arguit, ut nonnisi tenuis & aquea chyli portio a minus patulis osculis recipi queat, pinguis vero, gelatinosa & nutritibilis portio ingressu exclusa, fæces dilutiores & sic diarrheam reddat chylolam. Merito quoque ab obstructione lacteorum lævitas intestinorum senibus familiaris repetenda, eo quod ætate ingravescente alvei minutissimorum in corpore canalium senlim angustantur, corrugantur ac concidunt, ut hinc nutritio intercidat ac multum alibilis liquidum per anum effundatur. Vicissim quando scybala durissima, instar lapidis compacta, magna cum difficultate egeruntur, haud fallaci indicio concludendum: ob mucosas intestinorum glandulas obstructas aut plane induratas, vel nimium calorem, excrementa siccescere, & labefcente simul motu peristaltico, diutius retineri. Quin non raro ea intestinorum sicci-

tas

tas alvique est durities, ut nonnisi iniectione clysinata, aut sum-
to pharmaco, quicquam exsolvatur, quam in rem memora-
tu dignus casus a *Ballonio lib. epidemior. pag. 58.* enarratur, ubi
post insuperabilem alvi ficcitatem, facta sectione ieiunium ita
angustum & cartilaginofum deprehendum est, ut vix per il-
lud chylus deflueret. Et hinc quoque est, quod nonnulla
medicamenta purgantia calidiora, præsertim si humidum iam
deficit, excretorios in intestina hiantes ductus stringendo, al-
vum potius obstruant, quam solvant,

§. XLVII.

Exit præterea cum fecibus quandoque sanguis <sup>De scyba-
lis san-
guinolentis.</sup> cerus, quod, si sine torminibus exquisitis succedit, ex ani-
venis stillat, ubi autem dolores circa umbilicum gravissimis
& crebriores dejectione simul urgent, ex erosione ab acri hu-
more tenuium vasculorum manare & dysentericum morbum ad-
esse testantur. Et sicuti prius plerumque pro sanitate est,
ita posterius, si longius extrahitur, affectum hypochondria-
cum flatulentum, tormina, hydropem, tumoris cedemato-
sos, atrophiam & hecticam, ob exesas sensim intestinorum tu-
nicas, inducit. Cruori quoque admixto debentur excre-
menta instar picis nigra, quæ cum summo virium lapsu &
mirifico foetore deijciuntur, ac de morbo sic dicto nigro
documentum ferunt, præsertim si vomitus simul sanguineus
accedit; eo quod sanguis post diuturnam in vasculis mesaraicis
stagnationem, demum in ileum tenuissima membrana ob-
ductum perrumpit & ad crassa descendens, cum fecibus quasi
confermentatus, nigrorum & foetorem ipsis conciliat. Et
de ejusmodi dejectione intelligendus utique *Hippocratis aph. 21.*
sect. IV. deiectiones nigra, qualis est sanguis niger, sponte venientes,
sive cum febre, sive sine febre, pessimæ; & quanto colores magis pravi
 fuerint plures, pejus.

§. XLVIII.

Alvi ex-
cretio de
motu in-
testino-
rum te-
statur

Præter hæc, de bilis aliorumque in intestinis succo-
rum indole, signa, alvina quoque excretio de motus peri-
(III.) staltici

staltici & universi nervosarum partium systematis constitutione indicium suggerit. Quemadmodum enim alvi facilis & conveniens successus, reciprocum relaxatorium & restrictorium motum in tunicis intestinalibus ordinate & æqualiter succedere testatur: ita contra, simulac hæc motio vitium patitur, & nimia adest vel adstrictio, vel dilatio, seu atonia, alvus aut supprimitur, aut effuse fluit. Nervosarum autem partium constitutio, eo certius ex alvina evacuatione cognoscitur; quo major inter has & intestina viget consensus, qua vitium ex illis ad hæc, & ex his ad illas, mutuo propagatur.

§. XLIX.

*In genere
mala al-
vustarda,*

In genere igitur tenendum: legitimum intestinalis excretionis successum, illibata sanitas; turbatum vero adversæ valetudinis, certum esse indicem. Alvi enim torpor vel plenaria suppressio recte sentiente *Sponio aph. 27. Sect. II.* omnium conturbationem & vasorum impuritatem affert, eaque propter merito inter ligna imminentis morbi refertur, eo quod sensibiles corporis partes gravius affectas esse & spasmo jam stringi subindicat. Inprimis teste eodem *Sponio l. c. aph. 28.* & per experientiam compertum est: obstructo inferiore ventre, flatus in universum corpus discurrere, ut distentis postea nimium ab iis intestinis cum ventriculo, sanguinis liber progressus impediatur, & ad alia superiora maxime loca conversus, varia, eaque gravia pathemata, cicat.

*nimis
fluxa:*

*inordi-
mata:*

Nimis effusa autem per alvum secessio indicio est, post vehementiorem sub crebriori dejectione strictionem, succedere nimiam fibrarum remissionem & laxitatem, qua fit, ut copiosior humorum affluxus eo contingat, quibus denuo spasmi ac tormina cum dejectione proritantur. Haud absimilis ratio est, quando alvus aliquandiu fluit, postea vero per aliquod tempus tensa est ac stricta, quippe quod pariter vitiosum peristalticum motum, ac intestina mox spasmo, mox atonia, detineri, arguit. Quumque adeo reciproci hujus in

inte-

intestinatorum volumine motus conservatio magnum conservandæ valetudinis sit præsidium, destructio autem multorum morborum & symptomatum mater; omni utique studio, tam in statu naturali quam præternaturali, ea vitare decet, quæ eundem turbant ac lædunt, ut sunt inprimis ira, terror ac moestitia, frigida potio largius sudanti corpori ingesta, omnia austera, acida, adstringentia & duræ compagis alimenta, cibi nimis pingues & flatulenti nimius cerevisiæ, vini & spiritus vini potus, omne frigus, nimix vigiliæ & mentis fatigatio, ex medicamentis, creber usus purgantium, inprimis drastico-
rum, opiata, mercurialia, saturnina, item acida stiptica.

§. L.

Ad morbos quod attinet & iudicium ex alvina ege-^{Alvina}stione in iis petendum, in omnibus capitis & nervorum affe-^{excretio}ctibus, propter mutuam partium nervosarum consensionem, ^{in capiti}alvus stringitur, & omnis ipsius constipatio, ingignit, fovet & exacerbebat capitis & nervorum morbos. Obvium hoc est in vehementiori cephalalgia, hemicrania, epilepsia, mania, melancholia, affectibus paralyticis, ophthalmia & auditus quoque difficultate, qui omnes morbi optime solvuntur alvi fluxu paullo diuturniori, quippe qui sedatos esse primis in viis spasmos, humores ad caput urgentes, & materiam peccantem ad inferiora descendere ibi que exsolvi testatur. Hinc ex vero *Celsus lib. IV. cap. 3.* alvum fluxam superiores partes sæpe resolvere; & *Hippocrates Sect. VII. aph. 5.* dysenteriam in insania bonam esse, asserunt. In reliquis quoque chronicis passionibus spasmodicis, pathematibus ^{aliisque} nempe hypochondriacis & hysteris, alvus ut plurimum ^{spasmodicis mor-}constipata pedesque frigidi observantur. Quæ ambo ubi ^{bis quælibet}præsto sunt, certo prædici possunt variæ ac multæ in superioribus afflictiones, ut præcordiorum anxietates constrictivæ, cardialgia, difficilis spiratio, melancholia, cephalalgia, vertigo, cordis palpitatio, ructus, digestio vacillans & abolita, dolor flatulentus in hypochondriis, eo

quod hæc omnia post inæqualem redditum per spasmos in inferioribus humorum cursum, eundemque ad superiora coactum, subsequuntur.

§. LI.

In febribus quæ bona vel mala?

Accedunt febres, de quibus pariter experientia compertum est, nullam earundem, siue sit continua, siue intermittens, inflammatoria, vel exanthematica, lymphatica, lenta aut hectica, sine prævia alvi adstrictione accedere, quæ etiam sæpius diu in morbi decursu perdurat, eundemque eo graviores reddit. Quod si vero alvus secundum naturam ferri incipit, tam quoad qualitatem, quam quantitatem, haud fallaci spe sanitatis restitutio expectanda, eo quod hoc facto, certum est, spasmos qui morbum proxime faciunt, in nervosis partibus solvi atque remittere. Quin multæ febres, præsertim putridæ & malignæ, item biliosæ, oborto iusto tempore alvi fluxu solvuntur, & ex eodem, reliquis quoque concurrentibus, salutis petendum est indicium, quod pluribus in *dissert. diarrhæa in febribus malignis saluari*, excussi. Monendum tamen, quod si in principio febrium & extra dies criticos intempestive alvus largius secedat, malum & infausum decursus præbeat indicium.

§. LII.

Alvina excretio quomodo in chronicis

& febribus prudenter movenda

Quum igitur in omnibus affectibus chronicis spasmodicis, convulsivis, hypochondriacis & hysteriis, alvus segnis, adstricta & dura admodum noxia sit: artis utique est ac prudentiæ, utilissimæ huius excretionis successum conservare, quod tamen minime acrioribus stimulantibus perficiendum, sed potius apprimere ex usu sunt salina, abstergentia, nec non absorbentia & balsamica pilulæ, quas extracta amara, resinæ temperatæ, extractum rhabarbari & aliquot grana aloes rite præparatæ ingrediuntur, unacum clysteribus emollientibus, carminativis & oleosis. In febribus autem, quia æque strictura nimia, quam laxitas, periculosa, eo magis artifici providendum, ne in alterutro, delinquat, sed
potius

potius accommoda diæta ac regimine, & congruis tam internis, quam externis præfidiis, alvinæ excretionis successum perite moderetur. Hinc ubi alvus subducenda, neutiquam drastica, acrioribus & stimulantibus utendum, sed leniora propinanda, mannata scilicet, tamarindinata, tartarea atque nitrosa, cum clysteribus lenientibus ac oleosis. Neque etiam dejectiones, licet nimie videantur, adstringentibus, opiat- & nimia-
tis & narcoticis vi sunt comprimendæ, ac potius blanda dia- compe-
phoretica fixiora, mitigantia, cum aliquot granis nitri, vel scenda-
uno aut altero corticis chaccarillæ, nec non succino præparato, vel floribus sulphuris & dimidio grano theriacæ cælestis, omne ferunt punctum.

CAPVT XIV.

DE

CRISIBVS ET CRITICIS DIEBVS IN EXPERIENTIA RATIONALI FVNDATIS.

S. I.

AD prognosin medicam, sive iudicium de morbis, præ- Ad præ-
fertim acutis, eorumque fausto vel infausto eventu gnosin re-
ferendum, referenda etiam doctrina de crisis, a ferenda
plurimis Veterum maximi habita & passim in scriptis cele- crisis.
brata, a multis vero Recentioribus, quibusdam etiam Prisco-
rum, partim in dubium vocata, partim neglecta. Primus
autem omnium qui de crisi scripto mentionem fecit, est ve-
tustissimus Medicinæ antistes Hippocrates. Is enim serio in-
culcavit, septimi cujusvis & dimidiati septeni diei, in acutis
morbis Medico rationem esse habendam, eo quod iisdem per
sudorem maxime, alvum aut hæmorrhagiam, a natura insti-

quid per
eam in-
tellexe-
runt ve-
teres.

tuantur excretiones, quarum fuccellu abfoluto, ipfæ febres demum folvantur. Et hos dies vernacula fua criticos, five decretorios, nuncupavit, quia iudicium de morbi eventu ferrent. Per crifin vero, quod vocabulum erat *πολύκριμα*, prifci vel noxiorum e corpore excretionem, (quia *Hefychio* & *Suida* auctore, notante *Langio lib. I. epift. 37. τὸ κρίνειν*, fequeft rare & veluti per cribrum aliquid excernere, denotat) intellexerunt, vel ipfam morbi folutionem crifeos nomine infigniverunt, (uti effert *Hippocrates lib. I. de præception. κρίσις ἐστὶ ἀπόλυσις νόσου*,) vel etiam crifin pro ipfius naturæ motu & pugna cum morbo habuerunt. Alii quoque crifin iudicium Medici, quod format, vel formare debet ex morbi circumftantiis de ejus eventu, effe voluerunt.

§. II.

Crifis fe-
ptenario
& femi-
septena-
rio nu-
mero
compu-
tanda.

Ut autem genuinus crifeos fenfus & criticorum dierum ratio eo luculentius pateant, ex his, qui multum iisdem detulerunt, maximeque *Hippocrate*, tanquam primo fonte, haufita adducemus præcipua testimonia. Primum efto, quod exftat de dieb. iudicat. §. 9. ita habens: *judicantur febres quarta die, feptima, undecima, decima quarta, decima feptima & vigeftima prima, quadam etiam trigefima & quadrageftima.* Et Sect. II. aph. 23. & 24. crifeos fuccellum fic conceptis delineat verbis: *acuti morbi in quatuordecim diebus iudicantur, feptima quarta index eft. Alierius hebdomadis octava principium eft. Consideranda vero eft undecima; hæc enim quarta eft fecunda hebdomada. Deinde rurfus consideranda decima feptima; ipfa enim eft quarta quidem a decima quarta, feptima vero ab undecima.* Porro lib. III. de præfag. §. 7. & 8. perite monet: *morbos advertere a prima die oportet, atque fingulos dierum quaterniones obfervare; fi enim haud obfcure fcies, quo fe converfurus fit morbus.* Nam febres ardentes epidemica iudicantur bono ordine in feptem ac decem diebus. Huc etiam referenda, quæ lib. de prænot. §. 20. prodidit: *placidiffima febres & fignis feuris fimis niven-*

tes, quarto die desinent, aut prius, malignissima vero & signis horrendissimis oborientes, quarto die aut prius occidunt. Eandem cum Hippocrate sententiam tuetur Galenus, qui integrum de diebus decretoriis concinnavit librum, in quo principes dies criticos vocat septimum, decimum quartum & vigesimum primum, ac in iisdem plures sanari, quam mori declarat.

§. III.

Septenos itaque & semiseprenos dies Veteres crisi dicuntur, quibus acutæ & continuæ febres in salutem terminantur. Ipsam vero crisin his diebus per excretionem, sudorem potissimum, alvum, vel hæmorrhagiam succedere idem tradiderunt, omnesque evacuationes, quæ extra criticos hos dies contingunt, pro minus salubribus, sed symptomaticis censuerunt. Et de sudore quidem perspicuis id testatur verbis Hippocrates Sect. IV. aph. 36. sic scribens: sudores sudorem. febricitanti si inceperint boni, sunt tertia die & quinta, & septima, & nona, & undecima, & decima quarta, nec non decima septima & vigesima prima, porro vigesima septima & trigesima prima & trigesima quarta. Hi enim sudores morbos judicant, qui vero non sic sunt, dolorem significant, & longitudinem morbi, & recidivas. Idem confirmat Galenus de dieb. decretor, qui sudores, inquit, manant diebus indicantibus, non eriticis, laborem significant & diurnitatem morbi: nam judicatoria, non judicantia, aut sunt funesta, aut certe sinistri judicii. Ac in eodem libro de sudoribus extra periodos crifimos fluentibus sic prodidit: in sexto judicantur egri cum difficilibus symptomatibus & periculo non mediocri, imperfecte & obscure.

§. IV.

Perficitur vero etiam solenniter crisis per sanguinis hæmorrhagiam & alvi fluxum. De utroque in procinctu sunt hæmorrhagiam testimonio. Nam de hæmorrhagiis eriticis egregius est locutus Hippocratis lib. I. epid. §. 115. in febribus, inquit, ardens fluxum. deni.

dentibus populariter grassantibus, quibus bene ac largiter sanguis per nares erupit, per hoc maxime servabantur, & nullum novi, qui in hac constitutione mortuus esset, si recte sanguis profluxisset. In Philisco enim, Epaminone ac Sileno, quarta ac quinta die parum de naribus stillavit, & moriebantur. Sanguis autem plurimus erupit; maxime adolescentibus & in vigore constitutis, & alium plerique perierunt, quibus sanguis non erupit; senioribus vero ad morbum regium res devenit, aut alvi ipsis turbata sunt, aut dysenterici facti sunt. De salubritate autem liberalioris alvinæ in morbis excretionis passim aut Hippocratem existant efata, ut Sect. IV. aph. 28. sect. VI. aph. 17. sect. VII. aph. 29. imprimis tamen huc referendum quod de febribus inculcat, dum lib. de judicat. §. 4. ardentes febres biliosa, ait, solvuntur plerumque septimo, aut decimo quarto die, sudore, aut alvo liberiore.

§. V.

*Crises repudia-
runt veteres qui-
dam &
recentiores.*

Tam magnifice de crisi & criticis diebus senserunt Hippocrates atque Galenus, quorum tamen fidem subleſtam reddere & hanc doctrinam plane in dubium vocare haud veriti sunt antiquorum Medicorum nonnulli. Hos inter primus fuit Asclepiades, qui teste Cælio Aureliano lib. I. cap. 14. pag. 37. asseruit: non esse in passionibus statos dies, quos crifimos appellat, nec certo aut legitimo tempore ægritudines solvi. Idem cum Asclepiade professus est Celsus lib. III. cap. 4. est, inquit, de diebus ipsis dubitatio, quoniam antiqui potissimum impares sequebantur, eosque tanquam tunc de agris judicaretur, reliquos nominabant. Id Asclepiades jure in vanum repudiavit. Neque in ullo die, quia par imparve esset, agris majus vel minus periculum esse dixit. Interdum enim peiores dies pares sunt. Nonnunquam etiam in ipso morbo dierum ratio mutatur, fitque gravior, qui remissior esse consueverat. Et paucis interjectis sic pergit: Verum in his quidem antiquos tunc celebres admodum Pythagorici numeri fefellerunt; cum hic quoque Medicus non numerare dies debeat,

beat, sed ipsas accessiones intruere. Ex recentioribus Comes de Flisco, vanitatem criticarum periodorum adstruxerit, lib. de fa-
to perhibens: in praxi numerum hunc dierum non semper
observari, & sæpius aliis etiam diebus crises fieri. Vt mitta-
mus, quæ Helmontius lib. de tempor. it. de febrib. nec non
Christianus Langius in Misc. natur. curios. & Faber in pan-
chymagogo, contra observationem crismum in medium attu-
lerunt.

§. VI.

Mitiorē hac de criticorum dierum existentia sen-
tentiam fovēt, ii qui licet non penitus eosdem negent, au-
tumant tamen, in Græcia tantum, minus in nostris regioni-
bus, succedere crises. Hunc insensum scribit *Waldschmidtus fundam. medic. pag. 113.* nihil opus, nos adeo curiosos es-
se debere in causis crismum rimandis, quum in nostris regioni-
bus & nostro hoc tempore, tales crises, non amplius fiant, nec
prædictiones nostra in morbis acutis adeo certæ, nec indubita-
te fidei, prout apud Hippocratem inveniuntur. Eidem sen-
tentiaæ pollicem premit *Eustadius de die astronom. in nostra*,
inquiens, Germania regionibus, & præsertim sub nostro polo &
in solo nostro, rarius crises perfectæ ad salutem veniunt. Et
Hollerius comment. in aphor. Hippocrat. testatur: in frigidis &
borealibus regionibus rarissime expectari criticas exactas
evacuaciones. Neque ab his dissentire videtur *Baglivus*
Prax. pag. 140. asserens: in Græcia perfectæ succedere crises
in acutis morbis, non vero ita in nostris septentrionalibus
regionibus, idque adscribendum putat aëris puritati & te-
nuitati illius regionis & adjacentis orientis valde elastici,
quum noster aër aqueis & crassis impuritatibus foedatus, hu-
mores quoque corporis magis impuros faciat, ut ad debi-
tum criseos, sive despumationis officium, nunquam perve-
nire possint.

Nonnulli
in Græcia
tantum
succedere
putant.

§. VII.

*Quid per
experien-
tiam
constet
de crisi*

*in eph-
mera,
synocha,*

causa,

tertiana,

*catar-
rhalibus.*

*Pleuriti-
de vera
& peri-
pnevmo-
nia.*

In hisce tam diversis auctorum opinionibus & objectis tot difficultatibus, non expeditior ad veritatem inveniendam via, quam ipsa experientia (quæ facta ingenue sistit ac optima veritatis & ratiocinationis medicæ parens est,) duce patet, prudenter in consilium vocatis observationibus practicis. Quare in exponenda hac crisi-um ratione ac natura, instituto me apprime satisfacturum confido, si exuto omni auctoritatis præjudicio, ea, quæ per institutum, a quadraginta & quod excurrit annis, artis exercitium, mihi iterato de febrium solutione, quomodo? & an certis ac statis diebus eadem contingat? innotuerunt, candide tradam, & postea rationes adæquatas subjiciam. Scilicet frequentius observavi, febres quasdam viginti quatuor horarum spatio perfecte terminari, quas Veteres eapropter dixerunt ephemeræ. Synocham mitiorem quarto, graviorem septimo die, vel per narium stili- cidium, cum proclivitate ad somnum, vel per largum sudorem cedere; ardentes vero & biliosas febres, causos dictas, nisi funestum sortiantur exitum, ut plurimum tertio, vel undecimo die, liberali sudatione, plerumque cum alvi fluxu, ad finem pertingere, expertus novi. Ipsæ tertianæ sæpius intenso cum æstu aggrediuntur; circa tertium autem & quartum diem remittit insultus, ac in intermittentis typum transit. Compluries quoque, & maxime anno MDCCX. Berolini, observavi catarrhales & epidemicas febres cum gravibus symptomatibus ingruentes, quarta autem die solutas, excretionem facta pustulari circa nares & labia, cum sudore pruriginoso.

§. VIII.

In pleuritide vera & peripnevmonia leviori, inter tertium & quartum diem per tussim cum levamine ejici materiam cruentam, hanc in junioribus & sensibilis naturæ septimo, in adultioribus vero & ubi inflammatio paullo profundior, demum circa decimum quartum diem, inflammatio-
nis

nis sequi discussionem, cum largo sudore & liberali fcreatu, respiratione quoque liberiori, identidem experientia compertum habeo; edoctus id crebrius, quum Mindæ Westphalorum, ubi morbus quasi endemius, artem primum factitarem. Pleuritis autem spuria & hepatitidis decursus atque solutio, plerumque septimo, vel undecimo die, per sudorem, aut alvi profluvium, multoties a me annotata. Febris quoque erysipelacea, quæ sæpe cum gravibus symptomatibus, horrore, frigore, vehementia est, interdum etiam delirio invadit, intra diem tertium & quartum conquiescit, amandata ad summam cutim materia acri biliosa, cui nonnunquam tumor glandularum inguinalium jungitur. Qui de pestilentia vera scripserunt observatores, confirmant, febrem pestilentem nonnisi erysipelaceam malignam esse, ac in ea salutis præbere indicium, quando circa tertium, quartum, vel etiam septimum diem, in partibus carnofis carbunculi, aut in glandulis bubones, apparent.

§. IX.

Vix tamen ullo in morbo tam conspicua sunt critica tempora & naturæ ordo, quam in variolis. Hæ enim eodem modo ac morbilli cum truculentis symptomatibus adoriuntur plerumque, quæ facta circa dimidiatum septimum exanthematum eruptione, una cum febre eximie remittunt, idque durat in variolis ad septimum usque, quo succedente primum in facie, postea in pectore, brachiis & manibus, ac demum infimis partibus suppuratione, febris denuo accenditur sic dicta secundaria, quæ ad undecimum usque diem protrahitur & donec pustulæ, eodem ut suppurari inceperunt ordine, a suprema ad infimam corporis regionem siccentur ac demum frustulatim decidant. Et sic in salutem decurrit variolarum morbus, ubi vero vires ferendis symptomatibus non sufficiunt, nono vel undecimo die lethalis accidit catastrophe. Aliud periculosum exanthematum genus sunt petechiæ, quæ quarto, vel septimo die, in corporis cortice com-

continuis parere, & prodeuntes levamen cum liberiori respirationis
& epide- fucceffu inferre folent. Tandem multiplici quoque experi-
micis. entia perfectum teneo : febres multas epidemice grassantes
 continuas putridas, petechizantes, folvi & falutatem fortiri
 eventum circa undecimum diem, per copiofum alvi proflu-
 vium, de quo pluribus egi in *difffertat. de diarrhea in febribus*
malignis faluari.

S. X.

Crifis Quamvis igitur nihil dubii fit, quin in noftris etiam
etiam ex- regionibus, in febribus præfertim acutis, feptenarius dierum
tra f. pte- numerus, magnas mutationes in morbis adducat, ac eodem
nos dies non modo fymptomatum, fed & totius morbi ceflatio, cum
conting. evacuationibus incipiat & fucceffive abfolvatur; nihilomi-
 nus tamen non femper circa feptenos dies crifes, five muta-
 tiones in pejus, vel deterius, fed extra dies quoque hos de-
 cretorios, paribus fcilicet, octavo, decimo & duodecimo, con-
 tingere, per experientiam conftat. Potiffimum in homini-
Quibus bus plebejiis, rufticis, fimplici & populari victu fruentibus, &
maxime qui neque inordinata vitæ ratione neque affectuum impe-
foleennes. tu, fanguinis maffam impuram reddiderunt, parum quoque
 medicamentis utuntur, crifes cum fufficienti evacuatione
quibus perfectas fieri, idemtidem a nobis obfervatum eft. Pariter
minus. multiplici experientia confirmatum teneo, hos, qui corpore
 præditi teneriori cum cute valde perfpirabili, naturæ agilio-
 ris & fenfibilioris, atate juvenes vel viri funt, & febribus a-
 cutis, inflammatoriis & ardentibus laborant, citius crifes,
 quibus morbus ad falutem, vel mortem, terminatur, expe-
 riri, quam ii, qui torpidiores natura, temperamento phleg-
 matici ac succulenti, quippe qui diutius cum morbis conflitantur,
 protracto ad tres & longius feptimanas, febrium difceffu.

S. XI.

Non om- Monendum vero, quod non omnes largæ evacuatio-
nis larga nes, præfertim, quæ per cutem diebus ordinariis criticis fuc-
& vacuatio cedunt, falutem fpondeant, fed illæ tantum, quas fympto-
 matum

matum notabilis remissio, pulsus duri & celeris in molliorem & sedatiorem mutatio, liberior & minus anxiosa respiratio, animus erectior, urina crassior consistentia cocta, corporis quies, somnus placidior, ac ut verbis Hippocratis Sect. II. aph. 13. utar, nox placidior, comitantur & consequuntur. Nam aliquot certe ipsis criticis diebus, sub largis sudoribus occumbere vidi. Neque etiam omnis pathematum remissio, quæ sæpe etiam diebus paribus accidit, crisis censenda, sed ea tantum, cui arteriarum motu magis naturali & respiratione liberiore facta, evacuationes aut iunguntur, aut postea accedunt.

aut sympto-
matum.
remissio.
crisis.

§. XI.

Et certe præclare monet Galenus lib. I. de dieb. decret. In crisi co-
quod crisin cognituro noscenda sit ætas, natura, anni tem-
pus, locus & pulsuum cognitio. Sicut enim hæc omnia de-
crasi & mixtione humorum, nec non dispositione solidorum
ad motus vegetos & promptos, aut imbecilles & tardos
testantur: ita pro eorundem differentia, ipsæ non modo cor-
porum naturæ variant, sed & operationes & effectus qui in
corporibus contingunt, diversi comparent in morbis. Hinc
perpetuæ fere observationis est, quod si sudores largi in fe-
bribus inflammatoriis, etiam exanthematicis, statim in prin-
cipio & ante debitum eruptionis tempus manant, vel etiam
materia variolacea ordinario termino citius expellitur & ex-
anthemata comparent, nec post eruptionem pulsus sedatior
sit, signum pessimi præbeat ominis. Ego quoque fre-
quentius annotavi, quod febres epidemice grassantes, siue
catarrhales, siue rhevmaticæ, siue exanthematicæ, sub ordi-
natis & constantibus anni constitutionibus prognatæ, statas
magis & tempestivas obtineant crises ac solutiones, quam
quæ præsto sunt, ubi aeris temporumque vicissitudines præ-
ternaturales admodum præcesserunt, quippe quæ, non tam
exacte servant tempora, sed difficilioris sunt solutionis, quod
scite innuit Hippocrates Sect. II. aph. 8. in constantibus, inqui-
ens, temporibus, si tempestive tempestiva redduntur, morbi

constantes & judicatu facillimi funt, in inconstantibus autem inconstantes & qui difficulter judicantur.

§. XIII.

Crifis per imprudentem medicationem turbari potest.

Deinceps medentum sagacioribus apprime cognitum est, ordinatos & criticos ad excretionem cum salute tendentes in febribus naturæ motus, imprudenti medicatione mirum turbari, perverti posse ac planè impediri. Egregia sunt quæ hanc in rem affert *Prosper Martianus in comment. in lib. II. de morb. Hippocrat. sect. II. pag. 174. continuo*, inquit, *medicamentorum refrigerantium usu propter febrem, incrassatis humoribus corporibusque densatis, spontanea evacuationes sæpe prohibentur, ut hac non sit levis causa, cur nostris temporibus tam raro fiant crifes, quæ frequentissima erant antiquis.* Neque minus luculentum est *Baglivi* testimonium, qui in *prax. pag. 254. mirari desinant*, ait, *practici, si hodie nec frequentes, nec perfectæ succedant crifes, uti olim in Græcia, siquidem illi Græcarum legum vel ignari, vel obrectatores, a principio morbi ad declinationem usque purgantibus, diaphoreticis, phlebotomiis, spirituosis aliisque imprudenter & intempestive exhibitis medicamentis, agrotantes fere conficiunt; ideo impossibile est, ut humores, per tam diversas remedium seditiones distracti, ad critica despumationis negotium stato tempore disponantur, sed assiduis confusionibus agitati, loco criseos perfectæ in metastases præternaturales desinant, atque hac de causâ nec criseos, nec dierum criticorum, nec aliorum demum natura motuum regulas ab antiquis traditas, in febribus observabimus.* Quapropter exquisita nititur veritate quod idem auctor *l. c.* tradit: *rusticis & qui Medicorum opera non utuntur, crises per sudorem, alvi fluxus aliasque naturæ vias perfici & motu prorsus ordinato fieri.*

§. XIV.

*In primis in vario-
lis & mor-
billis.*

In nulla vero ut supra meminimus febre, tam soleniter observatur criseos successus, quam in exanthematica illa, feretoti generi humano communi, variolarum nempe & mor-

morbilorum; interim non desunt, qui, quod certe mirum, sine ulla solida ratione illum negare audent, aut minimum eundem minus curant, quum tamen merito nobis in febribus sit crisis, quando circa statum quoddam tempus, cum notabili quadam evacuatione, vel etiam excretionem per cutem, symptomatum fit remissio, immo cessatio, cum meliori pulsu & respiratione, quod certe post eruptionem variolarum & morbillorum conspectius obvium, licet postea tempore supurationis, nova secundaria febris, magis symptomatica, accendatur. Quare gravissimum utique in hoc morbo per imprudentem medicationem conciliatur ab ignaris damnum, dum vel nimis expellentibus & calido regimine intempestive instant, vel etiam in contrarium eruptionem cohibent nimis refrigeratibus, ut valde nitrosis, quorum alias præstantissimorum etiam nostro jam tempore pessimus passim invalescit abusus, ut per eosdem motus ordinatos salutare turbatos, multosque, qui revera potuissent servari, periisse, observarim. Quin omnes evacuationes in morbis criticæ, maxime tamen *quin* per sudorem, si supprimuntur imprudenter, vel minus sufficienter succedunt, morbi recidivas, vel pejorem priore, & *omnibus morbis.* solenniter febrem lentam invehere solent, de quo notandus *Hippocratis aphorismus* 12, *sect. II.* ita habens: *quæ relinquuntur in morbis post judicationem, recidivam facere solent.* In exanthematica autem illa febre, quæ seculo abhinc nostris plane *non servata* incognita, jam vero admodum familiaris, in expulsiōe *ma-* *vrat* *cri-* *teriae causticæ ad corporis corticem critica, statim dies non tam ses.* certo observantur, symptomata tamen, quando eadem contingit, semper complacantur. Neque denique in recensentibus observatis criticis omittendum, quod nulla dies in febribus continuis & acutis, etiam exanthematicis, maxime variolis, magis fatalis sit, quam nonus & undecimus, quorum *IX. & XI.* *dies.* alterutro plurimi occumbant, utut reliqui etiam non omni careant periculo.

§. XV.

*Critica
numero
septena-
rio ad-
stricta
mutatio-
nes.
non a prin-
cipio in-
terno.*

Postquam igitur in conspectum ea produximus , quæ circa crises & dies criticos in certa experientiæ veritate ipsoque facto fundata sunt ; nunc , quum nihil fineratione sufficiente in rerum natura fiat , paullo curiosior incidit quæstio : cuinam scilicet causæ illa observatio , quod septenario numero , tam magna , vel in melius , vel deterius fiat mutatio , tribuenda sit ? Veteres , quibus corporis nostri mechanico-organica structura , & rerum corporearum natura , proprietates & operationes , motuumque regulæ , plane erant incognitæ , naturæ , tanquam agenti cuidam & principio rationali omnia secundum ordinem , numerum , mensuram & tempus in corpore nostro producenti adscripserunt , in auxilium etiam vocatis celestium siderum , solis & maxime lunæ influxibus , quum Priscorum sententiam , plures etiam ex nostris sola credulitate sequi video. Sed qui in philosophicis erroneam per petitionem principii argumentationem norunt & nihil in rationali explicatione & deductione , nisi quod clare & distincte concipi , definiti , vel sufficientibus argumentis probari & adstrui potest , admittunt , fictiones quoque a claris & distinctis conceptibus , sterilia nomina , a causis realibus distinguere didicerunt , minime hac philosophandi , quæ pigris , non vero sagacioribus ingeniis accommodata admodum , ratione contenti sunt , eo quod ex gratis supposito tali principio , nullum naturæ phenomenon commode explicari & intelligi potest , tantum abest , ut vel levissimum usum in applicatione ad praxin inde sperandum.

§. XVI.

*Sed moti-
bus in
corpore.*

Neque enim crisis pro actu quodam mentali aut ideali , quales quidem etiam dantur in corpore , haberi potest , sed potius pro mechanico , sive certo effectu motuum , qui fiunt in corpore nostro , a causis potissimum corporeis & physicis. Nam quia omnes in rerum natura effectus & mutationes , ad quas vita , conservatio , nutritio , mors , morbus , medicamentorum operatio & sanatio spectant ,

stant, nonnisi a certis motibus dependent, qui a certa rerum corporearum figura, magnitudine, nexu, situ & vi agente, resistente proveniunt, & omnes inde resultantibus effectus certum etiam gradum ac numerum, sive quantitatem motuum, desiderant; necesse utique est, ut notabiles effectus certo quodam absolvantur tempore, quia hoc nihil aliud est, quam certus motuum sibi invicem succedentium ordo & numerus. *ex summæ*
 Quod vero solennissimæ naturæ operationes in toto universo, *opificis*
 & maxime microcosmo, potissimum ad septenarii numeri ter- *instituto*
 minum, uti ex diversis ætatum periodis & annis climactericis, *derivanda.*
 de quorum rationali explicatione egi peculiari dissertatione, patet, succedant atque contingant, clarissime sapientissimi divini opificis, summam & infinitam in structura universi & præcipue corporis exhibitam artem arguit, eaque propter ordinati hi omnes septenario numero adstricti & comprehensi universales & in sacris quoque obvii effectus, longe rectius a prima, una & infinita causa, Deo, quam a multis particularibus principiis rationaliter & moraliter agentibus, deducuntur.

§. XVII.

Ut itaque clarum etiam ac verum conceptum habeamus de crisi in morbis, illa nobis nihil aliud est, quam mor- *Et sic quoque*
 bi & symptomatum successiva cessatio, quæ propter spasmus *crisum*
 universalem illum, qui in febribus omnes nervosas & vascu- *in morbis*
 losas partes occupat, maxime in emuntoriis resolutum & *ratio red-*
 causam quæ ipsum produxit correctam, vel expulsam, con- *denda.*
 tingit. Jam quum ipsæ febres acutæ, pro causâ, vel stases sanguinis & humorum inflammatorias, vel humorem quendam causticæ corrosivæ indolis, partibus nervosis inhærescentem, habeant; ad stases vero sanguinis in vasis præternaturales expediendas & materiam causticam nervis inimicam corrigendam & ab interioribus ad exteriore emovendam, certi partium solidarum motus & fluidorum appulsus requirantur: aliter sani fieri & res concipi nequit, quam ut

certis etiam temporibus ceſſatio morbi & ſymptomatum ſequatur atque eveniat, quam evacuationes liberaliores, remittentibus ſpaſmis, per cutem, alvum, urinam, potiſſimum vero pulſus & reſpiratio melior & magis naturalis, teſtantur. Quodſi itaque hæc omnia non obſervantur, neque evacuationes junctæ ſunt, certum indicium eſt, morbum, vel ejus cauſſam, nondum per naturam, hoc eſt motus naturales, victam eſſe & ſubjugaram, ſed ingens adhuc periculum corpori imminere, quod cum tempore temper ingraveſcit.

§. XVIII.

*Porifma-
ta ex cri-
ſi præſti-
ca.*

Reddita ſic criſium rationali explicatione, multo rectius nunc Medicus de criſi Veterum perfectæ, imperfectæ, evacuatione critica ſalutari & ſymptomatica, judicare poterit atque decernere. Inde etiam ratio patebit, cur circa ſic dictos criticos dies, rectiſſime monente *Hippocrate*, nihil moveri debeat, ne motus naturæ ordinati & ſalutares, quibus materiam peccantem per convenientia organa ejicit, turbentur & alia incongrua loca non ſine periculo divertantur. Denique prona quoque eluceſcet conſequentia, evacuationes iſtas ſalutares, quibus partim materia, quæ morbum fecit, partim etiam noxii humores, qui ſub ipſo morbo geniti & accumulati fuerunt, excluduntur, non imprudenter cohibendas eſſe, ne vel recidivæ, vel lentæ febres, aut aliæ chronicæ affectiones, ingignantur, ſed potius eo reſpiciendum, ut, ſi motus evacuatorii paullo ſegnioreſ ſint ob debilitatem virium, roborantibus & analeptiſis iisdem adjuventur ac promoveantur.

§. XIX.

*Crifeſ
quoque
preſto
ſunt in
intermit-
tentibus.*

Quæ quidem omnia ſicuti de febris acutis, continuis & ardentibus in propatulo ſunt: ita jam quæſtio indagine haud indigna emergit: num etiam in intermittentibus febribus criſes dentur? quod utique certo reſpectu affirmamus. Licet enim in iisdem dies certi & ſtati, qui etiam ab eſſentiam criſium non pertinent, minus obvii ſint: ubi tamen ſolu-

solutio morbi & symptomatum successiva fit, junctis largioribus evacuationibus, ibi recte nostra sententia crisin fieri asseritur, eaque propter quum in omnibus paroxysmis febrium id eveniat, ac sub declinatione largi sudores fluant, urina cocta & cum sedimento appareat, non raro etiam vehementia symptomatum in tertianis per excretiones purulentas circa labia, item in quartanis per pustulas scabiosas & ulcerosas, humore quodam acri corrosivo a partibus interioribus nervosis ad exteriores propulso, mitigetur atque discedat, crises in iisdem contingere nequiquam erit negandum.

§. XX.

Neque etiam in aliis chronicis morbis insolentes ad eo sunt criticae solutiones. Nonnulli enim morbi, quantumvis diuturni ac rebelles, ita sunt comparati, ut cum die & tempore, maxime circa diversas novas ætatis periodos, sponte solvantur ac cedant. Ac de epilepsia quidem notum, quod infantili & juniori ætati, quam maxime sit infesta, pubertatis autem tempore ac erumpente in virginibus mensium fluxu, sæpissime discedere solet. Ut adeo experientia respondeat aph. 20. Sect. III. Hippocratis: plurima affectiones pueris judicantur partim in quadraginta diebus, partim in septem mensibus, partim in septem annis, partim ad pubertatem accedentibus. Deinceps omnes dolores graviores, ce-
phalalgia, cardialgia, atroces colici, nec non paroxysmi epileptici & spasmodico-convulsivi, crises suas servant, quibuscum complacantur. Ipse porro crebrius observavi, quod graves nervorum & capitis morbi, motus convulsivi ac epileptici, item vertigines & insanix, quin pathemata spasmodica, quæ hypochondriacam melancholiam referunt, propulsis ad corporis superficiem purpureis efflorescentiis, aut erumpentibus pustulis ulcerosis, felicissime terminentur, præsertim si Medicus congrua medicina salutarem hanc crisin prosequatur ac tueatur. Nam sæpius hi morbi a caustica

quadam scorbutica materia, nervosis partibus firmiter inhaerente, natales ducunt, quæ, si ad exteriores partes robore naturæ amandatur, graves istæ internarum partium affectiones conquiescunt. *Sennertus* quoque, *Rhodius*, *Tulpius* & *Pechlinus* multa consignarunt exempla, maniam, melancholiam & epilepsiam, diarrhœa, excretionibus cutaneis & abscessibus discessisse. Sopores profundos, vertiginem, mentis turbationem, nec non asthmata convulsiva, accedente dolore podagrico, vel erumpente hæmorrhoidum fluxu, judicatos fuisse ac penitus sublato, sæpius vidi. *Hydropem* anasarcam, oborta spontanea diarrhœa, *Forestus lib. X. obs. 31.* & largissima narium hæmorrhagia *Hildanus Cent. I. obs. 50.* sine medicamentis subsedisse ac evanuisse, testantur. Et quæ plura hanc in rem facientia, in superioribus jam cap. *II. & IX.* nec non antecedente *XIII.* ac *XII.* sparsim inferuimus.

aliisque
morbis.

CAPVT XV.

DE

CERTIS IMMINENTIS IN MOR- BIS PERICVLI IPSIVSQUE MORTIS INDICIIS.

§. I.

Prognosis
utilis &
necessa-
ria.

Quamvis non negandum sit, nobilem illam de morborum decursu & maxime eventu perite judicandi scientiam, non directe ad finem artis obtinendum pertinere: nullum tamen dubium est, quin eadem utilis admodum & scitu necessaria sit, & quam maxime ad evincendam certam artis nostræ rationem ipsiusque Medici existimationem

tionem fervandum conferat. Nam præclare pro more suo Hippocrates, artis prognosticæ facile princeps, statim in limine prænotionum tradidit: Medicum prænotionem adhibere optimum esse mihi videtur. Prænotens enim & prædicens apud agrotos, & præsentia, & præterita, & futura, & quæ ipsi agroti delinquent exponens, fidem utique fecerit, quod agrotorum res magis cognoscas; quare audebunt homines seipsos Medico committere. Idem lib. prædict. Sect. III. inculcat, in prædictionibus inquiens, Medici illius probe memores esse debent, quod si cui successerit prædictio, is apud agrotum intelligentia prædium admirationi fuerit; si vero quis aberraverit, supra hoc quod odio habetur, forasse etiam insanire videbitur.

S. II.

Dolendum modo, excellentem hanc & divinam fere *Ardua* in morbis præfagiendi scientiam, tam arduam, tam infidam, *tamen &* incertam & dubiam deprehendi, ut non immerito iudicium *difficile.* de morborum eventu ex vero formandum sit in difficillimis, & Medici etiam periti sapissime in hoc delinquant. Nam quia Veteres non ex integris morborum historiis, sed paucis duntaxat circumstantiis, regulas prognosticas desumserunt; neutiquam certe mirum est, parum certi iisdem inesse ac easdem sapius experientiæ non respondere. Accedit, quod, quum primi Medicinæ auctores, neque vitæ, neque morborum aut mortis, in quo posita sit, naturam & rationem intellexerint, structuræ quoque corporis humani atque ex ea pendentium motuum plane ignari fuerint, ex observationibus etiam plenis veras causas & notas futuri in morbi eventus, convenienti & rationali modo elicere haud potuerint, sed potius etiam hanc artis nostræ partem empirice tantum coluerint, eaque propter symptomata, sub quibus aliquoties ægros mortuos observant, pro funestis illiæ declaratione, quum tamen eadem pro diversitate corporum, morborum, regionum, morbi etiam temporum, mirifice varient, ut hinc

derivata prognostica præcepta rarius veritati & experientiæ sint consentanea. Recentiorum autem quamplurimi vix alia incedunt via, & simulac artem salutare opificii instar addiderunt, ad ejus exercitium, minus instructi iis subsidii quæ rationalem efficiunt Medicum, properant, aut statim inter initia morbi præcipitanter nimis, antequam certas notas habere possunt, judicium interponunt, eaque propter non possunt non in prognosi formanda graviter delinquere & falli, ut tanquam moribundum deferant, qui postea convalescit, aut vicissim vel juramento, ut novi, fidem faciant, convalituum, qui elapsis vix aliquot horis, occumbit.

S. III.

*Addi-
scenda
tamen
ex certis
signis.*

Sed quo magis difficilis & ardua hæc prælagiendi ars est, eo magis laborandum Medico, quo eandem addiscat & potissimum certa ratione & experientiæ subnixâ imminētis in morbis periculi ipsiusque morbis signa, acquirat, de quo etiam non est quod desperemus. Nam illud negari nullo modo potest, omnes eventus, sive ad salutem, sive interitum referendi sint, a certis, adæquatis & proportionatis causis proficisci, nec sine his contingere posse. Quodsi itaque causas, cur æger necessario ex morbo mori debeat, quis probe noscat; nullum sane est dubium, quin ex earum præsentia futurum interitum conjicere possit atque prædicere. Vicissim quando artifex exacte callet, quo modo, quo tempore, quibus viis aut excretionibus morbus solvatur & æger ad sanitatem traducatur: ex his utique cōfidenter & cum certa ratione de salute futura judicium promere poterit. Proinde quum in superioribus, & maxime capite quarto, genealogiam causarum, quæ sanitatem immediate pervertunt, & proxime antecedentibus ea, quæ de cognoscenda morborum ex variis signis solutione, scitu necessaria, solide & rationali modo exposuerimus: expedita jam via est, ad eruenda ac sistenda

*Instituti
ratio.*

stenda

stenda futuri in morbis vitæ discriminis signa atque indicia, quibus tuto in edendo præfagio inniti queat artifex.

§. IV.

Quod igitur ad morbos acutos, sive febres, attinet, *De iudiciis periculi in acutis, sive febribus.* ex antecedentibus ut notum supponimus, in quavis harum duplicem obvium esse motum, probe invicem discernendum, alterum summe pernicialem & vere morbosum spasticum, qui a circumferentia ad centrum tendit, alterum salutarem, post spasmum a centro ad circumferentiam directum, cujus beneficio exitiales illæ spasticæ partium stricture laxantur, inflammatoriæ stases discutuntur & tubuli excretorii, stricti antea & clausi, felicissime adaperiuntur. Jam quicumque binorum horum sibi oppositorum motuum genium, potentiam, effectus & mutuas eorum actiones & relationes penitus novit: is utique magna cum ratione & prudentia in omnibus agere, pericula prudenter prædicere & faustos eventus quam optime prænunciare poterit. Nam si infesti spasmus *in genere* ac inde dependentes inflammationes, congestiones ac stases sanguinis, a motu calido resolutorio febrili, certo interposito tempore, non digeruntur ac discutuntur, sed firmius persistunt, in proclivi est judicare: demum succubituram naturam, putredinem insequuturam ipsamque mortem certo futuram; id quod eo magis metuendum, quando spasticæ stricture circa dies criticos, corpore a morbo jam debili reddito, non conquiescunt, sed potius incrementa sumunt.

§. V.

Ut autem lethiferi spasmodorum effectus eo clarius *Indicia* notescant, breviter strictimque indicia exponemus haud *ex* fallacia, e quibus de illorum præsentia ac vehementiæ gradu conjiciendum. Tenendum igitur: exitiales has spasmodicas stricture, non unam sed plures in corpore, cum majori, vel minori discrimine, adoriri partes, eaque propter prout partes variant, variis quoque dignosci signis. Nimirum quando *spasmus* *do cutis*

do rigor cum frigore circa morbi vigorem observatur, vel sæpius recurrit, si corpus non æqualiter molle, sed durum, calidum & asperum est, si exanthemata retrocedunt, vel tantisper absconduntur, exteriora horrent & frigent, fonticuli quoque vel ulcera antea manantia siccantur, nihil boni portendunt, sed summum mortis periculum minantur, quapropter spasmos in superficie corporis, sanguinis & humorum motus ad interiora coactus, pessimas inflammatorias congestiones facile suscitatur, & impedit, quo minus morbida materia excre-
toriorum tia perspiratione corpore possit expelli. Pergunt quoque in acutis spasmi plerumque ad excretoriorum emissaria, urinarios nempe tubulos & ani ostium, ut urina tenuis aquosa reddatur & alvus plane dura, tensa & oclusa sit. In quibusdam etiam, ob urgentem reciprocam strictionem, frequens mectendi & desidendi adest stimulus.

§. VI.

*Fibrarum
cordis &
tunicar.
arteria-
rum.*

*nervorum
pneumo-
nicorum*

*œsophagi
& ven-
triculi.*

Longe gravius periculum imminet, si quando spasticæ contractiones interiores ac nobiliores, quæ motibus vitalibus vacant partes, infestant. Nam pulsus parvus, contractus, celer & durus, item inæqualis & intermittens, non aliunde, quam a spastica & convulsiva strictione nervorum, qui cordis fibræ & tunicis arteriarum implantantur, proficiscitur, & semper in statu morbi plurimum periculi portendit. Ejusdem notæ respiratio crebra, anxiosa & difficilis est, ubi in critica tempora incidit; quandoquidem sicut sapienti Hippocratis effato in prognosticis, facile spirare magni momenti est ad salutem in omnibus morbis, ita crebrior & ægra spiratio in acutis, minus fausti semper est ominis. Nervis præcordialibus spasmò affectis, summæ urgent anxietates, inquietudo corporisque jactatio, ac ægri crebrius lectum situmque mutant. Oesophagi & ventriculi membranæ nerveo-musculares quum stringuntur, vomendi adest conatus, potus regurgitat, non infrequenter e faucibus limpidum serum stillat, deglutitio difficulter perficitur ac inexhausta sitis, cum oris

oris & linguæ ariditate affligit, quibus raptò in consensum simul duodeno, flavus corporis, maximeque faciei, color iungitur.

§. VII.

Vbi vero atrocìa spasmì latius diffunditur ac univer-^{In univer-}sum nervosum genus graviter concurrìt atque convellit, ad ^{sa nervo-}ultima jam ventum esse indicio sunt ræres acuminatæ, tem-^{so genere}pora collapsa, aures frigidæ & languidæ, oculi concavi, cutis circa frontem dura ac tensa, color fuscus aut perpalitus, quibus facies Hippocratica, certus mortis nunciùs, describitur. Huc quoque referenda nervorum distensio, quæ semper in acutis terroris & periculi plena, iuxta *aph. 6. Sect. IV.* ac potissimum cognoscitur, quando æger supinus cubat, genua contrahit, pronus subinde ad pedes ruit, brachia & pedes nudos exporrigit & inquietus iactitat, ungues ac digitos pallidos habet, manibus floccos legit fimbriasque ducit, vel in vicino pariete, si qua minuta eminent, carpit, quibus si demum tendinum subsultus accedunt, hora adest decretoria.

§. VIII.

Quamvis autem plurimi ex acutis morbis ex inflam-^{signa in-}matione interna primam trahant originem eaque propter ^{flammati-}periculo non careant; sæpissime tamen in ipso vigore mor-^{onis fere-}bi novæ superveniunt, vel in ventriculo, vel cerebri mem-^{lis.}branis inflammationes, quæ nunquam non gravissimi sunt discriminis ac mortis prænunciæ. Atque hæ inflammationes, si ve alterutra earundem, si ve ambæ simul adsint, non modo in malignis, petechialibus: contagio infestis & castrensibus febribus, sed & in aliis acutis, synochis, ardentibus, purpureis, variolis & morbilis, circa septimum, nonum vel undecimum diem accendentes, ægrum certissime perimunt. Et ^{in ventri-}stomachi quidem inflammati signa sunt, quando intensus æ-^{culo.}stus & ardoris exquisiti sensus, cum acuto circa præcordia dolore urget, & circumscripta ibi regio tactu durior precipitur,

extrema algescunt, summa anxietas & inquietudo affligit, si-
que omne: quicquid vel medicamenti, vel potus assumtum,
aut protinus vomitu reicitur, aut retentum maximam creat
molestiam ipsamque anxietatem adauget. Quandoque tam
late inflammatio serpit, ut per oesophagum ad ipsas fauces
propagetur, quæ inde ardentibus dolorificis pustulis obsi-
dentur & viscido corrupto muco iugiter obducuntur, ex quo
cerebri mortis præsagium petendum. Periculosior hæc, licet sæpius
membra- ipsi iungatur, est illa mortem brevi antecedens membrana-
nis. rum cerebri inflammatio, Græcis phrenitis dicta, quæ ple-
rumque assiduam & pertinacem vigiliam impensumque capi-
tis dolorem excipit. Hanc futuram rigor, urinæ copiosæ
ac tenues, aurium tinnitus, fortis pulsatio in capitis interio-
ribus & paucæ stillantes e naribus sanguinis guttæ nunciant:
præsentem autem produnt oculi rubicundi, scintillantes &
torvi, mentis alienatio, sermo inconditus, male cohærens, la-
crymarum involuntarius sæpe effluxus, dentium stridor cum
abolita humidi appetentia, quæ si convulsionibus demum sti-
pantur, mortis ferunt significationem.

§. IX.

*Maligni-
tas ex
qua cog-
noscenda.*

Atque hæc sunt præcipua pathemata & signa, quæ vi-
tam in discrimen adduci in acutis testantur, obvia maxime
in iis, qui temperamento cholericis, sanguinei vel sanguineo-
cholericis, ætate invenes & viri, exquisitiori sensu præditi, ad
iram proclives, habitu corporis macilenti & qui spirituosis
nimium indulserunt. Secus vero evenit in his, qui succu-
lenti & spongiosi sunt corporis, phlegmatici, ac vires vel per
morbos, inediam aut diuturnam moestitiam, vel enormes san-
guinis profusiones perdiderunt. Nam hi non tam per vehe-
mentes spasmos & gravia dolorifica pathemata ingulantur,
quam potius ex motuum imbecillitate atque defectu par-
tiumque atonia mortem oppetunt, & stagnationes ac sta-
ses sanguinis atque humorum statim in principio in putridam
corruptionem inclinant. Et licet sic dispositi ægri non sine

ventriculi & cerebri membranarum inflammatione pereant: hæc tamen non tam gravibus spasmis & symptomatibus stipatur, sed sub mitiori insultu in corruptionem concedit. Hinc quia morbus plerumque lenioribus incedit symptomatibus, sæpius Medicis imponit, ut in prælagio ferendo fallantur, quum tamen ob occultam perniciem eo difficilioris sit iudicii eoque maiorem foveat malignitatem. Cognoscuntur autem maligni eiusmodi morbi his indiciiis: cum levi frigori & horrore accedunt, vires statim mirum prostratæ sunt, pulsus languidus & frequens simulque contractus micat, in situ erecto facile animo deficiunt ægri, somnus nullus perpetua tamen ad eum adest inclinatio, & si obrepit, major virium postea percipitur languor & mens ipsa emovetur, decumbentes de nullo dolore, siti, vel magna molestia conqueruntur, inquieti tamen sunt & sese jactitant, sique demum extrema algescunt ac pulsus deficere incipit, nec in carpo amplius percipitur, lethalis imminet catastrophe.

S. X.

Quumque porro omnis inflammatio demum in necrosin five sphacelofam putredinem transire soleat: noscenda quoque sunt signa, quæ factum hoc esse subindicant. Ac tum quidem internus frigoris percipitur sensus, dolor acutus antea & acerbus, circa caput vel inferiores partes subito conquiescit, mens delira quodammodo ac se redit, virium vero defectus increfcit pulsus penitus deficit, vel valde inæqualis, angustus & intermittens est, alvus stricta laxatur & vel præter voluntatem fertur, vultus foedus ac pallens compareret, tempora, cervix & pectus gelido sudore madent, extrema corporis frigescunt, borborigmî ac sonitus in ventre exaudiuntur & liquida immissa sonitum quando descendunt emittunt, *als wann sie in einen hohlen Topf fielen.* Quæ omnia si præsto sunt, mortem adesse manifesto produnt, eo quod ob sphacelum vires fumentem, partium atonia & virium la-

*Transitum
inflammationis
in sphacelum indicia.*

pfus adeo increfcit , ut omnis in corpore motus , & cum eo vita, exspirent.

§. XI.

In purpura alba.

variolis

Sunt vero adhuc alii affectus qui & inflammatione, & atrocioribus fpasimis perimunt , in quibus non minus instans vitæ discrimen ex obviis phænomenis conjici potest. Nimirum febris cum purpura alba , quæ lymphæ valde vappescentis & corruptæ soboles est , si in fine associatur aliis acutis febribus , item variolis , morbillis , vel etiam in puerperio post lochia suppressa accedit , nunquam periculi expers est , ac ut plurimum per inflammationem interiorum partium , præsertim ventriculi & intestinorum , necat. Funestum autem suggerit indicium , si æstum bræcordiorum summamque anxietatem internus frigoris sensus , cum pulsu parvo , debili & inæquali excipit , purpura disparet , animi defectio , mens turbata & spiratio difficilis adsunt. Eundem in censum referendæ variolæ , quæ ubi statim primis diebus cum gravi dolore lumborum & delirio ingruunt & præmature secundo mox die exanthemata , in cute aspera instar purpuræ cum maculis , comparent , ac die quinto & sexto , post plenam eruptionem pulsus non sedatior fit , sed celer micat totumque corpus pustulis oblitum est , raro quenkum in juvenili ætate evasisse scio. Neque minus periculi metuendum , ubi circa nonum diem gravissimus ex suppuratione dolor accedit , qui sæpissime omnia , quæ salutis spem ostendere videntur , pervertit atque immutat. Hæc enim ardente sua vehementia , universum genus nervorum spasmis afficiens summas parit anxietates , corporis jactationem , pustularum subsidentiam , donec respiratio difficilis , mentis turbatio , convulsio & pulsus languidus , parvus supervenientes , brevi vitam eripiant.

§. XII.

sumto veneno aut

gante sumto moriuntur , hos identidem inflammatio sphacelastica , lola , teste anatome practica , e medio tollit. Mortis autem

præ-

præfagium ferunt ardores interni & summæ anxietates, pul-
sus valde parvus & inæqualis, vel plane deficiens, cum sudo-
re frigido, delirio & convulsione, quam, a pharmaco put-
gante concitatam ipse *Hippocrates Sect. VII. aph. 25.* & pas-
sim alibi, mortiferam pronunciat. Qui ex dolore a calculo
decedunt, in his plerumque inflammatio lethalis ventriculi
& meningum supervenit. Quod si enim vomitum & acu-^{dolore}
tissimum dolorem febris sequitur, cum magna anxietate & ^{calculi.}
fiti vehemente, postea singultus & delirium cum extremo-
rum frigore accedit, æger non diu amplius erit superstans.
Illud vero atrocissimum dolorum in intestinis genus, quod
colicæ convulsivæ nomine notum, sæpius quoque perimit, ^{colica con-}
dum intestinum rectum ob exquisitissimum sæpe ex stagnan-^{vulsiva.}
te cruore doloris sensum, & inflammatione & sphacelo affi-
citur, sub quo ex putrescente intestino foetidissima prodeunt
excrementa, pullus frequens & debilis, eum summo virium
lapsu, sequitur, & sphacelosa corruptio quandoque ad extre-
mas partes ipsumque scrotum serpit, ut obrepente animi tan-
dem defectione, mors ipsa succedat.

S. XIII

In passione iliaca, ubi acutissimi infestant dolores,
cum contumaci alvi constipatione & vomitu assiduo etiam ^{Passione}
male olente accedente singultu, delirio, gelido sudore, ^{iliaca.}
extremorum frigore nervorumque distensione, certos adesse
multis prodromos censendum, observante id dudum *Hippo-*
crate Sect. VII. aph. 10. sic perhibente: *ab ileo vomitus, sin-*
gultus, convulsio aut delirium, malum. Cholericus morbus
quando stipatur impensiori dolore & torsionibus, tam supe-^{cholera.}
rius, quam inferius, magno impetu humores, præsertim vi-
rides, eliduntur, sitis vix extinguisibilis urget, facies flavescit
vel pallefcit & pulsus parvus & concisus deprehenditur, in
incipiti ægrum versari significat. Vbi vero arteriarum mo-
tus sensim gracilefcit ac plane deficit, crura contrahuntur,
sudor frigidus prodit animoque liquuntur ægri, inflammatio-

*Dysente-
ria.*

nem in sphacelum jam concessisse indicia confirmant. Dysenteria quoque si languentem adhuc a priori morbo corripit, raro servatur æger, quia facilis tunc ad putridam corruptionem aditus, quam præsentem torminum acutissimorum subita remissio, exteriorum refrigeratio cum summa virium jactura indicant, futuram autem, singultus, cardialgia, præcordiorum æstus atque anxietas, pernicialis in ventriculo inflammationis signa, nunciant.

§. XIV.

*Signa pe-
riculosa.*

*in cynan-
che.*

*peripnev-
monia.*

Accedunt signa, quæ suffocationem ipsiusque periculum minantur & antecedunt, conspicua in iis, qui gravibus pectoris morbis, angina, peripneumonia, empyemate, catarrho suffocativo, asthma convulsivo, thoracis hydropse detinentur actandem pereunt. Nam omnes hi affectus non modo liberum aeris in pulmones ingressum & ex iis egressum intercipiunt, sed & sanguinis per pulmonum vasa, ex uno in alterum cordis ventriculum, sufflaminant & tollunt, ac sic jugulant. Angina quidem, quæ musculos laryngis internos occupat, & Græcis cynanche dicitur, ubi neque in cervice, neque in faucibus, quicquam vel tumoris, vel ruboris, conspicitur, exquisitissimus tamen dolor ac vehemens febris affligunt, citissime per suffocationem necat. Ac tum quidem, ut verbis utar *Lomii observat. medicinal. lib. II.* oculi vertuntur & rubent & veluti iis qui strangulantur prominent, vox impedita nihil significat & qualis catulorum est tenuis editur, os apertum hiat frigidi aeris cupidum, ex eoque spumans saliva movetur, lingua exferitur, potui datus liquor per nares remeat, ipse æger totus inquietus est, crebro e cubili exsilit, tandem vero strangulatu atque syncope oppressus perit. Ita etiam præfocatione occidit peripneumonia, in qua si nihil plane excreatur, sed anxia adest spirandi difficultas & magna angustia, inquietudo, sputum intus in pectore strepit, pulsus inæqualis & intermittens ferit, alvus infirmis iam viribus sponte fertur, quod screatu operose ejicitur.

tur spumofum, modo flavum, modo cruentum est, continua simul urget vigilia, phrenitis iungitur, ægri cupidissime frigidam auram captant, proni & erecti cubant & reclinati præfocari videntur, quinto, vel ad summum feptimo die, certo ingulantur.

§. XV.

Qui afthmæ fic dicto convulfivo, idemtidem fuffo-*Asthmate*
catione pereunt. Nafcitur enim hoc malum plerumque ex *convulfi-*
hydropc thoracis, dum ruptis hydatidibus, humor effufus pul-
monum impedit liberam expansionem, ut nec aer ingredi,
nec fanguis per eos curfum conficere queat. Oritur quoque
ubi interior bronchiorum tunica, multis & magnis glandulis
obfita, ita anguftatur, ut nec fpiritum in pulmonibus elidi,
nec novum recipi patiatur. Quandoque convulfivus qui-
dam fpafmus tam fortiter bronchia concutit atque coarctat,
ut ægri strangulatione mifere intcreant. Hinc in omnibus
hifce afflictionibus fumma anxietas & inquier cum tremula
fpiratione, pulfus inordinatus & inæqualis, nec non fibilus
ac ftrepitus in pectore præfto funt, ægri crebrius locum fitum-
que mutant & nihil nifi fpumofi aut cruenti quippiam extundi-
tur, tantemque inalgefcentibus corporis extremis, fyncope
& fuffocatione opprimuntur.

§. XVI.

Idem contingit in catarrho fic dicto fuffocativo, qui
maxime fenes, imbecilles atque infantes perimit, ac plerum-
que paralyfi nervorum pnevmonicorum ortum debet. Tra-*Catarrho*
hitur in hoc pariter fumma cum difficultate & anxietate spi-*fuffocati-*
ritus, & quia bronchiis, fecedente a fanguine humore vifcido
ferofe, repletis, nihil tamen fputi eiicitur, aer admiifus ftrepitum
& ronchum in fiftilis edit, donec præclufo penitus aere æger
fuffocetur. Quod antequam evenit, pulfus aliquot fæpe
ante horis intermittit, fenfim gracilefcit penitusque interci-
dit, nonnunquam etiam mentis turbatio cum extremorum
frigore fupervenit. Pari quoque ratione phthifici, fi ob vi-*Phthif.*

rium plenarium lapsus humor purulentus, copiosus, in exesa ampla cavitate recunditus, non eliditur, sed exspuitio cessat, præcluso spiramento, expirant, ita tamen, ut periculum & funestus eventus diu ante colligi possit, quando totum corpus tabe consumitur, assidua hæctica febris urget, genæ rubent, alvus nimis fluit, ungues pallent, pedes intumescunt, oculi concavi & nares acuminatæ apparent.

§. XVII.

*In morbis
chronicis
ex corrup-
tione vis-
cerum.*

Ex morbis autem chronicis eminent maxime hydrops, scorbutus, cachexia, marasmus, hæctica & tabes, quorum periculum & futurus lethalis exitus pariter certis quibusdam signis potest dignosci. Scilicet qui iisdem decumbunt, lento gradu ad mortem procedunt, propter successive incrementem & latius serpentem viscerum ex humorum stagnatione & extravasatione corruptionem, quæ, quoniam nulla arte arceri aut per sanari potest, certo mortem ingenerat. Indicia vero viscerum in inferiori ventre corruptorum adeoque sequuturi interitus sunt, appetitus penitus prostratus, cum fastidio etiam eorum alimentorum, quibus sani mirum delectati fuerunt. Deinde lenta febris si incrementa sumit & pulsus etiam mane post somnum celer est, nunquam non internam corruptionem produnt. Denique summus virium cum respiratione difficili lapsus, somnus valde laboriosus & plus debilitans, quam reficiens, in pessimis sunt. Hæc enim si diutius affligunt nullisque remediis mitescunt, certo mortem prælagunt, maxime si corpora sunt senilia, vel ex morbo præcedente chronicis eiusmodi passionibus implicita.

§. XVIII.

*Specia-
tim hy-
drops.*

Quod speciatim ad hydropem attinet, si is post asthma diuturnum cordisque palpitationem, vel ex induratione hepatis post quartanam sequitur, ægrum non facile servari posse, confidenter pronunciandum, sique urina pauca, turbida & rufa redditur, omen est admodum periculosum, & simulac superiora contabescunt faciesque flavescit, mortem aliquot

aliquot menses antequam accedit, haud dubie praesagire licet, quæ etiam certissime, febre aucta & respiratione difficiliore reddita, sequitur. Pariter his, qui sapius, & maxime post motum corporis & animi vehementiorem, gravem ac contumacem cordis palpitationem sentiunt, ac postea asthma convulsivum, hæmoptysin, aut hydropem incurrunt, diu mortiferum discrimen prædicipotest. Nam horum omnium causa polyposa in cordis vasis concretio est, quæ nulla ope submovenda, tandemque concursantibus aliis causis, funestum ingenerat morbum, cuius periculum eo certius & gravius, si subito & sine manifesta causa sæpe anima deficit, quod certissimam reddit polypi suspicionem, qui repentinam mortem inferre solet, confirmante id jam Hippocrate, Sect. II. aph. 41. *quisque sæpe multumque sine causa animo linquitur, is subito mori consuevit.*

S. XIX.

In cachexia quando totum corpus intumescit ac pal-Cache-
lidum fit, ciborum fastidium adest & crebrior male olens vo-xia.
mitus urget, per alvum pauca feruntur, urina cruda & pau-
ca secedit, spiritus difficulter trahitur, & e corpore adversus
odor spirat, accedente postremo pulsu frequenti, mortem
aliquot mensibus ante prænunciare licebit, quæ eo certius
insequitur, quo ægrotans majora in victu nimioque potu errata
admisit, vel diuturna animi mœstitia fatigatus fuit. Hepar, *corruptio-*
amplissimum illud abdominis viscus, ubi mortifera corruptio *ne hepatis*
occupat, fastidium cibi adest, maximeque carnum nausea,
frequens & multa urit fitis, febres urget, vires prosternun-
tur, singultus quassat subinde diaphragma, vomitu quoque
excutitur serum vel flava bilis, ipsumque corpus tabe peni-
tus sensim marcescit, & sæpissime certe in his pathematibus
defunctis, jecur sphacelosum plane & nigrum sectione de-
prehendi. Pariter ventriculi exulceratio longum & lethale *& stoma-*
lem adducit morbum, & cognoscitur, quum summa anxietas *chi exul-*
& vomitus cibum assumptum excipit, quæ oblata acri salina *ceratio-*
(III.) *Yy* aut *ne.*

aut spirituosa medicina augetur, corpus interim contabescit, pulsus celer jugiter vibrat, extrema rigent & quandoque horrent, fonticuli siccescunt & ad cicatricem ducuntur, somnus accisus est & laboriosus. Et his feralibus qui detinentur passionibus, tertio vel quarto plerumque post mense expirant, ac diu ante mortis signa circumferunt.

§. XX.

**Cancro
exulce-
rato.**

**retroce-
dente e-
rysipela-
te &c.**

**carbun-
culis**

**nimiis
hæmor-
rhagiis.**

Cancro exulcerato nemo facile servatur, propter summam corruptionem, quam sanies nigra, tenuis, odore abominabilis prodit, & lenta febris cum virium defectu, somno anxio, laborioso vel nullo comitatur, donec ultimo animi defectio & mors sequatur. Porro accidit interdum, ut inflammationes in exterioribus partibus consistentis, cujus generis sunt erysipelata, podagra & chiragra, retrocedant ad interiora & cito vitam eripiant, non alia ratione, quam inflammatione & spacelatione ventriculi, aut intestinorum. Majus discrimen est, si in peste carbunculi vel bubones interiora repentes disparent, vel non rite prodeunt. Hoc enim si contigerit, horrore ager concutitur, summa anxietate & inquietudine affligitur, æstus cum exteriorum refrigeratione regioni ventriculi insidet, ad vomendum est conatus, vel etiam singultus accedit, donec ultimo sub mentis turbatione & syncope, ager exanimetur. Qui ex nimia sanguinis profusione, ut infelici abortu, hæmoptysi, vomitu cruento, vel morbo nigro Hippocratis, aut gravi hæmorrhagia in febribus obeunt, ex animi quidem defectione & syncope pereunt, notabile tamen est, quod plerumque vehemens fitis, inclinatio ad vomitum & pulsus cum debilitate frequentia, nec non artuum distensio, præcedant, indicio, sanguinem in partibus interioribus, ventriculo & capite subsistentem, quosdam adhuc movere spasmos.

§. XXI.

**Parturi-
entibus.**

Superfunt signa mali ominis in partu ac puerperio, quibus plures feminae discedunt. Nimirum quando mulieres

vel

vel ob incongruum foetus, praesertim grandioris, situm, continuus spasms, doloribus ac laboribus per aliquot dies assiduus, junctis simul ardoribus internis vehementissimis, quos pulsum celeritas arguit, defatigatae sunt, accidit saepius, ut parturientes, vel partu brevi defunctae, dejectis repente viribus, in forte animi deliquium, vel affectum apoplexiae similem incidunt, nullaque arte vel ope vires & vitam recipere possint. Hic autem affectus, ubi aliquot horas perdurat, nec penetrantissima medicina, qualis est spiritus salis ammoniaci cum calce viva paratus & oleo rutae essentificatus, naribus intrusa, anima revocari potest, lethi signum est. Si facies sub synoptica hac affectione colorata manet, sanguinem ex vehementioribus spasms impetuose ad cerebrum coactum hoc, apoplectico per omnia simile malum, produxisse subindicat, ac plerumque post obitum ex ore & naribus serum sanguineum foetidum effluit. Saepius etiam evenit, ut foetus, exspirante sub partu matre, post mortem demum, ob relaxatas tum vias & interiorum fermentativum motum, foras ex utero mortuus pariter propellatur.

§. XXII.

Quae in puerperio decedunt feminae, ut plurimum ex *Puerperis* retento impuro sanguine, qui enixo partu ex utero salutari-*ris*. ter per aliquot dies manare solet, graves primum patiuntur dolores, quos, si non excipit effusio lochialis sanguinis, sed fluxus magis obstipatur, uteri plerumque inflammatio & febris valde exitiosa sequitur. Testatum facit febrilem hunc morbum incendium ab inferioribus locis usque ad cordis regionem vergens, cui si magna anxietas, virium prostratio, inquietudo & omnis appetitus dejectio junguntur, postea sensus internus frigoris cum horrore accedit, pulsus frequens, parvus & debilis micat, visus quoque obscurare incipit, mortem ex sphacelo instare, haud dubia est significatio. Plurimae ex puerperis integra mente obire solent, & licet haec antea turbata fuerit, paucis tamen ante mortem horis saepe

ad se redit, ut imperitiores rem penitus in vado esse sibi persuadeant, pulsus tamen moribundus proximi interitus semper certus est index. Alia phaenomena praesto sunt in puerperis, quae ob nimium sanguinis post partum & in puerperio profluvium, pereunt, quippe tunc lentus cum pulsu frequenti & debili calor assidue urget, neque etiam mane post somnum sedatur, juncta praeterea est inappetentia viriumque plenaria dejectio, & circa exitum puerperii, hoc est sexta post hebdomade, syncoptica plerumque mors succedit.

§. XXIII.

*Ac infan-
ribus.*

Denique morbi, quibus infantes decedunt, ut plurimum spasmodici sunt & convulsivi, inflammationem & sphaecelum, praesertim ventriculi, intestinorum, aut capitis, inducentes. In teneriori enim aetate, ob dolores ex dentitione & abdominis ex lacte corrupto tormina acutiora, facilis in epilepsiam & convulsionem, febres quoque atque asthmata est lapsus. Quod si vero epilepticus paroxysmus unus alterum crebro consequitur, & alvus antea fortiter clausa, sponte jam dimittit excrementa, mirum foetida & nigra, vox simul clangosa fit ac singultuosa, totumque corpus ardet, haud dubie augurandum, imminere funestum finem.

§. XXIV.

*In for-
manda
prognosi
disting-
uenda.*

*pathema-
ta chro-
nicorum
& acu-
torum.*

Haec itaque sunt potiora & certiora signa, quae in varii generis morbosus afflictionibus periculum, aut plane interitum nunciant: ita tamen comparata, ut in applicatione eorundem ad prognosin, magnum judicium, curata distinctio omniumque circumstantiarum pensatio accedere debeant; quo eventus formato ex iis iudicio respondeat. Et primo quidem solicite distinguenda sunt pathemata in morbis spasmodicis chronicis obvia, ab iis, quae in acutis comparant. Nam sapissime in hypochondriacis & hysteriacis ejusmodi truculenta occurrunt symptomata, quae in acutis lethalem effectum minantur, in illis vero minus periculi alunt. Et quid frequentius est? quam quod hypochondriaco &

co & hysterico malo laborantes sub paroxysmis maximis anxietates, spirandi angustias, cum extremorum frigore & urina aquosa, pulsu existente debili & parvo, patiantur, quin plane vehemens animi deliquium persentiscant, quæ tamen omnia brevi remittunt, expirant & sine periculo trans-eunt.

§. XXV.

Deinde probe discernenda sunt morborum tempora. *Tempora*
Nam ex omnibus, quæ modo attulimus indicis funestis, si *morbi.*
quædam, vel etiam plura sub initio & primis morbi diebus apparuerint, præcipitanter nimis ageret, qui statim mortem instare exinde judicaret. Alia vero ratio est, quando viribus nimio calore, vigilia assidua, inappetentia, anxietate, dolore, per plures dies infestante, fractis & exhaustis, funesti ejusmodi spasmi & ab iis oriunda symptomata prodeunt, maximeque iis temporibus, quibus morbus alias salutariter solvi solet. Inprimis etiam primus impetus & vehementia morbi invadentis curate expedenda; quæ, si statim in principio vires dejicit, pulsu valde frequenter feriente, nil boni portendit, sed potius imbecillitatem ferendo morbo imparem, succorum impuritatem & ad corruptionem proclivitatem, luculenter arguit.

§. XXVI.

Porro exquisita etiam semper habenda est ratio cor-*Corpara.*
porum quæ ægrotant, & maxima perquirendum; utrum ex imbecilibus, an robustis sint? eo quod illa nunquam non in morbis magis, quam quæ robustioris & validioris sunt constitutionis, periclitantur, ac potissimum facili negotio ex doloribus vel inflammationibus sphacelo corripiuntur mortifero. Imbecilibus vero ratione ætatis, senes & infantes, ratione corporis structuræ, qui repleti multisque & exilibus vasis instructi sunt, annumeramus, neque minuseos, qui a parentibus debilibus ac morbosus procreati sunt, item, qui præcedente diuturno morbo, vel immodicis sanguinis profusionibus

bus ad diuturna inedia, aut impenso animi affectu, moestitia, cura & graviore meditatione, vires attriverunt ac consumserunt. Eundem quoque in censum referendæ puerperæ & qui ex vitio diætæ aut vitæ regiminis, nec non excretionibus suppressis, ingentem impurorum succorum copiam sibi contraxerunt.

§. XXVII.

Et causa.

Neque tandem omittendum, quod in signorum consideratione, studiose semper attendendum sit artifici: num a causis quibusdam externis nocentibus, per iram, terrorem, corporis refrigerationem, aut cibum insalubrem, vel pharmacum vehemens & virulentæ indolis, atrocia jam conspicua suscitata sint symptomata? Quæ quidem in morbis per se periculosos corporibusque infirmis, in vitæ discrimen ægros adducere, vel ipsam mortem accelerare possunt; in morbo vero minus ancipiti & corpore valente, non adeo extimescenda.

CAPVT XVI.

DE

CAVSSIS MORTEM IN MORBIS GIGNENTIBVS.

§. I.

*Mortis
caussa
cogno-
scenda.*

QUum princeps ac præcipuus salutari arti præfixus sit scopus, ut in curandis morbis quibus ad interitum facilis & ordinarius fere est transitus, corpus a morte modis defendat omnibus, idque Medicus cum certa firma & fundata ratione facere debeat: necesse utique est, quo proximas & adæquatas mortis causas & quomodo eadem

dem

dem in & ex morbis gignantur, medentum quilibet studiose scrutetur atque pernoſcat. Jam vero non melior magisque apta ad perquirendas quæ mortem in morbis inferunt cauſſas ſuppetit via, quam per diſſectionem corporum morbis defunctorum, qua clariffime, quid mors & quænam formalis ejus ratio, vel ſenſuum miniſterio, palpari poteſt ac perſpici. Nimirum ex omnibus conſignatis obſervationibus & hiſtoriis ^{quæ ſint} anatomico-practicis, planum fit atque teſtatum: mortem ^{in genere.} nihil aliud eſſe, quum ſublatam penitus progreſſivam & circularem ſanguinis ac humorum, beneficio cordis & vaſorum motionem, quam vel canalium, præſertim circa cor & pulmones, a polypoſis concrementis obturationes, vel largiores ſeri & ſanguinis in cerebro aut nobilioribus aliis partibus extravafationes, vel ſuccorum in partibus eminentioris uſus nervoſo-muſculofis inflammatoriæ in ſphaceloſam putredinem tranſeuntes ſtaſes, vel etiam putridæ viſcerum corruptiones, proxime gignunt & immediate producant. Quapropter e re utique erit, ut quæ ex his in variis morborum generibus poſt mortem deprehendantur cauſſæ, ex fide dignis qui inſtituerunt ſectiones auctoribus delibemus, & ea qua fieri poteſt brevitate, hoc loco commemoremus; eum maxime in finem, quo medentes mortiferas has cauſſas congruis remediis tempeſtively averruncare corpusque ab interitu tueri poſſint, nec unquam imprudenti medicatione ad earundem geneſin quicquam conferant.

§. II.

Incipiemus autem a funeſtis capitis morbis, quorum *ſpeciali* in numero potiſſimum apoplexia, lethargus, epilepſia atque *tim in a-* phrenitis ſunt, & primo loco diſpiciemus: cur ſæpius ſani & *poplexia.* robuſti, in optimo ætatis & virium vigore conſtituti, ex apoplexia tam repentina morte pereant? Et de hac quidem curatior eadem defunctorum anatome clariffime confirmat, quod ſanguinis vel ſeri extravafatio in cerebro ejus ſit cauſſa. Potiſſimum *Vvepſerus*, quo nemo majori ſolertia in hu-
jus

jus mali generationem inquisivit, in eximo de *historiis apople-
cticorum* libro, testatur: se semper fere effusum ex plexu cho-
roideo cruorem, in cerebri penetralibus reperisse. Deinde
VWillisius lib. de anim. brutor. cap. IX. pag. 222. refert historiam
de juvene sanguineo, plethorico & vino indulgenti, in cu-
jus aperto capite, anterior cerebri cavitas sanguine grumoso
cum feri copia impleta visa est. Et *VVarthonus in adenograph.
cap. 2.* fidem facit: se in iis, quos apoplexia subito abstule-
rat, ventriculos cerebri sanguine refertosprehendisse.
Haud dissimilis observatio legitur in *Misc. nat. curios. Dec. II. An.
X. obs. 161.* dum dissecto apoplectico, multum saniosi feri ex
cerebro diffuxit, sinus falcatus cruore turgidus & ventriculi
lymphā referti, fuerunt ostensi. Alius apoplexia interem-
tus, ut *l. c. Dec. II. An. I. obs. 154.* proditum est, in ventricu-
lis sanguinem serosum extravasatum copiosum exhibuit, &
grumus sanguinis, ovi columbini forma, nec non quartus
ventriculus cum infundibulo sanguine turgidus repertus.

§. III.

*Lethargo,
paralyfi
& hemi-
plexia.*

Et quemadmodum apoplexia ob sanguinem vasorum
alveis elapsū inducitur; ita in lethargo, paralyfi & hemi-
plexia, quæ sæpe diuturnis cephalalgis, scorbuto aliisque
gravioribus affectibus chronicis, lethali eventu superveniunt,
ingens feri copia in cerebro conspicitur. Sic *VWillisius l. c.
pag. 155.* in cephalalgia diuturna ex lethargo demortuo; ce-
rebri anfractus, tam exteriores, quam cavitatem internam,
aqua limpida repletos offendit. Puer trium annorum, te-
ste eodem auctore *l. c. cap. IX, pag. 225.* post ophthalmiam
& faciei exanthemata soporosus factus, largam copiam lim-
pidæ aquæ sub meningibus stagnantis exhibuit, cujus copia
etiam ventriculos & thalamos opticos implevit, eosdemque
comprimendo cæcitatem intulit. Ex cephalalgia scorbuti-
ca demortuum, ventriculos cerebri copiosiori & acriori
lymphā tam turgidos gestasse, ut uncix decem effluerint,

Misc.

Misc. nat. curios. Dec. II. An. VI. obs. 3. testantur. Paralyticum quoque sectum, vasa cerebri atro sanguine quam maxime turgentia & ventriculos largo sero distentos ostendisse, *Pezoldus obs. 60.* auctor est. Idem confirmat *Harderus obs. 34.* exemplo paralytici a longo tempore cachectici, quo post mortem secto, versus ventriculos & prope basin cerebri ac cerebellum, exundans serum occurrit, polypus quoque oblongus ex eodem loco extractus est.

§. IV.

Ex epileptico malo qui intereunt, in capite vasa plerumque ^{Epilepsia} cruore turgida obtinent, & serum quod a sanguine secescit ^{& phrenitide.} fit in inferiore cerebri parte stagnans. Idem fit, quando quis ex phrenitide moritur, cui etiam funesta epilepsia ordinario solet supervenire. Confirmat hoc *Harderus obs. 34.* casu epileptici quatuordecim annorum, qui sanguine diducta habuit cerebri vasa, protuberantibus instar vesicæ aquæ repletae anterioribus ventriculis, e quibus facta incisione, ichor copiosissime profluxit, qui in tertia & quarta cavitate non minori quantitate delituit. Eandem in rem facit observatio *Willisii lib. de morb. convuls. pag. 504.* ubi in femina, motibus convulsivis & epilepticis mortua, vasa meningum adeo sanguine farta fuisse narrat, ut quasi tota sanguinis massa in capite aggesta visa sit, cerebri vero substantia humore aquoso redundantius irrigata fuit, & ventriculi aqua limpida repleti. Similem historiam idem auctor *l. c. pag. 542.* consignavit: de femina, pathematibus convulsivis & hystericis oppressa, cujus vasa cerebri mirum sanguine distenta fuerunt, ut ejus vix quicquam in reliquo corpore effluerit, cerebri cavitatibus ac recessibus serosa colluvie plenis. Simili ratione *Petr. Pavv. obs. 8* commemorat, in epileptico & phrenitide demortuo, vasa meningum sanguine atro & adusto fuisse distenta & in cerebello putridum humorem repertum. Et *Joh. Rhodius Cent. I. obs. 39.* in phrenitide membranas cerebri cum rubore adeo tumentes invenit, ut venæ a cerebri

substantia potuerint separari, in alio autem *obs.* 40. piæ matris vasa inflammata fuisse, scripto confirmat.

§. V.

*Unde tam
subita
mors.*

Sanguinis itaque vel feri in capite exundantiam atque effusionem subito mortem inferre testatur experientia, neque etiam ratio deficit, cur id contingat, luculenter demonstrans. Nimirum cerebrum sanctius animæ domicilium & tenuissimi ac purissimi liquidi, quod vim, robur, tonum ac motum fibris & solidis corporis partibus præstat, secretorium ac officinam esse, & saniorum Veterum tulit sententia, & diligentior Recentiorum observatio anatomica confirmat. Nam spirituosum summæque activitatis liquorem in vasculoso cerebri cortice secerni, per medullaris substantiæ mæandros ad oblongatam medullam pergere, & ex hac, nec non spinali, per appendiculas nervos ad subjectas partes derivari, ex eo clarissime patet: quod constricto vel dissecto membri cujusdam nervo, protinus ejusdem sensus & motus expiret, diffracta vero vel discissa spinali medulla, partes infra læsionem illico omni sensatione ac movendi potentia priventur, & cervice fracta, nec non læso vel obturato spinæ principio, animans extemplo penitus exanimetur. Quumque ex oblongata in basi cerebri medulla, novem illa nervorum paria oriantur, quæ sensoriiis maxime præfunt & ad præcipuas vitales partes cor & pulmones abeunt, in proclivi est judicare: hac a sero vel sanguine extravasato obstructa, aut compressa, hunc mobilissimi nervi liquidi influxum quam maxime intercipi, ut non mirum sit, animam nihil amplius percipere & cor atque arterias activo & vitali systoles motu orbari ac ita mortem subito conciliari.

§. VI.

*Causa
morbis in
pectoris
moris
plerumq;
polypus.*

A morbis capitis progredimur ad eos, qui in pectore sedem ac domicilium suum habent, ac mortem cient, quorum in numerum referendi syncope, a Veteribus sic dicta cardiaca, asthma & catarrhus suffocativus, peripnevmonia & phthi-

phthisis. De hisce etiam experientia anatomica edocemur, quod non alia ratione internecioni dent hominem, quam quod liberum circuitum & transitum sanguinis per cor & pulmones sistant ac intercipient; id quod testatum faciunt polyposæ concretiones canalium alveos obturantes, neque minus scirrhusi tumores & corruptiones saniosæ ac sphacelosæ, quæ pulmonum substantiam in hisce vitiis infestant. Ad synopen quod attinet, qua sæpius subito & præter omnem opinionem plures extinguunt, immo in lecto, quem sani firmique conscenderant, mane exanimis offendi, non novum, sed res crebræ experientiæ est; causa tam repentinæ mortis non alia, quam viscidior & coagulata membranacea massa, quam polypum vocamus, & quæ prius cordis columnis & lacertis, quasi radicitus implantata, tandem vi dimota, ostia majoris vasis obturans, liberum iter ac motum sanguinis penitus intercludit, unde protinus tota sanguinis circulatio sistitur ac perit. Plura ejusmodi exempla memoriæ prodita sunt in

Boneri anat. præct. lib. I. Sect. II. lib. II. Sect. II. Malpighii diss. de polypo, Bergeri diss. de polypo cordis & nostra de subita morte præcavenda. Inprimis etiam huc referri meretur *Bartholini lib. de lacteis thoracis cap. 14.* testimonium, fidem facientis: se in iis quos subito fato extinctos aperuerit, majora cordis vasa sanguine concreto repleta invenisse. Solent vero polypi plerumque dextram cordis cavitatem eique annexa vasa occupare & grandiores quoque ibi delitescere, quam in sinistra, fortasse quia non solum redux a nutritionis & perspirationis negotio sanguis, multis particulis tenuibus liquidis, sulphureis & salinis castratus, viscidior est & facilius concreescens, sed etiam a chylo ex ductu thoracico affuso, facile in coagulum filamentosum præcipitatur, quod in auriculæ finibus, vel amplis dextri ventriculi columnis obhærescens, ex agglutinat viscidis præterfluentis feri moleculis, sensim paulatimque in majorem molem excrescit.

§. VII.

Ut in asthmate & catarrho suffocativo.

Sæpius etiam polypus aliis gravibus & periculosis in pectore malis sese associat & citra suffocationem trucidat. Nam in iis, qui asthmate & catarrho suffocativo jugulantur, plurimque polyposas in vasis cordis & pulmonum concretiones repertas fuisse, observationum fide constat. Testatur id maxime *Greiseliûs* in *Misc. nat. curios. An. MDCLXX. obs. 74.* quotquot, inquit, catarrho suffocativo, quo homo frequentius morte decedit subita, mortuos aperui, in omnibus corpora callosa, viscida ac glutinosa in corde deprehendi. Sic quoque *Pezoldus obs. 61.* in asthmate suffocativo & pectoris hydrope cor magnum, polypo solidò repletum, cum magna in vasis atri coagulati cruoris copia, observavit. Pariter *Misc. nat. curios. Dec. II. An. X. obs. 174.* asthma ex polypo cordis & pulmonum, cum duro sinistro pulmonali lobo, descriptum tradunt. Potissimum vero notabile est, quod adduxi in dissertatione de *asthmate convulsivo*, Grætzium, scilicet Medicum quendam castrensem, vel quingentos milites asthmate suffocatos incidisse, atque semper vel hydropem pectoris, vel polypum cordis ventriculos & vasa obsidentem, adinvenisse. Ipse non minus confirmatius asseverare possum, me quotiescunque copia fuit asthmate defunctos dissecandi, polypum in vasis pulmonum & cordis, nec non serum foetidum effusum in thoracis cavo offendisse, cujus origo merito difficiliore sanguinis cursui per pulmones debetur, unde serum per lymphatica vasa rupta exprimitur inque pectus descendit, ut hinc perpetuo fere gravi asthmatis junctus sit pectoris hydrope, de quo egregias observationes prodidit *Carolus Piso lib. de morbis ex seros. colluv. pag. 217.* nec non *Baglivus in Praxi pag. 107.*

§. VIII.

Peripnevmonia.

In peripnevmoniis non modo pulmones materia crassa & cruore repletos ac inflammatos, sed & sæpissime polyposa in vasis concrementa deprehendi, anatome idem-

tidem

tidem confirmamur. Recensui tale exemplum in dissertatione de *peripneumonia* §. 10. juvenis, hoc morbo vita functi, cujus exenti pulmones admodum duri apparuerunt instar carnis, & libra examinati, quinque pondo graves fuerunt, aquæ autem injecti submersi sunt. Iptæ vesiculæ quasi carnea crassa rubicunda substantia fuerunt infarctæ, ac discissæ, parum putridi sanguinei ichoris, nihil vero puris, fuderunt. Aspera arteria spumofam & tenacem materiam recondidit, pulmonalis autem & arteria & vena, circa confinia cordis obsessa fuit polyposis concretionibus, quæ cordis columnis & fibris firmius connexæ, ex hoc, auriculis, ramisque appensorum canalium extractæ, unciarum duarum pondus excefferunt. Cordis etiam ventriculi cruore crasso nigricante penitus fuerunt constipati, & in pericardio sex ad minimum cochlearia aquæ, instar loturæ carnis, comparuerunt.

§. IX.

Rara quidem sunt exempla eorum, qui hæmoptysi *Hæmo-*
pereunt: notavi tamen hic ante aliquot annos memorabi-*pyssi.*
lem ejusmodi casum. Videlicet virginem octodecim annorum, teneræ constitutionis, ex mensium obstructione diu respirandi difficultate pressam, inopinato enormis sanguinis profusio cum tussi ex pulmonibus, iteratis aliquot vicibus incessit, & tertia vice tanta copia erupit cruor, ut aliquot vasa eodem replerentur, simul quoque frustra dura, magna, carnosa e faucibus protracta sunt, quæ aqua calida elota, examine instituto, nonnisi polyposa & fibrosa membranacea concrementa fuerunt deprehenfa, & ponderata, quatuor unciarum gravitatem superarunt. Quo tam immani sanguinis profluvio, omnes penitus consumptæ sunt vires, ut tertio post die honestissima virgo placide animam efflaret. Id vero ex hac singulari historia merito elicitur: polyposa hæc corpora excreta anevrismatibus, vel varicosis pulmonum vasis infedisse, unde illis disruptis, in majores bronchiorum ramos simul apertos penetrarunt. Neque dubium est, quin

gravis hæmoptysis sæpissime ex magna obstructione, a polypo vel scirrhelcentia lobi cujusdam pulmonalis proveniat, unde libero sanguinis itinere impedito, ipse impetuose ruit ad alia vasa, quæ nimium distindendo, tandem aperit funestumque ciet fluxum. Confirmat idem notabili observatione *VVillsius in op. posth. Sect. 4. cap. VII.* fidem faciens: totum finistrum lobum a tumore scirrroso ita obriguiffe, ut penitus constrictus & quasi lapideus apparuerit, ac plane non mirum fuerit, quod cruor per pulmones rapidissime trajiciendus, alicubi e vasis eruperit.

S. X.

Palpitatione
cordis.

Qui palpitatione cordis detinentur, eos polypus cordis plerumque interficit. Egrege hanc in rem prodidit *Baglivus Prax. med. lib. II. pag. 229.* sic scribens: *sectis cadaveribus plurimis, observavimus in cordis ventriculis polypos, aneurismata, grumos sanguinis ingentes & consimilia, inter quæ elapso quinquennio annotavimus in cadavere sexagenarii, palpitatione demortui, aneurisma ingentis magnitudinis in aorta ascendente, ubi proxime a corde exoritur, & in cavitate aneurismatis, polypum magnitudine ovi anserini.* Jam facile patebit ratio, quare palpitatione sola corporis incurvatione, vel capitis ad terram inclinatione, quoties impetit, cohiberi possit, & pro vario in latus, vel dextrum, vel finistrum, decubitu, exacerbetur aut complacetur, de quo memoratu digna observatio de juvene, qui, quoties in lecto lateri dextro incumbebat, spirandi difficultate, cum suffocationis metu cordisque tremore laborabat, quæ mutato in latus finistrum decubitu, protinus cessabant. Tandem mortuus reperiebatur, & dissectus ingentis magnitudinis polypum auriculæ dextræ impactum exhibebat. Observatur vero etiam in iis qui palpitatione pereunt, solenniter ingens feri copia in pericardio, testantibus id *Pisone de morb. a seeros. colluv. pag. 170.* *Olao Borrichio in Act. Hafniens. pag. 173.* *Tulpio lib. IV. cap. XX.* & *Fernelio lib. V. pathol. cap. XI.* Neque alia hujus

extra

extravasati fero origo est, quam difficillimus sanguinis per cordis thalamos transitus, unde serum per poros auriculæ dextræ nimium dilatatos expressum, in pericardii conceptaculum descendit.

§. XI.

Accidit quoque interdum, ut quidam asthmate inter-^{Asthma-}cant, ubi pulmonum moles amplissima & sensu integra, to-^{te.}tam thoracis cavitatem replet. In his mortis causa querenda est in tunica illa glandulosa, interius universum bronchiorum tractum investiente, quæ tumida, vel scirrhusa impedit, quo minus aer intrare iterumque exire possit, unde sanguinis quoque liber per vasa pulmonum circuitus intercipitur. Notavimus talem casum aliquot ante annos in Theologo primario Cizensi, qui multos per annos ex difficili respiratione laboravit, tandem quoque eadem decessit. Aperto post mortem thorace, pulmones omnem ejus cavitatem occupabant & nihil præternaturale ibi visebatur, præterquam quod multa scirrhusa tubercula & granula in ramis internis bronchialibus eminerent. Huc quoque referendam censeo *Ruysschii obs. XIX.* qua casum proponit de virgine, quæ postquam per multos menses orthopnoea suffocativa laborasset, extincta est, in cujus cadavere aperto culter anatomicus in parte pulmonis magnum pellucidarum vesicularum cervum detexit, quæ aëre ita expansæ erant ac infartæ, ut is nonnisi validiori compressione elideretur, neque immixtus per asperam arteriam flatus ullum cum expansis hisce vesiculis habuit commercium. Similes historias idem auctor *obs. XX. & XXI.* refert, de viro ac puero dyspnoea mortuis, in quibus totum malum hæsit in obstructa pulmonis parte, cujus omnes vesiculæ oppilatæ & extensæ apparuerunt. In demortuo Principe, qui orthopnoea & hæmoptysi obierat, teste *Verzascha observatt. pag. 307.* pulmo stupendum in modum fuit inflatus ac universam thoracis cavitatem implevit, aspera autem arteria sanguine grumoso & florido re-
ferta,

ferta, & exterior pulmonis superficies innumeris ulcusculis obfessa.

§. XII.

Phthisi.

Ex affectibus chronicis ipsa phthisi pectorali & consummata nullus facile majoris periculi est, dum hominem lento gradu omnibus viribus exuit ac demum inopinato suffocat. In defunctis culter anatomicus sequentia detegit. Primo in omnium fere, qui phthisi decedunt, pulmonibus ingentes scirrhositates, vel dura tubercula, quæ partim pure scatent, partim instar steatomatum sebaceum concrementum recondunt, reperiuntur, de quo exempla prodita in *Misc. nat. curios. Dec. II. An. III. obs. 188. Hafn. P. I. An. 1673.* nec non apud *Pezoldum obs. 64. 74. & Harderum obs. 46.* Deinde in nonnullis pulmonum lobi penitus abscessu & pure consumti, in quibusdam exsiccati nullum amplius pus fundentes visuntur, & propagines asperæ arteriæ, nec non sanguinea vasa albescunt, & a pulmonum excessu substantia, sine ulla dilaceratione, soluta cernuntur, fidem potissimum faciente *Pavv. obs. 22. & 25. Hardero obs. 51. & Bartholino Cent. V. obs. 7.* Porro nonnunquam in pericardio, item thorace, ingens feri impuri foetidi copia offenditur, id quod quamplurimis exemplis confirmatur in *Misc. nat. cur. Dec. I. An. I. obs. 15. Dec. II. An. III. obs. 199. Harderi anatom. pract. obs. 41. 45. 47. 51. & 52. Blancardi anatom. pract. pag. 189. Pezoldi obs. 74. & 92. Plateri observat. lib. III. pag. 689.* Præterea in omnibus fere observationibus quæ anatomen phthisicorum sistunt, obvium est, quod pulmones firmissime costis itemque diaphragmati adhæreant. Tum quoque crebriori observatu constat, polyposas massas, vel cruorem coagulatum, in corde vel pulmonum vasis phthisico malo extinctorum offendi, de quo phænomeno inprimis consuli potest *Harderus obs. 45. 49. & 52. Bartholinus histor. cent. V. obs. 7.* item *Misc. nat. curios. Dec. II. An. V. obs. 65.* Denique concrementa calculosa tartarea interdum in exulceratis pulmonum

num sinuositatibus reperiuntur, uti constat ex *Harderi anatom. pract. obs.* 45. *Misc. nat. curios. Dec. II. An. IV. obs.* 35. *Dec. III. An. III. obs.* 188.

§. XIII.

Hæc autem omnia & singula in cadaveribus phthisi ^{Unde} demortuorum conspicua phænomena, tum morbi genium & ^{phthisis} symptomatum rationem, tum interitus causam satis perspicue ^{& cur} declarant. Nam qui prima phthiseos incunabula atque originem ex obstructis minimis pulmonalibus vasculis tumefactis ac induratis deducunt, recte, mea quidem sententia, judicant. Hæc quippe tubercula, quæ cum vesiculas pulmonales, tum bronchiales fistulas occludunt, impediunt, quo minus aer pulmonum compagem sufficienter elevare atque distendere possit, unde intercepto libero sanguinis itinere, cum difficultate, angustia atque anxietate fit respiratio, eoque gravior, quo majorem pulmonis partem scirrhusitas occupat. Hæc quoque tubercula, & mole sua, & acrimonia lymphæ, vel purulentæ quam recondunt materiæ, nervosas bronchiorum partes perpetuo irritando, continuæ, siccæ & ferinæ tussis causam subministrant. A libero vero sanguinis per pulmones præpedito circuitu, is regurgitat ad cor, quod nimium ampliando ac opprimendo, maximas anxietates, phthificis admodum solennes, parit, ubi etiam facta nimia accumulatione, in polyposam massam successive coalescit, qua postea sanguinis iter magis adhuc per cor atque pulmones sufflaminatur, ut hinc in universo venarum systemate circulatio fiat tardissima. Quin serum secedens inque porosam partium substantiam concedens, tumores pedum & abdominis gignit, qui subinde phthificis accidunt & mortis significationem ferunt. Idem quoque serum a sanguinis connubio dilapsum, in cordis conceptaculo hydropem pericardii ciet, ac tandem etiam perruptis lymphaticis vasis, in thoracem exundat. Frequentior vero pulmonum ad pleuram adhesio, sero, quod ex poris pulmonum, sub difficili

(III.) Aaa trans-

transitu exprimitur, tribui debet. Hoc enim, exhalantibus partibus tenuioribus, tenax fit, quo partes conterminæ conglutinantur. Igitur quo gravior est læsio pulmonum, consumptio, scirrhotitas & obstructio, eo majus, ob difficiliorem sanguinis commeatum, suffocationis periculum imminet, quæ plures phthisicorum intereunt. Ac demum phthisi perpetuo fere hæcticus calor, cum ingenti virium defectu, jungitur, qui liquido nerveo a putredine inquinato, jure est adscribendus. Quumque sub continuo hoc æstu interno succi & vires successive consumantur, lente cordis motus fatiscit, tandem extinguitur, atque mors sine ulla turbatione mentis plerumque inexpectata & ex improvise quasi obrepit.

§. XIV.

In hydrope vel aliis morbis superveniente.

Ex chronicis porro malis vix ullum frequentius hydrope perimit, qui plerumque aliis gravibus affectionibus, ut asthmæ, quartanæ, cachexiæ & scorbuto supervenit. Causam mortis si inquiramus; inspectione cadaverum diligentiori, ingentem copiam feri putridi, tam in abdominis cavitate, quam sæpiissime etiam in pectore & pericardio, deprehendimus, quod interiora, præsertim omentum (quod nunquam non consumptum & putridum visitur,) aliaque viscera corrupta, & ipsa adeo intestina, livida ac sphacelosa reddit, confirmantibus id *Bartholino Cem. III. hist. 81. Misc. nat. cur. Dec. II. An. VII. obs. 187. ii. obs. 188. Dec. III. An. III. obs. 161. Dec. I. An. IV. obs. 3. Dec. II. An. VI. obs. 73. Dec. I. An. VI. obs. 165. Pexoldo obs. 77. 88. 65. Hardero obs. 72. Petr. Pavv. obs. 5. ii. 28.* Et ubi hæc feri extravasatio in hydrope decumbentibus non præsto est; ibi etiam nondum omnis spes salutis evanuit. Quod vero ut plurimum paracenthesin factam mors subsequatur, in causa est aer admissus, quo accedente, feri putrefactio multum promovetur, quæ ubi incipit, non modo omnis appetitus tollitur & quicquid virium adhuc restat consumitur, sed & calor præternaturalis, sine quo non facile hydropicus moritur, supervenit atque incenditur, qui peni-

penitus omnes vires & superstites vitales succos ita exhaurit, ut cordis musculus a motu suo vivifico in totum deiciatur.

§. XV.

Fit quoque hic morbus sapissime ex asthmate, asthmate ^{Vel ex} vero ex polypo cordis, in cavitatibus ejus detento, aut minime ^{asthmate} tumore nodoso majorum vasorum ostia coarctante, qualis etiam in hydropicis dissectis non raro in conspectum prodit, uti patet ex *Cent. III. Misc. nat. cur. obs. 117. Dec. III. An. III. obs. 161. it. obs. 65. Pezoldi obs. 77.* nec non *Boneri Sepulchreto*. Neque rationem difficile est invenire, siquidem retardato sanguinis per pulmones motu, is regurgitans ad venarum systema, ibi tardius movetur atque subsistit; unde feri in partibus inferioribus, per quas semper adscensus sanguinis, quia perpendicularis, difficilis est, secessio fit magna-que collectio.

§. XVI.

Quin naturalis illa difficilior sanguinis in hepate, ex ^{Vel en-} vase portæ venoso in venam cavam trajectio, multarum ^{hepatin-} chronicarum passionum, & quam maxime hydropis, causa potentissima utique recte censetur. Nam sanguis ex hoc vase per connexos eidem canales regurgitans in pancreas, lienem, mesenterium, intestina, hæc viscera multum infarcit tumidaque reddit, & minimos glandularum ductus occludendo, hæc omnia scirrhusa ac dura efficit; quæ etiam viscerum vitia semper fere, facta inspectione, oculis sese ingerunt, multisque exemplis comprobantur a *Misc. natur. cur. Dec. III. An. III. obs. 161. Dec. II. An. VIII. obs. 100. it. An. VI. obs. 73. An. VII. obs. 187. An. I. obs. 2. An. V. obs. 73. Dec. I. VI. obs. 68. it. obs. 165. & 221. Hardero obs. 71. & 72. Petr. Pavv. obs. 5. & obs. 28. Pezoldo obs. 88. Bartholino Cent. III. Hist. 81. Riverio Cent. II. obs. 53. Ruyschio in obs. 45. & 46.* Per indurata sic & obstructa vero viscera, libero sanguinis cursu præpedito, indicitur ejus stagnatio in vena portæ, &

inde serum secedens ad vasa fertur lymphatica, quæ nimium distenta & a tono suo dejecta, diducuntur in hydatides, (quarum ingens sæpe copia in dissectis visitur,) quæ disruptæ, illam exitialem feri extravasationem efficiunt.

§. XVII.

*Aut uteri
vitis.*

Ratione haud dissimili hydropis origo ex sanguinis circulo per uterum, vel ob vasa, a materia polyposa aut cruore coagulato varicosa reddita, vel ob ipsius uteri substantiæ scirrhescentiam, impeditiori facto. Nam obice sic posito, sub lentiori progressu atque stagnatione, serosus humor a vinculo discedit & copia ac impetu in vasa lymphatica confluit, eorum latera ampliat, ut interjecta valvulis spatia in hydatides abeant, quæ tandem divelluntur & contentum humorem effundunt; cujusmodi exempla passim in observatis medicis & maxime in *Misc. nat. curios. Dec. II. An. IX. obs. 99.* nec non apud *Harderum in apiario obs. 87. Vesalium lib. V. de corp. human. fabrica Cap. IX. & Mauritium Cordæum Comment. in lib. I. Hippocr. de morb. mulier.* consignata repertiuntur.

§. XVIII.

In cachexia & heptica aliis morbis superveniente.

Præterea sæpissime mors in cachecticis, tabidis & diuturna lenta ac hectica febre detentis, ex ingenti abscessu interno rupto natales trahit. Effusum enim foetidissimum pus, non modo viscus cui insidet penitus consumit, sed & vicinas quas tangit partes labe inficit atque corrumpit, simul quoque foetore suo tenuissimum illud fluidum, quod fibræ vim motricem confert, admixtione sua contaminat; unde verum *Hippocratis* effatum *Sect. VII. aph. 8. ex tuberculi intus ruptione exsolutio, vomitus & anima deliquium fit.* Occupant autem ejusmodi abscessus maxime mesenterium, hepar, uterum ac renes, ac pariter fiunt ab intercepto, propter insuperabiles obstructions & compressiones vasorum viscerumque scirrhositates, libero sanguinis circulo, unde cruor ita concipiens vasorum tunicas perforat, ac cavitates

tes sibi efformans, tandem in pus foetidum convertitur. Junguntur his abscessibus, teste observatione anatomica, plerumque tumores atque duri scirrhi, prout fidem facit *Paræus lib. XXIII. cap. 36.* exemplo feminæ, cujus mesenterium penitus scirrhosum observavit, tantæ molis, ut libras decem cum dimidia pondere æquaret, adhærescentibus quamplurimis abscessibus, sua quoque cystide incluso. Pari ratione *Hildanus Cent. I. obs. 7.* meminit puellæ, cujus mesenterium tumoribus duris scirrhosis & steatomatibus refertum fuit, præcipue circa venas, quæ ad portam tendunt. Et *Coiterus observat. anatom.* in hydropico tumorem & magnam colluviem puris foetidi, quod hepâr putredine infecerat, animadvertit. Et quæ plures huc referendæ observationes memoriæ proditæ sunt in *Wvarthoni tr. de glandul. pag. 50.* *Raygeri observat. & Misc. natur. curios. Dec. III. An. III. obs. 73. & 131.* Speciatim de iis abscessibus quæ renes & hepâr occuparunt consuli merentur, *Misc. nat. curios. Dec. I. An. IV. obs. 114. Dec. III. An. III. obs. 72.* *Hildanus Cent. II. obs. 39.* nec non *Harderus obs. 76.* Frequentius tamen abscessus in musculis abdominis, præsertim a causâ externa, residet, quo interius rupto, mors ut plurimum sequitur, de quo digna sunt quæ evolvantur in *Misc. nat. curios. Dec. II. An. I. obs. 88.* *Hildano Cent. II. obs. 37.* *Riverio Cent. I. obs. 92.* Quod vero apostema mortem inferat, causâ subest, quia febre lenta, quæ abscessus nunquam non stipat, omnes paulatim vires exhauriuntur, & tota humorum massa successive in excrementa resolvitur ac consumitur.

§. XIX.

Qui ex calculo renum & vesicæ moriuntur, hos non minus corruptio putredinosa, vitali moventi insensissima, ne-
cat. Nam si quando calculus in vesica vel urethere hæret, efficit, ut colatum per renale cribrum serum falsum immane
quantum & ureteres & renes distendat, qua vehementi disten-
sione & vasorum compressione, renum substantia inflammatur

In dolori-
bus ex
calculo
per re-
nem cor-
ruptio-
nem.

atque in abscessum vel putrilaginem, qua penitus tandem exeduntur ac consumuntur, concedit. De hoc frequentissima apud observatores est mentio, e quibus adduxisse sufficiet, *Misc. nat. curios. Dec. II. An. IIX. obs. 53. An. II. obs. 13. Dec. I. An. II. obs. 81. An. IV. 23. Bartholini hist. 35. Cent. III. Petr. Pavu. obs. 3. Verzascha obs. 2. cent. 1. Fernelium de part. morb. & symptomat. lib. VI. cap. 12. pag. 316. Riolanum lib. II. cap. 29. Tulpium lib. III. observatt. cap. 6. Pancirollum Pentecost. quarr. obs. 31.*

§. XX.

*Aut intestinorum
sphacelum ex
consensu.*

Insuper compluries in iis, qui ex calculi tormentis & ischuria diem obierunt, ventriculi inflammationem, ex suis signis dignoscendam, nec non epilepticas convulsiones supervenientes, animadvertimus, procul omni dubio ob atrocissimos spasmos, in ventriculum, vel ipsum caput, per consensum derivatos. Nam licet in iis quas perlustravi observationibus, parum hujus phaenomeni mentionem invenerim, sed sectores plerumque reperto calculo, tanquam mortis causa, aliarum partium inspectionem supervacaneam crediderint; nullus tamen dubito, quin, si in dissectione cadaverum etiam ventriculi & intestinorum constitutio curatius investigetur, proximior ibi, maxime in senibus & debilitatis, mortis causa, inflammatio nempe & sphacelatio, sit compa-ritura.

§. XXI.

*In morbis
acutis &
malignis.*

Eadem ventriculi & intestinorum inflammatio & sphacelatio, qua plerique, qui morbis acutis & malignis decedunt, item ex veneno, vel validiori pharmaco, nec non peste, morbo Hungarico, dysenteria, colica vel iliaca passione, aut acuta vel omni alia febre succumbunt, tanquam praesentissima mortis causa, in dissectionis reperitur. Etenim in nullis certe corporis partibus, inflammatio vel sphacelatio periculosior est, quam in iis, quae nervosae ac membranosae sunt texturae & exquisitiore sensu ac motu gaudent, neque minus

cum

cum universo nervorum genere consensionem alunt; cujus generis ventriculum & totum intestinorum canalem esse, vix ullus addubitabit. Venena vim suam maxime exserere in ventriculum & vicina tenuia intestina, sphacelo eadem corripiendo, sectiones & observationes passim prostantes luculenter declarant, in cujus confirmationem instar omnium allegari meretur *Vesperus*, in *tr. de cicuta aquatica*, qui plura experimenta instituit, & quæ in animantibus observavit, collegit.

§. XXII.

Aquæ aut alius liquoris frigidum potum, corpori *ca-* *post fri-*
lesfacto copiose ingestum, vel brevi mortem, vel alias ad *gidum*
 mortem tendentes afflictiones invehere, res certæ, quotidiana-
potum.
 næ & indubitata experientiæ est. Neque alia tam subitæ ac funestæ catastrophes suppetit ratio, quam quod frigidus potus celeriter ipsum sanguinem in vasis ventriculi & intestinorum coagulet ac in circulari motu sistat, unde, nisi mature discutiatur, ut in sphacelum concedat, necesse est. Digna est, quæ hic interferatur observatio, quam ante aliquot annos notavi. Princeps erat excelsa non minus indole, quam corporis forma gratiosissimus, sanguine & succis redundans, obesior paullo, nec tum vigesimum quintum ætatis annum egressus, qui perfecte antea sanus, quum vehementi motu corpus exastuasset, ac postea liberalem cerevisiæ frigida haustum ingessisset, simulque frigido & aperto aëri sese iterum exposuisset, mox de languore, horrore, calore intensiori & vigilia conqueri coepit. His succedebant atrociora pathemata, impenſa quippe virium prostratio, lipothymiam erecto tantisper corpore statim minitans, pulsus languidus, inæqualis & celer micabat, conatus ad vomitum erat perfrequens, anxietas perpetua, tantopere subinde increſcens, ut non modo huc & illuc membra agitarer, sed & in uno loco diu contineri non posset, halitum exspirabat foetidum, ac die morbi septimo inter maximum suorum luctum mortem cum vita commutabat. Concedebatur sequenti

quenti die Medicis facultas corpus aperiendi, eaque instituta, ventriculus totus propemodum inflammatus comparuit, ac quod rarum observatu, aliquot cochlearia foetidi & corrupti sanguinis in ejus cavo. Lien admodum fuit distentus, flaccidus, sanguine lividi coloris refertus & corruptioni tam propinquus, ut ad levem attactum ipsa substantia ejusdem dissolveretur. Totus sinister pulmonis lobus niger deprehensus est, corruptus ac foetidissimus, e quo humor putridus mirifici odoris in thoracis cavum destillarat, tam erodentis indolis, ut spongiam qua detergebatur, atro inficeret colore, nec inusta ei macula ullo artificio posset deleri ac elui. Vasa de reliquo sanguinea maxima ex parte inanita, ipsumque cor minoris magnitudinis offendebantur. Eundem cum gelido potu in senio confectis & viribus orbatis effectum præstare fructus refrigerantes, ut melones & persica mala, avidius devoratos, observationum medicarum fide constat. Nam notum est, quam pronus senum, quin etiam scorbuticorum & imbecillium sanguis sit in sphacelosam corruptionem, quæ hinc accedente levissima sæpe causa, quam facile suscitatur.

§. XXIII.

In febribus pestilentialibus & malignis.

Quos pestilentia & febres malignæ tollunt, in his ventriculus & intestina nunquam non sphacelata conspiciuntur: id quod etiam de omnibus ferme febribus acutis, ardentibus, cholericis, semitertianis, variolis aliisque intelligendum est. Ego certe plena testari possum fide, quod omnes eos, quos ex febre quadam acuta obiisse novi, ex inflammatione ventriculi, intestinorum, vel meningum superveniente, decessisse deprehenderim: idque non modo ex symptomatibus dijudicavi, sed & ex dissectionibus, quas administravi, & de quibus alii fidem mihi fecerunt, compertum habui. Potissimum memoratu dignus videtur casus feminae annorum XXVI. sensibilibioris naturæ, quæ ex vehementi iracundia febre ardente biliosa, juncta cum crebris alvi dejectionibus,

correpta fuerat. Hæc quidem adhibitis congruis remediis, ex ancipiti tantisper levata videbatur, post immensam vero denuo ex ira animi commotionem, priora non solum, sed pejora etiam redibant pathemata, quæ licet alvi fluxus erumperet, undecima tamen die ægram jugulabant. Dissecto post mortem cadavere, totus intestini jejuni & ilei tractus, partim inflammatus, partim sphacelatus & niger cum fœtore in conspectum prodiit, luculento indicio, inflammationem intestinorum diarrhææ quoque in febribus, & in sphacelum concedentem, mortis esse causam. Eandem in his morbis mortis causam testatam faciunt consignatæ passim in commentariis medicis historiæ, ut apud *Forestum lib. VI. obs. 13. Diemerbroccium pag. 273. Helmontium pag. 887. Bartholinum Cent. III. hist. 68. Cent. V. obs. 4. item Cent. III. ep. 92. & 29. Misc. nat. curios. Dec. III. an. III. obs. 100. Dec. I. An. VI. obs. 161. Pezoldum obs. 87. Blancardum obs. 67. nec non in dissert. quam ipse de inflammatione ventriculi, ante aliquot annos evulgavi.*

§. XXIV.

Ne que alia internectione diarrhæa vel dysenteria cor- *Diarrhæa*
repti, quam intestinorum sphacelatione, perimuntur, id quod & dysen-
pariter non solum signa, sed etiam sectiones manifestant. *teria.*
Laborant vero maxime his in morbis crassa intestina putrida
ex sphacelo corruptione, multisque simul tuberculis obsi-
dentur, fidem facientibus *Misc. nat. curios. Dec. II. An. VI. obs. 104. Act. Hafn. P. II. obs. 17. Platero lib. III. pag. 821. Bartholino Cent. VI. hist. 2. Binningero Cent. IV. obs. 48. Eadem colica &*
ratione in colica spasmodica vel iliaca passione correptis, ex *ileo.*
intestinorum fideratione & corruptione mors accedit, uti patet
ex *Misc. nat. curios. Dec. II. An. III. obs. 65. & 193. Blancardo anat. pract. Cent. V. obs. 2. Hildano Cent. II. obs. 61. Kerkringio obs. 42. Villisio de medic. oper. pag. 28. Idem fatum ex inte- ex ver-*
stinorum sphacelosa affectione subeunt infantes, quos ver- *mibus.*

mes enecant, de quo casus consignati in *Act. Hafniens. tom. II. pag. 88. & Lemilii Miscellan. medico-pract. pag. 365.*

§. XXV.

*In colica
quandoq;
coale-
scunt in-
testina.*

Id vero adhuc notatu perquam dignum est, quod in iis qui colica spasmodica, vel veneno non adeo præcipiti internectione occidente, aut aliis atrocioribus in intestinis tormentis, pereunt, intestina plerumque connexa atque mutuo coalita offendantur. Et licet ipse hanc intestinorum præternaturalem concretionem nunquam observarim, fidem tamen mihi fecerunt viri, quibus sæpius corpora his morbis ubi crebro occurrunt defuncta incidendi occasio fuit; & similes quoque casus memoriæ proditi a *Rhodio Cent. II. obs. 32. Petr. Pavv. obs. 5. Bartholino hist. anatom. cent. III. hist. 6. Hæchstettero Dec. X. cas. 6. Misc. nat. curios. Dec. II. An. VII. obs. 15.* Causa hujus peculiaris phænomeni vix alia poterit suppeditari, quam quod serum ex intestinorum tunicis glandulosis & vasculis minimis sub arctis illis spasmis exprimatur, quod avolantibus fluidis tenerioribus partibus, glutinosum & tenax redditum, illam coalescentiam efficit, haud secus ac superius de coalitu pulmonum cum pleura & contiguis partibus, in pectoris affectibus, meminimus.

§. XXVI.

*Puerperis
& infan-
tibus.*

Accedunt puerperæ, febre inflammatoria pereuntes. Has simili ratione uteri sphacelo tolli, & symptomata in iis obvia, & sectiones post mortem administratæ, commonstrant, cujus generis plures continentur in *Misc. nat. curios. Dec. I. An. II. obs. 85. An. IV. obs. 195. Dec. II. An. IV. obs. 94. Dec. III. An. I. obs. 22. An. III. obs. 123.* Infantes denique pusillos & uberibus adhuc victitantes, ex torminibus ventris, nec non epilepticis convulsionibus, ab acrimonia humorum caustica, abripi, res vulgo notissima est. Neque dubium est, quin etiam

etiam in his, intestina, e quibus non raro antequam exspirant, nigra secedunt, sphacelata in dissectionibus reperiantur, modo frequentius a Medicis corporum infantilium & omnis ætatis exanimatorum dissectio institueretur & a cognatis concederetur.

§. XXVII.

Hæc itaque sunt observata, quæ per cadaverum sectiones, tanquam vere interitus in morbis causæ, innotescunt. Monendum tamen est, id quam maxime hoc in negotio esse vitandum, ne mortis causæ cum morborum causis perperam contundantur, quod certe sapissime animadvertimus. Id enim quamplurimis in more positum est, ut ægro periculoso ex morbo decedente, cadaveris incisionem luadeant, & inventis sub ea internis partibus sphacelatis atque corruptis, adstantibus mortiferam labem monstrant, speciose differentes, jam defunctum, ob tam ingentem & immedicabilem læsionem, nullo plane modo servari potuisse ac perianari. At vero hi gravissimum admittunt errorem, ac morbis causam, apertissima fallacia, pro morbi causâ venditant, quum potius id in quæstione sit: an non ipsæ hæc quæ mortem induxerunt causæ, convenientibus & tempestive adhibitis auxiliis præscindi potuissent atque averti. Sed hæc Medicorum techna, quæ ignaris speciosum fucum faciunt, & famæ fervientes, delicta, si quæ forsan in medicatione commiserunt, callide atque astute obvelare student.

§. XXVIII.

Jam perspectis sic adæquatis exitii causis; id utique in futurum usum inde eliciendum erit Medico: ut ejusmodi medendi rationem ineat, qua easdem opportune prima in herba submoveat & averruncet. Scilicet stagnationes, stases & extravasationes sanguinis atque humorum in capite præcipitem afferunt interitum, plerumque vero a nimia congestione.

gestionem sanguinis, ab extremis & inferioribus partibus per spasmos ad caput, maxime in plethoricis, facta, subnascuntur, quæ eo gravior est eoque facilius contingit, quo magis ipsum caput a causis antecedentibus fuit debilitatum. Quamobrem prudentis atque periti est Medici, impetum & accumulationem humorum a capite arcere ac divertere, id quod commodissime convenienti sanguinis missione in inferiori corporis regione, pediluvii, clysteribus emollientibus, alvum leniter ducentibus & antispasmodicis ac carminativis perfici potest, cavendo omnia vaporosa medicamenta, spirituosæ, absynthiaca, ac interdicens refrigerationes, animi affectus, impenas meditationes & inebriationes, omniaque quæ caput infirmare ullo modo possunt.

§. XXIX.

Polyporum generatio.

Deinceps polypi multarum chronicarum, gravium ac lethalium afflictionum causam constituunt, quorum vero ea est ratio, ut ulla ope aut medicina tolli possint iterumque dissolvi, & hinc Medicus in eorundem medela id tantum agere debet, ut vel mature eorum generationem impedit, vel si jam adfuerint, incrementum præscindat. Jam vero experientia confirmamur, polyporum generationi admodum accomodos atque obnoxios esse eos, qui otio indulgent, spongiosi habitus sunt, venas gerunt exiliores, ac vel nimis calidis esculentis & potulentis, vel etiam acidorum liberaliori usu, tenuiorem aqueam partem, quæ sanguini fluiditatem conciliat ejusque motum intestinum custodit, absumunt, hisque simul efficiunt, ut crassiores terrestres molecule e fluidi sinu discedant atque concrecant. Quare injungenda utique exacta vitæ victusque ratio, & ejusmodi diætetica maxime præsidia commendanda, quæ vitiosam hanc sanguinis dispositionem corrigunt ac tollunt, inter quæ principem merito obtinent locum, motus & exercitatio corporis cum aëris mutatione, potus tenuis, nec non conveniens aquarum

mine-

mineralium usus, præsertim earum, quæ temperatiores indole & sal alcali vehunt, ad dissolvendas fibrosas ad concretionem pronas in sanguine partes, accommodatissimum.

§. XXX.

Porro, quia illæ in morbis diuturnis obviæ viscerum *Viscerum* indurationes, corruptiones, ulcerationes & abscessus, nonnisi *corru-* a stagnatione & quiete humorum circumagendorum natales *ptiones.* ducunt: tutiori longe & certiori ratione hæc pariter mala præcaventur, quam persanantur; cui fini obtinendo identidem quam maxime inserviunt, deprompta ex diætâ & bono vitæ regimine subsidia. Temperies quippe & mediocritas in rebus sic dictis non naturalibus, est efficacissimum auxilium, quo & corporis integritas servatur & morborum causæ averruncantur; omne autem nimium, peritissimo *Hippocratis* effato, naturæ inimicum, dum sanitatem labefactat, ac destruendo humorum vitales in corpore motus, causas morborum præparat atque ingignit. Potissimum ad chronicorum morborum genesin faciunt nimia verocitas, otium atque desidïa, animi moeror, aer densus, humidus, impurus minusque elasticus, potus intemperatior, cibi insalubres semiputridi, quæ omnia ea propter summo evitare debet studio, is, qui corpus a gravi vel plane lethifera labe immune præstare nititur.

§. XXXI.

In acutis vero morbis, qui inflammatione, eaq; in spha- *Inflam-* celum concedente, necant; summa opus est prudentia, quo *mationes* in eorundem curatione omnia ea evidentur, quæ inflamma- *& sphae-* toriam statim ipsamque putredinem conciliare possunt. Nam *laciones.* profecto, si in ullo, certe in acuto, qui præcipitis est periculi morbo, perquam leves etiam commissi errores, tam pernicialis sunt effectus, ut in summum discrimen agros adducant, præsertim si jam per aliquot dies symptomatum vehementia continuo æstu & assidua vigilia corpus exhaustum viresque infirmatæ fuerint. Compluries certe observavi, a situ paul-

lo diutius erecto, ab improvida linteaminum mutatione, a pedum refrigeratione, ab ira, timore vel terrore incussio, a potu spirituoſo, nimis calido, ab assumpto vino, a cibo etiam morbo declinante largius ingesto, multo magis a medicamento nimis calido, opiato, purgante aut clyſtere acriori, omnia in pejus mutata & lethiferam contractam fuiſſe inflammationem. Hinc licet ipſa natura acutas has & diffi-
cillimas paſſiones quam optime ſanet; verumtamen quia plurimæ dantur cauſæ, quæ naturam in opere ſuo impedire, turbare & motus ſalutares pervertere poſſunt, Medici, ceu naturæ miniſtri eſt, omnes has cauſas probe tenere perſpectas modisque declinare omnibus; unde etiam præſentia ſua decumbentibus crebro adeſſe debet, ne vel ipſi, vel adſtantes, damnum procurent; id quod ſapienter etiam præcipit Hippocrates Sect. I. aph. I. oportet, inquiring, non ſolum ſe ipſum exhibere quæ decent facientem, ſed etiam egrotum, & præſentes, & quæ externa ſunt.

§. XXXII.

Mortis
naturalis
cauſſa,
quæ?

Non autem alienum erit, ſi huic de generatione mortis in morbis diſquiſitioni, nonnulla de vera inevitabilis omnibus moriendi neceſſitatis cauſſa, ſubnectamus. Hanc omnibus ex æquo incumbere nemo non novit; in quo vero ejus genuina & adæquata ratio poſita ſit, tantum non omnes & Medicorum & Philoſophorum libri ſicco plane prætereunt pede. Ego vero in *Medicine rationalis ſystematica* Tom. I. pag. 62. ſeq. nec non Tom. II. pag. 54. ſeq. in mortis naturalis genuinam cauſſam inquirens, eandem non tam in fluidarum, quam potius ſolidarum corporis noſtri partium depravata conſtitutione, fibrarum nempe & membranarum increſcente cum ætate craſſitie, duritie & compaſtiori textura conſtituendam eſſe, primus fere merito aſſerui. Nam quia temporis diuturnitate cartilagineſ in oſſa denſantur, hæc magis magisque indurantur, tendines cum fibris muſculofiſ ob-
rige-

rigescunt omniumque annosiorum animantium carnes longe solidiores & compactiores sunt quam juniorum, ac proinde coctione ægrius mollescunt, nullum etiam dubium est, quin tunica vasorum, e quibus corpus penitus coagmentatum est, crassescant, alvei canalium his angustentur, occludantur, ut minimi eorundem demum concidant, ac nihil plane fluidi transmittant. Hoc autem si contigerit, intercipitur non solum vitalis ille humorum per universum corpus circulus, sed etiam secretiones cum excretionibus per minimos tubulos non rite perficiuntur, succi vitales spissescunt & sordescunt, vires concidunt, digestio perit, nutritio deficit, & sic sensim sensimque ad morbos paratur aditus ipsaque mors obrepit.

§. XXXIII.

Quod si itaque vita diutius conservanda & senectus a familiaribus ipsi morboris insultibus vindicanda, eo quam maxime in vitæ victusque ratione dirigendum est consilium, quo partes solidæ flexiles, canales patuli & humores fluxiles, tenses ac puri servantur. Hinc evitanda merito omnia qualitate & quantitate excessiva, senili corpori insensissima, omnia acida, adstringentia, falsa, cibi nimii flatulenti, duri, difficilis concoctionis, præsertim ex mari desumpti, potus nimium spirituosus, frigidus & crassus, otiosa quies, frigus, pathetica animi impeniores commotiones, veneris intempestivum exercitium, diuturna vigilia, excessiva corporis agitatio, aer vappidus, impurus ac nubilus. Vicissim temperiei & moderationi in rebus sic dictis externis non naturalibus solícite studendum, animus ad hilaritatem & tranquillitatem componendus, cibus paucus, mollis & facilis concoctu cum potu tenui & expedite transeunte usurpandus, vinum moderate, non acidum, sed dulce & spirituosum, bibendum, juscula analeptica orbillanda, balnea & pediluvia subinde admittenda, venæsectio crebrior sed parca instituenda, corpus moderate exercendum & in aëre puro ac sereno, rurali maxime, commorandum, corpus subinde

de blando calore fovendum, alvus nonnunquam clementer subducenda, & quæ plura eundem in finem præcepta in dissertatione, *de tuenda senum valetudine*, tradidimus.

§. XXXIV.

*Lethiferarum
lætionum
ratio.*

Neque postremo alia, quam in morbis & ex naturali necessitate, ratione, motuum nempe vitalium, tam in solidis systaltici & diastaltici, quam in fluidis circulatorii & progressivi, plenaria destructione atque extinctione, mors a gravi per violentas causas externas læsione evenit. Nimirum pleræque mortiferæ per externam quandam vim illatæ læsiones, enormi sanguinis profusione atque extravasatione trucidant, dum, ex fauciatis tam in, quam extra amplissima corporis viscera, majoribus vasis, cruor nulla ope compescendus manat, ac demum cum viribus vita, exhausto penitus liquore vitali, concidit. Aliæ lethales violationes ita sunt comparatæ, ut vitalem illum systoles atque diastoles motum extinguant, hinc si cor ampliore vulnere fauciatur, illico exanimatur læsus, non solum ob extravasationem, sed maxime quod circularis sanguinis progressus, pereunte in corde, tanquam centro, recipiente & expellente motu, sistatur atque cesset. Idem fit, quando principium nervorum, quod in medulla oblongata cerebri est, sive per vulnerationem, aut ab incumbente gravius humore, offensam patitur, eo quod sufficiens liquidi nervei influxus, a quo motus cordis & vasorum contractorius & relaxatorius ad vitam necessarius, dependet, intercipitur penitusque aboletur. Aliæ denique inflictæ vulnerationes putredinem sphacellosam & corruptionem post se trahunt eademque latius serpente ipsosque vitales succos contaminante lethum inferunt ægrumque lente conficiunt. Ac in his omnium absolutæ lethalitatis lætionum ratio fundata est & continetur.

SECTIO II.

DE

METHODO, ORDINE
ET LEGIBVS MEDENDI, TAM
NATVRÆ, QVAM ARTIS.

NEC NON

DE REMEDIIS, EORVM QVATVOR GENERIBVS,
OPERANDI ET RECTE APPLICANDI
MODO,

VNACVM CAUTELIS, OBSERVATIONIBVS ET MEDICAMENTIS
COMPOSITIS SELECTISSIMIS.

WILLIAMS' PINK PILLS
FOR PALE PEOPLE

THEY ARE THE ONLY
PILLS THAT
GIVE THE BLOOD
AND MAKE THE
SKIN PINK



CPVT I.
DE
OPTIMA NATVRAE MORBIS
MEDENDI METHODO.

§. I.

QVod plurimi, præsertim ex plebejis, *Natura rusticis & qui simplici ac populari victu fruuntur, sola sæpe morbos sanat.* & tranquillioris quoque ab intemperantia affectuum vacui sunt animi, a febribus acutis, etiam gravioribus, pestilentibus, malignis, sine omni medicamento & sine singulari artificiosa Medici ope, sola abstinencia & quiete, qualicunque evitatione nimiarum refrigerationum, tutius & felicius, solius naturæ, qua pollent energia, robore ac viribus sponte liberentur, & tutius, felicius ac certius, quam multi alii, divites quoque & Magnates, qui famigeratissimis Medicis eorumque pretiosis arcanis utuntur, convalescant, tam evidens & notum est, ut nulla plane egeat probatione. Quin ad unum fere omnes ex antiquissimis & recentioribus Medicis in eo consentiunt & cum *Hippocrate lib. VI. epid.* 5. fatentur: quod natura optima sit morborum medicatrix,

Ccc 2

quæ

quæ suis viribus usu, juxta *Galenum*, noxia e corpore expellat & utilia salutis causa retineat, ut sine ejus auxilio etiam Medicus nihil solidi præstare possit.

§. II.

*Quid per
eam in-
telligant
Veteres.*

*Et qui-
dam re-
sentiores.*

Quid vero per hanc naturam, quæ tam efficaciter vitam & sanitatem tuetur, hominemque a præsentis mortis & morborum periculo defendit ac liberat, intelligendum sit, obscura inde ab omni ævo fuit quæstio, quam maxime tamen evolvenda. Veteres, quorum sapientia in physicis plus inanimis nominibus, quam rebus & veris causis occupabatur, naturam corporis humani dixerunt omnis motus in eo principium & causam: qua vero definitione nihil aliud egerunt, quam ut id quod in quæstione erat repeterent, sive idem per idem explicarent. Quidam non incelebres nostri ævi viri paullo pressius naturæ vocem exposituri, perhibent: omnium actuum, tam mentalium, moralium, idealium, quam physicorum & mechanicorum in corpore nostro, unam & primam causam, unum agens & principium esse, nempe animam, ratione & interna cognitione instructam, omnesque motus ad certum finem & salutem corporis dirigentem. Hanc, quando vitaliter agat, id est, motus ad vitam conservandam administret, naturam appellandam, quæ quidem non tantum & contactu quodam physico, absolutæ necessitatis, sed tantum morali quadam causarum nocentium & læsionum imminenti affirmatione, motus ad eas removendas ac ejiciendas corpore, quamvis sæpius erronee, instituat, adeoque omnes hos motus & conatus, quum in salutarem finem, nempe conservationem corporis tendant, in se & sua natura semper bonos & salutares esse, eamque ob causam perperam noxios & morbosos a vulgo Medicorum haberi.

§. III.

*Atque ve-
ro in cor-
pore tri-
plices.*

Nova hæc est ac ingeniose excogitata hypothesis, quam tamen examini subicere & pluribus ac evidentibus argumentis infirmare jam nec loci est, nec nostri instituti, in pri-

inprimis quum etiam jamjam de eadem abunde in *Medicine* hujus *systematicæ* *tomo I.* a nobis actum, & alii quoque, quos inter eminet D. Burchardus, Professor Rostochiensis celeberrimus, in *tr. de principio movente primo in animatis*, id docte fatis & solide præstiterint. Id saltem hoc loco monendum esse duxi: quod triplices in homine observentur actus, in se & sua natura distinctissimi, nempe mentales, quæ intellectu & voluntate absolvuntur, ac homini proprii sunt, ideales, qui in receptione idearum ex objectis & inde emergente certa sensatione & perceptione fiunt, quos cum brutis animantibus communes habemus, & denique actus pure physici, sive motus, qui ex operatione & mutua actione rerum corporearum resultant, & pro diversa structura, situ, nexu, dispositione, magnitudine & figura solidorum & fluidorum, certo numero, ordine & fine etiam eveniunt, ac a Philosophis dicuntur mechanici, & neque principium illud quod intellectu præditum, neque illud quod ideas format, sed vim motricem, quæ omnibus rebus corporeis essentialis est, varie modificatam, pro causa vera, proxima & immediata agnoscunt. *Ex his* Et tales actus physici sunt verum Medici & Medicinæ objectum, eo quod vita, sanitas, lætio actionum, sive morbus, *mechanici* eorum extinctio, sive mors, præservatio & restitutio a morbis, *Mediciniæ ob-* item vis & virtus rerum quæ nocent & prosunt corpori *jectum.* humano, ab his primo, proxime & immediate dependent, utur non negari possit, ex divina commercii & consortii lege, quam summus opifex inter actiones vitales, sensuales & mentales sancivit, cogitationes ac phantasias hominis limitatam & determinatam quandam habere potentiam, actus istos pure physicos, non causally efficiendi, sed potius turbandi & quadantenus disponendi.

§. IV.

Ut itaque paullo clarius & specialius mentem nostram promamus, per naturam corporis humani, quæ secundum *Horum motuum æconomiam naturam.*

dum *Hippocratem* omnis sermonis & ratiocinationis in Medicina principium esse debet, nihil aliud intelligimus: quam progressivum & in circulum abeuntem sanguinis & omnis generis humorum motum, a cordis & vasorum, quibus fluida continentur, aliorumque solidorum motu contractorio & dilatatorio reciproco, dependentem, quo solidorum & fluidorum decenti motu, tam partium utilium & qui in usum retineri debent, continua secretio, quam etiam variæ indolis inutilium, per convenientia emunctoria & cribra excretio, perficitur. His motibus recte & ordine succedentibus, vita & integritas corporis conservatur ac morbidæ læsiones arcentur, iisdemque inordinate se habentibus, partium & actionum læsiones, sive morbi, oriuntur, quorum sanatio illis in ordinem per convenientia auxilia reductis, evenit atque conficitur. Hic autem activus, vegetus systoles & constrictionis solidorum motus, tanquam vera causa, quæ recte dici potest anima, actionum vitalium, non a principio quodam spirituali, morali & metaphysico, sed partim a solidorum & vasorum structura organica & virtute elastica, partim a fluidi tenuissimi, magna potentia movendi instructi, ac in sanguine arterioso & nervis contenti, in motrices omnis generis partes maxime tubulosas influxu dependet.

§. V.

*Methodus
nature
in caussa-
rum re-
motione
consistit.*

Jam quum clarissime consistet, quid sit natura illa corporis conservatrix & medicatrix; nunc dispiciendum erit: qua methodo, qua via, hæc ipsa natura, cujus plane mirabilis in liberando corpus a præsentibus morbi & mortis periculis vis est ac energia, hoc solenne negotium perficiat. Nam certe cognitio hujus methodi, qua natura, quæ infinite sapientem architectum pro auctore habet, utitur, merito vera ac firma cynosura est artis medicæ, quæ secundum hanc leges & regulas suas medendi construere debet, ut naturam recte agentem non turbet, vel pervertat, sed potius sequatur & imitetur, vel deficientem & impeditam adjuvet atque

in ordinem reducat. Palmarium vero momentum, in quo methodus & ordo, tam naturæ, quam artis in medendo, quam maxime conveniunt, in eo versatur, quod utroque causæ morborum, quæ œconomiam motuum secundum naturam turbant & corrumpunt, removeantur atque corpore ejiciantur. Hinc recte docet *Galenus lib. I. method. medend.* perfectam curationem a causis exordiri. Et ex *Celsi* mente is recte curat, quem causæ origo non fallit; quia causæ investigatio ejusque primordia & occasio, in affectionis & remedium cognitionem amplissimam deducunt. Idem confirmat *Fernelius lib. I. cap. 4. method. med.* asserens: morbos absque causarum præcognitione, nec præcaveri, nec feliciter curari posse.

§. VI.

Quod si itaque sola natura sponte & suis viribus usa, *Causæ* sine ope & arte Medici & sine pharmacorum apparatu, morbos subinde sanat, idque causas morborum penitus removendo præstat, jure meritoque quæritur: quænam sint illæ morborum causæ, & quomodo, quo ordine ac methodo eadem a natura vincantur ac submoveantur. In hac autem decidenda tenendum est: quod sicuti, uti jam monuimus, ad conservationem corporis nihil magis necessarium, quam motus tam progressivus, quam excretorius: ita nihil naturæ infestius & ad destructionem inveniendam aptius, quam sanguinis & humorum quies, stagnatio, stasis, extravasatio, vasorum occlusio, sordium retentio & viscerum induratio. Hæ enim efficacissimæ sunt causæ ad inducendos motus febiles, spasmodicos & convulsivos, quibus maxime motuum morbosorum apparatus continetur, hæ quoque putredinem, quæ & mixtioni & structuræ solidorum insensissima est, inferunt, quam recentiores Medicorum malignitatis nomine insignant.

§. VII.

§. VII.

*Ad eas
removen-
das infer-
vit motus
solidorū
& flui-
dorum.*

Has igitur morbificas causas subigere ac remove-
bet natura, si officio suo recte perfungi velit. Ad hoc vero
exsequendum non convenientius ac efficacius excogitari pote-
rit medium, ipso motu, tam solidorum, quam fluidorum,
auctiori facto. Hujus enim indoles & præcipua virtus est, ut
humores subsistentes eorumque stases & stagnationes concu-
tere, latibulis extundere, resolvere, iterum in motum ciere
& sic obstructions vasorum referare possit. Hic quoque
motus spissos, immobiles impactosque humores fluxiles ac
progressu idoneos reddit, pariterque copia delinquentes suc-
cos ipsumque sanguinem per congrua loca exonerandos, nec
non excrementitios, serosos, salios per diversi generis emun-
ctoria proscribendos, quam maxime idoneus est, biliosos
quidem & viscidos per alvi secessum, salios aquosos per uri-
nam & subtiliores aqueas salino-sulphureas sordes per univer-
sale cutis emunctorium exonerando.

§. VIII.

*Qui au-
thor sa-
ctus &
morbos
facit &
eos solvit.*

Jam vero memoratu admodum dignum est, omnem
morbificam causam, sive quantitate seu mole, sive intempe-
rie & activitate infensa sit, principaliter actione sua afficere
partes subtiliori motu & sensu præditas, quales nervoso-
membranaceæ & musculosæ sunt, & ex illis maxime com-
positi omnes canales & tubuli qui fluida vehunt & motu sy-
stoles atque diastoles pollent, quos moleste vel distendit &
comprimit, vel lancinat, irritat aut erodit, quod dum effi-
cit, vigore legis mechanicæ microcosmicæ, molesta quædam
spastica tractoria motio, sive reactio, universum sæpe syste-
ma partium nervosarum & fibrosarum in similem motum per
consensum abripiens, suscitatur, quæ spastica motricium,
musculosarum & nervearum partium constrictio, evidentem,
primam & proximam motuum morbosorum causam unice
constituit atque absolvit. Hæc quippe est, quæ omnibus
motibus, qui alias secundum naturam ordinate fiunt, tur-
bandis

bandis & pervertendis apta est, hæc functiones partium lædendi ac invertendi potentia pollet, & ex hac omnium in morbis obviatorum symptomatum origo merito petenda est. Quod vero mirandum, idem hic spasticus motus, est instrumentum ac medium, quo natura utilissime utitur ad ipsam morbi causam, quæ motus hos morbosos concitat, superandam ac præscindendam, ut adeo infinita summi architecti sapientia & providentia in construenda corporis humani machina merito admiranda sit, qua factum, ut morborum motus subinde remedio sint, ipsis morborum causis corrigendis ac removendis.

§. IX.

In quo quidem quum magnum naturæ medicatricis *Quota-*
arcanum & res maximi momenti contineatur: scopo nostro *plex sit*
quam maxime erit consentaneum, ut mentem nostram circa *motus*
hoc negotium paullo clarius exponamus. Videlicet obser- *hic.*
vatur, ut passim inculcavimus, in omnibus motibus & paro-
xysmis spasmus, qui recte primo in universalem & particu-
larem, deinde in salutarem & perniciosum dispescitur. Uni-
versalis, si totum vasorum genus, præcipue vero cor & ar-
teriarum ac fibrarum systema affligit, & facta præternaturali
in iis constrictione, systoles & diastoles intenditur sanguinis-
que progressus acceleratur, febris recte dicitur, cujus pul-
sum frequentia certissimus index est. Alter particularis,
in certis tantum corporis partibus consistit, quas constrin-
gendo coarctat, sanguinisque liberum progressum intercipit,
adeoque inæqualem commearum efficiendo, sanguinis co-
piam ad alias partes minus strictas impetuosè urget. Po-
tissimum spastica hæc affectio particularis nervosas & mem-
branaceas partes exagitat, ut sunt ventriculus cum toto in-
testinorum volumine, in quo scenam sæpe adornat, quod
morbus ille spasmodicus, qui mali hysterici vel hypochondriaci nomine notus, pathematum & varietate atque atro-
cia planum facit testatumque. Præsto quoque est hic spa-
(III.) Ddd smus

smus in omnibus hæmorrhagiis, nimis sanguinis ad certa loca congestionibus, humorum decubitu, in omnis generis doloribus, cunctis anxietatibus & excretionibus suppressis. Quod si vero hic vehementior spasmus duram matrem, quæ totum cerebrum ac cerebellum involvit ac nervorum omnium immo ossium membranis ortum præbet, tangit, non modo celerrima fluidi nervei per totum membranarum & nervorum systema fit trajectio, sed & citra voluntatem artus vel stringuntur, vel distorquentur, aut validissime agitantur, & sic epilepsia, sive convulsio universalis, nascitur, quum contra convulsiivi motus ex spasmō membranarum ac nervorum spinalis medullæ originem fortiantur.

§. X.

*Qui ex iis
ad salutem.*

Hi sunt præcipui illi naturæ motus, qui in morborum insultu vel paroxysmo nunquam non advertuntur; jam disquirendum: quinam ex iisdem salutem & causis morborum removendis apti sint, & quinam vicissim ad perniciem ipsamque mortem tendant? Salutares itaque eos in morbis motus ac spasmos dicimus, qui ita sunt comparati, ut causam morborum sive spasmodicorum motuum auferant, & tam humores stasim vel stagnationem concipientes expediant iterumque in motum cieant, quam & acres causticos corrigant atque contemperent, simulque ad excretionem materiæ peccantis vergant.

*qui ad interitum
tendant.*

Exitiosos vero multumque periculosos censemus eos, qui cutim & omnis generis emunctoria constringunt, materiam quæ in vitio est ipsumque morbi fomitem intus detinent & ad ima viscerum ac interiora vitæ penetralia pellunt, neque evacuant. Illos sanitas, hos mors, excipit.

§. XI.

*Spasmus
quomodo
fiat salutis?*

Ea quidem omnium spasmodorum indoles est isque effectus, ut sanguinem & humores a corporis ambitu ad interiora agant, ac emunctoriorum minimos ductus stringendo, evacuationes quodammodo sufflamment: nihilominus tamen salutares sæpe fiunt, quando scilicet interposito certo temporis

poris spatio, excernicula antea occlusa laxantur, crispati tubuli adaperiuntur & postea major succorum ad corporis superficiem partesque externas succedit appulsus, cutanea excretio augetur, sudor manat, urinæ crassæ minguntur & alvus biliosa ac viscida copiose dimittit. Et ex his excretionibus, quæ morbos & spasmos certo præsertim tempore subsequuntur, salutaris effectus & auspiciatus eventus merito dijudicandus, unde etiam Medici easdem criticas, sive morbum judicantes, appellare suescunt. Solent autem hæ ipsæ, si cum salute contingunt, die maxime impari, critico eapropter dicto, succedere, dimidiato scilicet septimo, nono; undecimo ac decimo quarto, & his diebus vel ad mortem, vel ad salutem morbus concedit. Ubi enim hisce diebus notabilis symptomatum fit remissio & evacuationes eveniunt, optima salutis est significatio: quando vero symptomatum atrocitas persistit, spasmi urgent nec evacuationes animadvertuntur, gravissimum imminet discrimen, ac mors ut plurimum morbum terminare observatur. Quare licet plures motuum morbosorum in se & sua natura a norma ac ordine deflectant, dirigente tamen sic divina in artificiosa solidarum & fluidarum machinam nostram constituentium partium dispositione, structura & motibus inde resultantibus, providentia, sapissime sunt salutes causasque morborum expugnandis idonei, ipsisque morbis sic optime medentur, quo etiam sensu recte a Veterum sapientioribus natura dicta est morborum medicatrix.

§. XII.

Igitur genuina, tuta ac saluberrima corpori a summo *Natura* conditore jam insita methodu, lex ac norma, qua & se- *causam* cundum quam ipsa natura morbos percurat, in eo maxime *tollendo* versatur, ut a causa morbi, sive mole, sive qualitate peccet, *sanat* spastici motus in genere vasculoso & membranoso etiam su- *morbos.* scitentur, qui ad ipsam causam morbi removendam, vel convenienti tempore eliminandam, tendant. Hi quando ex va-

to succedunt, sola natura morbos sanat & Medicus tantum spectatorem agit, quod si autem hæc sola id præstare nequit, artifex eidem viæ ac methodo insistere, naturam adjuvare, impedimenta tollere, motus moderari, vel intendere, materiam ad congrua loca ducere, ab incongruis divertere, variis debet accommodis remediorum generibus. Ut adeo in eo jam unice omne medentis auxilium, omnis intentio ac sanandi ratio fundata esse & consistere debeat, quo methodum naturæ, si in materia subsistente dissolvenda atque expedienda, acri emendanda & temperanda demumque debito tempore, per convenientia loca expellenda, occupata est, observet, sequatur, adjuvet ac in rectam viam ad salutarem finem traducat.

§. XIII.

*Natura
processu
in febri-
bus acu-
tis.*

Sed necessarium æque ac utile erit, quo mentem nostram paullo clarius exponamus & hanc naturæ methodum in variis morbis investigemus, ostendendo, qua ratione in iisdem corpus sæpe a præsentanea noxa vindicet. Ex horum numero potissimum sunt febres, tam acutæ, quam chronicæ. Acutarum quidem pleræque sunt inflammatoriæ & fixam sanguinis stasim in tubulosa partium aut viscerum substantia pro causa agnoscunt, quæ dum spasmus in universo genere fibroso & valculoso suscitatur, sanguinem per totum systema vasorum celerius agit & majori copia ad partem affectam appellat, quo fit, ut sanguis subsistens & firmiter inclusus, successive abstergatur, eluatur, resolvatur ac in motum redigatur, quod plerumque circa septimum diem contingit. Et si tunc spasmus cum omnibus symptomatibus etiam ipsa febre remittit, cortex cutis glandulosus laxatur, exhalatio repetit, sudor liberius manat, generatæ sub febrili commotione multæ recrementitiæ salino sulphureæ sordes, solius naturæ beneficio utiliter evacuantur, ipsa febris ex voto solvitur, qua certe naturæ methodo plures, præsertim plebeji, sine ullius Medici ope, sæpe feliciter, ex febribus inprimis continuis, evadunt.

§. XIV.

§. XIV.

Hæc naturæ methodus curandi quam maxime Medico *Medici officium* monstrat viam, quid in hujus generis febribus facere vel omittere debeat. Lex enim curandi hæc est: impactus tubulis sanguis successive & paulatim citatori sanguinis appulsu resolvendus est. Ex quo facile colligitur, quia a sanguinis abundantia, qua nimium vasa distenta sunt & turgent, impeditur sanguinis per partem inflammatam liberior transpulsum, ut potius exinde major sanguinis in eadem fiat stagnatio ipsaque inflammatio incrementum capiat, tali in casu nihil præsentius esse, quam sanguinis detractionem provide institutam, partim quo major stasis & inflammatio impediatur, partim etiam ut liberior cursus universo sanguini & transpressio per partem affectam concilietur. Vicissim & illud ex prima & principe morbis medendi lege naturæ addiscimus, non valde nimiam esse sanguinis quantitatem exhaustiendam, siquidem detracta, nimia sanguinis copia, non sufficiens sit ad partem affectam ejus appulsus, quo tamen stasis, quæ causa morbi est, dissolvi debet. Quare graviter ii peccant Medici, qui in febribus inflammatoriis quando sanguis deficit, repetitas venæsectiones moliuntur, quibus nihil aliud perficiunt, quam ut inflammatam partem celerrime ad sphacelum perducant. Et dum in minimis & capillaribus vasculis sanguis & humores stasin ac inflammationem concipiunt atque ex his ipsis eluendi sunt, per hæc tamen sanguis crassus & densus difficillime transit, facile apparet, ea omnia, quæ humores fluxiles reddunt, quæ diluunt, humectant & immodicum calorem, quo serum tenue absorbitur, contemperant, remedia convenientissima esse: contra omnia, quæ humores increasant, quæ calorem augent, humidum absorbunt, uti opiata & calidiora sudorifera, in omni inflammationum genere noxiosissima esse.

§. XV.

In exanthematis febribus quid natura faciat.

In acutis gravissimis febribus, quæ jungi solent variolæ, morbillis, purpuræ, petechiis, bubonibus pestilentialibus, serum sanguinis causticum, acré, tenue, in partibus nervoso membranaceis, præsertim ventriculo & intestinis, acerbæ spasticas constrictiones, nec non humorum ad varias partes congestionem efficit, simulque febrem accendit, cujus beneficio sanguis, a partibus exterioribus ad interiores, ubi materia peccans hæret appellitur, ut copiosioris lymphatici humoris & sanguinis affluxu materia acris caustica temperetur, corrigatur, resolvatur & apta ad excernendum fiat. Quod si naturæ beneficio id feliciter accidit, spasmodorum omniumque fere symptomatum fit remissio, pori & tubuli subcutanei relaxantur & sanguinis ad summam cutem & ambitum corporis fit major affluxus, unde materia morbifica caustica ibi secernitur atque sub forma exanthematum, pustularum, bubonum excernitur. Et sic sæpe naturæ solius beneficio pestis, variolæ & morbilli, citra singularem apparatus medicamentorum, sanantur. Nam perspicuis certe verbis *Sanctorius sect. I. aph. 139.* confirmat: plebejos magis liberari a peste, quam divites, qui multis medicamentis utuntur & *Sydenham* in limine *acut. morb.* ita differit: *ipsa pestis quid obsecro est aliud, quam symptomatum complicatio, quibus utitur natura ad inspiratos unicum aëre particulas miasmodes per emunctoria, apostematum specie, vel aliarum eruptionum opere, excutiendas.*

§. XVI.

Quid me dico facienda.

Quod si igitur hac via, natura sola hos gravissimos morbos curat, utique etiam Medicus, qui naturæ minister audit, huic viæ insistere debet, si natura sola id perficere impeditur. Regula namque exanthematicis hisce febribus medendi hæc est: materia acris, caustica, vitalibus partibus inhærens, uberiori sanguinis & lymphæ benignæ appulsu conterperanda est, ut apta ad excretionem per ambitum corporis

poris fiat. Ex quo jam conficitur: omnia ea, quæ ad con-
temperandam materiam acrem faciunt, & quæ succos sangui-
ni dulces, gelatinosos, benignos ingenerant, naturæ vacil-
lanti egregie opitulari. Hinc patet, præstantissimum in his
morbis usum esse decoctorum, quæ leniunt & demulcent acri-
moniam, qualia parari solent ex dactylis, ficubus, radice
glycyrrhizæ, floribus papaveris rhæados, semine fœniculi.
Patet quoque porro, plane eximium esse usum bezoardicorum,
quæ fixioris indolis sunt & acrimoniæ humorum temperandæ
egregie serviunt. Neque ex dictis amplius obscurum esse
poterit, quam valde graviter & perversè in curando procedant ii,
qui statim ab initio, antequam materia cocta, tem-
perata & ad exclusionem apta reddita fuit, sudoriferis valen-
tioribus & expellentibus hos morbos tractant, quibus certe
nihil aliud efficiunt, quam ut acerbiora symptomata ipsi sumque
funestum exitum accersant. Denique ex allatis id quoque pa-
tescit; quod quum materia per cutem sit eliminanda, nefarii
sint eorum aulus, qui eo tempore, quo ipsa ad hoc in super-
ficie corporis emunctorium transmitti debet, valentiora pur-
gantia, diuretica, aut emetica, vel etiam acida refrigeran-
tia, aut opiata, vel nimia quantitate nitrosa, præsertim in in-
fantili ætate, propinant, aut corpora liberiori aëri exponunt.

§. XVII.

Febres quoque intermittentes remedii & præsidii *Febrium*
quippiam complectuntur, & haud raro sine Medici auxilio *intermit-*
cum insigni subsequente emolumento discedunt. Quum *tentium*
enim contumaces ex iisdem, ut sunt quæ autumno, vel hie- *naturalis*
me accedunt, nec non quartanæ, focus ac fomitem ple- *decursus.*
rumque alius in abdominis visceribus, hepate, liene vel pan-
create constitutum habeant, eaque propter corpora sangui-
ne crasso farta crebrius infestare soleant, ac nonnunquam
vel sponte, vel per imprudentem medicationem, in icterum,
analarcam, asciten, pedum oedemata, aut lienis tumorem con-
cedant:

cedant: nihil certe efficacius magisque aptum ad obstructa & infarta hæc viscera referenda excogitari poterit, quam citatior atque validior sanguinis ad oppilatos tubulos appulsus ac motus, quo utique succi crassi & impacti urgentur, latibulis eliduntur iterumque in motum percipientur, ut hinc solutis obstructionum repagulis, ipsa febris, vel sponte sæpe, vel exigua artis ope, felicissime desinat.

§. XVIII.

*Artificis
officium.*

Quia vero graves a sanguine nimis copioso & crasso oppilationes, minus ex voto a sola natura expediri queunt, sed potius recurrentibus tam crebro paroxysmis, sanguinis massa admodum consumitur, intemperiem calidam biliosam contrahit, ipsæque vires simul exhauriuntur; omnino artificis est, optimum naturæ processum opera sua, quantum fieri potest, secundare, omniaque auxiliorum genera eo dirigere, quo facti obstructione viscerum meatus referentur. Quo pertinet maxime prudens & circumspectus pro diversitate corporum usus salium aperientium, spissos succos colliquantium & abstergentium, decocta & infusa ex radicibus & herbis amaris aromaticis incidentibus balsamicis concinnata, accommoda evacuantia, ut sunt balsamica nostræ pilulæ, item mercurialia rite præparata; quæ omnia debito ordine ac tempore administrata, utique ad debellandas has contumaces febres & corpus ab imminente periculo tuendum, præstantissimæ sunt efficacæ. Contra vero nefaria sane & perversa rebelles intermittentes sanandi est methodus, qua mox in principio purgantia validiora & emetica, item sudorifera, opiata & adstringentia, liberaliori præsertim manu, propinantur; eo quod hoc facto, obstructiones potius obfirmantur & pessimæ recidivæ, vel alia longe graviora mala arcessuntur, quæ nullam sanationem admittunt.

§. XIX.

*Natura
methodus
in lym-
phaticis
et hæc.*

Accedunt arthriticæ, rhevmaticæ & catarrhales febres, in quibus maxime peccat serum copiosum excrementitium.

titium, tenue, falsum, quod languescente perspiratione retentum, & ad interiora, atmosphæra præsertim a ventis borealibus compressa, repulsum, in glandulosis asperæ arteriæ vel faucium locis, aut membranis articulorum vel musculorum hærens, spasticas ibi stricuras movet, unde extremorum horripilatio, refrigeratio, lassitudo corporis gravativa, appetitus prostratio, alvi constrictio, frequentior ad urinam stimulus, calor sub vesperam & noctem auctior, sternutatio, tussis, dolor artuum, subsequuntur. Nihilo tamen secius sub hisce naturæ contrariis ab ambitu ad interiora motibus, subsidium latitat atque remedium; quandoquidem dum sanguis & temperatior lymphæ ad partes stimulo salino exagitatas largius advehitur, tubuli antea constricti ampliantur & materia caustica contemperatur, sive coquitur, atque adeo ad excretionem cum copioso humore viscido in tussi & coryza, vel ad exhalationem per cutis spiracula in arthritide & variis rheumatismi speciebus apta redditur. Et hic naturæ processus *Et artus* Medico planius monstrat, quid in ejusmodi morbis prosit, *eidem in-* vel obfit, & quid ipsi faciendum, vel omittendum. *nitens.* Prima enim atque palmaria ejus intentio esse debet, quo congruis prædiis, acrem & falsam materiam corrigat, altera, ut non prius quam cocta & rite præparata fuerit, ejusdem ejectionem molliatur, tertia, quo per convenientia loca & emunctoria excretionem proritet, minime vero ad alia incongrua excretoria per improvide adhibita moventia, purgantia aut emetica, pertrahat, vel plane eliminationem, quæ exhalatione perficitur, præpostero topicorum, adstringentium ac repellentium usu, impediat aut cohibeat.

§. XX.

Quemadmodum igitur natura febres, causam earum *Hemor-* dem per motus auctiores subigendo ac ejiciendo, sola sæpe *rhagia in* persanat: sic quoque eadem methodo per varii nempe *ge-* neris excretiones alios morbos & arcet & percurat. *salutem.* Animæ naturæ *a natura* advertimus videlicet sanguinem in vasis, præsertim in sexu *institu-* untur. *se-*

sequiori, ætate juvenili, habitu corporis spongioso, molli, vitæ genere delicatiori & quietiori, statim temporibus vel temporum periodis redundare, stagnare & hinc inde in vas majoribus impeditius moveri, quo fit, ut spasmo, qui ima abdominis maxime petit, atque ex dolore circa lumbos, flatulentia in abdomine, alvi adstrictione, extremorum refrigeratione, urinæ tenuitate cognoscitur, obortæ, venæ in mesenterio & abdomine comprimantur, & hinc sanguis majori nisu & impetu in feminis ad uterum, in sexu nobiliori & provectiori ætate ad hæmorrhoidales venas, in adolescentia ad caput & nares urgeatur, ac majori ibi facta collectione, vasa extrema intra tunicas teneriores narium, ani vel uteri jacentia, nimium distendantur, tandem aperiantur atque notabilem sanguinis copiam effundant. Ecquis est, qui hic non animadvertat, salutarem & utilissimam esse hanc sanguinis excretionem, quæ liberat corpus a copia, libero vitalis hujus liquoris progressui contraria & ingens corpori periculum minitante,

§. XXI.

*Medica
earun-
dem tra-
ctatio.*

Et salutare hoc negotium ubi natura recte in movendo & excernendo exsequitur, nihil moliri debet Medicus. Imprudens enim ipsique rationi contrarium molimen foret, si has excretiones salutiferas externis vel internis constringentibus, aut motus sistentibus, opiatibus, narcoticis, cohibere niteretur. Quando vero natura in opere deficit, & vel motus isti spastici non sunt sufficientes ad sanguinem expellendum, vel sanguis nimis crassus, tenax ac viscidus est, vel viæ, per quas debet fieri evacuatio, obstructæ aut nimis spasmo contractæ sunt: ejus vestigiis merito insistendum & sanguinis exsolutio facilitanda ac promovenda, eumque in finem emmenagogorum moderatiorum cum sufficienti humido, item potus thée, coffeæ, balneorum, aquarum mineralium, nimiam spasmodum vehementiam sedantium, fotuum, frictio-

num

num, eo tempore quo exitum affectat sanguis, usus longe est efficacissimus.

§. XXII.

Sæpe etiam fit, ut provida solius naturæ ope, graves & *Hæmorrhagie* vix ulla arte sanabiles morbi, sanguinis profluvio solvantur & *rhagia* finiantur felicissime. Ut enim mittamus criticas illas in febri-
bus acutis maxime obvias hæmorrhagias, de quarum salubritate frequens apud *Hippocratem* aliosque Veteres est mentio; *solvunt morbos.* multiplici certe experientia compertum est: insaniam, vertiginem, convulsivum asthma, colicam convulsivam, affectus soporosos, item paralyticos, hemicranias, arthriticos & rheumaticos dolores, pathemata hypochondriaca, exsoluto per ani venas sanguine, motu & exercitatione corporis, remississe ac cessasse. Sæpius quoque a me observatum est, epilepticas convulsiones & convulsivas artuum tractiones, quæ per multos annos juvenculas affligerant, accedente mensium tempore ac prodeunte fluxu, sponte conquievissæ. Pariter experientia constat, cephalalgias, tinnitus aurium, vertiginem aliaque gravia capitis mala, tempestivo narium in juvenibus stillicidio, egregie levare ac abigi. Et quæ plura *Seç. I. cap. VII.* de damnis ex cohibitis sanguineis evacuationibus in medium adduximus. Ut adeo in ejusmodi casibus nihil satius magisque pro sanitate sit, quam ut artifex naturæ ductum sequatur, successum evacuationis tueatur atque facili-
tetur, nec ullo modo eundem inturbet.

§. XXIII.

Tam salubri eventu adornantur a natura evacuatio-
nes sanguinis; præter quas tamen plures adhuc aliorum hu-
morum aliarumque materiarum quæ corpori perniciem in-
tentant, ab eadem per varia loca instituuntur excretiones. *Natura sanatæ tuctur.*
Nimirum serosus quoque humor, tam quantitate, quam qua-
litate quandoque morborum causam constituit, eaque pro-
pter cum insigni sanitatis emolumento natura administra-
corpori subtrahitur. *per catarrhales defluxiones.* Obvium hoc est vere maxime & au-

diar-
rheas,

sudores,

Urina
proflu-
vium.

tumno, ubi per glandulosam narium & sinuum capitis tunicam, pituitariam dictam, item per glandulosas bronchiorum pulmonalium tunicas, seroso-mucidus humor copiose sub coryza, tussi aliisque catarrhalibus ac rheumaticis affectionibus eliminatur. Pariter accumulatis nimium in corporis penetralibus serosis, acribus, biliosis falsis succis, sponte sæpe oboritur alvi profluvium, quo iidem egregio cum levamine eji-ciuntur, morbisque inde oriundis minera subtrahitur. Sæpe quoque per cutis spiracula natura molitur exitum & sudorem movet copiosum, tam acrem & mordacem, ut ipsam cutem excoriet, cum molestissimo ad scalpendum pruritu, quo vidimus scorbuticam diathesin sublatam. In aliis, suppressa inprimis cuticulari excretionem, exsuperantem serosum humorem per urinarios tubulos emittit, corpusque per copiosum urinæ fluxum ab eo liberat.

§. XXIV.

Per vo-
mitum,

cutis de-
foedatio-
nes,

U
podagra
senum.

Singulari porro naturæ vigori & beneficio tribuendum: quod si ventriculus a copia ingestorum, præsertim incongruorum, vel crudorum & semicoctorum ciborum farcina oppletus est, vomitu cito citius eum depleat, quod certe apprime pro sanitate est, quippe ubi moles illa relicta stomachum aggravat, protinus ructus, flatu, borborygmi, hypochondriorum dolores, sanguinis ebullitiones, cum pulsu magno & celeri somnique defectu accedunt. Hinc etiam de lactentibus pusillis pervulgata opinione non sine ratione creditur, quod in crebriori vomitu magnum ad sanitatem eorum momentum sit repositum. Idem sentiendum de iis egestionibus, quibus natura delitescens intus & noxam minantes morbificas causas ad habitum corporis utilissime protrudit, quod subinde evenit in variis cutis defœdationibus, scabie, lepra, tinea capitis, achoribus, varis, maculis cutaneis, tumoribus erysipelaceis & serpigiosis ulculis aliisque in cute efflorescentiis. Inprimis quoque de podagra senes invadente experientiæ & rationi subnixa fert

sen-

sententia, eandem longævam præstare vitam, de quo scitum Sydenhami effatum: *quid podagra*, inquietis, *nisi natura providentia ad depurandum senum sanguinem, atque ad expurgandum corporis profundum, ut cum Hippocrate loquamur.* Quæ quidem omnes hæcenus enumeratæ criticæ egestiones, quum sanitatem tueantur & morbos mineram ejiciendo arceant, neutiquam intempestiva ac præpostera ope sunt compescendæ, aut materia ad corticem critice amandata, infido artificio repellenda, ne eo majus eoque gravius in corpus redundet detrimentum.

§. XXV.

Quod vero quam maxime mirandum, is sæpe naturæ *Morbos* in tuenda corporis integritate est processus, ut uno illo flui-*per mor-* dorum & solidorum motu auctiori facto, binas morbificas *bos curat-* causas tollat & sic morbos per morbos expugnet. De febribus, quod convulsiones solvant, prisca est *Hippocratis sect. V. aph. 17.* sententia. Quin quartanam illud Medicorum scandalum convulsiones ipsamque epilepsiam abigere, non modo idem auctor *sect. V. aph. 70.* nec non *Conc. III. 80.* prohibet: sed etiam exemplis confirmatur a *Bartholino Cent. II. hist. 68.* *Salmutho Cent. II. obs. 84.* Ipse quoque compluries observavi, motus convulsivos ex vermibus, accedente febre vermibusque per æstum vel bilem acrem enectis, sponte cessasse. Pathemata hypochondriaca adolescentes ac juvenes diu exagitantia, nec ulla medica ope expugnabilia, superveniente quartana, vel tertiana, evanuisse, idemtidem novi. Neque minus insanias & passiones spasmodicas, produnte in conspectum purpureo in cortice corporis scorbutico exanthemate, remisisse ac penitus discessisse, comper- tum habeo. Coryzam in aurium tinnitu, cephalalgia re- belli & oculorum vitiis, cum bonis ægrorum rebus oboriri, experientia uberius constat. Dysenteriam ac diarrheam hypochondriacis & melancholia hypochondriacis laboranti- bus, podagricis etiam, subinde tulisse suppetias, & recentio-

rum & Hippocratis testimoniis confirmatum est. Aliquot etiam mihi innotuerunt exempla, quod anasarca, item hydrops pectoris, cum cordis magno tremore & suffocationis metu, succedente post pilularum balsamicarum & salis aperitivi usum ingenti per uterum aquosi humoris fluxu, subsederit atque cessarit. Idem per largum alvi profluvium, per lenem stimulum procuratum, contigisse, & ipse vidi, & testatur *Ballonius lib. I. epid. pag. 6.* Hydropem quoque saccharum, fuscitato per lapsum ex improvise copioso urinae stillicidio, disparuisse ac feliciter fuisse sublatum, uberius enarratur in *disser.* haud ita pridem heic habita, *de hydropica lapsu integro abdomine curata.* Et quæ plura rariora exempla passim in observatis Medicorum sunt consignata.

§. XXVI.

Morbis
chronicis
non sufficit.

Sic quidem natura sola optime his morbis medetur, & ineffabili sæpe prorsus modo corporis integritatem tuetur; alia vero ratio est morborum chronicorum, quos natura sola non vincit, sed qui utique artificis opem atque accommodam medendi methodum per efficacia præsidia exposcunt. Nam recte in præfatione *Cæli Aureliani* asseritur: *celeræ passiones sua sponte solvantur, nunc fortuna, nunc natura favente, fluore sudoris, sanguinis, vel ventris: chronici vero solius Medici peritiam poscunt, quum neque natura, neque fortuna solvantur.* Et *Celsus* scite non minus quam ex vero *lib. III. cap. I.* eandem in rem disserit: *magis ignoscendum est Medico parum proficiente in acutis morbis, quam in longis.* Id enim breve spatium est, intra quod si auxilium non profuerit, æger extinguitur. Ibi & deliberationi & mutationi remedium tempus patet, adeo ut raro, si inter initia Medicus accersit, obsequens æger illius vitio pereat. Scilicet longe dispar chronicorum & acutorum morborum est ratio, dum non solum in illis vehementes spastici motus, qui morbi causam impetuose aggrediuntur celeremque exitum gignunt, adsunt; in his vero rarius, neque continuo, sed cum nota-

bili

bili intermissione præsto sunt, sed etiam illi ut plurimum ce-
leriter corpori valenti accedunt, hi vero successive generan-
tur & lentis adolefcunt incrementis. Accedit, quod eo-
rum qui diutius trahuntur morborum cauffæ plerumque sunt
obstructiones & indurationes minimorum vasculorum in emun-
ctoriis & glandulosis visceribus, inutilium & superfluum
tam se-quam excretioni dicatis, quibus oppilatis, non potest
non ingens vitalibus succis conciliari impuritas, ac demum
ipsa viscera & glandulosa excernicula penitus oppleta, indu-
rata & tumefacta in putridam corruptionem, exulcerationem
cancrofam vel in abscessum concedere, aut funestis lymphæ
effusionibus ansam suppeditare. Adeoque quum in his caussa
mórbi ipsa mora firmissimas agat radices, & labe latius serpen-
te, vires exhauriat, motus supprimat ipsamque naturam mi-
rum debilitet: non mirum est, naturam in expugnandis iis
languere, motibus auctis raro eosdem aggredi, nec dispel-
lendis iis sufficere, sed artis potius hic vigere opus, naturæ
vacillanti succurrere idque perficere in quo ipsa deficit.

§. XXVII.

Hoc autem ex voto exsequendi, nulla itidem alia *Qui arte*
suppetit methodus, quam qua vitalis ille, vitæ sanitatisque *sanandi.*
auctor, sanguinis & humorum per omnia vascula itus ac re-
ditus liber redditur, sordiumque per omnis generis excerni-
cula evacuatio integra præstatur, adeoque obstructiones, ubi-
cunque consistent, citissime expediuntur atque humores qui
in vitio sunt per congrua emunctoria educuntur. Jam vero
ipsa dicitur ratio, vasculorum obstructiones nec prius solvi,
nec succos vitiosos eliminari posse, quam mobiles, fluxiles
& ad excretionem apti redditi fuerint. Hinc utique omnis
per longos morbos sanandi methodus in eo continetur, ut
humores crassi mobiles ac fluidi efficiantur, dura emollian-
tur, stricta laxentur & postea validiori factò sanguinis im-
pulsu, per intensam solidorum actionem, impacti humores
con-

concutiantur, dissolvantur, eluantur & sic obstructionum repagula referentur. Ex quo quidem clarissime patet, efficacissimum ad hunc scopum obtinendum esse thermarum, acicularum & aliarum medicatarum aquarum, infusorum, decoctorum, totuum, balneorum & omnium, quæ incidente & aperiente virtute pollent, tempestivum usum; contra vero ante debitam materiæ quæ in vitio est præparationem, damnosam ac præposteram validiorum purgantium, diureticorum, sudoriferorum, salivantium, mercurialium & metallicorum oblationem, ut certe nihil imprudentius sit, quam intestinis fecibus duris conferis forte purgans exhibere, vel calculum impetuosè pellere, ubi a doloris & spasmi atrocía uretheres cum ductibus urinariis stricti calculusque impactus, aut aquas hydropicorum purgante exturbare niti, ubi succi viscidii adhuc intra membranarum tunicas obhærescunt, vel denique sudorem elicere velle, ubi spiracula cutis spasmò stricta atque compressa.

§. XXVIII.

*Natura
motus
minus sa-
lutares in
hamor-
rhagiis.*

Neque vero tantum natura quandoque in opere deficit, verum etiã nonnunquam alienos plane ac perniciosos in corpore concitat motus, qui causæ removendæ neutiquam accommodi sunt, sed potius exacerbationi favent. Hunc in censum referendæ sunt illæ sanguinis evacuationes, quæ si non sanguinis copia delinquit, sed serum acre causticum nerveo-membranosis partibus insidet & enormes profusiones in impuris cachecticis corporibus suscitât, uti sæpius contingit in purpura, variolis, morbillis, scorbuticis & arthriticis minus plethoricis, eveniunt, sub quibus sanguis, qui potius servari debebat, unacum viribus effunditur, nec ullo modo tenuissima acris materia morbi causâ ejicitur. Hinc utique in tali casu Medico opera danda est, ut qua fieri potest celeritate, has perniciosas ejectiones compescat, quod tamen non violentis stipticis & constringentibus expedire consultum est, sed spasticæ multo magis stricturæ laxandæ,

xandæ, humor acris temperandus & discutiendus, quod commodissime diaphoreticis sedativo nuptis præstatur. Eadem ratio est hæmorrhagiarum, quæ ex obstructione, induratione, vel infarctu viscerum, subnascuntur in cachecticis atque hydropicis. Tunc enim sanguinis evacuationes per nares, hæmorrhoides, vel etiam vomitum frequentiores, maxime detrimētosæ esse solent, quia mali causam non tollunt, sed potius vires consumendo, fatalem morbi exitum procurant.

§. XXIX.

Ex febribus, five febrilibus spasticis generis nervosi *Febribus.* & vasculosi commotionibus, minus salutare sunt, quæ a sphacelo interno, ut sunt malignæ, vel a corruptione lenta viscerum, aut apostemate, ut sunt hecticæ, oriuntur, & phthificis, cachecticis atque hydropicis superveniunt, quippe quæ reliquias boni sanguinis ipsasque vires penitus consumendo, certissime ad mortem ducunt. Ab assumpto veneno caustico, a læsione vel punctura externæ partium nervosarum ac tendinosarum, a calculo ureteribus infixio, bile caustica, veribus, hernia incarcerata, ardore ex concedentibus in exulcerationem confluentibus variolis, omnibusque gravissimis doloribus, febres fieri acutas, quas Veteres dixerunt symptomáticas, experientia indies edocet. Sed omnes sic accedentes febres, nihil boni, sed plus damni minantur, & merito qua fieri potest celeritate & dexteritate exorbitantes hi motus sunt sistendi; quandoquidem frustra causis a quibus pendent opponuntur, nec easdem ullo modo subigere & abigere possunt, sed potius dum ad affectam & irritatam partem sanguinis majorem affluxum proritant, inflammationem ipsamque postea sphacelationem inducunt. Haud dispar indoles est quarundam intermittentium, earum scilicet, quæ a prohibita perspiratione, iracundia graviore, cibo cum nausea sumto & male digesto, saburra vitiosorum prima in regione succorum & bile acri caustica proficiuntur. Hæ
(III.) Fff enim

enim si subsunt causæ, febriles impetus atque commotiones ad illarum emotionem parum omnino faciunt, quin potius expedit, vel emetico, vel salibus deterfivis, aut conveniente laxante & acrimoniam temperantibus, causas aggredi, ac postea, ubi febriles motus sponte penitus conquietescere re-nuunt, roborantibus ac tonicis eosdem sistere atque com-ponere.

§. XXX.

*Epilepti-
cis & con-
vulsivis
motibus.*

*cordis
palpita-
tione,
singultu
& vomitu,*

*tussi
ferina,*

*dejectio-
nibus,*

Iisdem minus salubribus naturæ motibus accensendi sunt, qui tam membranas cerebri, quam spinalis medullæ, infesto fortiori spasmo exagitant, totumque nervorum & musculorum systema in consensum pertrahunt. Horum classem ducunt epileptici & convulsivi insultus, qui ex dolorum atrocia in dentitione difficili, torminibus infantum, calculi cruciatibus, vermium morfu, læsione cerebri, fractura cranii, punctura duræ matris a festucis, nec non in variolarum principio vel fine accedunt, nec ullo modo superandis his causis accomodi sunt. Neque cordis palpitatio, cujus causa ut plurimum est polyposum in cordis thalamis hærens concrementum, bono & salutari fine contingit, eo quod validissima hæc quassatio, causam minime vincere valet. Pariter inanis ille singultus & vomitus a ventriculi inflammatione & insidente virulenta materia, omni utilitate destituitur, tanto magis quando materia vellicans intra stomachi membranas, ut in purpura, variolis & morbillis percussis solenne, hæret. Tussis quoque sicca ferina, quam dura pulmonis substantiam obsidentia tubercula cient, nullius plane usus est, sed potius vires consumit, somnum arcet & stomachum ad vomitum sollicitat. Ita etiam copiosæ cum sævis torminibus in diarrhea ac dysenteria, vel post acre purgans assumptum dejectiones, nec quicquam ad salutem conferunt, eo quod non humorum copia, sed maligna qualitas in vitio est, cui frustra tanta sanguinis & seri egestio opponitur, qua vires magis exhaustiuntur & boni ac temperati humores cum detri-

detrimento subtrahuntur. Idem tenendum de diarrheis, quæ nonnunquam inflammatoriis febribus symptomaticæ accedunt, quippe quæ pariter neutiquam discussioni staseos inflammatoriæ favent, sed plerumque in causâ sunt, ut inflammatio latius, etiam ad intestina, serpat eoque citius necet. Denique ^{post an-} omni etiam usu ac fructu carent motus isti fortiores, qui ^{mi affe-} gravio-
riorem animi affectum, iracundiam vel terrorem excipiunt, ^{ctum.} qui certe adeo intempestivi sunt, ut vitam in summum subinde adducant discrimen. Ut adeo pateat perniciosos hos naturæ motus ab iis qui ad salutem tendunt provide atque solícite esse distinguendos, & quum non solum fructu destituantur, sed succos viresque exhauriendo etiam noceant, tempestive compescendos, ita tamen, ut simul causæ morbi per congrua præsidia removendæ exquisita habeatur ratio.

§. XXXI.

Vidimus itaque naturam solam sæpe sponte morbos ^{Hinc ge-} egregie percurare, arcere & corporis integritatem tueri, ^{nuina} vidimus ejus vires non omnibus morbis expugnandis sufficere, ^{methodus} sed artis juvamine indigere, vidimus quoque eandem sæpius ^{noscentia} incongruos moliri motus corpori damnosos, eaque propter ^{& custo-} ab artifice hos prudenter esse emendandos ac componendos. ^{dienda.} Jam vero vehementer utique optandum esset, ut omnes qui salutarem artem exercent, genuinam illam & probatissimam naturæ methodum, qua morbos feliciter sanat, intimius perspectam tenerent & molimina sua ad ejus præscriptum adornarent. In quo quidem laudanda merito Veterum sententia, qui ad unum fere omnes professi sunt, Medicum esse naturæ ministrum, spectatorem, imitatore & adiutorem; ita ut *Hippocrates* passim prodiderit: naturam impulsam artis peritis quæ facienda sunt monstrare, nec quicquam salutariter fieri posse, nisi quod ipsi naturæ convenienter fiat, id quod etiam *Duretus*, optimus Hippocratis commentator, *lib. de hum. purg. pag. 17.* urget, præstantissimum, asserens, artis magistrum illum esse & dici debere, qui fidelissimus naturæ

imitator, observator & adjutor. Neque minus scite hanc in rem scripsit *Fernelius in præfat. lib. I. therapeut. medicinæ*, inquiens, *leges, naturæ legibus debent esse consentanea. Et felix medicatio, cui adjutrix natura succurrit, irrita vero, quæ repugnante natura tentatur*; cui assurgit pariter *Henr. ab Heer obs. 5.* perhibens: Medicum motum naturæ dominæ suæ observare debere, & nihil ea operante temere mutare, nisi, ut vel infrenem frenet, vel ut pigriorem excitet.

§. XXXII.

Sed dolendum omnino plurimis ignotam esse optimam & securissimam naturalem morbos sanandi rationem. Plures quidem præpostero nisu arcana ad certos, immo universalia ad omnes, morbos curandos, magno studio undique conquirunt, quæ accuratius perpensa re, spem plerumque fallunt & manifesto ignorantiam arguunt medentum, quasi in tanta corporum caussarumque morbificarum diversitate, unum idemque omnibus aptum esset atque accommodum: pauci autem de simplici, facili & compendiosa naturæ methodo cogitant, quum tamen non tantum medicamenta curent, verum ipsa potius natura, per remedia convenienter adjuta. Et licet sint; qui naturam mirum extollunt ut præter eam nihil sapere videantur: teste tamen experientia, haud raro in eo delinquant, quod nec ipsas naturas, nec motus naturæ, qui in salutem, ab iis, qui ad perniciem tendunt, solícite distinguant, & naturæ opus, ad salutarem, uti putant, finem, licet incongrua ratione, directum, interpellare nolint.

§. XXXIII.

*Ipsæque
natura
disting-
guenda.*

Proinde e re utique erit, ut ultimo loco quodammodo naturarum differentias delineemus, disquirendo maxime, quæ ad spontaneam medicationem aptæ sint ac dispositæ, quæ minus. Jam naturæ vel robustæ sunt, vel debiles. Robustam quidem sic describit *Aræteus lib. II. cap. 3.* quod sit, quæ est probe temperata, quæ omnia superat, omnibus domi-

dominatur, ac per humorem & spiritum ac solida, horumque omnium convenientem ordinem ac methodum, hominis vitam administrat. Quæ certe definitio ut antiquissima, ita elegantissima & principiis naturæ mechanicis quam maxime accommoda, utpote in æquabilitate & temperie, ordine ac motu solidorum æque ac fluidorum, consistit, utique administratio vitæ & sanitatis, & hunc quæ imperturbatum servat natura successum, jure robusta dicitur ac valens. Sunt vero maxime plebeji, pauperes & rustici, qui simplici & populari victu fruuntur, a robustis parentibus geniti, nec robur affectuum intemperie ac impetu, vel immoderatis animi fatigationibus atterunt, ætate juvenes ac viri, qui naturæ robore pollent. Vicissim languet plerumque ac debilis est natura in nobilibus, opulentis, laute ac inordinate viventibus, a parentibus morbidis prognatis, patheticis commotionibus crebro obnoxiiis, meditationibus studiisque nimium indulgentibus, senibus ac infantibus, post morbos perpeffos, aut ubi occulta labes fluidis vel ipsis visceribus inhæret, in quibus motus solidorum & fluidorum anomali sunt inordinati atque remissi.

§. XXXIV.

Valens igitur ac robusta natura, ad tuendam & revo-*Valentes*
candam corporis integritatem apta est, debilis autem & infir-*sint?*
ma minus, sed in præstando saluberrimo hoc negotio languet.*nec ne?*
Illa morbos gravissimos sæpe sola, vel levi tantum arte adjuncta, remotis nonnunquam tantum obstaculis, percurat, hæc vero difficilis est ad sanandum, non sola sufficit, sed opportuno Medici consilio & auxilio indiget, quin omnem sæpe exquisitissimam medentis eludit artem. Hinc utique multum interest, quo Medicus naturam ægri curate noscat, & felix sane censendus, cui fortuna in eo favet, ut natura valente pol-
lentes sanandos nanciscatur, fortunatior adhuc, si sint genere,
honoribus atque divitiis eminentes, qui ipsum illustri præconio
nobilitate simulque muneribus excipere possunt amplissimis.

CAPVT II.

DE

METHODO, ORDINE ET LEGIBVS ARTIS IN MEDENDO.

§. I.

*Natura
in me-
dendo
magna
virtus.*

IN superioribus satis, ut puto, evidenter ostendimus, a benignissimo & infinitæ sapientiæ corporis humani opifice ita constructas & coagmentatas esse machinæ animalis varii generis partes, ut certi ac determinati motus solidorum & fluidorum progressivi simulque secretorii, depuratorii & excretorii contingant, qui non modo ad vitalem conservationem & durationem corporis in se corruptibilis vergant, sed etiam summo artificio ita instructi sint, ut ubi a nocentibus rebus & caussis inordinati sive morbidus fuerint redditi, illi ipsi ad submovendas & destruendas illas caussas a quibus pendent, conspirent. Et hoc est quod Veteres voluerunt, & quod etiam ipsa attenta confirmat experientia, plures nempe & graves etiam ægritudines, sponte solius naturæ viribus, sine peculiari Medici auxilio, sanescere, & naturam optimam morborum esse medicatricem.

§. II.

Arte tamen opus est quia natura sæpe debilis.

Possset itaque quispiam facile inde hoc elicere dubium: quod quum tam eximia sit naturæ virtus atque potentia, vana & supervacanea censeretur mereatur in morbis tollendis omnis Medici ars & opera. At vero licet hoc de valente & robusta corporis humani natura, neque adeo corrupta vel debilitata, locum habere possit; quum tamen mirum quantum naturæ & corpora quæ morbis affliguntur inter se differant, alia firmiora,

miora & valentiora, alia imbecilliora & vitiata sint, adeoque non sufficiant ad negotium sanationis recte conficiendum, utique necessarium est, ut artis opus ipsis subveniat & congruis auxiliis succurrat. Quin experientia subinde docet, ipsam *externis* robustam & idoneam alias ad sanandum corporis morbum *na-impe-*ditur, non solum semper sufficientem esse ad sanandum, sed *tur.* indigere simul variis adminiculis externis, ne impediatur, vel plane invertatur salutare, quod molitur negotium; quorum si non adhibetur observatio, plures, quibus robusta etiam natura, in variolis, morbillis & febribus continuis, etiam inflammatoriis levioribus, pereunt, qui potuissent servari, dum regimine nimis calido in lecto, & conclavi, vel refrigeratione intempestive admissa, potu frigido, vel etiam spirituoso, cerevisiæ vel vini, cibis improvide in vigore morbi datis valde nutrientibus, situ corporis nimis diu erecto, improvida lintheaminum mutatione, iisque rebus & occasionibus, quæ animum ad iram & terrorem movere possunt, damnum & noxa procuratur, ut hinc omnino opus sit, quo prudens Medicus, si non pharmaceuticis, minimum diæteticis, utilem opem & operam præstet.

§. III.

Deinceps sæpe in agrotantibus præsto sunt obsta- *Obstac-*
cula, quæ si non remouentur, totius naturæ negotium in cu- *la remo-*
rando plane turbatur, vel pervertitur, nec tamen sine Me- *vere.*
dici auxilio & consilio eadem removeri possunt. Exemplo fit: quando corpus sanguine redundans atque repletum morbis tentatur acutis, præsertim inflammationibus, natura sine superflui cruoris per venæsectionem imminutione, eosdem superare & curare nequit. Vel etiam si fordibus & scybalis copiosis ac duris canalis intestini crassi invadente morbo refertus est, hunc vacuare & recrementa protinus in principio educere expedit, ut felicius & debito ordine motus causam morbi expugnantes succedant, & ad eum, cui destinati sunt finem, pertingere queant. Aut quando etiam evenit, ut pri-

prima regio colluvie vitiosorum & semiputridorum humorum conferta sit, idque statim in morbi, sive sit acutus, sive chronicus, invasione, quam maxime proficuum est, convenientibus auxiliis, vel per superiora, vel inferiora, eam prius exturbare, ne vis morbi & symptomatum inde augeatur & exacerbetur.

§. IV.

*Et succos
vitiosos
alterare
potest.*

Porro licet non negandum, naturam firmum & præstans suggerere subsidium, in emovendis iis morbificis causis, quæ motibus obsecundant & expugnari possunt, in alteratione tamen & correctione humorum nocentium non minus necessaria, eadem parum vel nihil opitulatur. Sic quando acidi, pontici & corrosivi humores primas vias obsident, qui vehementes dolores, spasmos ac tormina, uti apparet in infantibus, concitant, item in hypochondriacis, in quorum ventriculo omnia coacescere solent, plus certe commodi & utilitatis ab acidum absorbentibus expectandum est, quam ab omnibus naturæ motibus. Idem sentiendum, si bilis exsuperat præcalida, eaque acris caustica inflammans est, tum certe natura sola non sufficit, sed medicamentum demulcens, orgasmum bilis acris deprimens, v. g. nitrosum & absorbens, omne fere curationis punctum absolvit, quemadmodum id luculenter patet in affectibus cholericis & ex gravi iracundia enatis. Neque etiam venena quæ paucò tempore necant assumpta, solius naturæ ope cicurantur & noxa eorundem abigitur, quum experientia testetur, sub vehementibus a natura suscitatis vomitibus & purgationibus, mori ægros, qui demulcentibus, oleosis & lacticiiniis potuissent servari.

§. V.

*Nec sufficienter
emovet.*

Præterea in multis morbis, præsertim acutis, natura evacuationes per hæmorrhagias, sudorem & alvum molitur, quæ tamen sæpe non sufficiunt, sed imperfectæ sunt, ideoque arte adjuvari & promoveri debent; vicissim crebrius nimias pro-

profusiones sanguinis & humorum suscitatur, quæ quia vires adi-
munt corpus nimium exhauriunt, componendæ sunt atque
sedandæ. Nihil quoque fere evenit frequentius, ac ut motus
vehementes ad destructionem potius vitæ, quam expugnatio-
nem causarum morbosicarum & vitæ conservationem tenden-
tes, instituat, uti in atrocioribus motibus epilepticis, con-
vulsivis, doloribus, præcipue qui per consensum partium ner-
vosarum subnascuntur, ubi sedativis quam maxime opus est.
Chronicas jam prætereo passiones, ut scorbutum, lue ven-
neream, cachexiam, hypochondriacam affectionem, quæ
a sola natura sine Medici ope, plane non superari possunt.
Quid præterea crebrius evenit, quam quod ex uno morbo,
quantumvis egregie sanato, propter imbecillitatem partium
relictam, alter sæpe deterior, nisi per artem roborantibus in
declinatione cito ac tempestive occurratur, ingeneretur.
Neque denique dubitandum est, quin morbus, qui a sola na-
tura temporis beneficio demum superari posset, longe citius
atque felicius opitulante arte tolli queat. Quod utrumque
disertis verbis inculcat *Celsus lib. II. cap. 14.* dum ait: *potest mor-
bus etiam, qui per se finem habiturus est, citius tamen adhibito
auxilio tolli, quod duabus de causis necessarium est, & ut quam
primum bona valetudo contingat, & ne morbus qui remanet, ve-
rum, quamvis levi de causa exasperetur. Potest enim morbus
minus gravis esse quam fuerit, neque ideo tamen solvi, sed re-
liquis quibusdam inhaerere, quas admotum aliquod auxilium
discutiat.*

§. VI.

Ex quibus omnibus adductis observationibus utilitas & *Transitus*
necessitas artis medicæ clarissime elucescit, iisdemque, quasi *ad insti-
tutum.*
totidem argumentis uberrime confirmatur, sive natura in
morbis languida, sive robusta fuerit. Interim tamen id cer-
tum manet ac firmum, quod ob imperitiam & temeritatem
medentium, qui ductus naturæ non sequuntur, sed crebrius
pervertunt, satius sæpe sit, soli naturæ negotium relinquere,
(III.) Ggg quam

quam imprudentis ac imperiti auxilio uti. Ne igitur in hoc tanti momenti negotio peccet Medicus, sed firmam habeat regulam, normam ac legem, ad cujus præscriptum consilia & molimina sua instituere atque dirigere queat, non utique alienum, sed convenientissimum erit, ut universales quædam regulæ & medendi leges, jam præscribantur, quibus summo cum fructu in medendo uti possit artifex.

§. VII.

Lex I.

Ex his prima est : *omnibus in morbis ordinem & successum actuum motuumque spontaneorum, immo ipsa tempora, quibus natura sola medelam in salutem agrotantium molitur atque absolvit, curate & perquam sollicite observare decet.* Vix vero ullus e morborum classe est, in quo tam conspicua naturæ methodus tamque distincta decursus tempora, quam in variolis. In variolarum enim morbo observatur, naturam primo certo temporis spatio uti ad materiam illam causticam partibus nervosis inhærescentem, tamque sæva in principio concitantem symptomata, attemperandam, quo mobilis & disposita fiat ad evacuandum, hoc facto, deinde excretionem ordinario intra tertiam & quartam diem auspiciari, eidemque iterum certum, duorum vel trium dierum tempus impendere, ita quidem, ut a superioribus ad inferiores descendat partes, & corporis corticem per omnem ambitum successive exanthematibus conspergat. Absoluta eruptione, rursus determinatam periodum insumit suppurationi & materiæ evacuatae maturationi, eaque confecta, interposito certo temporis spatio, ulcuscula siccant atque consolidant, incipiendo pariter in superioribus, ac desinendo in inferioribus. Et hic est solennis ille naturæ hoc in morbo processus, hic ordo, hæc tempora, quæ artifex studiose notare debet, quo tempestive fatiscienti naturæ succurrere possit, nec unquam adversi quippiam huic methodo præpostere moliantur. Idem vero etiam in aliis morbis obvium est, adeo, ut cardo medendi rationis, quæ natura utitur, in eo potissimum

vertatur, ut primo semper materiae hostilis & vitiosae correctioni studeat, eandemque ad evacuationem disponat atque praeparet, idque fere in omnibus morbis, febribus non tantum exanthematicis, verum etiam inflammatoriis, immo chronicis; quae proinde methodus pari studio servanda est ac imitanda. Quumque hoc praeparationis negotium nonnisi certo temporis spatio absolvi possit, utique ut maxime omnium tempus exspectet, nec cursum praecipitet Medicus, necesse; quae certe prudens exspectatio in Medicina summum arcanum est, de quo non inelegans est *Gideon Harvæi* libellus *de morbis exspectatione curandis*, cui addi possunt ea, quae in *dissertatione de curatione morborum in tempore* inculcavi.

§. VIII.

Secunda lex sic praecipit: *tempestive & statim in prin-* Lex II.

cipio morbis occurrendum est, & materia quae in vitio brevissima via evacuanda. Scilicet ex praestantissimis medendi regulis est illa Hippocratica, *sect. II. aph. 29.* ita habens: *incipientibus morbis, si quid movendum videtur, move, vigentibus vere, quietem agere melius.* In qua quidem gravissimus auctor merito utique rejicit omnem illam medendi rationem, quae in morbi vigore, hoc est, statu, impetu & exacerbatione ejus, ubi omnia in vehementissimo motu, per fortiora medicamina, maximeque evacuantia, suscipitur: vicissim vero accommodatissimum, ad medicinas quae movent & evacuant porrigendas, morbi esse initium, serio inculcat. Rationem hujus canonis divinus senex in sequente *aph. 30.* subjicit, dum ait: *circa principia & fines omnia debiliora sunt, circa vigores vero fortiora.* Nimirum quia sub vehementia atque vigore morbi omnia in motu intensiori statuque turbulento constituta, partesque motibus vacantes musculosae ac nerveae spasmo obnoxiae, in proclivi est ratio: quare tum omnia stimulantia & moventia locum non inveniunt, nihilque agendum, sed potius quiescendum sit, neque

alia quam humectantia, temperantia & effrenes motus quodammodo placantia usurpanda. Contra ea inchoante & declinante morbo, omnia sunt debiliora, id est, spasmi & motus intensi nondum in tanto gradu adsunt, vel vehementiam posuerunt; ideoque omnino, si opus est, materia & causa morbi statim in principio exturbanda, vel alienus qui sub morbi decursu genitus est humor, sub declinatione expellendus est. Si experientiam consulimus, hæc pariter hanc medendi legem uberrime confirmat. Nam profecto ad graves ipsa in herba jugulandos morbos, præsertim qui contagio debentur, ut sunt pestis, dysenteria, castrenses & mali moris febres miasmata susceptæ, non efficacius occurrit remedium, quam lene emeticum, simulac corpus iidem incesserint oblatum, quo colluvies vitiosorum humorum unacum miasmata, quod cum saliva in ventriculum descendit, antequam ad sanguinis massam & nervorum genus deferatur, statim eliminetur. Variolæ quoque, morbilli, purpura & continuæ plures febres, biliosæ etiam & ardentes, nec non quæ arthriticis & podagricis insultibus associantur, longe mitioribus incedunt symptomatibus, & longe facilius sanationem recipiunt, si mox in principio, simulac æger conqueri cœpit, prima regio, vel leni emetico, vel elementi purgante, & sentina vitiosorum humorum fuerit depleta: eo quod crescente morbo, spasmi augescunt, quibus hæ sordes intus retentæ morbi & symptomatum vim mirum exacerbant. Et quia intermittentium febrium, tam tertianæ, quam quartanæ, fomes, initio plerumque in ventriculi & intestinorum plicis ac glandulis hæret; e re est, ut statim sub auspicio primæ viæ a sordibus, sive per mitiora emetica, sive salia deterfiva, sive commoda laxantia, repurgentur. Confirmat hoc luculentis verbis Hippocrates lib. de affect. si, inquit, quartana deprehenderit, vomitorium in principio exhibendum, rursus aliquo intervallo, aliud infra purgans medicamentum. Quod si per hæc non sedatur, medicamenta febrisfuga dare oportet.

vet. Neque tamen purgantia fortiora, quæ ipse *Hippocrates lib. de purgant. S. 5.* rejicit propinanda, quippe quæ nunquam in febribus tuta, quoniam spasticas exacerbant motiones, vel easdem, si conquieverint, revocant & recidivas pariunt. In lentis febribus, quæ maxime intermittentes male curatas sequuntur, in principio & laxantia, & leniora emetica tutissima, quo iisdem alimentaris canalibus a saburra acida viscida liberetur; quod, si negligitur, diuturniores paroxysmi ingentem & fluidis partibus & visceribus labem affricant, & lentæ febres ex facili in hecticas concedunt. Periculi plenæ inflammationes internæ, ut pleuritis, peripneumonia, angina, matura sanguinis missione & subjuncto infuso diaphoretico, feliciter in principio discuti queunt; hoc autem neglecto, curatio, ob febrem ac intensiorem inflammationem, difficilis admodum fit & anceps. Ipsa quoque ventriculi inflammatio sæpissime ex potu frigido corpori sudanti copiosius ingesto, natales trahit, omne tamen periculum mox declinari potest, modo infusum ex herbis diaphoreticis cum aqua calida factum statim forbilletur. Quod sphacelus exteriora occupans præsentaneo subsidio, simulac primordia cepit, suffocari & arceri queat, res in vulgus nota est, quum elapso hoc medicandi tempore, mors sequatur certissima. Atque ex his omnibus clarissime innotescit: tempestive morbis esse succurrendum & occasionem medendi solícite captandam, in qua, ut ait *Hippocrates lib. de præcept. S. 1.* non multum temporis. Quare vehementer certe optandum foret, ut & Medici opportunitatem temporis in morbis sanandis curatius observarent & aucuparentur, & ipsi quoque ægrotantes mature medicam opem implorarent, eo quod in tempore curare & morbo occurrere, palmarium in sanationis negotio momentum est, & justa temporis observatio, merito curandi & methodi medendi anima dicenda.

§. IX.

Lex III.

Accedit tertia lex : *evacuationes nunquam in morbis moliendæ , nisi materia excretioni apta & viæ patula fuerint.* Summa hujus præcepti *sect. II, aph. 9. Hippocratis* continetur, sic perhibentis : *corpora quicumque quis purgare voluerit, fluida facere oportet.* Nam ipsa sana ratio suggerit, frustra materiæ commotionem & expulsiōem tentari, nisi ipsa ad motum ac emotionem disposita sit reddita. Primo itaque omnis scopus, omnis intentio medentium in sanandis perlongis morbis eo utique tendere debet, ut humores crassi fluxiles & mobiles efficiantur, durities molliatur, viæ adstrictæ relaxentur, & postea validiori factō sanguinis impulsu & strictura solidarum intensa, impactī humores excutiantur atque obstructions referentur. Ex quo jam elucescit, quam incomparabilis sint usus ad hunc finem consequendum thermæ, acidulæ & aliæ aquæ salubres, infusa, decocta, fots, balnea & omnia, quæ emolliente & diluente virtute prædita sunt. Patet quoque exinde, quod ante præparationem & mobilitatem materiæ, nunquam validiora purgantia, emetica, diuretica, sudorifera, mercurialia ad salivæ fluxum eliciendum, locum inveniant. Communis fere, sed pessimus hinc error est, quando deficiente mensium vel hæmorrhoidum, aut subsistente lochiorum fluxu, pellentia fortiora, sic dicta emmenagoga, uti sunt myrrhata, succinata, crocata & alia adhuc calidiora, in usum præmature vocantur; siquidem hæc sine præmissa venæsectione, sine primarum viarum expurgatione, sine prævia vasculorum uteri apertione & dilatatione, sine antea adhibitis medicamentis fluiditatem sanguini conciliantibus, potius noxam afferunt & malum augment, tantum abest, ut juvaminī sint exoptato. Observationes enim docent, ab eorum intempestivo usu febres, capitis dolores, vertigines, anxietates, hæmorrhagias per incongrua loca, deliria, melancholiam, & mille alia symptomata, fuisse exorta. Præstat itaque potius prius plethoram demere, al-

vum

vum laxantibus lubricare, sanguini fluiditatem decoctis & infusis appropriatis conciliare vasorumque obstructions balneis, vel aliis convenientibus remediis, amovere, & tunc pellentia cum cura subungere, & sic demum exoptatus consequetur effectus. Hæc lex medendi & regula in sanandis morbis chronicis, præsertim scorbuto, lue venerea, hydrope, quartana, melancholia hypochondriaca, calculo, asthma, amplissimi non solum est usus, sed etiam in acutis egregia & curate observanda. Nam in his pariter extra crisin & ante materiæ maturationem, vel ut Veteres loqui amant, coctionem, in vigore paroxysmi, nunquam evacuantia cum fructu exhibentur. Hinc probe monet *Hippocrates Sect. I. aph. XXII. quæ matura coctaque sunt, medicamento purgante educere oportet ac movere, non cruda.* Natura ipsa huic methodo insistit, quippe quæ in omnibus fere febrilibus commotionibus, primos dies materiæ hostilis attemperationi & resolutioni stasium in inflammatoriis & aliis acutis febribus, impendit, quam felicissime exsequitur motu & appulsu auctiori sanguinis ad loca affecta, quo non modo sensim ac sensim sanguis & viscidus humores impacti solvuntur, sed & discutiuntur. In aliis quoque morbis, motu tam intestino, quam progressivo intensiori, crassi viscidus humores attenuantur, dissolvuntur fluidique redduntur, falsi quoque & acres cum oleosis, viscidis & terreis implicantur & contemperantur, ac nimis fluxiles & tenues inspissantur, quem proinde naturæ ductum merito artifex sequi debet.

§. X.

Quarto inter præstantissimas medendi leges hæc *Lex IV.* omnino connumeranda: *Evacuationes per loca humori excernendo convenientia fiant.* Aureum enim hoc præceptum dudum *Hippocrates Sect. I. aph. 21.* his inculcavit verbis: *quæ ducere oportet, quo maxime repunt, eo ducere oportet per convenientes locos;* idque merito a medentibus maxima cu-

ra atque diligentia observandum. Etenim si Medicus humorum, qui in vitio sunt, excretiones stimulo quodam promoveri debet, probe omnino disquirendum, cujus conditionis ac indolis sit materia hostilis evacuanda, & quo in loco & parte etiam corporis sit constituta, ut brevissima via commode educi possit. Sunt quippe diversi generis excrementa, ideoque iis eliminandis non quolibet accommodata sunt emunctoria, sed quodvis excrementum, peculiare & proprium quasi habet excerniculum. Hinc si in ventriculo & prima regione stabulatur & fixam sedem habet vitiosorum corruptorum biliosorum humorum sentina, quæ anxietates, ructus, tensiones & dolores gravativos parit, ciborum appetentiam prostermit, somnum placidum impedit, phlogosin excitat, vel etiam febres minatur; tum utique emetica, deplendo hac saburra ventriculum, utilissimam præstabunt operam, & hac ratione magnus & periculosus morbus præscindi poterit. Si in principio morborum intestina infarcta, vel ex male adsumtis & male concoctis eduliis multas recondunt cruditates, facile patet, ea, quæ clementer intestinalem regionem expurgant, omnium opportunissima esse. In hypochondriacis prima regio, ac potissimum duodenum, ingenti cruditatum acido-biliosarum colluvie subinde repletum est, quam si quis diureticis vel sudoriferis præpostere vellet eliminare, næ is non leve damnum allaturus esset. Nam ejus generis humores temperantibus obtundendi & per ventrem evacuandi, unde etiam ex thermis & acidulis aliisque medicatis aquis, quæ alvinas sordes liberaliter emoveant, convenientissima in hoc malo sunt præsidia. Graviori iracundiæ affectu motus canalium biliosorum peristalticus auctus ingentem bilis sæpe corruptæ & acris copiam in tenuia intestina effundit, quæ parit anxietates, nauseam, ciborum fastidium, compressiones circa præcordia, interdum etiam cardialgias & inflammationes subortas notavi, & ut quis

cholericam ; quibus gravissimis pathematibus si fortiori emetico vel sudorifero quis vellet succurrere , is certe pestilentem errorem committeret , de quo complures lugubres eventus propter inflammationes subortas notavi , & ut quisque sibi caveat , serio hortatus sum in *dissertatione de medicina emetica & purgante post iram veneno*. Nam quia congruum humoris biliosi excretorium est venter , longe tutius & consultius bilis ab ira commota per rhabarbarina , cum nitro & pulvere præcipitante nupta , vel per alia miora laxantia , educitur. Quin sunt inter exempla quidam , qui ex gravi ira male habentes in balneum se demiserunt & fortiter sudarunt , hoc eventu , ut lentæ febres , artuum tremores , arthritides , immo hypochondriorum spasmi & contracturæ , sequutæ fuerint. Nihil quoque magis noxium vel intempestivum est , quam alvo per quinque vel sex dies clausa , sudorifera , vel alia calida spirituosâ , offerre , aut emeticum præbere ; nihil inconsultius , ac serum in habitu corporis hydropici obhærescens per sudorem velle educere , quum potius per urinarias vias & alvinam regionem ejus educationem moliri e re sit. . Pessime pariter ægotantium salutem prospiciunt , qui circa illud tempus , quo variolæ , morbilli , purpura & alia exanthemata , vel inflammationes erysipelaceæ prodire debent , purgantibus , vel emeticis eos exagitant , sicque materiam illam acrem ad interiora nobiliora loca alliciunt , gravius damnum certo allaturam. Ubiunque vero unius ejusdemque indolis humor per diversa emuntoria excludi potest , tunc certe non alienum est , excretiones in aliis etiam quam ipsi proprie dicatis excretoriis movere , quo divertatur affluxus humoris , qui partem diu infestavit. Ita in tussi valde humida , qua mucosâ in maxima copia & immoderatus sreatu ejiciuntur , opportune purgantia offeruntur , quia mucum ex pectore in glandulas mucosas crasforum pertrahunt. Quod etiam valet in fluore albo & gonorrhœa , ubi sæpius ingens viscidorum humorum copia ad has partes affectas affluens excernitur , & purgantia eam ob

causam, ut divertatur nempe humorum nimius appulsus, optime præscribuntur. Manet itaque firmum ac stabile, naturam semper in opere evacuatorio, si deficit, ut humores evacuandi commode per congrua emunctoria duci ac ferri possunt, adjuvandum esse.

S. X.

Lex V.

Non minus universalis ac utilissima est quinta hæc lex: *nunquam vi morborum curationes aggredienda, vel evacuationis molienda, sed paulatim & successive agendum & tempus expectandum.* Sane si ullus ex aphorismis Hippocratis memoratu dignus & in artis exercitio memori mente tenendus, certe est Sect. II. 51. sic præcipiens: *plurimum & repente vacuare aut replere, vel refrigerare, aut omnino quomodocumque corpus movere, periculosum est. Et omnis multitudo naturæ contraria est. Quod vero paulatim fit, tutum est, tum alias, tum si ex altero in alterum transitus fit.* Sicut enim omnes in rerum natura operationes per gradus, non per saltus, paulatim & successive, non vero cum impetu & violentia quadam, perficiuntur; ita eadem quoque via in sanandis morbis, in castigando & expellendo noxio humore, in obstructionibus referendis, procedit natura & temporis beneficio utitur. Quapropter etiam Medicus suo satagens officio naturam imitari & nunquam violenter agere, multo minus impetuose evacuationes urgere debet. Nam certa & diuturna experientia compertum habemus, non majus periculum est errore & temeritate Medici ægrotantibus accedere, ac ab emeticis & purgantibus validioribus, neque minus ab iis remediis, quæ vi sudorem pellunt, aut urinam & salivam movent & corpus fortiter calefaciunt. Neque etiam cum subita & ingens mutatio, quam corpus a validissimis & magna dosi exhibitis remediis patitur, utilis, sed potius valde noxia esse potest, quia omnes vehementes motus in eorum numero, qui naturæ insensibiles sunt, qui præternaturales, morbosus & corpori vim inferunt. Hinc quando emeticum

ticum porrigendum, consultius est parciori, quam liberaliori manu propinare illud, eo quod ubi humores ad ejectionem anotericam inclinant, operatio erit sufficiens, & si non fuerit, iterato, vel auctiori dosi, pharmacum offerre præstat, ac uno impetu exturbare. Ubi per inferiora subducendi sunt humores peccantes, longe magis e re est, id clementioribus & repetito, quam simul & semel validioribus perficere: eumque in finem apprime ex usu sunt pilulæ secundum Becheri exemplum confectæ, quæ aloën probe cicuratum & extractum hellebori, cum temperatis balsamicis gummatibus & extractis amaris, habent, ita ut una dosi vix tria purgantium grana capiat, eaque propter tonum ventriculi & intestinorum, quem purgantia labefactant, firmant potius & conservant, aliquoties tamen datæ, alvum saluberrime vacuant. Idem faciunt infusa ex radicibus & corticibus antiscorbuticis, aromaticis, atque ex rhabarbaro & agarico, addito stimulo salino tartareo, per extractionem cum vino confectæ, & tam ad præcavendos morbos vere & autumnis, quam ad sanandos rebelles chronicos affectus, egregii sunt usus. Quod si porro per corticem corporis halituosæ sordes excludendæ, nunquam in usum trahenda ea, quæ sudorem universam sanguinis & humorum massam commovendo fortiter pellunt; sed potius infusa & decocta diaphoretica, vel etiam pulveres fixioris naturæ, nec non temperata balnea, quæ omne punctum in sanatione etiam rebellium morborum chronicorum, præter acutas passiones, ferunt. In lue venerea affectis, si salivæ fluxus proritandus est, nunquam impetu & larga mercurialium oblatione id efficere oportet, præsertim in iis, quibus genus nervosum debile & humores impuri ac intemperati, nisi feralia symptomata vel incomspicibile salivæ stillicidium ciere velimus. Pariter in efferatis motibus componendis doloribusque sedandis, proficuum magis est semper anodyna refracta, quam plena & magna dosi adhibere, & sistentibus amico temperamento quædam stimulantia adjungere, quo

nomine theriaca coelestis, massa pilularum Starckii, Wildengansii, vel tinctura antimonii tartarifata, aut acris, cum pauxillo extracti opii remixta, commendari merentur. Quando denique roborandum, & partes nerveæ, ne consuetos spasticos motus repetant, firmandæ, quod fit maxime in reprimendis paroxysmis intermittentium, & quidem familiarissime per famigeratissimum illum chinæ corticem & alia roborantia; tutius semper est, causâ febrili prius subacta & evacuata illud efficere, in accisa & repetita, quam magna & continua dosi, & antequam causâ prospectum fuerit; eo quod hoc neglecto, experientia teste, phthisis, hydrops, asthmata, hæctica & pathemata spasmodico-hypochondriaca conciliantur. Quapropter omnes qui artis operibus manum admovere gestiunt, cum cura monendi sunt, ut quantum fieri potest, ab omni validiori medicina, multo magis plena manu oblata, abstineant, sed potius temporis beneficio utentes, nunquam nimis festinent, & sic demum tuto, sine noxa & periculo, sua conficiant.

§. XII.

Lex. VI.

Convenit interdum motus effrenes morbosos compescere, relicta ad tempus eorum causa. Sexta hæc lex est, amplissimi in praxi recte instituenda usus.

Quemadmodum enim ii motus in morbis, qui a centro ad circumferentiam abeunt, qui comitem habent pulsum citatiorem, cutem relaxant, spasmos cum causa morbi tollunt & sic in salutem machinæ labefactatæ tendere solent, nunquam a prudenti medico sistendi, sed potius pro circumstantiarum ratione conservandi, vel tantum moderandi sunt: ita e contra illi, qui vergunt a circumferentia ad centrum, quales sunt maxime spasmodici, qui omniaturbant in corpore, & dum liberam dispensationem & motum humorum ac debitam secretionem & excretionem impediunt, interitum minantur, vel nisi ad causæ remotionem directi sunt, interdum provido consilio protinus compescendi sunt, licet causâ materia-

lis efficiens eorundem adhuc intacta relinquatur. Quod ut testatius patefeat, exemplo sit acerbissimus ex calculo dolor. Nimirum dimoto ex renum conceptaculo ac in urethere ob majorem molem vel aspritudinem firmitus obhærescente calculo, nerveo-membranaceus hic canalis ob vim illatam arctius constringitur, non solum dolor suscitatur exquisitus, & inflammatio cum febre accenditur, sed etiam per consensum simul ventriculus & duodenum afficitur, & inverso motu peristaltico, vomitus proritatur, quin toto tandem genere nervoso in consensum raptò, deliria, tremores, convulsiones & epilepsiæ excitantur, quæ, ut vidimus, quandoque mors funesta exiepit. Sub hoc igitur motuum exorbitantium & symptomatum choragio, si quis velit causam, calculum, vi emoliri, nec prius vias laxare; is sane nihil aliud efficeret, quam ut spasmodicas constrictiones augendo, lethalem morbi catastrophem induceret. Quin potius longe consultius causa morbi tantisper relinquitur & motus quavis arte complacantur, & his demum ad temperiem reductis viisque ampliatis, faciliori negotio causæ amolitio tentari poterit. Pari ratione in colica passione, primum esse decet, ut vehementia spasmodicorum deliniatur clysteribus oleosis & unguentis ex axungia humana, pinguedine taxi, castoreo, zibetho & hujus generis aliis, & interius quoque ejusdem virtutis medicamenta adhibeantur, ut sunt oleum amygdalarum dulcium, antispasmodica, inque primis liquor noster anodynus mineralis, qui dolores & spasmos effrenes sistit, vomitus compefcit, sine stupore tamen & sine omni noxa; hoc autem facto, facile ac tuto causæ materiali, siue illa hæreat intra canalem intestinorum, siue intra membranas ejus, appropriatis remediis poterit succurri eademque expelli. In hæmorrhagiis quoque nimis, quarum eruptio semper a spasmis, sanguinem ad certam quandam partem adigentibus & vasa venosa eo excurrentia distendentibus, proficiscitur, vel potentissimis stipticis, constringentibus sanguinemque cohibentibus fluxus

non cohibebitur, delinitis autem spasms, vel sponte cessabit, vel facillima ratione coërceri poterit. Tacemus plurimos alios spasmodicos, convulsivos & cum magna dolorum atrocia junctos affectus, in quibus semper expedit paroxysmos sedantibus prius invigilare, quam causæ abolitionem urgere. Cavendum tamen quam maxime est, ne in ejusmodi morbis, ubi motus nimii perniciem minantur, ad eos sistendos opitata vel adhuc fortiora sedativa & narcotica adhibeantur. Testantur enim observationes Practicorum celeberrimorum, hoc perperam facto, spasmodicam colicam sæpius in paresin, aut etiam veram paralyzin, transiisse, aut calculum uretheri remisso nimis eo diutius inhæsisse, ac in universum, lethales inde subsequutos esse effectus, quales annotavit & exemplis confirmavit *Stahlius in dissertatione de impostura opii.*

§. XIII.

Lex. VII.

Excipit septima lex: *vigente paroxysmo & quando natura jam movet, a fortioribus commoventibus & evacuanti-
bus desistendum, ac potius excedentes motus moderantibus &
ad temperiem reducentibus, utendum.* Ipse Hippocrates quum observasset, quantam noxam afferat, si quis in illis morbis, ubi sanguis cum impetu circumagitur & morbi vehementia est maxima, fortiora medicamenta, quæ majorem sanguinis cient orgasmum, propinare, aut purgantia exhibere audeat, sapienter *sect. H. aph. 19.* præcepit: *vigentibus morbis, quiescere multo præstat:* ac potissimum valentiora ejusmodi pharmaca tempore paroxysmi febrilis non præscribenda esse serio in *libr. de purgantibus* suasit: *quicumque* inquiens, *a febribus fortioribus corripuntur, his medicamen-
ta purgantia dare non oportet, donec remiserit.* Etenim quando vehementes motus vel spasmi intensiores præsto sunt, ut plurimum exteriores corporis partes cum summa cute contractæ sunt, & sanguis a circumferentia ad centrum urgetur, alvus, renes, poruli cutis & reliqua emunctoria, propter ni-
miam

miam constrictionem, non rite munere suo funguntur & excretionibus subsistunt; atque propter nihil certe imprudenter poterit excogitari, quam tum motus ciere vel augere, & præsertim purgante, vel vomitorio, aut sudorifero valido, humores naturæ corporis nostri inimicos exterminare niti eoque symptomatum vehementiam magis exacerbare. Quiescendum potius tunc temporis est, vel parum agendum, & magis effrenes motus moderandi ac cum violentis spasmodicis componendi. Hanc ob causam rectius procedunt ii, qui in morbi paroxysmorum vigore atque impetu, si quid arte tentandum, tantum diluentia, blandam diaphoresin conciliantia & moderate nitrosa ac sedativa naturæ amica exhibent. Ubi vero movendum, accommodatissimum tempus est in acutis principium, vel quando vehementia remisit, in chronicis extra paroxysmum & conquiescentibus spasmodicis motibus, quo etiam evacuantia congrua operationem suam bene exsequuntur. Egregium hanc in rem *Cælii Aureliani lib. II. cap. IIX. pag. 217.* est monitum, dum ait: *nec phlebotomia, nec aliis medicamentis, qua cito & copiose peccantes humores detrahunt, unquam utendum in augmento passionis, sed potius tempore dimissionis.* Unde, pergit, *in accessione simpliciter mitigantibus utimur adiutoris.* Sed dolendum profecto, toties totiesque contra hanc impingi legem. Nam communis tam vulgi, quam Medicorum non incelebrium, olim fuit & adhuc est opinio, variolarum, morbillorum, purpuræ atque pestis morbum, expellentibus & alexipharmacis fortioribus esse excipiendum, quo illud quod vitæ est inimicum, cito & sine mora per corporis peripheriam proscribitur, unde tot in officinis prostant tincturæ bezoardicæ, spiritus volatiles, salia volatilia, essentiæ antipestilenciales ac pulveres varii generis sudoriferi & alexipharmaci, olea calidiora aliaque id genus plura. At vero sic calor calore fovetur, ignis igni additur, ipse sanguis quasi accenditur, mixtio ejus naturalis & temperata crasis dissolvitur & destruitur,

ac in univcrsum nihil aliud efficitur, quam ut anxietates, inquietudines, deliria, epilepsia & convulsiones concitentur, placida & successiva eruptio impediatur, ipsaque materia exanthematica deleteria, plus augeatur, quam imminuatur. Longe tutiora certe in expellendis variolis, morbillis, purpura & omnibus morbis, in quibus aliquid per corporis corticem excerni debet, sunt illa medicamentorum genera, quæ nimias & turbulentas commotiones cum stricturis superficialibus amicabiliter placant, & impedimenta removendo, eruptionem blande adjuvant. Quod quidem, quemadmodum de fortioribus sudoriferis in propatulo est; ita eadem cautio de eorum quæ per os vel alvum vacuant usu, studiose tenenda. Neque enim unquam convenit, emetica vel purgantia, quin salia, majori dosi tempore paroxysmi tertianæ, vel quartanæ, aut non multo ante ejus accessionem, propinare: quippe per experientiam cognitum est, insultum inde longe reddi acerbiorum maximasque cum cardialgia anxietates laborantes affligere. Ratio in proclivi est. Scilicet hæc medicamina non alia ratione quam spasmo agunt, & partes nerveo-membranosas subtili sale acri caustico vellicando ac stimulando, ut validiori crebriusque repetita strictura & separetur & exturbetur quod in vitio est, efficiunt; in omni autem febre ejusque paroxysmis, jam tum teste nausea, dorsi dolore, pandiculatione, conatu vomendi, flatibus in abdomine, anxietate præcordiorum, horripilatione, cutis refrigeratione, alviq; adstrictione, adsunt spasmi & formalem ejus rationem absolvunt, ideoque dum sic spasmus spasmo accedit, & stricturæ intenduntur, non possunt non pathemata exacerbari & paroxysmus longe gravior reddi. Ubi vero impetus refedit, nervosum genus tranquillum & partes spasmo prius exagitata languent ductusque patuli sunt, tutissime ac utilissime fomes & vitiosa materia artis ope laxantibus, purgantibus vel emeticis e latibulis evocatur atque proscribitur. Quæ certe prudens temporis opportuni

exspe-

expectatio, tum in morbis, tum in omnibus moliminibus, tam necessaria est, ut sine ea frustaneus sit omnis conatus, de quo scite cecinit *Ovidius*:

*Dum furor in cursu est, currenti cede furori,
Difficiles aditus impetus omnis habet:
Aggrediar melius tunc, cum sua vulnera tangi
Iam sinet & veris vocibus aptus erit.*

§. XVI.

Octava lex fit: *ubi motus jam languent, anodyna & Lex. IX.*
sedantia summa cum cura sunt evitanda, ac potius vires res-
cipientia motusque excitantia usurpanda. Quemadmodum si
non potior, certe haud postrema, dexteritatis atque peritiæ
medicæ pars in eo versatur, ut artifex exorbitantes motus
opportune complacare noscat: ita profecto præposterum ac
clamnosum est molimen, quando opprimuntur ac sopiuntur,
ubi potius provocandi sunt & excitandi. Etenim anodyna
& sopientia pharmaca & ex his frequentissimi usus opiata, ex
heroicorum numero sunt, quæ magna pollent efficacia, &
tam ad juvandum, quam nocendum parata, ideoque cautissi-
me, ac ut *Celsus lib. V. cap. 25.* monet, nonnisi nimia necessi-
tas urgeat, usurpanda. Pessimus quidem quorundam mos
fert, ut in quovis dolore aut somni defectu, imprudenti con-
silio, sine circumstantiarum perita pensitatione, ad anodyna
ceu sacram anchoram confugiant, & doloris mitigationem
cum quiete procurare nitantur, quum tamen sapienter præci-
piat idem *Celsus lib. III. cap. 18.* quod hæc moderatio semper sit
adhibenda, ne quem obdormire volumus, postea excitare
non possimus. Semper igitur ante sedativæ virtutis reme-
diorum usum exquisita virium ratio habenda, eademque
nunquam in usum vocanda, ubi virium, sive ob ætatis, sive
aliam causam, adest imbecillitas, quæ ex impotentia mem-
bra movendi, pulsu debili parvoque, item actionum anima-
(III.) Iii

lium torpore atque segnitie, sufficienter cognoscitur. Hoc autem neglecto quam maxime detrimentosa sunt, senes ad affectus soporosos disponunt, plethoricis sanguinis excretiones supprimunt, quibusdam mentis abalienationem conciliant, in febribus autem malignis aliisque morbis, dum vires penitus prosterunt motusque ad expugnandum morbum necessarios sopiunt, sphacelum ipsamque mortem inducunt. Et certe frequentissima est in observatis medicis mentio noxæ ex improvido sedantium & opiatorum usu, ut apud *Santorium de metodo vitandi errores lib. VII. cap. 12.* *Willisium in pharmacia rationali P. I. pag. 392.* *Sennertum Prax. lib. VI. cap. I. pag. 7.* & *Forestum lib. IX. obs. 14.* qui narrat, cacoehymicum, cui imperitus Medicus præscripserat in dolore calculi opium, somno sepultum esse perpetuo. Ipse quoque novi, quendam febre ardente laborantem, ad sopiendam diuturnam vigiliam aliquot granis laudani sumtis, aternam sibi conciliaffe quietem. Quin non desunt exempla, ubi opium in forma suppositorii immissum mortem induxit, cujus generis plura scripto reliquerunt *Tilingius lib. de opio pag. 46.* *Sennertus l. c. Marcellus Donatus hist. mirabil. lib. IV. cap. 18.* Et licet aliquando dolorem primum quodammodo mitigare videantur, ejusmodi sopientia attamen infidus est effectus & non ita multo post acerbiora ingruunt pathemata, morbus pertinacior fit ac peior, ipsaque mors haud raro succedit. Conceptis id de colico dolore testatur verbis *Trallianus lib. X. cap. 1.* sic perhibens: qui ex opio & alterco parantur, in colica non temere admovere oportet. Et si enim doloris levationem asferre videantur, tamen efficiunt, ut postea dolor diutius permaneat, proutque bona ratione ipsa non conferre. Et paucis interjectis sic pergit: multi igitur, quum in ejusmodi affectibus iterum atque tertio dedissent, effecerunt, ut partes læse emorerentur resolverenturque, interdum vero etiam mortem omnino induxerunt. Præstat igitur potius antispasmodicis, balsamicis, corroborantibus, analepticis, itemque bezoardicis paulo fi-

xioribus & accuratiori insuper diætæ ratione languenti naturæ succurrere, ac motus conservare atque erigere, sique vel maxime, ob urgentes atroces dolores, ad complacationem aliquid videtur moliendum, non opiatibus & vehementioribus sedativis, sed blandissimis anodynis, cum balsamicis naturæ amicis nuptis, utendum, qua virtute non possum non commendare liquorem meum anodynum sic dictum mineralem, qui vires non prostermit, sed custodit, ac tutissime sine metu omnis noxæ potest usurpari; cui interdum refracta dosi balsamum vitæ, vel spiritus bezoardicus ad mentem Bussii paratus adjungi poterit.

§. XV.

Ad nonam jam progredimur legem : *excretiones criticae & salutare* *Lex. IX.*

promovere, non intercipere, decet. Criticæ Veteribus dicuntur illæ evacuationes, quæ in acutis morbis, cujus generis maxime sunt febres, sponte a natura, sine ulla etiam arte, certis diebus, ut sunt medius inter tertium & quartum, septimus, nonus, undecimus, plerumque cum bonis ægri rebus eveniunt. Ita enim, ut antecedenti capite docuimus, a sapientissimo opifice coagmentata est corporis humani machina, ut inordinati in ea motus, qui a causâ morbifica excitantur, sapissime in medicinam cedant, ac per eosdem ipsa morbi causâ summe pernicialis corrigatur & correctæ e corpore expellatur. Et quum hæc materiæ correctio certum & determinatum temporis spatium requirat, antequam commode ex corpore eliminari possit, atque huic negotio divina sapientia septenarium maxime numerum dixerit, ex eo fit, ut evacuationes, quæ circa septenos, vel semiseptenos dies succedunt, in salutem corporis maxime vergant & naturam ordinate sua perficere indicent. Duplici vero modo excretiones illæ salutare sunt. Vel enim ipsam causam, quæ functiones corporis turbavit, secernunt atque evacuant, ut fit in variolis, in morbillis, in febre erysipelacea, pestilente, quibus in morbis, ubi ad summam cutim, vel

glandulas, nocens materia propulsa fuit, mox sævissima illa symptomata mitiora fiunt, aut plane conquiescunt. Vel critica evacuationes hoc nomine saluti sunt, quia effectum morbi pernicialem a corpore separant atque remonent, siquidem sub ipso morbo & motu concitatori febrili, sanguinis & humorum massa in multas excrementitias falsas, sulphureas sordes dissolvitur, quæ, dum morbus in vigore & impetu est, non commode secedunt & expelluntur, simulac vero causa morbifica est sublata, ac v. g. in inflammationibus stases sanguinis discussæ, spasticæ constrictiones corpus deferunt, tubuli excretorii relaxantur & omne alienum atque excrementitium, quod sub ipso morboſo motu generatum fuit, utilissime propellitur, ut sudor largiter profluat, alvus sua sponte descendat & copiosa excrementa mucida biliosa dimittat, urina quoque crassior secedat atque copiosum deponat sedimentum, vel etiam humor crassus viscidus, in pectoris præsertim morbis, maxime acutis, uberius collectus per expectorationem educatur. Jam quisque facile perspicit, nihil perniciosius esse, quam salutiferas has excretiones temere sistere ac intercipere. Sane, quam gravia, immo sæpius funesta mala, non modo a variolis, morbillis, purpura, crusta lactea, scabie, erysipelate, podagra, arthritide repulsis & ad interiora percussis eveniant, plurimis observationibus atque experimentis in praxi medica quotidie innotescit. Perquam nota sunt etiam illa damna, quæ ex antiquis ulceribus sanatis & diu gestatis fonticulis, præpositere consolidatis, pullulant. Pessime non minus ægrotantium saluti consulunt, qui alvi fluxus in febribus continuis, immo malignis, quibus sæpe salutariter morbus terminatur, noxios censent, eosdemque eapropter imprudenter cohibere ac sistere audent. Pariter exitiale molimen est, hæmorrhagias, quæ sæpe febribus continuis superveniunt, sive in criticis diebus, sive extra eos obveniant, vi quadam compescere, ex quo certe nunquam non capitale notavi damnum: quæ tamen omnia jam

jam tum Sect. 1. cap. 8. de damnis ex cohibita cuticulari & cap. 9. sanguineis aliisque evacuationibus, nec non cap. 14. de crisi-
bus in experientia rationali fundatis, fusius exposui. Interim si for-
san excretiones etiam salutare nimia & excedentes fuerint,
ut vires iisdem gravius pessundentur, non tam directe sedati-
va & sistencia adhibere e re est, quam potius ea, quæ appul-
sum humorum ad alias partes divertunt & motuum impetus
blande demulcent atque placant.

§. XVI.

Decima lege præcipiendum: ut morbo, vel paroxysmo Lex. X.
finito, artifex roborantibus utatur, quo recidiva vel novus mor-
bus arceatur. Qui sanio-rem medendi rationem sequuntur,
eos non latet, paroxysmos morborum, præsertim spasmodi-
corum vehementiores, subsequi magnam atoniam ac debilita-
tem corporis, & illius inprimis partis, in qua causa morbi in-
hærens vehementiam suam exercuit, quæ relicta debilitas, non
modo facillime paroxysmos priores impetu longe fortiori re-
vocat, sed & ob sanguinis circulum ibidem factum impeditio-
nem & vigorem deperditum, humores noxii eo decumbere
consueſcunt, ibique stagnationem subeuntes, chronicis diu-
turnis & maxime lentis morbis amplissimam subministrant occa-
sionem. Perite idem inculcavit artis nostræ parens Hippocrates
aph. 32. sect. IV. hunc in modum disserens: quibus a morbo resti-
tutus quippiam est infirmum, 'ibi abscessus fiunt. Quem aphori-
smum Heurnius ita exponit: quando post morbum infirmitatis ali-
quid superest, quæ ex lassitudine & imperfecta crisi judicatur, ita
ut supersint materiæ febrilis reliquæ, aut si liberalius se potu aut ci-
bo invitent, quam immutata ventriculi actio, temperamentum &
habitus perferre possunt, tunc in discrimen venit homo, quia
partes internæ & externæ labefactatæ sunt; hinc si non accura-
ta diæta accesserit, hepatis & lienis scirrhi, vel cephalæa, vel fo-
ras in artus, si ibi imbecillitas, abscessus effunduntur. Quare
ne quid coaceruetur, dentur pilule aleoplanginæ, mastichinæ

vel Ruffi, vel tale quid. Huc quoque referendus, *aph. XII. sect. II. morborum reliquiae, quae a crisi supersum, recidivos morbos parere consueverunt*, quod potissimum, sicut rursus id optime explicat *Heurnius*, contingit, quando ob infirmam naturæ vim, materia morbifica non tota fuerit exclusa, neque in declinatione alvus purgante sollicitata. Quæ quum ita sint & experientiæ quoque testimonio uberior constent, utique manifesto apparet, nihil esse finito motu morbofo ad reliquias mali extirpandas accommodatius, quam ut omne noxium & morbificum, quod adhuc hæret in corpore tacitasque ipsi struit insidias, siue in ventriculo, siue in venis substituerit, mature excludatur & corpus ab omni excrementitio succu liberetur. Graviter vero in hoc errare ut plurimum solent Medici, quod in fine morbi & ægris ad sanitatem redeuntibus, morbiferas reliquias neque evacuantibus, neque diaphoreticis eliminant, neque robur deperditum naturæ atque ventriculi per congruam dietam & probata stomachica apte restituant. Etenim quo minus Medicus utilem opem conferre potest morbo in vigore constituto, eo majus eoque præstantius in principio atque in declinatione ipsius est auxilium, siquidem initio, natura adhuc valida existente, multum proderit, si omnia congruis subsidiis obstacula, quæ motus salutare sufflaminant, dextre removeat & materiam vitiosam diminuat; in declinatione vero, si corpus debilitatum, rursus confirmet, vires languidas erigat, & quod restat adhuc noxium, expellat, & sic non modo recidivas peiores, sed & novos longe periculosiores morbos plerumque succedentes felicissime avertat. Ad subigendas igitur morborum reliquias & reparandum universi corporis robur, egregia virtute splendent pilulæ balsamicæ ut *Becherianæ* & ad harum exemplar paratæ *Stahlianæ*, vel nostræ, quippe quæ aliquoties oblata, noxia clementer expurgant, ac ventriculo cum intestinis robur iterum conciliant, præter quas commendanda etiam stomachica, quæ digestio-

gestionem promovent, motum peristalticum infirmum egregie fulciunt & succis vitalibus tenuitatem ac spiritaliscentiam denuo conciliant, quæ tamen tanto utiliora sunt, quanto minori, continuata tamen sæpiusque repetita dosi, assumuntur. Quod si autem ullo in morbo, certe in variolis & morbillis, reliquæ morborum ut proscribantur, corpus firmetur & ab insultibus morboſis defendatur, necesse est, quandoquidem hoc neglecto, ex facili varias exulcerationes, abscessus quoque viscerum aliaque gravissima mala subsequi, experientia planum facit testatumque. Deinde post partum, immo abortum, vel puerperium etiam, uterus valde enervatus & a tono suo dejectus ad pristinum robur commoda medicina reducendus est, ne magnæ contumaces ac diuturnæ inde resulent affectiones, cui scopo eximie pilulæ nostræ balsamicæ, vel infusa laxantia leniterque purgantia, cum nervinis & uterinis mixta, unacum exquisito in vitæ victusque ratione temperamento, satisfaciunt. Mirum quoque tonum ventriculi & intestinorum labefactare solent diarrhæa ac dysenteria, qui si non cito reparatur, lentæ inde febres, pedum oedemata, status cachecticus, spasmi hypochondriaci aliaque redundare possunt, ad quæ arcenda egregie usui, præter exactam dietam, est vinum generosum, uti Hungaricum, vel Gallicum Pontack, parcius inter cibandum potum, nec non elixir stomachicum, vel balsamum sic dictum vitæ, accisa dosi, sed diutius, usurpatum. Semper autem præstat hæc successive perficere, ac vires potissimum fractas atque depressas sensim analepticis reficere ac refocillare.

§. XVII.

Eadem cura tenenda lex undecima: *debilibus, debilia, Lex. XI. valentibus, valentiora conducunt.* Hanc totidem fere verbis consignavit Celsus lib. II. cap. 20. scribens: *Imbecillis hominibus rebus infirmisimis opus est, mediocriter firmos, media materia optime sustinet & robustis apta validissima est.* Et

Et Hippocrates lib. de loc. in hom. §. 55. eandem sic conceptis verbis inculcat : *medicamenta fortiora a natura in debilibus morbis dare non oportet* ; ac paullo post , *medicamentum singulis secundum naturam , debilibus debilia a natura , fortibus vero , fortis natura pharmaca exhibenda sunt*. Ut autem hic practicus canon eo clarius pateat , exponendum quid per debilia & valentia , tam corpora , quam pharmaca , sit intelligendum. Debilitas igitur ejusque oppositum firmitas & fortitudo , dicitur in genere a viribus , quæ valore effectus , id est , potentia movendi , ut in macrocosmo , sic etiam microcosmo , sese produnt. In homine quidem vires secundum functiones in quibus sese exserunt , optime in animales , naturales & vitales discesci possunt , singulæ vero influxu subtilissimi , purissimi & mobilissimi , quod cum sanguine mixtum & in cerebro segregatum per nervos vehitur , tanquam causa & fundamento nituntur & continentur. Quod summæ activitatis liquidum , quum ex puriori aëris & alimentorum substantia ortum trahat ; facile patet , quod qui bene appetunt , digerunt & egerunt , robustioris sint naturæ ; contra ea quibus appetentia prostrata , ingestio , digestio atque egestio vacillat , debiles & languidi ; eo quod in illis humores puri & temperati , in his vero impuri & intemperati redundant. Infirmi vero etiam dicendi , qui sensibilibioris animi & corporis & quorum nervosæ partes levi etiam ex causa ad suscipiendas anomalas motiones promptæ sunt atque dispositæ ; valentes vicissim , qui animi compositi , nec tam facile a rerum externarum insultu afficiuntur aut læduntur. Atque adeo in procinctu est ratio , quare infantes , ætate graves , vel valde decrepiti , qui spongiosum fibrarum habitum obtinent , vasa , nervos ac tendines exiliores gerunt , vigiliis , animi affectibus mentisque fatigationibus nimium indulgent , morbo graviore acuto , vel chronico laborarunt , aut nimium sanguinis profuderunt , in debiliū numerum merito referantur , unacum iis , qui morbo , mul-
toque

toque magis ejus paroxyſmo, jam detinentur. Per fortiora autem medicamenta intelligenda ea, quæ parva doſi magnis agendi viribus inſtructa evacuandi & adſtringendi, commovendi & ſiſtendi calefaciendi & refrigerandi, inprimis ex minerali regno petita: lenia contra ac debilia nuncupanda, Galenica vulgo dicta, quæ non vi, ſed blande ac ſucceſſive operationem ſuam exſequuntur, nec majori etiam doſi facile nocent, ut ſunt clementia & per epicraſin laxantia, clyſteres, infuſa theiformia, lac aſininum, ſerum lactis, temperantia, diaphoretica fixa, abſorbentia, liquores fixi alcalini cum baſamicis & amaris extractis conditi, nec non plura arcana illa univerſali, panaceæ, eſſentiæ quoque ſolares dulces, quæ innocenter pariter in omnibus morbis, firmis æque ac infirmis præberi poſſunt, nec quicquam comprehendunt, quod conſpicuam in morbis inducere poſſit mutationem. Jam quum ad omnes ſalutares in corpore humano perficiendos effectus exquiſita inter agentis & recipientis vires requiratur æquabilitas atque proportio, & natura humana ab omni exceſſiva, ut ait *Hippocrates*, qualitate lædatur, clariffime innoteſcit, in omni medicamentorum oblatione corpora curate eſſe diſtinguenda eorumque vires cum pharmacorum facultate ſolicite comparandas, & ſic accommodam medendi rationem ineundam. Qui ſecus procedit, is certe graviter nocet, & debilibus fortia porrigens, vires iſdem opprimit penitusque proſternit, vel plane cum vita extinguit, debilia autem fortibus offerens, fruſtraneam proſuſ locat operam, aut commovendo, nec emovendo quod in vitio eſt, malum exacerbat. Potiſſimum tamen cavendum, ne infirmos unquam validioribus pharmacis aggreſdiamur, ſed hi ſemper magis diæteticis, quam pharmaceuticis ſunt tractandi, & nullum medicamentum, iſtis ſæpe eſt optimum. Quumque inprimis debiliſ numero accenſendi ſint infantes ac ſenes: patet certe, quam temerarium & imprudens ſit molimen, infantibus dimidii vel unius anni lacten-

ribus, epilepsia ex dentitione difficili correptis, acriora purgantia, ut pulverem ex resinæ jalappæ grano uno aut duobus, & mercurii dulcis binis, vel tribus granis, crebrius propinare, iisdemque demortuis, tamen de securissima medicatione, cum summa alterius contradicentis injuria, gloriari. Pariter ætate proVectis tam fortia purgantia damno sunt gravissimo; quippe quæ teste *aph. 36. sect. II.* sana etiam corpora cito exsolvunt, multo magis senilia & imbecillia labefactant & detrimento macant. Neque etiam infantibus, senibus aliisque imbecilibus, spirituosâ calida, sic dicta confortantia, tam proficua & amica sunt ut vulgo putatur, eo quod hæc, ipsumque, ut audit, lac senum, vinum potens, largius haustum, intestinum calorem in succis accendunt eosdemque per hunc exhaustiunt penitusque consumunt; moderate vero & medice cum optimi succi cibus assumtum vinum, acido destitutum & generosum ac purum, ut Rhenanum vetustum, vel Hungaricum, stomachi vires totamque naturam egregie reficit atque custodit. Neque vero tantum validiora pharmaca, verum etiam alimenta valentis, ut *Celsus* dicit, materiæ, invalidis minus accommodata sunt atque proficua, licet & Medicorum & aliorum vulgus erroneam hanc foveat sententiam, debiles & a morbo languidos, cibo, potu & jusculis confortantibus ac nutritientibus esse subinde reficiendos. Recte enim jubet *Hippocrates Sect. I. aph. II. in ipsis exacerbationibus cibos adimere oportet: nam præbere noxium, & cum per circuitus redeunt morbi, in ipsis accessionibus, abstinendum est*; eo quod corpora, ut impura, sic etiam imbecillia, monente eodem auctore, quo magis nutritiveris, eo magis læseris, & vires in morbis non meliori ratione reparantur, quam prudenti medicatione & successiva caussarum morbificarum remotione. Quamobrem memori utique mente nunquam non reponendum: inter vires corporis & medicamentorum, mensuram quoque alimentorum ipsumque laborem & motum, exquisitam semper servandam esse proportionem, cumque in finem, ut perite vult *Hippocrates*

lib. de morb. curate expendendam hominis naturam, corporis staturam, ætatem, anni tempus & constitutionem, situm regionis aliasque id genus plures circumstantias.

§. XVIII.

Ad duodecimam nunc pergimus legem : *perpaucis sele.* Lex. XII.

Etis medicamentis, ad morbos & sanandos, & arcendos, utendum. Sane nihil magis medentem perturbat atque confundit, quam ingens illa remediorum multitudo atque varietas, qua libri botanici, pharmaceutici, chymici & practici referti sunt, ut non sine fastidio perlustrari possint & parum absit, quin artem ipsam exhorreat diffusissimum hunc campum ingressus. Tam innumera enim sunt remediorum genera, tot compositiones, tot medicaminum vulgo adscriptæ virtutes, ut ne quidem memoria his omnibus capiendis sufficiat, tantum abest, ut quæ de singulorum usu & perita applicatione scitu perquam necessaria, animo teneri queant infixæ. Celebrandum quidem in eo merito summi conditoris est providum institutum, quo benigna parens natura affluenter ex inexhausto suo penu varia & multiplicia in sanorum æque ac ægrorum usum suppeditat præsidia, neutiquam tamen opus est, ut omnia in usum vocentur, sed natura, ut in alimentis, sic etiam iis quæ in medicinam cedunt, paucis contenta est. Pauca quippe & simplicissimæ sunt morborum causæ, ideoque iis etiam removendis pauca sufficiunt adminicula, & ex vero scribit : *Jo. Langius ep. 76. ego dico, desipere eos Medicos, qui pluribus medicamentis aliquid expediunt, quod paucioribus transigi potest.* Quin potius ipse ego scio & experientia edoctus sum, nunquam Medicum, qui immenso isto pharmacorum, quæ in pharmacopoliis asservantur & plerumque sine ratione & fide mirificis encomiis celebrantur, apparatu, utitur, crebrius ea mutat & affatim ægris ingerit, ad veram, certam & intimam eorundem cognitionem, pertingere, in qua tamen præcipuum felicitis medendi rationis momentum est repositum. Hinc egregium

profecto *Damasceni aph.* 34. est consilium: *pharmaca pauca tibi tenenda sunt, & quorum operationes ac potestates jam multoties experius es. Totius enim multitudinis notitia incomprehensibilis est, ac quum per singulas volueris inquirendo discurrere, multiplici diversitate distentus, nescies, cui debeas fidem adhibere.* Artis igitur atque prudentiæ est, ex tam numerosa supellectile pauca & certæ virtutis quædam deligere ac per longam atque attentam experientiam quid in tot diversis, ut offeruntur quotidie, casibus & circumstantiis præstare queant, quid minus, addiscere, ac tum demum perspectis penitus eorundem viribus ac operationibus, iisdem uti ac in medicatione cum certa ratione inniti. Nam scite hanc in rem scribit: *B. Viedelius de medic. faculi. cogn. & applic. pag. 25. res se habet hæc instar amicorum. Magis æstimamus unum vel alterum amicum, quam centum notos. Multi etiam amicitiam offerunt, pauci merentur. Ita etiam curiosum, selectum & expertum medicamentum reliquis omnibus præferendum est. Qui omnes habet amicos, neutrum habet, qui omnia novit, neutrum novit. Qui vero artem speculando tantum agitant & experientia destituuntur, hi certe fluctuant & hallucinantur, nec firmum, solidum & eventu comprobandum interponere possunt consilium, multo minus quamdiu usui insistendum, quando desistendum, quæ dosi offerendum & quæ alia sigillatim circumstantiis accommodanda, ex vero præcipere.*

§. XIX.

Lex. XII.

Ex præcipuis præterea medendi legibus est decima tertia: *Medicus in iuvando nature curatricis opere, plus utatur remediis diæticis, lenioribus & simplicibus, quam pharmaceuticis activioribus & compositis.* Per diætetica ea intelligimus, quæ ex iis rebus, quibus ad vitæ & sanitatis tutelam nemo non indiget & quæ recepta in scholis denominatione rebus non naturalibus accensentur. Nam quemadmodum ex harum perverso & inordinato usu prima fundamenta

menta & proximæ morborum origines pullulant pariterque vehementia augescunt : ita ad morbosas varii generis afflictiones arcendas & subigendas, legitimo illarum usu & exquisita victus & vivendi ratione aptius & accommodatius est nihil, nec ipsa natura sine hac quicquam boni in sanando præstare, nec medicina optatum exserere potest effectum. Unde vera sunt quæ *Galenus* tradit : *nullum efficax remedium medicina habet, quod solidum auxilium asserre possit, si ei victus ratio resistat, vel illud non adjuvet.* Sane ipse ego sancte asseverare possum, quod remediis diæteticiis, quo æris & coeli mutatio, corporis conveniens motus, accommodatus cibus & potus, nec non seri lactis, vel aquarum mineralium prudens usus, item abstinencia & quies, referenda, in expugnandis rebellibus chronicis morbis, qui maxime in imbecilli nervosarum partium systemate longam & fixam sedem habuerunt, ut affectus spasmodici & convulsivi, hypochondriaci & hysterici, id præstiterim, quod frustra artificiose compositis & concentratis medicaminibus tentarant alii, & ipse a magnæ famæ medicamentis expectaram. Diætetica quippe remedia humoribus & motibus vitalibus affinia sunt, & blande, successive & cum tempore laudatissimam suam exserunt operationem, naturam imbecillem & morbidam in meliorem statum reducendo. At vero quo major est horum simplicium in Medicina utilitas, eo pauciores ex Medicis eorum cognitioni, multo minus dextro usui, debitum constituent pretium ac utilissimam dant operam, sed plerique pensî habitis diæteticiis præceptis, nonnisi operose concinnatis e pharmaceutico fonte petitis subsidiis morbos oppugnare contendunt, quo tamen plerumque nihil aliud efficiunt, quam ut naturam in saluberrimo sanationis ordine, progressu & tempore turbent, vel festinatione opprimant. Hinc citante *Langio lib. 1. epist. 76.* multiplices medicamentorum ex simplicibus numerosis confarcinatas compositiones falsæ jam pridem irrisit *Plutarchus in sympos. Dec. IV.* Cui *Plinius*

H. N. lib. XXIV. cap. 1. his verbis per pelle suffragatur : *ex terra nascentibus nata Medicina. Hac sola natura placuerat esse remedia parata, vulgo inventu facilia ac sine impendio, ex quibus vivimus. Postea fraudes hominum & ingeniorum captura officinas invenere istas, in quibus sua cuique venalis promittitur vita. Statim compositiones & mixtura inexplicabiles decantantur. Arabia atque India in medio aestimantur ulcerique parvo medicina a rubro mari importatur, quum remedia vera pauperrimus quisque evenet. Ita est profecto, magnitudo populi Romani perdidit ritus vincendoque victi sumus, paremus exteris & una artium medicina imperatoribus quoque imperat. Longe prudentiores in eo se gesserunt vetustissimi Medicorum, ut peritissimus Celsus, Celsus & Methodici, qui, re probe perpenſa, quicquid in arte præstiterunt, solius naturæ ordine & ductu & ignobilibus hisce auxiliis ac diætæ beneficio effecerunt. Nam pharmaceutice quidem confecta priscorum medicamenta, magna ex parte incondita sunt ac nullius fere pretii; contra vero in eorum monumentis longe meliora & utiliora in regimine diætetico recte adhibendo in morbis & extra eos reperire quispiam poterit præcepta, quam in ullo fere recentiorum scripto. Laudandus tamen merito hoc in genere Montanus ejusque optimus discipulus Crato, e quorum scriptis & ego multum profeci; quumque ipsa experientia de præstantia magis confirmarer, utilissimam me collocaturum operam putavi, si neglectui datam hanc potissimam artis salutaris partem omnibus modis excolere atque splendori suo reddere anniterer, evulgatis hunc in finem quamplurimis latino idiomate & Germanice redditis iterum iterumque recufis schediasmatibus, non sine luculento peritiorum applausu. Accedit & hoc, quod in universa rerum natura nullum purum detur simplex, sed omnia, quæ ad medendum tria sic dicta regna suppeditant, ex variis & diversis subjectis jam tum mixta sint, nec etiam hoc nomine artificiali mixtione & compositione opus sit, præferenda*

da tamen maxime ea simplicia sunt compositis, quæ non uni, sed duplici, immo sæpius triplici, indicationi curandi satisfaciunt. Ita v. g. manna præter facultatem alvum stimulantem, aliam adhuc, videlicet acidos, ponticos humores demulcentem & simul spasmo constrictas fibras intestinales relaxantem, obtinet, unde in hypochondriacis & pectoris affectibus, omnibus aliis purgantibus palmam præripit. Rhabbarum præter vim stimulantem, custodit etiam principium subadstringentis & roborantis virtutis, unde tutissimum in diarrheis ipsisque dysenteris est laxans. Cortex chinæ quoniam non modo amaritiam, qua acidum vitiosum in intermittentibus corrigitur & blandior spirituscentia sanguini conciliatur, habet, sed & elementum genus nervosum valde imbecille & ad novam febris materiam progignendi pronum roborandi aptum obtinet, aliis antifebrilibus & compositis recte antepositur. Pulvis florum chamomillæ vulgaris propter oleum virtutem anodynæ & antispasmodicæ, ac propter amaritiam subtilem vim aperientem & corrigentem recondit. Mentha custodit oleum subtile roborantis pariterque anodynæ virtutis, simul quoque elementum adstringens terreæ fixioris naturæ, ideoque in vomitu non datur ea præstantius. Neque tamen omnem omnino simplicium sic dictorum compositionem, multo minus cum ratione institutam miscelam, rejiciendam, sed potius quandoque proficuum admodum, immo necessariam esse, arbitror. Sic nitrum est simplex, si ullum, certe hoc præstantissimum, quod calorem intestinum sedat, acrimoniam biliosam temperat, alvum simul laxat & urinæ fluxum promovet; quod si vero intentio est Medici præter has virtutes aliam addere, nempe acidum in primis viis corrigendi, commodissime ipsi pulvis ex lapidibus cancerum absorbens adjicitur. Pari ratione opium, ne nimium sistat excretiones, non inutiliter miscetur cum purgantibus, ut aloë, in pilulis Wildegansii, cum extracto hellebori & oleo terebinthinæ in pilulis Starckii, sive An-

gli-

glicanis, cum alexipharmacis in theriaca coelesti. Neque etiam laude sua defraudanda chymica & ex metallorum censu deprompta pharmaca, maxime ubi periculum in mora & efficaciter morbi causa & aggredienda & exterminanda; semper tamen leniora, quæ secura, naturæ amica, & non tam exquisitam exposcunt circumspeditionem, præferenda activioribus, quin prudentiæ, ut scite monet *Mesues*, gratum est, ad valentiora nunquam descendere, si debiliora sufficiunt.

§. XX.

Lex. XIV.

Addenda denique restat lex decima quarta: *a crebro mutatione medicamentorum abstinendum & securis atque probatis remediis insistendum, licet non statim conspicuum afferant levamen.* Est hæc ex præcipuis, quam Veteres ipsa experientia edocti sollicitè inculcarunt. Hos enim medicamentorum continuationem maximi facisse, præter alios auctor est *Seneca ep. 2.* egregie ex ipsorum mente perhibens: *nihil aque sanationem impedit, quam remediorum crebra mutatio.* Hinc etiam medicamenta annalia, quæ per integrum annum usurpabantur, Priscis dicta sunt, quorum meminit *Celsus Aurelianus lib. de passion. chron. cap. 2.* his verbis: *Veterum quidam in passionibus arthriticis annalia medicamenta potanda præbuerunt, ut est diacentaurium & diascordium, bibenda anno continuo judicantes iis, qui longo tempore fuerunt passione vitati.* Et profecto, prostant incomparabilis adversus multos morbos virtutis præsidia, quæ sine continuato & repetito usu, parum, vel nihil juvant. Luculento exemplo sunt foteriæ aquæ, imprimis Carolinæ thermæ, quarum in debellandis chronicis & rebellibus morbis mira certe efficacia, sed nonnisi per longum tempus & larga copia iisdem potis, expectanda aut impetranda. Digna est quæ hic interferatur observatio ex *M. N. C. Dec. II. Ann. I. obs. 179.* *Reverendus Pater multis ventris torminibus & compressionibus pectoris vexatus, suâsu quorundam ad thermas*

Carolinas se consultis, & bibere cepit thermales aquas tanta in copia, ut fidem superare videretur: bibebat nempe sexaginta quatuor diebus 26089. sextarios, sextarius autem unus erat duodecim unciarum. Et additur: si citius discessisset & humores commoti non expurgati fuissent, in peiorem corporis statum incidisset, & omnia media adhibita incassum abiissent. Ab eo autem tempore curatus egregie fuit, & ter quaterque in anno thermas istas invisit, sex septimanarum spatio ibi commoratus. Quo etiam referendum Cæli Aureliani l. c. monitum: in articulorum passione usus adhibendus aquarum, tum calidarum, tum frigidarum, ut sunt Abuleæ & Corilæ, sed affectanda repetitio. Pariter in lacte, inque primis asinino, quam maxime præstabiles adversus chronicas passiones, phthisin, atrophiam, podagram, arthritidem & scorbutum reconduntur virtutes quidem; quas tamen non brevi & parco, sed diuturno demum & largo usu, exserit. Quam in rem instar omnium esse poterit Pechlini testimonium obs. 23. ita differentis: lac est summum remedium, sed continuato id efficit usu, quo nempe per iteratas circulationes salis arthritici aculei obtundantur, & separato per album aut remes variareo fermento, velut positis reduvis, novus recoctusque sanguis emergat. At, recte subjungit, hanc ego curam eo absolutiorem fore confido, quo lactis usus diuturnior est & dieta in ceteris morosior. Verum cum deficiant statim ad prima experimenta delicatuli nostri, nec lactis usum cum decenti dieta, qua tamen hic omne fert punctum, continent, mirum non est, si desideratus se non sistat effectus, aut plane sinister inde emergat eventus. De quo etiam argumento plura attulimus in dissertatione de mirabili lactis asinini usu in medendo. Serum quoque lactis, præsertim secundum nostram inventionem recenter & dulce præparatum, spectatissima certe in morbis longis & rebellibus splendet efficacia, sed opus est, ut potatio ad unum vel alterum mensem extrahatur, ac eodem modo sub iisdemque cautelis in vitæ vicusque regimi-

ne instituat, quam cum acidulis vel thermis solenne est, prout latius exposuimus *in differat. de seri lactis virtute longe saluberrima*. Decocta medicata, præsertim temperatio-
ra, quicquid in lue venerea ad sanguinem purificandum, & ex travmaticis, aperientibus & consolidantibus speciebus concinnata, quicquid in phthisi & internis atque externis abscessibus præstant, id omne longo & continuato usui in acceptis ferendum, sine quo nulla fere virtus nullusque effectus conspicitur. Quin in plurimis chronicis affectionibus, uti malo hypochondriaco, hysterico, cachexia, chlorosi virginum, mensium suppressione, inque primis affectibus uterinis, parum, vel nihil, solidi levaminis afferre poterit Medicus, nisi paullo diutius appropriatis & accommodis remediis, ut sunt elixirum nostrum balsamicum temperatum alcalisatum, pilulæ polychrestæ balsamicæ, deterfiva, balnea, elixir stomachicum in notis ad Poterium descriptum, per aliquot menses insistant. Cinnabarina, ceu arcanum antepilepticum, a Chymiatriis potissimum magnis laudibus extolluntur; sed vix respondet effectus, nisi in paullo largiori, ad grana decem, & repetita ad aliquot dies dosi, usurpentur. Quaquidem ratione, non modo in epilepsia a causâ interna, sed etiam externa, a gravi nempe capitis percussione producta, vertigine, motibus convulsivis, præsentaneam & incomparabilem eorum facultatem olim sapius expertus sum, licet non eo, ut vulgo moris est, sine, ceu sedativum & anodynum, sed potius ut medicamentum, quod humorem alveis elapsum & membranis cerebri vel nervis in hærentem, resolvit & colliquat, adhibuerim. Nec mercurius dulcis, nec æthiops mineralis, curat luem veneream, vel defœdationes aut exulcerationes cutis, nisi usus ejus continuetur. Neque etiam chinæ cortex intermittentes tollit, nisi ejusdem usui aliquandiu sub debitis cautelis insistantur. Neque denique fluor fœminarum albus facile abigitur, quam balneis, laxantibus & roborantibus diutius paullo usurpatis. Et quæ plura hac

de re exempla & monita in *dissertatione de prudenti medicamentorum continuatione*, attuli. Igitur non possum non omnibus, qui cum laude in artis exercitio versari gestiunt, pauciora, sed selectiora, eaque leniora potius, quam activiora remedia, de meliori commendare, ac ut iisdem cum prudentia & constantia uti addiscant, quam maxime suadere. Nam vere dixit *Helmontius*: *pauca sunt, quae Medicum nobilitant*, sed hæc, addo, pauca paucissimis sunt cognita, & apparatu quidem ac copia medicamentorum non destituimus; at perita & in experientia fundata eorundem applicatio cum dexteritate adhuc semper & ubique in desideratis.

CAPVT III.

DE

MEDICAMENTORVM VIRI- BVS ET CAVSSIS IGNORANTIÆ EARVM.

§. I.

QUandò Medicus naturam, cui principem in sanando *Remedio-*
locum merito vindicamus, dextre adjuvare ac imi-
tari nititur; nihil ei prius, nihil posterius esse de-
bet, quam ut non modo juxta *Hippocratem lib. de flat. caus-* *parum*
cognita. *rum vires* corporis affecti, sed & remediorum, quibus tanquam in-
strumentis omnia ipsi perficienda, vires & facultates penitus
cognitas habeat atque perspectas. At vero quo magis in
artis exercitio utile est ac necessarium, veras & non fictas
medicamentorum, pro tam diversa corporum & mor-
borum ratione vires, intimius nosse; eo magis utique do-
lendum, immo mirandum est, quod si dicere licet quod res

est, perpauca sint remedia, quorum virtutes & operationes certæ ac recte perspectæ, sed pleraque spem atque expectationem curantis frustrantur, quin veræ pharmacorum facultates in *Democriti* quasi puteo adhuc latitent. Quod quidem assertum paradoxon & plane a veritate alienum videri posset, quum tam numerosi libri practici, botanici, chymici & pharmaceutici, medicamentorum, tam simplicium, quam compositorum, Galenicorum & chymicorum copiam, non modo recenseant, sed & eorum laudes atque efficaciam miris concelebrent encomiis, nec tamen satis deprædicare possint: nihilominus tamen re accuratius expensa & adhibita ad tam magnificas laudes & tantopere decantatos effectus explorandos circumspècta observatione, pauca certe supersunt, quæ fidæ & expertæ virtutis, plurima vero infida, suspecta, fallacia, ficta & energiæ egentissima, licet in nullo mendacio secundum *Plinium lib. XXIX, cap. 1.* majus sit periculum quam in medico.

§. II.

Quæ
rum mul-
tudo
varia.

Si causam hujus tam perniciosæ ignorationis medicamentorum quoad veras suas vires & facultates disquirimus, sunt quidem plures, inprimis tamen ipsa immensa illa per ignorantiam pariter adeo accumulata moles & farrago remedium, quibus ars salutaris referta & tantum non oppressa est, impedit, quo minus recte in exquisitam singulorum notitiam pervenire possimus. Nam quum tam mirifice dilaudatis pharmacis Practici uterentur, nec tamen expectatus effectus sequeretur, mox ad alia delapsi, nova condere, vel ab aliis recenter condita, in usum vocare cœperunt, quæ quum eodem modo ipsorum votis non responderent, sed ubique inertiam atque defectum arguerent, alia rursus consilii inopes quæsierunt, immo ad chymica, panaceas & ipsa exotica, quorum modo fama afferebatur, conversi sunt. Hinc nata est tanta medicamentorum sylva, qua certe nihil ad distinendam ægrotantium salutem & ad praxeos rationalis &

efficacis incrementum remorandum, deterius inveniri potest. Nam profecto sub tanto numero medicamentorum, quibus nostro tempore pharmacopolia referta & plane onusta sunt, genuini & proprii cujusvis effectus & operationes, in tot differentibus naturis, morbis eorumque causis, recte haberi & cognosci non potuerunt, neque etiam unquam cognitio intimior speranda, aut virium exploratio cum successu molienda, nisi prius ad paucorum & selectorum numerum redigatur innumerable apparatus.

S. III.

Altera causa, ob quam veræ remediorum in medendo *Pathologiae* proprietates adeo ignotæ atque abstrusæ, est veræ *pathologiae verae* ad hæc usque tempora neglectus. Nam sicut secundum *ignota, Hippocratem lib. cit. de flat.* si quis causas corporis affecti probe cognovit, potens est valde ea asserre, quæ corpori commodant, nimirum contraria morborum natura perspecta: ita omnis qui hac cognitione destituitur, vel erroniam hausit, nequitiam etiam accommoda remedia invenire atque in usum proponere potest. Quapropter pathologiam veram veræ therapie primum & præcipuum fundamentum habendam esse recte ducimus, & hinc etiam non sine ratione & fine in prior sectione copiosius & accuratius ad eam stabiliendam valde utilia capita adduximus. Quumque ex hac solida morborum philosophia planius innotescat, non multiplices & valde abditas atque abstrusas, sed simplices & manifestas esse multorum & magnorum morborum ac symptomatum causas, quæ maxime pro differentia locorum quibus insident, valde differentes læsiones & effectus producant: in proclivi omnino est judicare, non pluribus, sed paucis pariter ad removendas has causas opus esse remedii.

S. IV.

Accedit tertio & inter ea, quæ defectum in perquirendis & cognoscendis veris remediorum facultatibus *Vulgo creditur medica- guunt mentis*

*absolutam
esse vim.*

guunt merito referendum & illud est: quod non modo vulgus, sed & ipsi Medici, qui doctis accenseri volunt, noxiam hanc foveant opinionem, quasi ipsis medicamentis formaliter inhærent noxii, vel salutares effectus, qui ipsorum usum sequuntur. At vero hæc assertio non solum erronea, sed etiam perniciosa est, ac tum in physicis, tum medicis rebus ingentem sterilitatem affert. Etenim omnes omnino corporum in rerum natura vires neutiquam sunt absolutæ, sed relativæ & conditionatæ, certis respectibus & circumstantiis limitatæ. Nimirum omnes effectus & operationes, quæ in corpus male affectum redundant, nonnisi motu accedunt; jam vero ex physicis & mechanicis patet, non in uno & simplici corpore motum existere, sed demum ex duorum congressu & reactione emergere, ipsamque vim motricem unius corporis ab alterius reagentem mirifice modificari: adeoque de nullo etiam medicamento in se considerato, certus quidam effectus, qui species motus, salutaris, vel minus talis, prædicari potest, licet eidem vis quædam ad actionem exferendam insit. Quapropter recte omnino colligitur, ut corpora, sic etiam medicamenta, agere non tam secundum spheram activitatis, quam potius secundum receptivitatem, & remediorum effectum non modo ad causas morbificas, sed & individua quæ varia sunt, & sine quorum cognitione fallax omnis medicinæ operatio, recte simul referri. Hæc autem accuratior circumstantiarum cognitio ex parte difficilem & conjecturalem artem nostram quidem reddit, sed rationalem ab empirica quam optime distinguit, quandoquidem prudentis & cum ratione agentis Medici est, in sanando quovis morbo, omnes tam prævias, quam concomitantes circumstantias probe inquirere, ponderare, naturam medicamenti cum genio morbi, & quidem sub tali corporis constitutione, probe comparare, hoc autem prætermisso, præter futilem, coecam & temerariam Empiriam expectandum nihil. Et quamvis post coeco tantum ausu adhibitam medicinam interdum per accidens &

casu

casu, vel declinante jam morbo, salutaris succedat eventus, eo tamen, si non alio nomine, culpandum erit ejusmodi molimen, quod semper periculum sit, ne gravi damno, quod prudenti adhibita observatione evitari poterat, ægrotantes mactet.

§. V.

Res clarius patebit exemplis. Nimirum lippis notum *Quod ta-*
est atque tonsoribus, jalappæ purgantem inesse facultatem. *men con-*
Hæc autem si eadem dosi, ad drachmam dimidiam, vel decem *tra expe-*
corporibus sanis, etiam ejusdem ætatis, mane offeretur, *rientiam.*
mirum certe erit, quam diversus effectus ratione temperamen-
ti, constitutionis corporis, partium nervosarum, immo viri-
um, inde resultabit, in hoc vel decem sedes cum vomitu, in
illo quinque tantum, in alio paucas valde, sed anxietates si-
mul junctas cum inappetentia, movebit, in hoc vehementia
tormina, in illo nulla, excitabit. Et eadem operationis di-
versitas, non modo in reliquis purgantibus, sed & aliis eva-
cuantibus, emeticis, sudoriferis & diureticis animadvertitur.
Neque etiam in artis exercitio versantibus obscurum esse
poterit, quantopere medicamentorum efficacia secundum
clima, regiones, anni tempora & tempestatum constitutio-
nes, victus & vivendi genus discrepet, unde recte *Celsus* di-
cit: *aliud medicamentum Romæ, aliud in Græcia adhiben-*
dum. Certe Westphaliæ, Pomeraniæ & septentrionalium
regionum incolæ, purgantia, emetica & alia fortiora expe-
rientia teste quam optime ferre possunt, quæ Italis pestifera
& tantum non venenata sunt. Hoc vero discrimen longe
magis in statu morboſo obvium, dum unum medicamentum
eodem modo & regimine, tempore ac dosi, eodem in mor-
bo exhibitum, uni prodesse, alteri non convenire, sed no-
cere, per attentam observationem confirmatur. Expertus
id nuperius admodum sum in binis puellis gemellis quinque
annorum, quæ eadem victus & vivendi ratione usæ, eodem
tempore variolis corripiebantur, & decumbentes iisdem me-
dica-

dicamentis eademque methodo tractabantur, diverso tamen plane eventu, dum altera gravioribus longe symptomatibus conflictata, inter decimum & undecimum diem exspiraret, altera vero eadem pustularum copia obsita, mitius laboraret & feliciter evaderet, ac in eo tantum diversa esset corporis constitutio, quod quæ moriebatur laxioris & succulentioris, altera vero strictioris & firmioris esset habitudinis. Pariter chinæ cortex circumspēcte adhibitus divinum certe in intermittētibz est remedium; sed quam noxius inde etiam in iisdem febribz propululet effectus, notissimum est. Martialia in cachexia, chlorosi, in affectione hypochondriaca, effectum persæpe præstant longe saluberrimum, nonnunquam vero plus noxæ, quam emolumenti afferunt. Quam diversa remedium, quæ sedativa virtute prædita, ut opiatorum, sit operatio, noxia & salubris, nemo non novit. Sulphura ex mineralibus, maxime ex antimonio, item medicamenta ex mercurio rite parata, incomparabili pollent virtute in chronicis & rebellibus morbis debellandis, imprimis lue venerea, sed nisi circumspēcte pro circumstantiarum ratione usurpentur, nocentissima sunt. Superfedeo plura alia adducere exempla, quum ex allatis abunde elucescat, verissimum esse Hippocratis lib. de arte §. 7. effatum: *quæ profuerunt, ob rectum usum profuerunt, quæ vero nocuerunt, ob id quod non recte usurpata sunt, nocuerunt.* Et Celsum lib. III. cap. I. egregie ad veritatem sentire, dum asserit: Medicum non semper posse præstare artis effectum, licet sit perpetuum in arte medica, quid fieri debeat, tamen non esse perpetuum, quod sequi convenit.

§. VI.

Quia fallacia
causæ ut
causæ
plerumq;
commit-
titur.

Accedit quarta tam supinæ ignorantia in propriis & veris medicamentorum facultatibus cognoscendis causa frequentissima, quod nimirum medentes naturæ, morbi & medicamentorum vires atque effectus non curate invicem distinguant, sed sæpissime fallaciam causæ ut causæ admittant,

tant, quæ frequens & quasi propria est in Medicorum scholis, ut nullus facile sit, qui cum hoc non colluctetur vitio. Nihil enim frequentius est, quam quod naturæ, immo morbi effectus, a vulgo & ignavis Medicis pro operatione medicamentorum habeantur ac falso venditantur. Sane qui atrocitas illa in variolarum initio obvia symptomata, delirium, epilepsiam, applicato antea clysteri vel interius assumpto medicamento adscriberet, is certe plurimum erraret, cum illo, qui vicissim medicamento diaphoretico, circa quartum diem, quo sponte omnia pacatiora fiunt, propinato, pathematum cessationem tribuere vellet. Plures vero ex idiotis sæpe hac ratione immeritam plane quandam famam callide aucupantur, ut oblato ab ipsis circa dies criticos, quibus sponte solvitur morbus, vel etiam sub declinatione medicamini subsequenter salutarem effectum tribuant & ignavis imponant. Interim tamen non negandum, remedium, naturæ & morbi effectus non semper a priori distinctos satis comparere, sed prudentissimos etiam sæpe in cognitione falli, & recte dixisse *Galenum de medicament. facult. lib. II. sæpe propriam cujusque medicamenti vim obscurari necesse est, ubi fallentem aliunde qualitatem acceperit.* Quo etiam apprimè facit elegans *Pechlini in observat.* testimonium: aliquando, inquietis, in Medicina eveniunt, quæ evenire non posse, nec debere, juratus crederes, adeo aliena illa sunt, cum a scopo Medici, tum medicaminis effectui. Nunc etiam quæ speras & singis animo futura, non eveniunt, & quum eveniunt, aliter quam oportet.

§. VII.

Neque porro prætereundum, multum omnino ad Paucos hanc Medicorum circa medicaminum vires ignorantiam ^{norunt} contulisse, quod perpauci iis adminiculis instructi sint, quo-^{principia}rum ministerio elementa & principia, quibus medicamenta ^{indagare.} agunt & in corpus operantur, indagari & cognosci possunt, philosophia nempe experimentalis chymico-mechanica, quæ

variis mixtionibus, destillationibus, extractionibus, solutionibus, corporum texturam, ingredientia, crasin, a qua eorum qualitates, proprietates & affectiones dimanant, detegit atque recludit. Ob hujus itaque scientiæ defectum, turpe dictu est, per inulta sæcula tota cana vetustas & recentiores quoque in pernoscendis medicamentorum agendi principiis summa in ignorantia versati. Antiquiores enim commentitiis quatuor elementis, qualitatibus, humoribus & temperiebus tanquam saxo adhærentes, nil nisi sterilia & futilia circa hanc rem proposuerunt. Post hos Philosophiæ Cartesianæ addicti nimis subtiliter de actione medicamentorum in corpus differe-re, & eorum operationes ex varia particularum figura, magnitudine, nexu derivare voluerunt, sed parum ad usum. Et nostro jam ævo prodeunt, qui hæc omnia rejicientes, asserunt: aliam esse actionem medicamentorum & corporum physicam, juxta physica principia explicabilem, aliam vero medicam, ad vivum corpus relata. At licet nemo unquam negaverit, vivo, non mortuo corpori offerenda esse medicamenta; in obscuro tamen evolvendum manet, quomodo hæc agant in corpore vivo. Et licet porro contendant, per vivum corpus intelligendum esse corpus principio interno activo, motus & omnem quoque medicamentorum actionem ad arbitrium & moraliter certum in finem dirigente, instructum, eaque propter supervacaneum penitus censeant illum conatum, quo principia & modus agendi remediorum investigantur: hæc tamen omnia sunt mera supposita, quæ nulla firma demonstratione nituntur, nec etiam quicquam utilitatis ad rationalem therapiam conferunt, ut potius cœcæ Empiriæ apprimere faveant.

§. IIX.

*Per Philo-
sophiam
experi-
menta-
lem.*

Igitur certum interea sit, pro diversa natura & indole medicamentorum, quæ etiam ex parte ipso odore & sapore cognoscitur, aliam atque aliam esse ipsorum operationem, v.g. refrigerandi, calefaciendi, sudorem, urinam & al-

vum

vum movendi, motus sedandi & intendendi. Certum quoque ac firmum sit, omnes in corpore nostro effectus, a causarum suarum nexu indissolubiliter dependere, adeo ut remedia, si sub certis conditionibus applicentur, certum etiam activitate sua edant effectum. His autem ceu veris, ut sunt, tantisper suppositis, nullum dubium est, quin mediantibus experimentis variis chymicis & mechanicis, a priori quam optime in principia & vires medicamentorum quispiam inquirere & penetrare possit. Clarissimo sunt documento soteriæ aquæ, thermæ nempe & acidulæ, de quarum ingredientibus Veteres ex defectu scientiæ physiciæ & chymicæ nonnisi fabulas & commenta in conspectum produxerunt, ego vero, quod citra arrogantiam dixero, primus fere in plurimis Germaniæ fontibus experimentorum ope genuina erui elementa, ut jam de eorum effectu judicare & quid in hoc vel illo morbo præstare possint, verum judicium ferre sit in proclivi. Neque minus ejusdem Philosophiæ experimentalis beneficio & mediante quoque sapore & odore, veras & genuinas in vegetabilibus detegi posse vires arbitror, ut pluribus asserui in exercitatione *de methodo compendiosa vires plantarum indagandi*, inserta *tomo primo opusculorum physico. medicorum*. Quin tentaminum chymicorum adminiculo, multorum certe arcanorum, imprimis quæ ex auro sumtuose præparari jactitarunt, ingredientia, quantumvis occultata, sunt evoluta ac magnificæ ipsis falso & fraudulenter adscriptæ virtutes manifestatæ.

§. IX.

Monendum tamen est, non omnes medicamentorum facultates & proprias virtutes, hac ratione solius experimentalis studii subsidio elici posse atque detegi, sed easdem demum a posteriori, sive effectu & experientia, melius in conspectum venire. Ecquis enim est, qui solis experimentis physico-mechanicis argenti vivi vim tam vehementer salivam moventem, nitri virtutem refrigerantem & antispasmodicam,

dicam, arsenici exitialem venenatam, seminis hyoscyami narcoticam, rhabbarbari purgantem, cantharidum diureticam, antimonii emeticam, a priori per ejusmodi experimenta, nisi accedat experientiae suffragium, conjicere, vel certo determinare poterit. Neque etiam virtutem quandam medicamento semel aut bis expertam pro certa & probata venditare licet, sed iterata demum & aliquoties sine suspitione alius causae confirmata experientia verum esse effectum evincit. Multi siquidem, ut perite monet Baglivus Lib. 1. prax. cap. 5. §. 1. & 8. ob faustos evenus, semel vel bis observatos, ex aliquo remedio, vel potius ob innatam quandam proclivitatem, tum laudandi, tum fingendi ad libitum medicamentorum vires, ita erga remedium aliquod afficiuntur, ut putent, illud unum ad curandos quosque morbos, summam vim ac velut imperium obtinere, sed progressu temporis re melius perspecta, illud particulare & instabile, non vero commune ac perpetuum fuisse, animadverterunt.

§. X.

Cognitio-
ni obstat
composi-
torum
usus &
mutatio.

Denique etiam haud leve obstaculum penitiori viri-
um in medicamentis cognitioni objicit, tum quod rarissime
simplicia, ac ut plurimum composita, nec hæc sola, sed alio-
rum usu interpolata, usurpentur, tum etiam quod pleraque
Medicorum turba animo fluctuet, nec uti quidem decebat, in-
sistat usui, sed juvante non illico oblato medicamento, aliud
promat crebriusque mutet. Etenim adhibitis multis simul
simplicibus, dubium utique est, cui potissimum adscribendus
effectus, multo magis si adjecta ita sunt comparata, ut virtu-
tem vel infringere, vel intendere, possint. Et licet simpli-
cia non semper omni indicationi satisfaciant, sed connubio
eorum sæpe opus sit; tamen compositorum etiam genuina
virtus nunquam innotescere potest, quando subinde alia atque
alia interponuntur ac ipsa adhibendi methodus pluries variatur.
Longe magis vero huic cognitioni obest crebra mutatio,
quandoquidem remediorum effectus nonnisi certo tempore

per-

perfici potest & cognosci, quod nisi expectetur ipseque usus aliquandiu continuetur, neutiquam de virtute certi quippiam poterit asseri, sed quantumvis egregium pro sterili habebitur. Eximium hanc in rem est *Celsi* præceptum *lib. III. cap. 1. non statim*, inquentis, *condemnetur, si quid non statim profuit; minus vero removeatur, si quid paulum salim juret, quia profectus tempore expletur.* Et idem etiam jam præcedenti capite *lege XIV.* pluribus inculcavimus. Atque hæc sunt potiora impedimenta solidæ cognitionis virium in medicamentis, quæ qui superat ac removet, pariterque tempus exhibitionis, dosim & modum cum congruo vehiculo propinandi curate annotat; is omnino genuinas facultates & operationes explorabit & cum certa ratione habebit perpectas.

CAPVT IV.

DE

MEDICAMENTORVM QVA- TIVOR SVMMIS GENERIBVS ET OPE- RANDI MODO, SPECIATIM ALTE- RANTIBVS.

S. I.

Quoniam omne fere Medici officium in eo contineatur, *Medica-* ut, quæ tum ad tuendam, tum redintegrandam *la-* mentoris *in classes* besactatam valetudinem, nec non levanda & miti- *distrib-* ganda urgentia pathemata faciunt, tempestive of- *tio neces-* ferre, & vicissim; quæ insalubria & fugienda, perite arcere *saria.* noscat; in proclivi est judicare: ad hoc ex voto perficien- dum nihil æque necessarium esse, ac distinctam & curatam sanitatis præsidiorum notitiam. Hæc autem cognitio sup-
Mmm 3 ponit

ponit non solum notitiam virium, sed etiam elementorum & operandi rationis; quo Medicus solido dijudicare queat ratio-
cinio, quid ex omni apparatu in hoc vel illo morbo, hoc vel
illo individuo, hoc vel illo tempore & pro diversa aliarum cir-
cumstantiarum ratione, obsit, aut proficiat. In quo qui-
dem ut recte versetur artifex & habeat, unde cuius casui ac-
commodum expedite promere & cum fructu afferre queat;
nihil aptius magisque proficuum est, quam si omnia hæc sua
instrumenta, secundum ipsorum principia, modum operandi
& effectus quoque quos sub certis conditionibus præstare pos-
sunt, in certas classes perite & compendiose dispescat.

§. II.

*Qua mi-
nus recte
huc usque
adorna-
ta.*

Jam quidem quamplurimi ejusmodi syllabi & catalogi
materiæ medicæ, a doctis etiam viris concinnati, passim cir-
cumferuntur: sed si verum fateri licet, ita ut plurimum sunt
comparati, ut solidæ & rationali therapiæ inde adornandæ,
plus obsint quam prosint, & a peritis ac in ipsa arte exercitatis
vix sine indignatione perlustrari queant. Etenim obviæ in iis
sunt longe plures quam par est & innumeræ fere remediorum
classes, ut non ita pridem in ejus farinæ libello vel quinquaginta
numerarim, prout nempe ratione partium quas affici-
unt, ratione morborum in quibus conveniunt & ratione effe-
ctuum quos interne & externe edunt, variant. Ipsæ vero
consignationes diffusæ & tam variis diversæ ac planæ contrariæ
indolis medicaminibus refertæ sunt, ut qui confidenter, sine
nova curata distinctione, earum ductum in conficiendis phar-
macis sequi velit, non possit non in ingentem errorem atque
confusionem perducere.

§. III.

*Et ad
quatuor
tantum
classes re-
ducenda.*

Quapropter summa medicamentorum genera com-
pendiose & longe rectius sic describi posse censeo, ut quum
omnia quæ medendi scopo offeruntur, ad removendas mor-
borum causas quoad modum agendi dirigantur, in omni ve-

ro morbo vitium vel sit in motu, vel in materia, quæ move-
tur, immo ad motum disponit, motus porro vel nimis, aut
in universo corpore, aut in certa tantum parte, intensus, vel
imminutus sit, materia autem vel quantitate, vel qualitate
delinquat, cuncta remedia vel circa motum, vel materiam
operatione sua in genere occupentur. Et materiæ quidem *Alteran-*
qualitate vitiosæ corrigendæ dicata sunt alterantia, quantita- *tium &*
re peccanti evacuantia, motui vero si deficit, imminutus est *evacuan-*
& partes atonia laborant, excitando & procurando roboran- *tium ro-*
tia, si vero intensus nimis est & adauctus ac partes spasmō ex- *borantiū*
ercentur, componendo ac remittendo, sedativa inserviunt. *& sedan-*
Hæ sunt generales quatuor medicamentorum classes, ad quas *tium.*
omnia quæ naturæ promptuaria ad medicum usum suppeditant,
commodissime possunt reduci. Quin etiam omnes artis in
medendo operationes, his adminiculis & hac ratione quam
optime perfici possunt, & Hippocrates elegantissime hinc & ve-
re mechanice Medicinam definivit, lib. de flat. §. 3. scribens:
Medicina nihil aliud est, nisi ablatio & appositio. Ablatio quidem
eorum quæ excedunt, appositio vero eorum quæ deficiunt. Qui
autem istud optime facere potest, is optimus Medicus censebitur,
quantumque quis ab hoc præstando deficit, tantum deficit quoque
ab ipsa arte.

§. IV.

Deinde quod ad causalem influxum ipsamque reme- *Actio ve-*
diorum actionem attinet; agunt ipsa immediate & proxime *ro vel*
vel in fluidas, vel solidas partes, ita quidem, ut alterantia & *fluidas.*
evacuantiæ dicata sint fluidis, roborantia & sedativa solidis.
Verum quia tam liquida, quam solida, diversæ naturæ sunt,
diversis etiam rationibus succedunt operationes. Quippe
nonnulla ex medicaminibus proxime actione sua afficiunt
tenuissimum ac mobilissimum illud fluidum, quod in cerebro
ac nervis hospitatur, & motum præcipue & sensum partibus
præstat, illud vel augendo ac in motum magis ciendo, ut
analeptica, cordialia & suaveolentia, vel intensiorem ipsius
mo-

motum sedando, ut vaporosa, anodyna, opiata & graveolentia, quæ exigua etiam dosi assumpta, præsentaneam exserunt virtutem. Alia medicamentorum immediate operantur in sanguinem & qui ipsi serviunt succos, ut diluentia, incrassantia, attenuantia, item absorbentia & acrimoniam causticam vel sulphuream contemperantia.

S. V.

Vel solidas partes afficit

Quæ in solidis effectum præstant, ut plurimum immediate & proxime eundem in nervosis partibus exsequuntur, præsertim ventriculo & intestinis, quæ sensationis exquisitissimæ. Hunc in censum veniunt pharmaca ex mineralium classe potissimum petita, quæ exigua in dosi operantur & in tenuissimas ac stupendæ exiguitatis moleculas integra virtute & textura dissolvuntur ac intimæ admissionis ad nervosas partes sunt, nec tam facile elui possunt, ut ex vomitoriis tartarus emeticus, ex salivantibus mercurius præcipitatus albus, ex sulphuribus, sulphur antimonii nostra methodo paratum & salia volatilia. Alia vero sale subtili caustico nervosas has partes adoriuntur, ut ex venenis arsenicum, ex purgantibus helleborus albus & niger, gummi guttæ, resina jalappæ & id genus alia, cum omnibus insectis, imprimis cantharidibus. Notandum tamen quod ex his nonnulla unam præ altera nervosa parte magis afficiant, uti mercurialia glandulas, lymphatica vasa ipsasque fauces, antimonialia emetica ductus biliosos, colocynthiaca nerveas intestinorum tunicas, helleborus oesophagum, laryngem & asperam arteriam, cantharides & insecta nerveos urinarios & seminales ductus, salia volatilia oleosa & sudorifera ex sale volatili regni animalis confecta tunicas vasorum arteriosorum. Alia denique ex iis quorum operatio solidis dicata, plus musculo-fibrosis, quam nerveis & membranaceis partibus facultatem suam insinuant, quorum e numero sunt roborantia, quæ vel leniori principio constringente fixiori terreo, vel sulphureo pollent.

§. VI.

Sic igitur in genere recte distinguenda medicamentorum *Instituti* suppellex, & sic quoque in compendio eorum actio & ope-*ratio*. randi ratio concipienda: jam de singulis seorsim. Quemadmodum vero Medicina rationalis ab evidentibus maxime causis, obscuris omnibus, ut loquitur *Celsus*, non a cognitione artificis, sed ab ipsa arte rejectis, instrui debet: ita etiam illam scientiam, quæ medicamentorum facultates pandit & ad rationes revocat, non ex causis obscuris nimisque remotis, vel principiis atomisticis & secundum magnitudinem & figuram particularum geometricis, quæ revera incomprehensibilia, sed ab evidentibus, proximis, in sensus cadentibus & comprehensibilibus, immo maxima ex parte ipsa experientia petendam & hauriendam esse judico. Cui proinde methodo etiam inpræsentiarum insistam, & in hac facultatum, & proprietatum medicamentorum explicatione, plana admodum, simplici & facile concipienda ratione procedam, ita quidem, ut non omnes, sed selectas tantum & usu comprobatas ex quavis classe species recenseam atque quoad agendi modum atque usum nervose explicem.

§. VII.

Sermo autem primo erit de ALTERANTIBVS, quæ *Alteran-* primam remediorum classem conficere & maxime circa corre-*tium qua-* tionem materiæ quæ qualitate in vitio est occupari, superius *tuor sunt* dixi. Jam vero quia materia emendanda in morbosis corpo-*genera.* ris afflictionibus variis modis delinquere potest, varias etiam alterantium species inde resultare elucescit. Nimirum succi corporis nostri, qui secundum naturam blandi, dulces ac temperati esse debent, vel salino-acidam & corrosivam naturam induerunt, vel intemperie calida, subtili sulphurea infecti sunt, vel nimis viscidam, tenacem & crassam, vel valde acrem & corrosivam indolem contraxerunt. Hinc ut quadruplex hæc vitiosa qualitas corrigatur, quadruplex etiam alterantium genus esse debebit. Et quidem ad acidum imbi-

(III.)

Nnn

ben-

bendum ac obtundendum, absorbentia, ad exæstuantem & biliosam intemperiem contemperandam & refrenandam, temperantia, ad viscidum & spissum dissolvendum ac colliquandum, incidentia & denique ad acrimoniam urentem & corrodentem involvendam ac mitigandam, demulcentia apta sunt atque accommodata.

S. IIX.

Absorbentia.

Primum itaque alterantium genus complectitur **ABSORBENTIA**. Horum classẽ ducunt ex marinis mater perlarum, concharum, cochlearum & ostracodermatum variæ species, corallia rubra & alba, nec non os sepia; ex animalibus desumpta cornua & ossa, sive per vaporem sub coctione emollita, ac ut in pharmacis audit, philosophice præparata, sive aperto igne trita, dentes & ungulæ, testæ ovorum, chelæ & lapides cancrorum, mandibulæ piscium, item unicornu animale & fossile; ex subterraneis lapis specularis, creta, crystallus præparata, osteocolla & omnes lapides calcinati & usti, varia bolorum, argillarum & terrarum sigillatarum genera; ex metallis limatura martis; ex chymice confectis omnia salia per incinerationem parata, cineres clavellati, sed tartari, nitrum fixum, spiritus salis ammoniaci urinosus, sal volatile ammoniacum, magnesia alba, tinctura salis tartari, item antimonii acris.

Theoremata.

Absorbentium horum omnium ea ratio est ac indoles, ut cum obvio quocunque acido promte congregiantur, illud imbibant, quantumvis corrosivum hebetent ac destruant & cum eo in tertium quoddam innoxium corpus commingrent. Patet hic effectus exemplo spiritus nostri fumantis & inflammantis quam maxime corrosivi, olei vitrioli, mercurii sublimati, aquæ regis, fortis aliorumque summe causticorum, quæ adjecta ferri scobe, vel commixto alcalino sale, aut absorbente terreo, omni rodente facultate orbantur, ut nec quicquam acidi aut arrodentis supersit.

Quamvis
vero

vero cuncta alcalina salina & terrea in eo convenient, quod acidum quodvis cicurent ac in tertium quoddam commutent: in eo tamen quædam intercedit differentia, quod salia alcalinæ indolis, sive lixiviosa, non solum a quovis acido, sed etiam liquore aqueo in corpore celerrime & ex toto solvantur, terrea vero non tam facile penitus liquefcant, uti conspicuum est in coralliis, martis limatura, calce viva, quæ nec ab acido, præsertim vegetabili, prorsus dissolvuntur, sed semper fixior quædam terrestris substantia restitat. Deinde alcalina salia præter vim absorbentem, suscepto in connubium acido, novam acquirunt medicamentosam virtutem, viscidos nempe, limosos & tenaces succos incidentem & colliquantem, leniter stimulantem, ac vel alvum, vel diuresin, vel etiam diaphoresin movent, & promte quoque per excretoria transcunt: plurima vero alia ex corporibus alcalinæ naturæ non tam expedite excretiones præritant, sed potius quandoque adstringentem relinquunt effectum, uti solenne est limaturæ martis, coralliis, bolis & terris sigillatis.

Corollaria practica.

I. Quia igitur alcalina terrea nonnisi ab acido dissolvuntur, hinc utique cavendum est, ne in iis morbis, ubi primam regionem, in qua absorbentia maxime operationem suam exsequuntur, magna crudorum & viscidorum succorum colluvies obsidet, ne indissoluta ibi hæreant, stomachum gravent, appetitum & digestionem destruant alvumque reddant adstrictiorem; id quod sæpius in febribus ardentibus, biliosis, hecticis & ubi languor motus peristaltici & constrictorii in ventriculo præsto fuit, factum fuisse observavimus.

II. Vicissim quia hæc absorbentia acidum tam promte absument atque invertunt, acor autem purgantium & vomitoriorum efficaciam quam maxime impedit atque infringit, utilissime digestivi loco, ubi justa acidi exsuperantis suspicio, horum usus præmittuntur.

III. Utur omnia terrea absorbent & obtundant acidum; ob diversam tamen singulorum texturam & naturam, quandoque fit, ut productum ex ipsis valde differat, ac diversum sæpe intentioni non respondentem in corpore effectum exsequatur, & hinc exquisitus in oblatione servandus delictus. Quando scilicet Medicus præter virtutem absorbentem, etiam quandam roborantem & adstringentem desiderat; expedit marina potissimum, & ex his corallia & ostreas, nec non testas ovorum, item varias margarum species, imprimis quæ sigillari solent, in usum vocare. Si lenius adhuc subadstringendum, perlarum mater & conchæ, ac speciatim ad cohibendum seminis fluxum, os sepia, ex usu esse poterunt. Ubi per absorbens laxans simul effectus perficiendus, magnesia, quæ ex lixivio nitri debita enchiresi paratur & nonnisi tenuissimus calcis vivæ flos est, offerenda, quæ tota ab acido soluta, in sal medium amarum, alvum promte stimulans transit, eaque propter in hypochondriacis & ubi prima regio acidis succis scater alvusque strictior est, eximiam certe exlerit efficaciam. Quum diureticus simul effectus præstandus, cancerorum lapides, cochleæ vel corallia usta, nec non osteocolla, utilissimam locant operam. Ad perspirationem una in morbis liberiores reddendam, animalium ossa usta, vel philosophice præparata, commodissime inserviunt. Et denique quo stagnantes & densati humores ipseque coagulatus sanguis resolvantur, nihil certe domestico illo remedio præstantius, quo cancerorum lapides in aceto liquati propinquantur.

IV. Absorbentia licet sint medicamenta admodum simplicia, fere domestica & facile parabilia, eorum tamen virtus & efficacia omnibus ferme aliis remediis superior, nec satis dilaudari potest. Nihil enim tam expedite ac promte noxios succos cicurandi & invertendi facultatem ex omni alterantium censu exserit, quam absorbens, neque tamen facile tam securum ullum aliud & innoxium est, nisi majori

riquam par est copia ingeratur. Adhæc uber admodum acidi in corpore est proventus, maxime in his, quibus bilis deficit, ut senibus ac feminis, nec non qui sedentariæ vitæ nimium indulgent, & potum, qui multum acidi recondit, largius assument, immo in multis morbis, præsertim affectione & melancholia hypochondriaca, enormis plane; acidum autem toti animantium naturæ, & coagulante effectu, libero succorum vitalium progressui, admodum inimicum est, & gravissimorum, præsertim chronicorum morborum, primam & originalem causam suppeditat: ideoque clarissime innotescit, optima & præstantissimæ virtutis immo polychresta esse hæc absorbentia, quorum tamen usus Veteribus parvus admodum fuit vel plane nullus, ac demum *Helmontio*, *Tackenio*, eorumque in Belgio maxime affectis *Sylvio* & *Bontekoe* in acceptis ferendus, qui acidum multorum morborum causam esse perhibuerunt & primi his acido oppositis usi sunt præsidii.

§. IX.

Secunda alterantium classis complectitur TEMPERAN-
TIA, quæ non modo intestinum calidum partium sulphurea-
rum in sanguine motum, sed & ipsum fervidum, urentem
biliosum humorem in intestinis, contemperant, cicurant &
hac ratione refrigerant. Hac virtute ex vegetabilium censu
splendent, radix & herba acetosæ, acetosella, poma citria,
aurantia, Chinenfium granatorum, ribesia, fraga, berberes,
baccæ rubi idæi, cerasa & ex iis parati succi, sirupi item
aquæ ex recentibus his destillatæ, nec non semina quatuor
frigida majora & decoctum avenaceum; ex animantium re-
gno serum lactis, lac ebutyratum, succus cancrorum fluviati-
lium, testudinum decoctum, decoctum dilutum rasuræ cor-
nu cervi & scorzonæ, cum vel sine hordeo, gelatina cornu
cervi, aqua etiam a rasura cornu cervi destillata, hoc nomi-
ne commendanda: ex mineralium familia omnibus palmam
præcipit nitrum, bene purificatum, melius adhuc regenera-
tum,

tum, ex aqua forti per additionem falis tartari; ex chymicis denique & pharmaceuticis sal essentielle acetosellæ, cremor tartari, phlegma vitrioli, clyffus antimonii sulphuratus, tinturæ rosarum, florum bellidis, violarum cum spiritu vitrioli philosophico præparatæ, quam optime temperant.

Theoremata.

Temperantia agunt triplici ratione. Vel enim sale acido, particulas volatiles sulphureas ligant & motum earum calidum vorticosum intestinum figendo & illas coagulando, quodammodo minuunt. Vel operantur expansiva aëreo-elastica quadam virtute, qualis delitescit maxime in nitro, quod sal acidum & alcalinum, ingentem partium sulphurearum nec non liquidi aëreo-ætherei copiam involutam recondit, eodemque materiam calidam in vehementi motu vorticoso calido constitutam dispellit & a centro quasi ad peripheriam displodit, sale vero neutro materiam crassam, quæ caloris & sulphuris matrix, attenuat, resolvit, disrarat, & subtili simul suo acido partes sulphureas in celerrimo motu sistit. Vel etiam partes sulphureas diluendo & disjungendo, humidum calore absumentum restituendo, simul etiam nimiam vasorum elasticitatem, a qua calor pendet, remittendo, operationem suam exsequuntur, uti potissimum observatur, ab aqueis, sero lactis, decocto cornu cervi & avenaceo.

Corollaria practica.

I. Hæc certe temperantia multi & magni usus sunt in Medicina, ubicunque calor præternaturalis exstinguendus, eaque propter in febribus omnis generis, item inflammationibus & gravioribus spasmodicis ac doloribus, qui perpetuo ferre nimia & calida sanguinis commotione stipantur, iisdem nullo modo carere possumus. Sed acidis, quæ figendo & coagulando agunt, merito præferenda nitrofa. Nitrum enim non tantum refrigerantem, verum etiam rigidas & spasmo afflictas partes relaxantem, sive antispasmodicam,

item

item urinæ & alvi excretionem promoventem virtutem possidet. Quin quum alia refrigerantia & acida fluida magis condensent & coagulent, nitrum potius colliquat, rarefacit, attenuat humores densos & viscidos, ita prorsus, ut si vel in pulverem redactum, vel in aqua prius solutum, sanguini nigro coagulato inspergatur eum & floridiorem & fluidiorem efficiat. Quare non solum in inflammationibus ipsisque febribus inflammatoriis, quæ a sanguine nigro, coagulato & incarcerato nascuntur, acidis longe præstantius, sed etiam quia tenacem & spissam feri materiam, quæ affluens in sanguine inflammationi subjectorum apparet, tam efficaciter fundit ac dissolvit, ad corpus ab inflammatione defendendum quam maxime proficuum.

II. In febribus chronicis, ut lenta, hæctica, quæ ut plurimum ex labe vel corruptione quadam viscerum natales trahunt & quando tussis aut hæmoptysis juncta est, ipsique pulmones vitio laborant, non acida, sed nitrosa & diluentia, præsertim ex regno animalium petita, ut serum lactis, aqua & decoctum, nec non gelatina cornu cervi, in usum vocari debet. Ubi etiam diarrhoeis, dysenteriis, cholerae, calor febrilis associatur, idemtidem abstinendum ab acidis, refrigerantibus, & potius diluentibus, gelatinosis, mucilaginosi, adjecto pulveribus temperantibus & absorbentibus uno vel altero nitri grano, utendum. De quibus laudatissimis virtutibus pluribus videri potest, dissert. nostra *de nitri usu*, nec non ea, quæ *observationes circa nitrum* tradit.

§. X.

In tertia alterantium classe comprehenduntur INCI-*Incidentia* sive ATTENVANTIA. Horum in censum veniunt radices: pimpinellæ albæ, ari, acori, asari, armoraciæ, enulæ, cichorii, iridis Florentinæ, sigilli Salomonis, vinetoxici; herbæ: arnica, beccabunga, cochlearia, nasturtium aquaticum & Indicum, piperitis, ros folis, fumaria, trifolium fibrinum, centaurium minus, hyssopus, scordium, cha-

charefolium, carduus benedictus, sedum minus, alliorum, porrorum & ceparum species; lignum guaiacum & ejus cortex; aromata piper & zingiber; semina: sinapeos, cochleariæ & nasturtii; gummata: ammoniacum, galbanum, sagapenum, opoponax, myrrha & benzoe; chymice & pharmaceutice confecta: mercurius dulcis, æthiops mineralis, flores sulphuris, salia alcalia fixa & vegetabilium per incinerationem parata, speciatim sal tartari, absynthii, porro media, ut digestivum Sylvii, nostrum aperitivum, ammoniacum, polychrestum, Ebshamense, Sedlicense, tartarus vitriolatus, terra foliata tartari, arcanum duplicatum, solutio oculorum cancri, nitrum & sal ammoniacum, volatilia, ut sal volatile salis ammoniaci, spiritus salis ammoniaci urinosus, oxymeii præterea squilliticum, tinctura antimonii acris, essentia gummi ammoniaci, piperis Indici, resina Guaiaci, sirupus nicotianæ, de erysimo, feculæ aronis &c. Fontes quoque medicati, qui præter diluentem & aperitivam virtutem incidente etiam pollent, ut acidulæ Egranæ, Sedlicenses, thermæ Carolinæ, nec non infusa theiformia, quæ propter copiosum aqueum elementum, maxime vim suam attenuantem & coalescentes moleculas disjungentem edunt, ac demum serum lactis dulce, quod ob dulce ac subtile quod custodit sal, deterfiva simulque ductus excretorios aperiente facultate splendet.

Theoremata.

Ex his nonnulla in fluidas, nonnulla in solidas corporis partes agunt. Quæ fluida immediato contactu afficiunt sunt perpauca, idque non aliis quam diluentibus aqueis, quorum magna certe ad colliquandos glutinosos ac viscidos humores est efficacia, nec non salibus alcalinis fixis & volatilibus ac nitrosis, quæ præsertim in forma liquida sanguini aut humoribus spissis ac densatis admixta, eosdem vel ad oculum liquefaciunt atque attenuant,tribuendum. Reliqua omnia in solida operantur, eorum tonum, robur, contractilitatem, vasorumque elasticitatem atque potentiam systolicam

Corollaria practica.

(III.)

000

& ob-

& obstructions referando, aperientem præstant effectum, & ob id recte dici possunt aperientia. Merentur etiam nomen antiscorbuticorum & sanguinem depurantium. Nam quia puritas & temperies succorum vitalium a legitima inutilium ac superfluum se & excretionem dependet; hæc autem oppilatis ab humore spisso & viscido emunctoriorum & glandularum minimis canaliculis, intercipitur; facile patet: ea quæ lentos succos incidendi & obstructions removendi virtute pollent, optima esse sanguinem depurantia, nec non adversus scorbutum præsidia, in quo humores maxime intemperati, & variis heterogeneis, viscidis, falsis, sulphureis, acribus particulis referti sunt. Quumque adeo diversum edant effectum, quæ cuique potissimum accommoda, sciendum.

II. In affectibus itaque ventriculi & primarum viarum, ad dissolvendas & incidendas viscidas cruditates egregie faciunt radix ari, pimpinellæ albæ, calami aromatici, piper, zingiber, sal ammoniacum depuratum, tartarus vitriolatus, arcanum duplicatum, sal digestivum Sylvii, nostrum aperitivum, sal absynthii, spiritus salis simplex, vel dulcificatus, nec non tinctura aperitiva Moebii. Et si per alvum simul crudi & male cocti succi exturbandi, præstans utique virtus est salium mediorum, imprimis salis Sedlicensis, Ebshamensis & polychrestii, pleniori dosi & cum sufficiente aqueo vehiculo propinatorum.

III. Ubi humores visциdi in pectoris affectibus resolvendi & per sreatum rejiciendi, commodissimam locant opem, radix enulæ, iridis Florentinæ, ros solis, hyssopus, scordium, capillus veneris, gummi ammoniacum, myrrha, benzoe, sulphur, balsamum Peruvianum, nitrum antimoniatum, terra foliata tartari, oxymel squilliticum, solutio lapidum cancrorum cum aceto destillato, sirupus nicotianæ, nec non de erysimo.

IV. Quando spissa & tenaci impuritate sanguis infectus ac inde emunctoria oppilata & dyscrasia falso-sulphu-

rea scorbutica humores conspurcati, apprime ex usu sunt, radix armoraciæ, cochlearia, nasturtium aquaticum, Indicum, piperitis, beccabunga, centaurium minus, trifolium fibrinum, carduus benedictus, fumaria, sedum minus, sinapi, gummi ammoniacum, sagapenum, myrrha, liquor nitri fixi, oleum tartari per deliquium, solutio nitri, elixir nostrum temperatum, tinctura antimonii acris, essentia lignorum, spiritus salis ammoniaci, sal absynthii cum succo citri, nec non ex aquis medicatis Sedlicensis & Egrana.

V. Quando sanguis congrumatus post contusiones & suffusiones dissolvendus iterumque fundendus, eximiam laudem merentur radix sigilli Salomonis, herba arnicæ, chærefolii, acetum destillatum cum lapidibus cancrorum, terra foliata tartari, nitrum antimoniatum.

VI. In morbis ubi lymphæ spissitudinem contraxit, maximeque a miasmate venereo, palmam ferunt guaiacum, saponaria, tinctura antimonii acris, mercurius dulcis & æthiops mineralis, qui prudenter usurpatus, ad lentos in glandulis & hepate obhærescentes succos colliquandos & resolvendos, usus est longe præstantissimi.

§. XI.

Accedit quarta alterantium classis, continens EMOL-*Demul-*
LIENTIA & DEMVLCENTIA. Hæc inter eminent ra-*centia.*

lices: althææ, liliorum alborum, liquiritiæ, scorzonæræ; herbæ quinque emollientes, lactuca, branca ursina, parietaria; flores: sambuci, meliloti, malvæ, verbasci, millefolii, chamomillæ vulgaris, liliorum alborum, borraginis, papaveris rheados, tiliæ, acaciæ, violarum & maxime omnium crocus; semina lini, foenu græci, anisi, cydoniorum, psyllii, papaveris albi, quatuor frigida majora & minora, filiqua, amygdalæ dulces, ficus, pineæ, pistacæ, gummi cerasorum, Arabicum, tragacantha, rasura cornu cervi & ejus gelatina, axungia humana, canis, caponis, medullæ ossium, pinguedines circa omentum, ossa & mesenterium, olea nativa animalium,

um, butyrum recens, lactis cremor, lac ipsum, saccharum lactis, sperma ceti, mel, vitellus ovi, ejus albumen exsiccatum & in pulverem redactum. Ex præparatis oleum amygdalarum dulcium, lini, raparum, momordicæ, decoctum cornu cervi citratum & scorzonæ citratum, ptisana, serum lactis dulce, sirupus dialthæa Fernelii, unguentum dialthæa, emplastrum diachylon simplex, de meliloto, spermatis ranarum.

Theoremata.

Virtus horum remediorum duplex est, solidis, vel fluidis dicata. In solidis quidem hanc ita exsequuntur, ut rigidas, duras ac tensas fibras laxent, molliant easque mobiles & flexiles reddant, simulque adductos per stricturas minimorum vasorum alveos amplient atque dilatent: in fluidis vero viscida sua mucilagine præstringunt, involvunt & quasi capsulæ includunt acies & spicula salium acrium rodentium, & sic quam optime demulcent. Exterius autem applicata, humorem vasorum alveis elapsum, nec amplius resolvendum, aut per lymphatica vasa rasorbendum, in pus convertunt, ita quidem, ut disjecto per calorem temperatum subtilissimo liquido, remanens viscosa materia, oblitinis blande poris, ne nimium humidi exhalet, & prolecto majore succi nutritii, ex quo pus maxime confatur, per relaxatos tubulos affluxu, ad coctionem & maturationem traducatur.

Corollaria practica.

I. Maximæ hæc demulcentia sunt efficaciæ, si venenum causticum assumptum, & vix sane melior datur his antidotus, ad pernicialem toxicum ex animalium, vegetabilium & mineralium censu vim cicurandam & infringendam, lacte præsertim & pinguedinibus copiose ingurgitatis, quæ non modo acerriima venenorum spicula obtundunt atque involvunt, sed & constrictas per virus a validissimo spasmo membranas laxant, & hac ratione veneni evacuationem, sive per vomitum, sive secessum, adjuvant.

II. In omnibus longis morbis & valentibus, præsertim qui ab acrimonia humorum ortum trahunt & nervis potissimum infident, simplicissima hæc emollientia in infusis & decoctis oblata, usum præstant longe saluberrimum. Sæpius certe convulsiones insania stipatas & scorbuticas artuum tractationes cum acerbis ventris torminibus, curatas novi decoctis, ex radice pœoniæ, altheæ, herba malvæ, parietariæ, brancæ ursinæ, floribus verbasci, liliorum alborum, sambuci, borraginis, chamomillæ, papaveris rhœados, ficubus & semine fœniculi, cum aqua vel sero lactis paratis, largiori tamen ac diuturno usu, & adjecto interdum uno vel altero cochleari olei amygdalarum dulcium & interposito balneo ex aqua dulci cum lacte remixto.

III. Axungia & pinguedines animantium recentes, maximeque ossium medullæ, quæ subtilissimam recondunt pinguedinem, in scorbutica acri humorum diathesi interne cum fructu usurpantur.

IV. In aridura partium & ubi articuli vix sine strepitu moveri possunt, nec non in doloribus arthriticis, eadem demulcentia, ut radix scorzonera, flores sambuci, millefolium, chamomilla vulgaris, semina quatuor frigida majora, inprimis vero serum lactis dulce, pinguiusculis cremoris partibus adhuc refertum, vel etiam pinguedines cum quodam alcali in saponis texturam redactæ, mirabilem præstant effectum, sed opus est, ut pingua hæc jejuno ventriculo, non adeo magnis, sed repetitis dosibus assumantur, superbibendo haustum calidum convenientem.

V. In exulceratione renum & mictione cruenta, quæ ob acredinem humorum quandoque incidit in variolarum morbum, gummi cerasorum, vel etiam tragacantha, aut albumen ovi siccatum, in sero lactis soluta, præstabilem locant opem. In pectoris vero affectibus, ad acredinem tussis causam obtundendam & materiam ad evacuationem præparandâ, specifica quasi virtute laudantur decoctum avenaceum, sperma

ceti, liquiritia, oleum amygdalarum dulcium, filiqua dulcis, saccharum lactis, crocus, ficus, sirupus violarum, flores papaveris & sambuci.

VI. Hecticus jugis si affligit calor & succi dulces continua lenta febre acrimoniam falso-alkalinam contrahunt, in cremore lactis & butyro recenti, ob demulcentem effectum, egregia reconditur virtus.

VII. Pariter in cholera, dysenteria, scorbuto, atrophia scorbutica, phthifica & ubicunque acredo succorum in vitio est, decocta gelatinosa, carnum, ossium, præsertim cornu cervi, item pedum vituli & vervecis, tam interius potu, quam exterius ano mediante clystere infusa, eximii sunt usus.

IIIX. Quando intestina infesta detinet strictura & alvus cum flatibus retinetur, egregium præstant effectum emollientia ac demulcentia, ut oleum amygdalarum dulcium, serum lactis, decoctum avenaceum, cornu cervi, non tam per os assumpta, quam potius per clysterem inferius injecta.

IX. Flores & herbæ emollientes, si admixto croci momento decoquuntur & vesicæ inclusæ dolente interna parte exterius applicantur, ut in pleuritide, hepatitide, colica, vel ano in dolore ex hæmorrhoidibus cœcis, conspicuum torminum conciliant levamen.

X. Quando humor quidam extravasatus & impactus in pus convertendus, egregie inserviunt linimenta & cataplasmata ex pinguedinibus emollientibus & lacte parata, & maxime quidem floribus & foliis liliorum alborum, croco, ficubus, cepis tostis, farina fabarum, vitello ovi ac melle; abstinentum vero ab his, ubi in induratis & scirrhis partibus materia continetur ac in pus converti nequit, ni funestam ciere velimus putredinem.

XI. Mucilagines, quæ ex semine cydoniorum & psyllii cum aqua rosarum vel spermatis ranarum conficiuntur

untur, in erosis atque exulceratis partibus, quibus dolor & ardor jungitur, ut aphthis ulcerosis faucium, coecis & dolentibus hæmorrhoidibus, tenesmo, dysenteria, gonorrhea, vel fluore albo erodente, præsentaneam sæpe ferunt opem.

CAPVT V.

DE

EVACVANTIBVS.

§. I.

EVacuantium operatio occupatur maxime circa humores qui copia in vitio sunt, eamque ob causam in sanitatis tutelam vel naturæ motibus, vel his non sufficientibus, aut plane deficientibus, artis ministerio, per congrua emunctoria expelli debent. Jam vero vitiosi succi non unius ejusdemque naturæ, crasseos atque texturæ, nec etiam excernicula per quorum emissaria quilibet exturbandus, ejusdem structuræ atque dispositionis sunt; ideoque etiam instrumenta quibuscum eorum expulsio adornatur, varia erunt ac multiplicia. Scilicet quæ stabulantem in ventriculi & primorum intestinorum cavo vitiosam saburram superius per os eliminant, emetica, quæ ex inferiori canalibus alimentaris regione per ani secessum, laxantia aut purgantia, quæ per tubulosum cutis emunctorium, diaphoretica & sudorifera, per renale cribrum & urinarias vias, diuretica, per glandulas & ductus salivales, salivantia, per asperam arteriam ex thoracis cavo, expectorantia, per narium & faucium glandulosam substantiam, errhina, sternutatoria & apophlegmatizantia ac denique quæ ipsum superfluum

um sanguinem evocant, emmenagoga & hæmorrhoides ciētia vocantur. Sed de singulis jam seorsim.

§. II.

II. Emetica.

Primum inter evacuantia locum obtinent EMETICA five VOMITORIA, quæ duplicis sunt generis, mitiora scilicet, vel fortiora. Lenioribus accensenda merito aqua simplex tepida, adjecto pauxillo salis & portione mellis, vel olei expressi aut pinguedinis, vel decocta cum semine vel cortice raphani rusticani, aut semine anethi, vel etiam aqua thermalis, simul & semel largis haustibus copiose ingurgitata. Validiorum in numero ex vegetabilium classe sunt folia & radix asari, helleborus albus, succus corticis medii sambuci, immo omnia cathartica validiora majori dosi data, nec non quæ ab exteris asportantur gummi guttæ & radix hypecuanhæ; ex metallorum & mineralium familia, quæ venereæ prosapia, ut vitriolum cyprium, album, Gilla Paracelsi & Angeli Salæ, ex capite mortuo olei vitrioli Goslariensis, quod venereæ indolis, crystalli viridis aris, sal emetico-diaphoreticum Moebii, ex vitriolo Goslariensi & nitro anaticis partibus paratum, nec non quæ ad regulinam stibii substantiam ortum referunt, ut tartarus emeticus, vitrum antimonii & ex eo parata aqua benedicta Rulandi, mercurius vitæ, maxime ex butyro antimonii rectificato cum præcipitatione aquæ simplicis, vel olei tartari per deliquium confectus, pulvis Monckii, ex duabus partibus reguli antimonii martialis & una nitri paratus, sulphur sic dictum auratum antimonii, idque correctum, panacea sic dicta Glauberiana, Conerdingiana, ad grana quinque vel sex oblata.

Theoremata.

I. Mitiora emetica & maxime diætetica a Galeno & veteribus potissimum sunt usurpata, quippe quæ admodum secura & ut plurimum copia sua, non secus ac clysteres ex iisdem ingredientibus concinnati, intestina, ventriculum, imprimis

primis jam debilis & ad motum excretorium, teste nausea, ructibus, oris amaritie, anxietate, proclivis est, ad vomitum exsolicitant: sed non agunt ultra limites ventriculi, ex quo utique humores crudos, pituitosos & biliosos ex male ingestis & digestis collectos non sine fructu evacuant.

II. Emetica validiora tenuissima sua caustica salino-sulphurea acrimonia, exigua etiam dosi, non modo in tunicam ventriculi & intestinorum nerveam eam spasmodice convellendo agunt, sed & si paullo majori dosi præbentur, ultra stomachum, in ductus maxime nervosos biliarios, item in glandulas intestinorum, mesenterii, pancreaticas ipsumque hepar penetrant & prolectos ex his biliosos & salivales humores expellunt, quandoque vero, si universum genus nervosum afficiunt, hostiliter etiam agunt & gravissime nocent.

Corollaria practica.

I. Veteres albo veratro, seu summe drastico, emetico scopo utebantur, uti auctor est *Celsus lib. 11. cap. 13.* & quidem in comitiali morbo, in insania & in valentibus aliis morbis sine febre, sed idem perite monet, ut ante hujus pharmaci usum, corpus probe humectetur. Nostro vero tempore, quo habemus securiora, merito a violento hoc medicamine abstinemus & ex supra recensitis tantum ea seligimus, quæ naturæ & nervosis partibus crassi & textura sua non adeo inimica, nec cum ancipitis periculi metu propinquantur. Hæc inter primo loco merito connumeranda radix illa Americana Ipecacuanha, ad drachmam dimidiam & ultra oblata, quæ præter salinum subtile acre principium, etiam balsamicum ac roborans custodit, & id peculiare plane servat, ut omnium celerrime operationem suam exiequatur, eaquepropter ubi periculum in mora & promte vomitus ciendus quam optime adhibetur. Et quoniam vomitu invertitur in ventriculo motus peristalticus deorsum tendens, per consensum etiam in intestinis, si in diarrhæa vel dysente-

ria nimis intensus est, sufflaminatur & alvi fluxus ad tempus sistitur; unde *Celsus lib. I. cap. 3.* recte perhibet: vomitum ventrem, solutum comprimere, compressum solvere, Ipecacuanhæ commodissime substituitur alarum, cujus radix & folia pariter subtili, acri volatili caustico elemento, quod coctione promte exhalat, simul quoque roborante & balsamico pollent, & in febre antiqua quartana, tertiana, hydrope, ictero egregium suppeditant auxilium. Ex antimonialibus præferendus tartarus emeticus, ex croco metallorum, non vitro antimonii, qui duplo validior, præparatus, qui vel solus ad tria aut quatuor grana, vel refracta dosi cum radice ipecacuanhæ mixtus, egregie suum facit officium; & si quis effectum emetico-purgantem desideret, decocto mannæ duo vel tria tartari emetici grana adjici poterunt. Pariter usui esse potest panacea Glauberiana, ad quinque vel sex grana cum cremoris tartari scrupulo oblata, nec non in asthma pituitoso interdum oxymel squilliticum, ad duas vel tres uncias datum. Emeticis vero venereis, quorum vis constringens gravius & diutius exagitat nervosas ventriculi & aliarum partium tunicas, item pulveribus istis regulinis antimonii, pulvere Monckii, vitro antimonii, mercurio vitæ, quæ infidæ operationis, & vel fortissime, vel insufficienter operantur, pro majori vel minori humorum in ventriculo dispositione, carere & tutius ab iis abstinere possumus in Medicina.

II. Non modo utilis, sed & quandoque admodum necessarius est emeticorum paullo valentiorum usus, ad venena, præsertim quæ narcoticæ sunt indolis, item miasmata, quæ ex contagiosis & malignis morbis decumbentibus exhalant, in ventriculum descendunt, ibique humoribus fermentantibus sese insinuant, cito, ne ad penetralia serpant, expellenda. Pari ratione ad humores ex commixtione heterogeneorum ingestorum, bilis humorumque fermentantium salivalium prodeuntes, corruptos & valde vitiatos, qui in

ventriculi & intestinorum, præsertim duodeni, cavo stagnant, mora corrumpuntur & frequentissime febri lentæ, quotidiana, quartanæ, item tussi chronicæ, nec non gravioribus morbis capitis, melancholiæ, hemicraniæ, quandoque etiam comitali, item apoplexiæ, ortum præbent, exturbandos, efficaciter agentia ex usu esse possunt.

III. In morbis qui a bile spissa, in gypseum sæpe & viscidum coagulum abeunte & ductus biliarios obstruente oboriuntur, ut ictero tam flavo, quam nigro, cachexia aliisque, emetica non sine fructu, reliquis aliis nihil juvantibus, propinquantur, eosdemque, exturbata biliosa copiosa sentina, felicissime abigunt.

IV. In anasarca, leucophlegmatia, tumoribus partium œdematosi & ascite curabili, emetica paullo majori etiam dosi data, vehementer quidem ex ductibus & glandulis intestinorum, mesenterii, pancreatis, hepate serum aquosum eliciunt ac per inferiora, rarius vero superiora, ejiciunt.

V. In omni accessione & paroxysmo febrili, inflammatione ventriculi, vel ubi stomachus spasmodice afficitur, ut in cardialgia, item vehementi ira, in spasmis hysteris, hypochondriacis & ubi ad hæmoptysin, nimium mensium vel hæmorrhoidum fluxum, dispositio præsto est, item ubi morbi a congestione humorum ad caput orti sunt, uti apoplexia, paralysis, auditus vel visus deperditus, vertigo, nec non ubi dolores atroces urgent, vomitoria plane exulent, nec unquam etiam plethoricis, nisi plethora per sanguinis missionem soluta, nec quibus intestina fecibus infarta & alvus obserata, quam his prius expurgatis, exhibeantur.

VI. Præstat semper emetica ad faciliorem operationem in liquida forma, vel etiam cum sufficiente vehiculo humectante & relaxante pingui offerre; siquidem vomitio non tantum validiorem pylori & fundi ventriculi constri-

tionem, sed simul etiam relaxationem orificii superioris oesophagi, desiderat.

VII. Sub emeticorum operatione & post eam abstinendum ab omni refrigeratione, frigido potu, ab omni commotione animi, ab omni calidiori & stimulante medicina, acri & salso cibo, ac potius demulcentibus cibisque boni succi & qui facile solvuntur, utendum. Inprimis apprime ex usu est lac asininum, si haberi potest, tres vel quatuor horis post ad aliquot uncias potare. Et quæ plura hanc in rem ex instituto tradidi in *dissertatione de cauto & præstantissimo vomitorum usu*.

§. III.

II. Laxantia.

Emeticis succedunt ea, quæ per inferiora vitiosam materiam eliminant, quæ pariter duplicis sunt generis, vel leniora, vel validiora. Inter ea vero quæ alvum elementer, tuto & sine stomachi & systematis nervosi læsione movent, & Latinis LENIENTIA & LAXANTIA, Græcis eccoprotica vocantur, præcipuum locum tenent, ex vegetabilibus manna, rhabarbarum, cassia, agaricus, tamarindi, folia fennæ, aloë, baccæ spinæ insectoriæ, passulæ minores, polypodium, flores persicorum, acaciæ, violarum earumque semen: ex salibus culinare, borra, & nitrum, item ex fontibus mineralibus, ut Ebshamense, Egranum, Sedlicense, nec non ex Carolinis paratum: ex animantium regno lac, præsertim asininum, serum & saccharum lactis; ex præparatis chymicis, terra foliata tartari, tartarus vitriolatus, cremor tartari, sal ex alumine & sale tartari concinnatum, sal essentielle acetosellæ, magnesia, sal polychrestum, aurum fulminans, mercurius dulcis, fl. benzoës; nec non composita, ut pilulæ de succino Cratonis, aleophanginæ, marocostinæ, tartareæ Schroederi, essentia, extractum & sirupus rhabarbari, sirupus rosarum solutivus, aqua laxativa Viennensis, elixir purgans Thomsoni.

Theoremata.

Laxantia hæc placide, sine magna commotione & labefactione motus peristaltici ventriculi & intestinorum, non modo sordes alvinas, sed & quando liberalius propinantur, ex intestinorum glandulis serum, satis largiter evehunt. Neque tamen sale acri subtili caustico, nervolis partibus inimico, ut purgantia, operationem suam perficiunt, sed substantia plane innocenti, quæ vero tenuissimæ salinæ stimulantis indolis est, & haud secus quam emeticorum & purgantium, diuturna coctione avolat & perit, uti patet exemplo mannæ, rhabbari, aloës, foliorum sennæ, quæ ea propter rectius infunduntur, quam decoquuntur. Sigillatim vero agunt hæc laxantia vel principio quodam salino-stimulante dulci, ut manna, cassia, passulæ, polypodium; vel sale quodam subtiliori sulphureo amaricante terreo, ut aloë & rhabbarum; vel sale acido fibras vellicante, ut tamarindi, cremor tartari, sal acetosellæ; vel sale neutro, ut nitrum, borra, sal gemmæ, digestivum Sylvii, arcanum duplicatum, tartarus vitriolatus, salia ex medicatis aquis producta & herbarum essentialia; vel sale quodam calcario amaricante, ut Sedlicense, Ebshamen, Egranum; vel denique terra calcaria, ut magnesïa, quæ ab acido primarum viarum soluta, in sal neutrum acre & stimulans transit.

Corollaria practica.

I. Polychresta hæc & præstantissimi multis in morbis usus simulque tutissima laxantia medicamenta, quæ nonnullis ob id benedicta audiunt, Veteribus parum cognita fuerunt, in quorum monumentis aloës, rhabbari, tamarindorum, foliorum sennæ, agarici, nulla, quantum quidem novi, fit mentio, sed cassiæ tantum & polypodii ex mitioribus, ac primus *Dioscorides* aliquid de rhabbaro & aloë prodidit, ex quo deinde *Plinius* & *Galenus* quæ habent desumserunt, manna vero, tamarindi & folia sennæ, Arabibus & Ægyptiis Medicis demum innotuerunt. Utut vero omni-

um laxativorum virtus in eo conveniat, quod sine noxa, impetu ac commotione alvum subducant: pro differentia tamen morborum, vel etiam individuorum, utique distinctio circa eorum usum utilis & necessaria est. Scilicet manna, cassia, passulæ, polypodium, in affectibus pectoris, tussi, hæmoptysi, pleuritide, phthisi, neque minus in morbis, qui a ferro falso, acri, scorbutico nascuntur, ut arthritides, rheumatismi, scabies, purpura, cum insigni fructu adhibentur aliisque merito præferri debent, quippe quæ non tantum alvinas sordes emoveant, verum etiam simul acrimoniam falsam temperant & corrigunt. Acidula, ut tamarindi, cremor tartari, sal acetosellæ, item salia essentialia ex herbis nitrosis, sal polychrestum, nitrum antimoniatum, in regionibus præcalidis, corporibus cholericis atque tempore æstivo, nec non in morbis ubi copiosa bilis delinquit & vehementior æstus præsto est, tertiana continua, duplici, æstiva, in causo, cum inexhausta siti, quam maxime conveniunt & aliis anteponenda, eo quod præter facultatem vacuantem, motum quoque intestinum partium sulphurearum sanguinis & bilis ferociam componunt & cicurant. In morbis qui ex defectu bilis & sulphuris in sanguine balsamici nascuntur, ut sunt cachexia & omnes fere chronicæ passionēs, in quibus succorum spissitudo & viscerum infarctus adsunt, laxantia amara, ut rhabbarbarina, aloëtica correctæ, omnibus utique palmam præripiunt. Ubi vero humores tenaces, viscosi in vitio sunt & primam regionem occupant, ac inappetentiam, tensiones hypochondriorum, ructus, flatulentias caussantur, salia omnia neutra, tam arte chymica præparata, quam nativa fontium medicamentorum, si paullo majori in dosi & cum sufficienti liquido offeruntur, efficaciter alvum solvunt & recrementa spissa & viscida everrunt. Quando acidum, ut solet fieri in hypochondriacis, melancholicis & quartanariis, nimium redundat & omnium aliorum, etiam acriorum, purgantium virtutem infringit atque eludit, præter mannata, magnesia

apprime ex usu est, quæ sicuti a spiritu vitrioli ex toto solvitur, atque in sal neutrum amaricantis saporis & virtutis purgantis transit, eandem pariter, si in ventriculo offendit acidum, induit naturam atque efficaciam, contra ea deficiente in corpore solvente succo, parum vel nihil operatur, & plus incommodi, quam commodi creat.

II. Aurum fulminans & mercurius dulcis inter laxantia quidem referri solent, sed eorum usus certe non adeo tutus est. Nam si illud penitus edulcoratum fuerit, parca vel plane nulla ejus operatio; si vero salino-nitrosis spiculis adhuc uberius refertum, quia ob gravitatem suam firmiter inhærescit parti ventriculi & intestinorum, alvum quidem movet, sed in sensibilibus subjectis atrocia tormina cum flatulentis aliisque mala parit, quin magis nocet, ubi humorum acido-corrosivorum, vel bilis causticæ, in ventriculo aut duodeno copia hospitatur. Mercurius autem sic dictus dulcis, qui solus, nisi associetur purgantibus, non facile purgantem exserit effectum, accessu vero bilis corrosivæ in duodeno, deleteriam facile rursus induit indolem ac generi nervoso vim ac læsionem infert. Et licet ad enecandos & expellendos vermes passim commendetur; nihilominus tamen quum infantibus mercurialia admodum sint inimica, atque ego subinde gravem noxam & insignem debilitatem ea attulisse observaverim, non facile, nisi summa cautione & sub certa methodo certoque regimine eorum usum hoc quoque sine suaferim. Plures porro ad acuendam vim auri fulminantis purgantem admiscere solent salia neutra, ut arcanum duplicatum, tartarum vitriolatum, nec negandum; ejusmodi sal ad drachmam dimidiam, cum duobus granis auri fulminantis sic contritum, metallicum quendam saporem nancisci & quoque intestina stimulando sedes movere, rarius tamen sine torminibus succedit effectus. Longe magis vero cavendum, ne mercurius dulcis cum salibus, præsertim alcalino vel ammoniacali, attritu subigatur, eo quod hac ratione
ejus

ejus vis corrosiva refuscitatur, qua agit in glandularum & nervosarum partium systema & molestissimam sæpe movet salivationem.

III. Omnia salia, præsertim neutra & amaricantia superius recensita, majori dosi ad unciam dimidiam vel unam cum sufficienti liquido soluta & exhibita, insignem vim alvum vacuantem, sine commotione sanguinis, vel appetitus & virium prostratione obtinent, & longe tutius, immo majori cum efficacia, iis utimur, ac validioribus purgantibus ex regno vegetabilium; præsertim in morbis & corporibus ubi humorum spissorum & tenacium copia, vel in primis viis, vel in vasis delitescit. Atque etiam fontes medicati, calidi & frigidi, qui acidularum nomine veniunt, quorum magna certe in morbis longis & valentibus cum arcendis, tum depulсандis est efficacia, vim suam aperientem, deterforiam purgantem, præter aqueum, ad salinum potissimum quod reconducunt elementum referunt, uti id a me latius variis dissertationibus in *tomo II. opusculor. physico-medicorum* collectim editis, expositum est.

IV. Inter flores qui laxante facultate pollent, acaciæ, persicorum, violarum, rosarum eminent, sed recentes sint & tantummodo infundantur, non coquantur. Optime hi exhibentur cum sero lactis dulci, vel lacte asinino, tempore præsertim verno, & ita quidem, ut per aliquot hebdomades medicata ejusmodi potio mane ad mensuram dimidiam ad purificandum sanguinem, inprimis si corpora teneriora & sensibilioris naturæ, potetur. Habet enim serum lactis & lac quoque asinum jam tum vim quandam laxantem, ut etiam auctor est *Celsus lib. II. cap. 12.* ita differens: *sum valetudinis genera, quibus ex lacte purgatio convenit. Antiqui, pergit paullo post, lac vel asinum, vel bubulum, vel caprillum, sumebant, eique salis pauxillum adjiciebant decoquebantque id, & sublatis his qua coixerant, quod quasi serum supererat, bibere sogebant.*

V. Ex aloë, five hepatica, five Soccotrina, præparata laxativa magnæ efficacis sunt præsidia, si probe prius a principio sulphureo volatili, valde peregrino & a resina tenaciter intestinorum tunicis adhærente debita enchiresi ipsa liberetur, & non in magna, sed refracta & exigua dosi, cum extractis amaris & temperatis balsamicis ingredientibus misceatur, quo nomine utique pilulæ, casu forsan a *Bechero* inventæ, & secundum ejus methodum ex aptioribus concinnatæ speciebus, utique commendationem merentur, sine non solum blande alvum movendi, sed & intestinorum tonum, qui plurimis in morbis labefactatus & a purgantibus etiam læditur, firmandi. Et utut tales pilulæ in corporibus robustis & sanguine abundantibus parum efficiant, eo præsentior tamen earum virtus in natura & a morbo infirmis, imbecillibus, in puerperio & quando ex uteri vitio menstrualis purgatio non recte succedit. Conveniunt quoque ubi digestio a morbo quocunque etiam convalescentibus vacillat, ad crudos succos corrigendos & evacuandos, item in hypochondriacis, quorum ventriculus jugiter excludit cruditates acidas. Contra ea aloëtica incorrecta & majori dosi data magnopere commovent sanguinem, eamque ob causam, plethorici, senbilio-ris naturæ & in sanguinis excretiones proclives recte ab iis penitus abstinere, quia id incommodum proprium servant aloëtica præpostere data, quod hæmorrhoides cœcas molestissimæ sensationis excitent & sanguinem ad regionem lumbarem & partes in pelvi contentas urgeant. Inter pilulas autem quæ aloën cum aliis aptis ingredientibus habent, præter *Becherianas*, tartareæ *Schroederi*, aleophanginæ, marocostinæ, de succino *Cratonis*, *Solenandri*, usu & utilitate sua non deiraudandæ.

§. IV.

Longe efficacius autem & validius alvum vacuant *III. Pur-*
PVRGANTIA; eoque nomine ex vegetabilibus potissimum *gantia*.
innotuerunt radices: mechoacanna alba & nigra, five ja-

(III.)

Qq

lappa,

Iappa, helleborus niger & albus, iris nostras, bryonia, esula, herbæ: soldanella, gratiola, linum catharticum Anglicanum, pomum colocynthis, grana tili, semen cataputiae, turbitum vegetabile, cortex medius sambuci, nec non gummi guttae, elaterium & scammonium, unacum iis quæ artis pharmaceuticæ ministerio ex his conficiuntur, trochisci alhandal, extractum colocynthis, esulae, panchymagogum Crollii, resina jalappæ, diagrydum sulphuratum, pulvis Cornachinus, sive Comitum de Warvich.

Theoremata.

Elementum quocumque drastica hæc pharmaca operationem suam perficiunt, est utique virulentæ indolis ac tenuissimum sal causticum inflammatorium, quod nerveas non solum ventriculi & intestinorum, sed etiam universi corporis membranas, exili etiam dosi, haud secus ac venenum, adurit, in easdem cum violentia agit & spasticas constrictiones, præcordiorum anxietates, cardialgias, ventris tormina, cum crebris dejectionibus, singultus, ventriculi & intestinorum inflammationes, cum extremorum frigore, immo convulsiones, excitare solet. Nam summæ tenuitatis & activitatis esse ac in universam humorum massam suam vim diffundere sal quod purgantia hæc recondunt, ex eo patet, quod infans ex lacte nutricis quæ purgans assumsit purgetur, & iisdem exterius tantum applicatis, purgans validissimus & perniciosus quandoque sublequatur affectus. Sic Veteres pedes decocto hellebori lavantes, se purgabant, ut habet *Heurnius in comment. in aph. Hippocratis*. Globulum ex helleboro fonticulo ad mundificandum impositum & vomitum & sedes movisse auctor est *VValaeus de meth. med. pag. 124*. Unguentum quoque quod habet colocynthidem umbilico illitum, purgat non modo infantes, sed & adultos. Caustica vero & inflammantis virtutis cathartorum indoles ex eo clarissime patescit, quod exterius tantum applicata, cum instar vesicatorii adurant & vesicas excitent, lac esulae ver-

verrucae consumat, & essentia ex purgantibus, ut jalappa, mechoacanna, scammonio extracta & deglutita urat & arrodatur fauces cum oesophago, aphthasque & pustulas arduas producat. Et certe virulentam ac veneni æmulam drastico-
rum esse facultatem, *Vesperis* experimenta uberrime evincunt, qui in *tract. de cicuta aquatica* memorat: se catellis varii generis purgantia certa dosi ingessisse, eoque facto, mox vomitus, convulsiones ac demum mortem successisse, factaque postea sectione, ventriculum & tenuia intestina inflammata & maculis rubicundis, non secus ac si arsenicum datum fuisset, conspersa comparuisse. Et quod memoratu dignum, eadem phænomena, eosdemque effectus, a resina jalappæ, cujus usus nostris temporibus frequens admodum est, observari, idem auctor conceptis testatur verbis.

Corollaria practica.

I. Quum itaque tam vehemens, periculosa, quin damno-
sa acriorum & validiorum cathartico-
rum sit actio; rectius omnino ab eorum usu prudens, rationalis & circumspexit Medicus penitus ferme abstinere. Certe experientiæ testi-
monio uberius constat: a nullo per omnia sæcula phar-
maco majorem perniciem, immo tam funestos effectus, produ-
ctos fuisse, quam per minus provide data drastica, ut vel e-
go, ex quo a quadraginta quinque & quod excurrit annis
medicinam exercui, innumera fere observari exempla eo-
rum, qui solis purgantibus fortioribus immedicabilem no-
xam sibi contraxerunt, vel plane occubuerunt. Neque et-
iam ullum aliud ex remediis pharmaceuticorum supelle-
ctile tam celeriter ac potenter vires prosternit, pulsum im-
mutat, stomacho infestum est ejusque & intestino-
rum natu-
rale robur & motum lædit atque pervertit, quam acre ejus-
modi pharmacum. Plures novi, qui crebriori horum u-
su morbum cachecticum, hydropicum & hypochondriacum
nati sunt, qui lethalem inflammationem ventriculi cum fe-
bre, dysenteriam & cholericam passionem incurrerunt, quin

paralyfin dextri vel sinistri lateris experti sunt. Id quod tamen fusius jam evolvi & rationibus demonstravi exemplisque ex auctoribus collectis confirmavi in *dissertat. de purgantibus fortioribus e foro medico ejiciendis*. Veteres quidem, quibus clementia laxantia maxima ex parte unacum salium usu erant ignota, frequentius his drasticis usi sunt, ipseque *Hippocrates* elaterio potissimum atque helleboro purgationes molitus est; sed si eorum scripta curatius perlustramus, nonnisi necessitate urgente ea propinarunt, & tum quidem provide certe consilio, & ante, & post elaterium, cui plurimum deferebant, lac potui præbuerunt, helleborum vero admixtione mulsi, olei, vel lactis cicurarunt, ne dicam ipsos non promiscue eadem in usum traxisse, sed morbos curate distinxisse, & *Hippocratem* maxime *lib. de purgant.* in omni febre & inflammatione eorum usum serio interdixisse. Quin peritissimos in arte præcos damna ex purgantibus neutiquam latuisse, uberius testantur reperiunda passim in eorum monumentis præcepta atque effata. Luculentis certe verbis testatum hoc facit *Sect. II. aphor. 57.* ita habens: *qui sunt sano corpore dum purgantur, celeriter exsolvantur; & Sect. IV. aph. 16.* purgationem periculosam pronunciat iis, qui sunt integra valetudine. Cujus aphorismi veritatem *Heurnius* demonstraturus addit: *vidi sanos, quos in perniciem traxit solum simplex apozema purgatorium ex fumaria cum fenæ foliis, temere exhibitum.* Neque minus *Celsus lib. I. cap. 3.* inculcat: *purgationes, ut interdum necessaria, sic ubi frequentes, periculum afferunt.* Et *lib. II. cap. 12.* ita scribit: *medicamenta, (intelligit purgantia) stomachum fere ledunt & hominem infirmant, & nunquam in adversa valetudine recte dantur, nisi morbus sine febre est.* Eadem *Dioscoridis* est sententia qui *lib. IV. cap. 178.* prodidit: quod stomachum offendant eidemque supra modum adversentur. Præ omnibus tamen graphice & copiose de purgantium venenata qualitate & noxa egit *Campegus* in peculiari libello; ut mit-

tamus *Helmontium* ejusque sequaces, nec non *Bentekoe*, purgantia mortifera plane appellasse, & *Montanum*, *Cratonem* & *Solenandrum*, peritissimos ac in arte versatissimos viros, eorum usum mirum reformidasse & pilulas ex extractis amaribus, gummatibus & aloë in usu habuisse frequentissimo. Inprimis vero quam maxime perniciofa atque infensa sunt ejusmodi drastica corporibus infirmis, infantibus, senibus, a morbo vix convalescentibus, quique valde imbecillum stomachum ac ad motuum ataxiam proclive nervosarum partium systema obtinent. Neque etiam ulla infestior medicina reperitur in cholerica & sensibilibioris naturæ hominibus, post gravem iræ affectum, ut plures hac ratione sublato viderim, inflammatione ventriculi unacum cholera subsequuta. Qui colica hæmorrhoidali & spasms hypochondriacis atque hystericeis patent, omni etiam cura hæc drastica evitare debent, nisi grave damnum incurrere velint, de quo quidem plura tristia exempla enumeravi in *dissertat. de inflammatione ventriculi*. Et quam detrimentosa sint purgantia drastica infantibus, præsertim si simul dentitione difficili laborent, memorabilis utique est observatio, copiose admodum & solide certis de causis evoluta ac *tomo I. Medicinæ consultat. Dec. V. Cas. IIX. pag. 262. sqq. inserta*.

II. Utur vero magna & gravia damna ab usu purgantium drasticorum metuenda; nihilominus quia venenum quoque diligenti circumspectione adhibitum transit in medicinam, uti mercurialium & emeticorum antimonialium exemplo constat; sunt etiam utique casus, rariores tamen, ubi valida cathartica commodam locare possunt operam. Nimirum in hydrope anasarca, præsertim si is non ex induratione vel scirrhotitate viscerum & glandularum, sed subito ex stagnatione aquarum, ob menstrua vel hæmorrhoidalem sanguinis fluxum suppressum, aut ex nimia voracitate in & post morbum, enatus, vidi nonnunquam cum fructu adhibitum fuisse succum iridis nostratis ad aliquot uncias,

item gummi guttæ, elaterium, extractum esulæ, cum mensura dimidia lactis, repetito etiam aliquoties usu. Mire enim inde funduntur aquæ non modo per alvum, sed & in feminis per uterum, quin bina memoria teneo exempla, ubi paucas quidem sedes hæc cathartica, sed largissimum & valde salutare urinæ stillicidium excitarunt. Hydropici quippe ob nimiam laxitatem & torporem fibrarum intestinalium commodius ejusmodi drastica ferre possunt, ac egent hæc omnino paullo validiori stimulo, quo ad motum excretorium animentur. Pariter acriora hæc purgantia utiliter in usum vocari possunt in paralytica membrorum resolutione, affectibus soporosis & ubi ob languorem efficaci medicina opus est, nec non in amentia, ut veteri proverbio constat; quo etiam referendum *Celsi* effatum *lib. II. cap. 12. veratrum nigrum, inquietis, aut irabile vexatis, aut cum tristitia insaniemibus, aut iis quorum nervi parte aliqua resoluti sunt, datur.* Neque minus experientia compertum habeo, in acerbo ischiæ & coccygis dolore, ad femora per intervalla excurrente, ea quæ validius alvum ducunt suppetias tulisse, & exturbatis septem vel octo sedibus biliosorum & male coctorum succorum saburra, tormina conquievisse.

III. Paullo robustioris etiam naturæ homines, qui septentrionales regiones inhabitant & durior ac crassior victu fruuntur, purgandi scopo, si necessitas exigit, ea quæ fortiter alvum vacuant assumere possunt; hac tamen, quam serio inculco cum cautela, ut refracta dosi, vel in pulvere unacum salibus, ut cremore tartari, vel tartaro vitriolato, adjectis aliquot antimonii diaphoretici granis, dentur, vel ut ipsa v. c. extractum hellebori nigri, trochisci alhandal, scammonium, resina jalappæ aliaque in formam pilularum redigantur, nupta iis, quæ virulentam vim infringunt & castigant, ut sunt cinnabaris, vitriolum martis, crocus, castoreum, sal succini, succinum, myrrha, quibus si extractum panchymagogum *Crollii*, quod valde acria habet purgantia,

convenienti dosi miscetur, pilulæ utique emergunt, quæ ubi acrior stimulus admovendus, egregie officio satisfaciunt. Nihilominus tamen memori nunquam non mente tenendum: quod si validiori evacuatione opus, longe magis e re sit, aucta leniorum dosi eandem proritare, quam acrioribus & virulentis urgere.

§. V.

Aliud evacuantium genus est, quod per cutis spiracula *IV. Sudorifera.* liberaliter & conspectius, vel leniter modoque minus sensibili, sordes subtiliores emovet. Quæ largius id faciunt *SVDO-RIFERA*, Græcis dicta hydrotica, sunt remedia, quorum virtute sensibilis mador per cutis tubulos lymphatico-arteriosos fertur. Hac virtute ex vegetabilium prosapia eminent radices saporis admodum acris & penetrantis oleosi, angelicæ, imperatoricæ, ostrutii, petasitidis, helenii, levistici, vince-toxici, dictamni, valerianæ, contrayervæ, serpentariæ Virginianæ, lignum guaiacum & sassafras cum corticibus. Ex mineralium familia antimonium crudum, regulus antimonii medicinalis, tinctura sulphuris volatilis, ex calce viva, sale ammoniaco & sulphure parata, sulphur antimonii correctum & fixatum, nec non mixtura simplex. Theriaca quoque, ejus essentia, spiritus & aqua, omnes spiritus & salia volatilia ex partibus animantium parata, præsertim cornu cervi, eboris & lumbricorum terrestrium, spiritus Bussii, tartari, serici, fuliginis, essentia lignorum, item olea destillata foetida, ut oleum cornu cervi foetidum, in spiritu vini solutum.

Theoremata.

I. Famigeratissima hæc ex sudoriferis remedia, non alio modo virtutem suam exercent, quam quod principio quo pollent cordis vim systolicam & arteriarum elasticitatem, quoad numerum & virtutem ictuum augeant, & majori facta circuli velocitate, ad cutis extimam & cribrosam substantiam, ex qua prodit sudor, adducant. Hanc vero exsequuntur vel subtili acri calido oleo, ut radices superius enu-

mera-

meratae, quæ etiam vocantur alexipharmacæ; vel fale volatili empyrevmatico igneæ naturæ, ut omnes spiritus salia volatilia & olea ex animantibus; vel fale acriori fixo plus minus refinoso, ut radix pimpinellæ albæ, guaiacum & ejus cortex, contrayerva, serpentaria Virginiana; vel denique actionem suam & quidem satis potenter edunt, fale & sulphure minerali tenuissimo, quo nervosas maxime fibrillas in motum vehementem cient, atque adeo in exili admodum dosi magnam vim possident, hinc uno grano mercurii nostri diaphoretici, item duobus vel tribus granis sulphuris antimonii fixati, sudor per universum corporis ambitum elicitur, qualem effectum etiam decoctum lignorum & antimonii crudi cum lignis, nec non regulus antimonii medicinalis, præstant.

Corollaria practica.

I. Valida hæc sudorifera, licet in majori dosi offerantur, sudorem minime tamen eliciunt, nisi corpus sit dispositum; id est, nisi cutis tubulosa substantia satis patula sit & relaxata, nisi etiam sufficiente humoris quantitate sanguis sit dilutus. Quare si quis in morbis sanandis utilem judicat sudoris prolectionem, necesse est, ut quæ recensuimus sudorifera, ad diluendum sanguinem cum sufficiente liquido sumantur, v. g. aqua calida, infuso thée, decocto hordei, atque ut ad cutis fibras remittendas in lectum & hypocaustum calidum, vel etiam balneum, præsertim vaporosum, concedat sudaturus, ac ita sudor satis largus manabit.

II. Sudorifera hæc activiora rarius locum inveniunt & cum insigni etiam prudentia adhibenda sunt. Etenim sudor in statu sano & naturali, nisi in motum extraordinarium cieatur sanguis, non profluit, nec eapropter salubritatis indicium est, ut perspiratio insensibilis, cujus etiam materia, quæ blanda, lymphatica, nutritia, nullius fere saporis est & odoris, a sudoris, quæ saporis salsi, odoris foetidi & ad urinæ naturam accedit, admodum differt. Deinde sudorifera hæc

hæc ingentem commotionem & orgasmum efficiunt insignem, nec moderate, sed nimis celeriter agunt, inque sanguine vel sero impuro refertis corporibus majori impetu cruorem ad vasa minima & angustiora impellendo, periculosas acutas afflictiones, ex inflammatione & humorum congestione oriundas, concitare valent. Nocentissima vero sunt, ubi saburra vitiosorum humorum primæ viæ repletæ, alvus constricta & si statim post iram propinantur. Vidi non semel hac perversa methodo, dolores arthriticos, rheumaticos, lentas quoque & hecicas febres, diutius non sine periculo affligentes, inductas.

III. In omnibus acutis morbis, febribus, inflammationibus, etiam exanthematicis, sudoriferorum usus plane exulet, & nonnisi quam maxime moderatus minusque creber admittatur. Nam sæpius certe ab essentia alexipharmaca promiscue, ut jam mos invalescit, oblata, calorem, anxietatem & symptomatum atrociam increvisse, observavi. Dicuntur quidem hæc remedia alexipharmaca, ut & ipsa theriacalia, quasi venenis & malignitati humorum resisterent, adeoque in morbis contagiosis grassantibus ipsaque peste, a Medicis mirifice commendantur; at vero plus valent ad horum morborum præservationem, quam curationem, præsertim si epidemii ejusmodi maligni morbi a tempestate nimis humida, vappida, nebulosa diuturna, ventis ex euro & borea flantibus destituta, vel etiam a diluvio & inundatione aquarum graviori originem suam trahunt; certius tamen & tutius etiam hoc fine, cum aceto vini aqua diluto propinantur, vel radices alexipharmacæ cum aceto infunduntur, quod deinde alexipharmaca vi imbutum ad aliquot cochlearia cum sufficienti aqueo vehiculo propinandum, quo pertinet etiam eximius usus aquæ prophylacticæ Sylvii, eo nempe tempore, quo ejusmodi morbi grassantur.

IV. Sudor vero utiliter evocatur in iis morbis, qui a frigore externo & perspiratione prohibita, ut sunt catarr-

(III.)

Rrr

tar-

tarrhi, rheumatismi, alvi fluxus, gravedines, tusses, tumores glandularum, oriuntur, item quando a frigido potu sudanti & calefacto corpori largius ingesto periculum metuendum; sed opus est, ut inter initia statim offerantur: ac tum quidem tinctura bezoardica, vel spiritus bezoardicus Bussii, cum liquore nostro anodyno remixtus, egregii usus. Neque minus suscepto morbi insufficientis miasmate, statim post lene assumtum emeticum, sudoriferum conducit, & quidem acetum bezoardicum, vel pulvis bezoardicus, cum camphoræ, quæ princeps alexipharmacorum, momento.

V. In iis porro morbis, qui in tubulosa & fibrosa cutis substantia consistunt & ab acri viscida materia texturam cutis destruyente ac defoedante, ut scabie, etiam mali moris, herpes, lepra, pustulis & ulceribus venereis, sudor cum fructu accommodatis remediis liberalius movetur. Idem fit in arthriticis rheumaticisque omnium partium doloribus, dum serum viscidum stagnans acre & membranis nerveis inhærens, hac ratione discutitur ac eliminatur. Pari ratione in morbis omnibus sic dictis frigidis, anasarca, leucophlegmatia, scorbuto frigido, lue venerea, arthritide fixa, malo ischiadico, paralyfi, ceteris paribus, sudorifera magnæ sunt efficacæ, quia elasticitatem & vim contractilem cordis & vasorum, quæ in ejusmodi affectibus admodum depressa est, intendunt, restituunt & sanguinis circuitum, ad meliorem impurorum succorum sequestrationem, efficaciter augent. Sed insistendum est aliquandiu hisce præfidiis.

VI. Sudorifera semper meliorem operationem exerunt, si cum sufficienti & calido liquido assumuntur. *Celsus jam lib. III. cap. 6.* hoc fine commendat potum calidum his verbis: *si nota est sudoris venturi, tum demum calidam aquam potui dare oportet, cujus salubris effectus est, si sudorem per omnia membra effundit.*

Et idem uberius testatum faciunt decocta lignorum, quorum usus in lue venerea aliisque frigidis morbis sane laudatissimus. Vidi quoque febres inter-

mittentes, tertianam, quartanam, in plebejis feliciter sublatas, si præmissis emetico, aliquot horis ante accessionem, sumtum sudoriferum, cum regimine, ex rob sambuci, sale tartari & piperis quibusdam granis, cum aliquot spiritus vini cochlearibus confectum.

§. VI.

Sudoriferis potentia agendi inferiora, sed salubri effectus longe superiora sunt DIAPHORETICA, quæ placidephoretica. tantum augent & movent perspirationem. Ex his inter ea quæ vegetabilium regnum suggerit, præcipua sunt radix chinæ, sarsaparillæ, carlinæ, gentianæ; ex herbis: carduus benedictus totus, ejus semen omniaque ex eo parata, essentia, aqua, extracta, sal, porro scordium, sambucus, isque humilis ebulus, ejusque flores, rob, aqua, item fumaria, scabiosa, crocus, flores calendulæ, opium quoque; ex regno animalium: omnia ossa, cornua ac dentes animantium, tam rasa, quam in cineres usta & philosophice præparata, maxime omnium quæ cervus suggerit, lapides, testæ & chelæ cancerorum; ex terreis: omnes terræ sigillatæ & margarum species, bolus fabrilis; ex salibus: salia herbarum per incinerationem parata, item nitrum; ex pretiosis & exoticis: petra di porco, lapis bezoar orientalis & occidentalis; ex mineralibus & chymicis: flores & lac sulphuris, cinnabaris tam nativa, quam vulgaris & antimonii, antimonium diaphoreticum, cerussa antimonii, magisterium antimonii, sive materia perlata Crügneri, bezoardicum minerale, tinctura antimonii temperata, ex regulo & sale tartari, antihecticum Poterii; ex compositis: lapis de Goa, qui ex lapide bezor orientali, tragacantha & ambra conficitur, pulvis bezoardicus Sennerti, Anglicanus, Pannonicus ruber, cordialis Dorncrellii, liquor noster anodynus mineralis, acetum quoque vini, vel etiam destillatum & floribus sambuci superinfusum, aut cum lapidibus cancerorum, pulvis noster polychrestus diaphoreticus, theriaca coelestis, laudanum liquidum, pilulæ Wildegansii.

Theoremata.

Actio diaphoreticorum varia est & multiplex. Vel enim privative agunt & acidum primarum viarum, quod ad sanguinem delatum ejus spiritualescentiam, fluiditatem & motum intestinum deprimit, absorbent atque invertunt, ejus indolis sunt omnia terrea alcalinæ naturæ: vel nimiam humiditatem imbibendo & remissas nimis fibras adducendo, ut terræ sigillatæ, boli & margæ, item ossa & cornua, tam usta, quam philosophice præparata, nec non unicornu fossile: vel sulphure anodyno blando vaporeso stricturas superficiales cutis in doloribus laxando & complacando, ut sunt sambucina, præsertim flores, crocus, ejus extractum, flores papaveris rhœados, liquor anodynus mineralis noster, emulsiva ex semine papaveris, opiata correctæ, potissimum theriaca coelestis, pilulæ Wildegansii, laudanum liquidum Sydenhamii methodo paratum; vel motum intestinum sanguinis ferociorem componendo ac figendo, uti nitrosa, refracta dosi fixioribus diaphoreticis nupta, nec non spiritus nitri dulcis, emulsiones ex seminibus quatuor frigidis majoribus, acidulata, succus limonum ipsumque acetum, vel denique positive elemento subtili acri fibras & vasa languentia leniter excitulando, prout carduus benedictus, scordium, fumaria, china, sarsaparilla, centaurium minus, scabiosa, carlina & gentiana.

Corollaria practica.

I. Quemadmodum illa subtilissimorum sordium per cutis poros insensibili modo succedens evacuatio, omnium est saluberrima, eademque intercepta, plures succrescunt morbosæ afflictiones: ita diaphoreticorum, quæ cutaneam hanc excretionem eliciunt, usus certe est amplissimus, universalis & fere polychrestus, in omnibus ferme affectibus, etiam ex præsentibus signis nondum satis perspectis & cognitis, ut iis Medicus modo carere possit plane nullo. Circulus enim sanguinis & perspiratio auctior, solennia illa natura

tura media sunt ac instrumenta, quibuscum materia quæ in morbis in vitio est, corrigitur, digeritur, resolvitur, discutitur ipseque morbus tutissime sanatur. Potissimum tamen in omnibus morbis & febribus acutis, inflammationibus cujuscunque generis sint, sola hæc, pauca & continuata dosi, cum convenientibus vehiculis data, omne sanationis punctum absolvent & revera optima sunt discutientia & sanguinis massam depurantia.

II. Quia excessivus, præsertim tempore æstivo & in cholericis ac biliosis corporibus, æstus, nec non qui febribus cholericis & biliosis jungi solet, nimis exsiccat, humidum absunt & perspirationem impedit; acidula & nitrosa, ac inprimis lapides cancrorum cum nitro, exhibiti in julapio ex aquis diapnoicis & cum sirupo acetositis citri condito, contemperando nimiam exæstuationem, cum bonis agrorum rebus ex voto diaphoresin movent.

III. Ubi ob dolorum atrociam arida & exsueca cutis ejusque tubuli angustantur & coarctantur; præstat semper leniora anodyna & antispasmodica diaphoreticis jungere, quæ virtute maxime splendet liquor noster anodynus mineralis, ad tres partes, cum una spiritus bezoardici-Bussii parte remixtus, item pulvis diaphoreticus fixior, leniter nitrosus, cum cinabari & uno vel altero pilularum Wildegansii grano, id quod etiam pluribus testatur *Etmüllerus in dissertatione de virtute opii diaphoretica.*

IV. Pulveres diaphoretici id servant peculiare, quod non solum perspirationis successum intendant, sed etiam sæpe virtutem laxantem & insigniter diureticam, exserant. Certe de pulvere nostro sic dicto bezoardico polychrestos, multiplici experientia compertum habeo, eundem si mane vel post meridiem propinatur & prima in regione offendit acidos succos, quatuor vel quinque sedes movere, quod in senibus & hypochondriacis cum eximio sanitatis commodo succedit. Idem quando circa lecti introitum offertur, nec ta-

men cutis ad sudorem satis disposita, ut in principio catarrhorum, largum urinæ movere solet fluxum, ubi vero ad diapnoen cutis apta, largiter sæpe fluit sudor.

V. In morbis acutis & febribus, ubi parum acidi in primis viis præsto est, tutius & majori cum efficacia, fixa & terrea diaphoretica paullo minori dosi offeruntur, ac optime miscentur cum sirupo acetositatis citri, nec non aceto vini, quippe solum acetum cum aqua non coagulat, sed sæpe resolvit & discutit sanguinem impactum, multo magis si diaphoreticis jungatur.

§. VII.

VI. Diuretica,

Sudoriferis ac diaphoreticis succedunt ea, quæ serum salsum, crassioribus terrestribus recrementis refertum, per urinarias vias eliciunt, DIVRETICA dicta. Horum apparatus *Celsus lib. II. cap. 31.* sistit: *urinam*, inquit, *moven*
quacunque in horto nascentia boni odoris sunt, ut apium, ru-
ra, anethum, ocimum, mentha, hyssopus, anisum, coriandrum,
nasturtium, eruca, fœniculum, præter hac asparagus, capparis,
nepetha, thymum, satureia, lampšana, pastinaca, siser, cepa.
Nos quæ hunc in finem commendemus, habemus ex vegetabili-
lium numero radices: petroselini, feleri, asparagi, graminis,
liquiritiæ, rubiæ tinctorum, pastinacæ, rannuculi esculenti
& quæ exteris debentur bareiræ bravæ & acmellæ; herbæ:
petroselinum, hederæ terrestris, equisetum, chærefolium, ur-
tica, omnesque porri & allii species; flores: genistæ, cyani:
semina: dauci, petroselini, feleri, fœniculi, miliisolis, ur-
ticæ, violarum, semina quatuor frigida majora, lycopodii,
fructus alkekengi, cynosbati, juniperi & fraga; lignum ju-
niperinum, sassafra & ejus cortex; resinæ & balsama: ma-
stix, succinum, balsamum de Mecca & de Copaiva; ex ani-
malium familia: cantharides, millepedes, vermes Maiales,
scorpiones, bufones, lumbrici terrestres, cochinellæ, nec non
serum lactis: salia porro omnia alcalia per incinerationem para-
ta, sal quoque succini, arcanum duplicatum, solutio oculorum
can-

cancrī ipsūque nitrum; ex præparatis & compositis: lixivium benedictum Mynsichti, tinctura tartari, antimonii acris, terra foliata tartari, liquor silicum, lithonripticus Michaëlis, tartarus solubilis, spiritus terebinthinæ, mastichis, succini, balsamum sulphuris terebinthinatum, juniperinum, oleum juniperi, malvaticum juniperinum, sirupus dialthæa Fernelii, trochisci alkekengi.

Theoremata.

Quemadmodum parcius & imminutus, vel difficilis urinæ fluxus a variis proficiscitur causis, & vel 1) ab humidi in sanguine defectu; vel 2) a tenacibus spissis urinarios renum tubulos obstruentibus succis; vel 3) a vehementi canaliculorum renalium spasmō & strictura; vel denique 4) a nimia eorundem laxitate atque resolutione: ita etiam remedia quæ debitum urinæ fluxum revocant & eliciunt, diversis ad has causas relatis modis effectum exsequuntur. Videlicet nonnulla fluidum sanguini spissescenti infundendo urinæ stillicidium augent, quæ inter connumeranda omnia diluentia aquea, largus aquæ dulcis tam calidæ quam frigidæ, eò magis herbis diureticis infusæ, potus, ipsūque infusum thæe ac decoctum coffeæ. Hac quoque virtute splendent foteriæ aquæ, tam calidæ, quam frigidæ, quippe quæ præter humoris copiam, qua sanguinem diluunt, eximia simul virtute pollent, alcalino quod recondunt elemento, viscidos & tenaces humores dissolvendi & renale cribrum ab obstructione liberandi. Idem præstat lactis serum, pariter & aquoso largo & salē dulci nitroso, abstergente blandeq; stimulante elemento instructum. Alia humores lentos ac spissos renalis colatarii ductus farcientes ac oppilantes dissolvunt eosdemque secretioni aptos reddunt, qua quidem virtute conspicua sunt salia omnia fixa & ex iis parata lixivium, item tinctura tartari, antimonii acris, liquor silicum, terra foliata tartari, tartarus tartarificatus, arcanum duplicatum, solutio oculorum cancrī, ipsaque magnesia alba, cum primæ regionis acido in sal aperiens de-

gene-

generans, neque minus tinctura calcis vivæ, mater perlarum & corallia succo citri maritata, unacum salibus, quæ ex medicatis aquis exhalationis ope eliciuntur. Nonnulla spasticas in renali emundtorio stricturas debitam urinæ sequestrationem sufflamantes & intercipientes mulcent atque relaxant, eoque nomine laudem merentur præter nitrum, semina quatuor frigida majora & ex iis paratæ emulsiones, semen papaveris albi, dauci, millii solis, lycopodii, item fructus alkekengi & ex iis artificiose confecti trochisci. Eadem facultas inest liquori nostro anodyno minerali, tutissimo certe & tamen efficaci remedio, croco ejusque essentia, nec non ob nitrosum sal succo graminis, decocto radice graminis, asparagi, & quod etiam egregie demulcet oleo amygdalarum dulcium. Quædam remissum renalis cribri robur firmant atque adducunt, idque vel oleoso, tenui & subtili balsamico principio, ut mastix, succinum, balsamum de Mecca de Copaiva, terebinthina, juniperus, ejus lignum & bacca, sassafra, petroselinum, pastinaca, fœniculum, anisum, ranunculus hortensis, seleri & quæ ex his confici possunt olea, essentia, spiritus, decocta & infusa; vel roborante quodam fixiori terre sulphureo elemento, cujus generis sunt fructus cynosbati, rob juniperi & ex eo malvaticum juniperinum, fraga exsiccata, bareira brava, hederæ terrestris, cortex radice acaciæ, equisetum, veronica, chærefolium. Aliqua demum potenti stimulo efficaciam edunt in tubulos renales, quando eorundem robur propter debilitatem summam penitus exsolutum, ipsaque hinc eorundem functio cessat. Propria hæc est facultas insectis fere omnibus, præsserim cantharidibus, millepedibus, araneis, scorpionibus, vermibus Maialibus, bufonibus exsiccatis, nec non ex vegetabilium genere porri & alii speciebus.

Corollaria practica.

I. Quum itaque tam conspicua inter diuretica ratione principiorum & operationis intercedat differentia; discre-

pans quoque eorundem erit usus & cum exquisito discrimine pro circumstantiarum ratione administrandus. Quodsi enim redundante in corpore sanguine, ante ejus imminutionem calculo laborantibus exhibere quis vellet calidiora, oleo subtili balsamico perfusa, ut terebinthinata, succinata, juniperina, vel balsamum de Mecca, Copaiva aut Peru; vel etiam acriora, caustico sale pollentia ex infectis, allio, cepis & porro: is profecto gravissime noceret & inflammationem renum induceret, vel calculorum generationem promoveret. Contra ea in corporibus humidioribus, minus sentientibus, plebejis & qui crasso victu fruuntur, nec non in morbis, qui a copia feri impuri natales trahunt, fluore feminarum albo, gonorrhœa, dispositione ad analarcam & leucophlegmatiam, efficaciora hæc remedia magno sunt usui.

II. Multo magis vero acria & stimulantia detrimento sunt, si ob dolores, ut ex calculo, vel spasticas constrictiones, urinæ fluxus sufflaminatur; & tum quidem longe tutiora ac utiliora sunt, quæ stricture relaxant & dolores leniunt, ut faciunt fructus alkekengi, semina dauci, lycopodii, papaveris albi, milii solis, quatuor frigida majora, emulsiva, trochisci alkekengi cum opio, nitrum antimoniatum, depuratum, aquæ florum ulmarie, tilie, acacie, oleum amygdalarum dulcium, spiritus nitri dulcis, liquor noster anodynus mineralis, serum lactis, nec non exterius balnea, infusio & fots emollientes, quorum omnium tam egregia virtus est, ut placando dolorificos spasmos, non modo suppressum urinæ fluxum restituant, sed & ipsius calculi progressum per uretheres & exitum eximie faciliunt atque promoveant.

III. Quando feri salii, tartarei copia, quæ dolorum tam arthriticorum, quam rhevmaticorum ut plurimum genitrix est, peccat, utiliter eadem per lenia diuretica expurgatur atque subducitur, non vero calidiora, ne iisdem salium

(III.)

Sss

spi

spicula in motum intensiorem abripiantur partesque quibus infident gravius exagitent. Commendari autem hunc in finem quam maxime merentur radix sarsaparillæ, pareiræ bravæ, sassafra, chinæ, liquiritiæ, asparagi, rubiæ tinctorum, cichorii, foeniculi, petroselini, graminis, lignum juniperinum & parata ex his cum brodio carnis vel aqua decocta, nec non serum lactis, ac potissimum acidulæ & thermæ temperatiores.

IV. Ubi vero vitiosi, viscidi ac tenaces humores in vesica urinaria hærent & cum primis calculi rudimentis excludi debent; acrioribus utique opus est magisque potentibus, cui scopo allium cum spiritu juniperi sumtum, pulvis millepedum, vermes Maiales, essentia cantharidum, tinctura antimonii acris, liquor filicum cum tinctura calcis vivæ satisfaciunt, quæ pariter in gonorrhœa virulenta, quando in prostratis, vesicæ collo & urethra obhærescens tenax materia per urinam educenda, prudenter adhibita ex usu sunt.

V. Omnium aptissima, tutissima & utilissima ad eliciendum urinosum laticem præsidia, sunt salia, tam alcalia fixa, quam neutra omnis generis, quippe quæ viscidos ac lentos succos siphunculos urinarios oppilantes dissolvunt, simulque blando stimulo excretionem proritant. Quo quidem effectû egregie splendent liquor salis tartari, cinerum clavel-latorum, nitri fixi, tartarus vitriolatus, sal absynthii, arc-anum duplicatum, solutio oculorum canceri, tartarus solubilis, terra foliata tartari, nitrum antimoniatum & sal polychrestum.

VI. Sed hæc hætenus recensita remedia non tantum ad eliciendum deficientem urinæ fluxum faciunt; verum etiam alios eximie utiles in morbis præstant effectus. Dum enim plura ex iis aperiente & incidente, alia roborante, tonica & balsamica, nonnulla anodyna facultate pollent, in longis utique omnibus affectionibus, quæ ab obstructione

glan-

glandularum, viscerum & emunctoriorum incunabula ducunt, nec non quæ ab impuritate & copia seri falsi acris tartarei proficiscuntur, ex voto ferunt suppetias. Et certe si ulla medicamenta ab hydropo, tumoribus oedematosis, calculosis concretionibus, podagra & arthritide defendunt; certe a prudenti diureticorum usu id erit expectandum. Cavendum tamen merito ab omnibus calidis, acris & causticis, & potius utendum lenioribus magisque diæteticis, cujus generis sunt vinum Mosellanum tenue, acidulæ Selteranæ & cerevisiæ vel decocta quæ diuresin blande movent.

§. VIII.

Ad salutes & criticas excretiones, quæ ad vitæ & salutis tutelam faciunt, pertinent etiam illæ, quibus bonus & sincerus sanguis, si copia peccat, non solum in feminis post annum decimum quartum singulis mensibus per uterum atque etiam post partum & abortum emittitur; sed in viris etiam nimium cruore redundantibus per extimas ani venas, quæ hæmorrhoidales vocari solent, sponte a natura per vices effunditur. Hæ itaque saluberrimæ hæmorrhagiæ, quando modo, quantitate, vel tempore peccant, plane deficient, aut vi quadam cohibentur, aptis remediis revocandæ iterumque in ordinem reducendæ sunt, ne gravissima inde in valetudinem redundet noxa, vel etiam ut enatus jam morbus abigatur. Inter ea vero quæ ad obtinendum hunc scopum ex usu sunt, connumeranda inprimis ex vegetabili regno: radix aristolochiæ, zedoariæ & quinque aperientes; herbæ artemisia, calamintha, matricaria, pulegium, melissa, sabina, polium montanum, ruta, majorana, rosmarinus; flores cheiri, crocus, baccæ lauri, juniperi; gummata bdellium, myrrha, galbanum, opoponax, sagapenum, succinum; ex purgantibus aloë, rhabarbarum, bryonia, itemque aromata; nec non quæ animalibus debentur salia volatilia cum castoreo

& quæ ex mineralibus & chymicis omnibus præferenda martialia.

Theoremata practica.

I. Quo major sanguinearum evacuationum ad valetudinem tuendam utilitas est atque præstantia; eo magis utique, ut dudum fecit *Hippocrates*, optandum foret, quo suppetere certa & efficacia ejusmodi præsidia, quibuscum Medicus illas quotiescunque e re est cum certo successu regere, evocare aut moderari, sicque tempestive plures graves ægritudines & præscindere & expugnare posset. Verum quia hæc sanguinis excretio maxime ipsius naturæ est opus, quod in feminis certæ temporis periodo, qua erumpit, succedit & definit, adstrictum, in viris autem nec omnibus solenne, nec adeo periodicum, ac præterea certam cruoris redundantis portionem, nec non vascula uteri & ani patula, laxa & ad spontaneum fluxum disposita exigit, pariterque a multiplicibus causis sufflamini vel plane intercipi potest; in proclivi est judicare: arduum utique nec tam expeditum esse negotium, resistans vel deficiens cruoris profluvium iterum procurare, quin nunquam perficiendum, nisi causarum defectus ratio habeatur exquisitissima.

II. Posito vero quod sanguis supra proportionem & modum in corpore redundet, quod præcipua fluxus causa, posito etiam quod vascula uteri & ani ita disposita sint, ut ab affluente copioso sanguine distendi & exitum ipsi præbere possint; neque tamen excretionis negotium rite succedere, vel propter vascula arteriolarum lateralia, quæ secundum naturam non vehunt sanguinem obstructa, aut spasmò constricta, vel etiam ob imminutam sanguinis spiritua-scentiam & cordis atque arteriarum vim elasticam contractilem: tunc omnino quæ supra adduximus remediorum genera exoptatissimam ferunt opem. Ad vasa quippe minima referenda & obstructiones expediendas egregie præter radices quinque aperientes, aristolochiam, rhabarbarum, bryoniam

niam, flores cheiri, præsertim si in decocto cum salino stimulo, ut borrace, offerantur, imprimis etiam conferunt gummata, cum aloë & purgantibus in forma pilularum exhibita. Ad tubulos infesto spasmo constrictos nimis & coarctatos adaperiendos, artemisia, quæ demulcet, millefolium, crocus, castoreum, plurimum valent. Et ad deficientem sanguinis spiritualiscentiam refocillandam, robur solidis addendum & fibrarum vasorumque tonum firmandum, roborantia, quæ sale volatili oleoso tenui operationem suam exsequuntur, ex usu sunt, quo referenda omnia aromata, myrrha, bacca lauri & juniperi, rosmarinus, pulegium, melissa, satureia, sabina, flores cheiri, calamintha, succinum, limatura martis & tincturæ ex marte paratæ, item salia volatilia oleosa.

III. Quando nimia sanguinis copia, quæ elasticitati vasorum valde resistit, retardati, vel imminuti fluxus causa est, neutiquam emmenagoga jam dicta, præsertim calidiora, locum habent. Sanguis enim hisce vehementius commotus pessima sæpe concitat mala. Sed opus tunc est sanguinis missione, quæ per sectam in pede venam instituta, saluberrimum hoc & criticum profluvium, sola sæpe restituit.

IV. Neque etiam hæc quæ enumeravimus emmenagoga conducunt, ubi sanguinis & succorum benignorum est defectus, ut in iis, qui mox a morbo convaluerunt, & quando primæ viæ sordibus viscidis fartæ, tunica villosa lento mucositate & bona digestio & chylicatio vacillat. Tum potius id præcipue agere debet Medicus, ut tam deficientem bonum sanguinem nutrientibus gelatinosis, jusculis & quæ facile in succum & sanguinem convertuntur, denuo ingeneret, quam labefactatam ciborum digestionem & chyli elaborationem congruis remediis, si opus est emeticis, vel lenioribus purgantibus, salinis aperitivis, amaris stomachicis, refarciat & debito ordini reddat.

V. Sæpe sanguinis effluxum impedit oppilatio ac infarctus vasculosæ colli uteri interni & exterius vaginæ, nec

non in viris ani substantiæ, ut nullum sanguinem, quantumvis valide appulsum, admittat. Quod si contigerit, supervacanea & irrita sane sunt quæcunque pellentia, nisi prius per congrua auxilia relaxata & emollita fuerit, obstipata & indurata tubulorum compages. Quod quidem non meliori magisque præsentanea ratione perfici potest, quam balneis, vel fotibus, seu balneis vaporosis, ita parandis, ut vas calida aqua, cui herbae artemisiæ, pulegii, flores chamomillæ infusæ, repletum, in hypocausto calido, tecto bene corpore, abdomini, quo vapor ad interiora uteri & partium inferiorum ascendat ac penetret, supponatur, & ad calorem aliquandiu conservandum, subinde candentes filices aquæ injiciantur. Eundem quoque in finem multum conferunt frictiones calidæ pedum usque ad inguina, præsertim mox a balneo aquæ dulcis cum pannis calidis institutæ.

VI. In iis autem malis, quæ a suppresso, deficiente, vel minus recte succedente, mensium, vel hæmorrhoidum fluxu, pendent, non certius, non securius, non efficacius præsidium deprehendi, prudenti aquarum mineralium, inprimis thermarum Carolinarum miciorum interno, & Toeplicensium externo usu, qui omnibus medendi indicationibus apprime satisfacit. Potu quippe thermalis aquæ humores lenti inciduntur & evacuantur, obstructions minimorum tubulorum expediuntur, balneo vero aquæ Toeplicensis, quæ omnium levissima, constringente terreo principio orbata, stricturæ remittuntur ipsaque vasa ampliantur, ut sanguinem affluentem promte admittere, capere iterumque eructare possint.

VII. Quemadmodum res admodum ardua & difficilis est in medendo, recte curare & procurare mensium in feminis profluvium; ita longe majoribus adhuc difficultatibus stipatus est excretionis hæmorrhoidalis successus, si copia sanguinis per venas ani exitum molitur, nec tamen ibi dispositionem ad exitum invenit. Nam licet ad ciendum sanguinis

guinis ex ani venis stillicidium pilulæ ex aloë paratæ singularem plane præ omnibus aliis possideant facultatem, dum non modo particulis suis resinosis sulphureis, valde subtilibus, in universa sanguinis & humorum massa insignem orgasmum concitant, sed & tenaci viscosa ac resinosa sua parte intestini coli & recti tunicis firmitus inhærendo, continuo stimulo majorem sanguinis proritant affluxum; nihilominus tamen quando cruor ita exæstuatus ac eo copiosius allectus, ob vascula perruptioni minus apta exitu præcluditur, partim extrema canaliculum ora cum exquisito dolore in ano tuberculorum instar protrudit, partim inter nerveas intestinorum tunicas stagnans eademque premens, vehementes inflationes, spasmos & varietate truculenta in abdomine pathemata, ingignit, quæ frequentissimæ certe sunt observationis nostro hoc ævo, quo omnes fere passiones ex fluxus hæmorrhoidalis anomaliis, tanquam causa, repetere, clari etiam viri haud verentur, & pilularum ad mentem Beccheri concinnatarum crebrior nimisque liberalis usus, seu potius abusus invalescit, quarum alias prudens usus laudem meretur.

§. IX.

In evacuantium classe etiam ea locum obtinent, quæ lxx. *Expectorantia*. lympham mucidam in glandulis, vel potius glandulosis tunicis, ex arterioso sanguine secretam & in emunctoriis hærentem, evocant. In nullo vero corporis organo mucositatis copiosior succedit sequestratio, quam in interioribus canaliculis asperæ arteriæ ipsisque pulmonum bronchiis, quæ interius tunica glandulosa obducta sunt, unde per tussim copiosa persæpe serosa, pituitosa, viscida, interdum etiam purulenta materia, in morbis præsertim qui pulmonum compagem afficiunt, tam acutis, quam chronicis, rejicitur. Et hanc e thoracis cavo evacuationem quæ promovere solent, vocantur, EXPECTORANTIA, in quorum numero e vegetabilium familia sunt maxime radix helenii, ari, iridis Florentinæ, liquiritiæ, herba veronicæ, chærefolii, scabiosæ, pilosellæ,

læ, scordii, hyssopi, dracunculi esculenti : flores violarum, crocus, malvæ, papaveris rhœados, semen anisi, fœniculi, cortex ligni sassafras ; ex gummatibus resinosis gummi ammoniacum, benzoe ; ex fructibus passulæ, ficus, jujubæ, nuclei pini, mel, succus liquiritiæ, oleum amygdalarum dulcium ; ex animalibus : sperma ceti & pinguedines ; ex mineralibus : sulfur, ejus flores & lac ; ex compositis balsamum sulphuris anisatum, spiritus salis ammoniaci anisatus, lohoch sanum & expertum, sirupus pulmonum vulpis, elixir nostrum pectorale, balsamum pectorale Meibomii, spiritus asthmaticus Michaëlis.

Theoremata.

Quemadmodum omnia quæ excretionem adjuvant, non uno eodemque modo suam edunt operationem, sed vel materiam mobilem reddunt & ad evacuandum præparant, vel vias emuntiorum referant, ut a succorum connubio segregari possit, vel denique vasa & canales ad motum excretorium excitant : ita ratione haud absimili etiam expectorantium agendi succedit modus. Nimirum si humor secretus est valde tenuis, acris & tubuli ac pori glandularum e quibus ejiciendus nimis constricti, aptissima sunt ea quæ vias emolliunt, acrimoniam hebetant & nimis tenues & fluxiles coagulant ; qua virtute ex jam nominatis splendent succus radices liquiritiæ, crocus, sperma ceti, flores violarum, malvæ, papaveris rhœados, cremor lactis, oleum amygdalarum dulcium, axungia, sirupus pulmonum vulpis, violarum, papaveris albi, massa pilularum de stirace, præsertim si cum liquido diluente, ut est decoctum avenaceum, vel decocto ex rasura cornu cervi gelatiniformi, assumantur. Quodcumque vero materia spissa & copiosa in bronchiis pulmonum hæret & respirationi obest, eaque propter stimulo quodam ad expectorationem opus est, tunc tenacem & viscidam materiam quam optime resolvunt infusa ex herba veronica, hyssopi, scabiosæ, scordii, terra quoque foliata

tartari, solutio oculorum cancri & nitrum antimoniatum. Et tunicas bronchiorum nerveas principio quodam acri tenui oleoso, ad motum excretoriam animant, gummi ammoniacum & ejus essentia, spiritus salis ammoniaci anisatus, myrrha, benzoe, pulvis radices helenii, iridis Florentinae, sulphur stillatitium, ejus lac, balsamum sulphuris; aut ubi acrius adhuc calcar admovendum, ut in asthma pituitoso & catarrho suffocativo, oxymel squilliticum & spiritus asthmaticus Michaelis, qui ex gummi ammoniaco & crystallis viridis aris paratur, adhiberi poterunt.

Corollaria practica.

I. In expectorantium usu, ob diversa quibus agunt principia ipsumque varium operandi modum, prudenti discrimine opus est, & qui promiscue nulla habita differentia temporis, vel materiae peccantis, iisdem utitur, is certe plus damni, quam commodi inducit. Hinc quando in tussi epidemice grassante, vere vel autumno, antequam materia tenuis & acris attemperata, propinantur quae stimulo agunt expectorantia, vel vicissim, ubi materia satis cocta & preparata, emollientia & relaxantia offeruntur, praeposterum utique & damnosum est molimen.

II. In tussi chronica, humida, asthma quoque pituitoso, in quo multum pituitae in bronchia pulmonum illabitur, dulcia, linctus, sirupi & oleosa ventriculum, qui in morbis jam tum languidus & a tono dejectus est, plus labefactant, appetentiam, digestionem & chylicationem minuunt ac non modo uberiori recrementorum proventui ipsiusque morbi incremento favent, sed & ad cachexiam, tumores oedematosos, immo hydropem, disponunt. Praestat tunc potius uti medicamentis pectoralibus balsamicis, quae grata simul ventriculo, ut elixirio nostro pectorali, essentia myrrhae, gummi ammoniaci, corticis sassafrae, nucistae, spiritu salis ammoniaci anisato, tinctura tartari aliisque similibus.

III. Cautissimus quoque expectorantium debet esse usus in dispositione phthifica, vel hæmoptica, si tussis sicca, spiratio angusta & difficilis, dolor pectus comprimens, quæ potius a sanguinis congestione, quam materia expectoranda accidunt; quandoquidem sive emolliendo, sive stimulando agant, affluxum & congestionem sanguinis & humorum augent, tantum abest ut removeant.

IV. In morbis acutis pectoris, ut pleuritide vera & peripneumonia, provide pariter excretioni pectorali dicatis, præsertim in principio, utendum, ne stasis & stagnatio sanguinis inflammatoria inde augetur; inclinante vero morbo & ubi maxima inflammationis pars discussa, ad materiam coctam lentescentem ex fistulis pulmonum evocandam, commodum habent locum.

§. X.

IX. *Errhina & sternutatoria.*

Porro ad excretionem, sequestratæ in obducta narium antris & duodecim cranii sinubus glandulosa pituitaria dicta tunica, mucidæ lymphæ, plurimum possunt **ERRHINA** & **STERNUTATORIA**, quorum illa leviter, hæc vero validius, has exquisitiori sensu præditas tunicas stimulando, & ad motus excretorios sollicitando agunt. Inter leniora quidem errhina dicta, locum quam commode tuentur, majorana, basilicum, thymus, hyssopus, satureia, marum Syriacum, origani summitates, flores liliorum convallium, benzoës, resina guaiaci, quæ ex decocto post inspissationem remanet, rasura tenuissima ligni aloës, sal volatile salis ammoniaci siccum, cum oleo majoranæ essentificatum, nec non vitriolum album; sternutamentum vero movent & quidem validissime euphorbium & pulvis hellebori albi, paullo mitius variæ species tabaci, mercurius præcipitatus, piper.

Theoremata.

Sternutatoria non alia ratione humorem e narium tunicis eliciunt, quam purgantia ex tunicis intestinorum glandulosis, sale nempe tenui acerrimo, tunicas has irritando

do & ad crispaturam adigendo. Sed uti acriorum purgantium, ita etiam sternutatoriorum, rarior debet esse usus, eo quod natura non facile in evacuationibus vult cogi, sed tantum duci. Errhina vero, sive ptarmica, naturæ & nervis magis amica, sale subtili acri volatili oleoso, tunicam pituitariam blande irritant, stimulant & mucidum liquorem evocant, longeque sternutatoriis sunt tutiora, eo quod hæc motum quendam convulsivum in nervos & per consensum etiam totum pectus invehunt, illa vero roborando potius nervos & nervosas tunicas, officio suo defunguntur.

Corollaria practica.

I. Pulveres errhini, ex herbis cephalicis, præsertim maorana, maro Syriaco, floribus benzoës, liliorum convallium, rasura ligni aloës, grano uno vel altero ambraë adjecto compositi, in capitis gravativis doloribus, hemicrania, affectibus soporosis, memoriæ debilitate, gravedine, coryza, auditus difficultate, cephalalgia pituitosa, præsertim ea quæ in ossibus frontis subsistit & plerumque a coryza suppressa oritur, oculorum mucosa defluxione, somnolentia, vertigine & si quippiam humoris maligni a lue venerea in narium membranis hæret, egregii sunt usus, & præter evacuationem, vigorem quendam addunt actionibus animalibus. Neque minus hoc nomine laudem meretur sal volatile salis ammoniaci cum balsamo nostro mixtum, quod ad aliquot grana naribus inditum, spectatæ est virtutis in auditus & visus difficultate, affectibus soporosis & in sensibilibioribus sternutationem ciet, sæpe proficuum, ubi motus in capite excitandi, in paralyticis & apoplecticis.

II. Nostreis temporibus, ubi fumi tabaci, ita etiam pulveris pro sternutatione, luxurians abusus maxime invaluit, valetudini minus conducibilis. Etenim jugi hoc pulverum attractu, non modo odoratus, propter obstructas & quasi induratas inde papillas nerveas membranarum quæ ossa squamosa & nares investiant, læditur, sed & ob nimium infar-

ctum ab allecto humore clara vox raucescit. Id quod pluribus inculcavi in *dissertatione, de usu & abusu sternutatoriorum.*

§. XI.

X. *Apo-* Haud absimili ratione ac errhina vellicando & irri-
phlegma- tando narium tunicas mucum ex ipsis eliciunt; APOPHLE-
tizantia. GMATIZANTIA salivalem & mucosam materiam ex tota
 faucium compage glandulosa, uvula & ductibus salivalibus
 evocant. Quin omnia, quæ errhina & ptarmica facultate
 gaudent, ori, vel per masticationem, vel gargarisationem
 admota & indita, phlegma & liquorem salivalem evehunt.
 Quippe tabacus in pulverem comminutus inter errhina, ac
 fumus ex ipso inter apophlegmatizantia, principem sibi ven-
 dicat locum. Præter nicotianam autem radix pyrethri,
 ostruthii, angelicæ, zedoariæ, pimpinellæ, galangæ, myr-
 rha, masticata fundunt & egregie colliquant salivam. Uius
 masticatoriorum eximius ad arcenda miasmata quæ in morbis
 contagio infectis inspirato aëre hausta, facile se apponunt fau-
 cibus, salivæ immiscent & deglutita demum morbum inve-
 hunt, si quis forsan in locis infectis & suspectis versetur, ubi
 etiam tabaci fumus conducit. Decocta vero ex radice
 pyrethri, pimpinellæ albæ, caryophyllis, herba majoranæ,
 satureiæ, angelicæ, cum vino vel spiritu vini, qui solus et-
 iam salivam fundit & fibras ductuum stringit, confecta, in
 vitiis oris & linguæ, dentium, gingivarum nec non auri-
 um, difficili auditu, vel tinnitu, quando orificium tubæ Eu-
 stachianæ, quod in interioribus non procul ab uvula hiat,
 obstructum est lento mucosæ, egregiam locant operam, quæ
 non minus in uvulæ relaxatione, aphonia, paralyfi linguæ,
 addito sale ammoniaco, vel spiritu salis ammoniaci, apprime
 inserviunt.

§. XII.

XI. *Sali-* Neque prætereunda in evacuantium enarratione sunt
vantia. sialagoga, sive SALIVANTIA, quæ lymphaticum & saliva-
 lem

lem laticem fortiter movent & per os evacuant. Utut vero in regno vegetabilium plura sint, quæ ore assumpta, ut emetica, vel dentibus, ut modo meminimus, manducata, salivalem humorem e faucibus & glandulis evocant; vix tamen in tota rerum natura suppetunt, quæ tam vehementer totam lymphæ massam in motum concitant atque in salivales glandulas & ductus tam fortiter agunt, ut non tantum per aliquot hebdomades, verum etiam menses, continuus satisque largus succedat salivæ fluxus, quam quæ regnum minerale suppeditat pharmaca, & maxime quidem mercurialis & regulinæ prosapiæ, arte chymica præparata. Nam argenti vivi ea propria laus & peculiaris plane virtus est, & exterius inunctum, vel parva etiam dosi interius assumptum, liberalissime moveat salivationem, cujus, si recte administretur, beneficium, affectiones ceteroquin insanabiles & contumacissimæ, ex impuritate feri & lymphæ ortæ, lues venerea, herpes, scabies maligna, ulcera cacoethea & serpentia, sanari funditusque expugnari possunt. Et hac singulari ac quasi propria facultate, pollet non modo ipsum argentum vivum, cum saccharo probe contritum & cum conserva interius propinatum, sed & omnia ex eo artificiose confecta, ut mercurius dulcis, præcipitatus ruber, albus, cum spiritu salis ammoniaci, ex solutione mercurii in aqua forti præcipitatus, turpethum minerale, arcanum corallinum, mercurius diaphoreticus jovialis, solaris, athiops mineralis ipsaque cinnabaris, tam nativa, quam antimonialis, vel communis, ex sulphure cum mercurio parata, nec non antiquarium Riverii. Ex iis vero quæ ad regulinam antimonii substantiam ortum referunt, commemorari merentur, crocus metallorum, pulvis Monckii, sulphur sic dictum auratum, vulgari modo per præcipationem cum aceto, vel solutione martis, vel etiam solis concinnatum, vel singulari modo præcipitatum, ut panacea Glauberiana, in pharmacopœis Brunsvicensibus Conerdiniana vocata.

Theoremata practica.

I. Quæ jam memoravimus salivantia optime in duas classes possunt dispesci, mitiora scilicet, & fortiora. Ex mitioribus quidem & mercurialibus, athiops mineralis & cinnabarina, modo in pleniore & continuata dosi offerantur, etiam salivæ fluxum proritant & humores lymphaticos in motum cient, atque cum fructu in iis morbis, qui ab obstructionibus glandularum, vel feri coagulo, aut extravasatione in capite oriuntur, resolvendo & fundendo coagulatos succos, usurpantur. Deinde quoque antimonialia, quia sulphur regulinæ in iis substantiæ quodammodo nuptum, etiam lenius agunt, nec ab iis tantæ turbæ & sæva symptomata timenda sunt, ac a plerisque mercurialibus chymica arte præparatis. Inter leniora quoque mercurium dulcem bene elotum & præparatum, item ipsum argentum vivum rite depuratum, in formam solidam & pulverem arte conversum, referimus, excepto mercurio vivo exterius applicato, quippe qui cum unctuosus in unguentum redactus, & partibus nervosis inferioribus pedum, poplitibus, genubus, multo magis spinæ dorsali, illitus, validissime sæpe & subito vix coercibile salivæ exprimit stillicidium.

II. Modus autem operandi ita evolvendus & concipiendus videtur. Videlicet argentum vivum 1) omnium fluidorum est gravissimum corpus, cujus minimæ etiam particulæ solutæ & divisæ, specificam suam gravitatem, respectu omnium fluidorum superiorem, semper servant, & 2) ipse mercurius ab omnibus salinis menstruis solvi & in infinite parvas & subtiles moleculas redigi potest, quæ ob vim corrodentem & simul gravitatem specificam intima vasorum & pororum in corpore humano penetrant. Mirum enim diffundi posse argenti vivi, & partes, & vires, ad oculum patet ex eo, quod sublimati mercurii unum tantum granum in aqua dissolutum, vel duas aquæ uncias conspicuo non solum metallico irritante sapore possit inficere, sed etiam tam efficaci

virtute imbuere, ut mercurialis hæc aqua interne & externe adhibita, excretiones per salivam, sudorem, alvum, immo vomitum, pro dispositione subjectorum & humorum, potenter moveat, & exterius admota, scabiem & omnes cutis defœdationes repente ficcet ac reprimat. Quandocunque itaque mercurialia, vel exterius applicata per fumum, emplastrum aut unguentum, vel interius sumta, ab humoribus corporis nostri bilioso-alkalinis solvuntur, sive in minimas partes discerpuntur, promte & efficaciter in nervos & nervosas maxime fibras glandularum conglobatarum & conglomeratarum, immo in ipsas tunicas lacteorum & lymphaticorum vim suam exercent, & earum systolen atque contractionem augendo, motum lymphæ concitatiorem reddunt, quo intensiori facto, consistentes in glandulis & minimis vasis humorum obstructions, stagnationes & stases lymphæ coagulata tandem resolvuntur atque expediuntur.

III. Hac utique ratione lues venerea & qui cum hac affinem naturam habent morbi feliciter extirpantur, nec ea propter semper in curandis his cum Gallica lue morbis opus est salivatione, sed qui arcanum novit, dextro mercurialium & antimonialium bene præparatorum usu & applicatione, sine salivatione, ut olim peculiari dissertatione adstruxi, has rebelles ac pertinaces affectiones sanare potest. Neque enim, quod omnes periti & usu exercitati Medici ultro confitebuntur, salivæ fluxus causa est curationis luis venereæ, sed potius illa sublata glandularum & minimorum vasculorum obstructio & colliquatio humorum viscidorum ibi stabulantium, quam deinde per accidens sequitur largior salivalis humoris profusio.

IV. Sub salivatione mercurio excitata, ut sæpius observavi, exteriores, præsertim inferiores partes, ut pedes, ordinario frigent & contractæ sunt, alvi etiam & urinæ fluxus retinetur, sublato autem per hanc partium inferiorum stricturam libero lymphæ & serî, nec non sanguinis in vasculis

lis minimis circuitu, necesse est, ut humores serosi & lymphatici cum impetu ruant ad partes superiores, & maxime solennia in faucibus glandulosa conceptacula, e quibus qua data via jugi postea feruntur rivo, & cibum, & somnum impediende. Vidi quoque in iis, quos enormis & ad tres vel plures menses durans salivatio demum lipothymia & catarrho suffocativo e medio sustulit, partes externas tam frigidasse, ut nullo auxilio; neque balneo, neque frictione, ad calorem reduci potuerint. Equabilem autem & liberum lymphæ ipsiusque sanguinis per omnes corporis partes interceptum progressum, salivam movere, continua illa sputatio testatur, solennis hypochondriacis ac melancholicis, in quibus pariter ob constrictas partes inferiores, lymphæ & saliva majori nisu fertur ad glandulosam faucium & oris compagem.

V. Quod vero profluens sub salivatione, præsertim in iis qui impura venere infecti sunt, humor, tam foetidum & putridum spiret nidorem, hæc reddenda videtur ratio: quod mercurii tenuissimæ partes, reliquos omnes humores gravitate superantes, ab illis in connubium susceptæ, motu suo circumvolutorio, mixtionem, crasin atque texturam sanguinis, haud secus ac in putredine, dissolvere incipiant, ut hanc ob causam foetor sulphureus, volatile quippiam spirans, exhalet & ipsi dentes nigredinem contrahant.

VI. Omnes magnopere a Chymicis celebratæ panaceæ maximeque solares, quæ potiores suæ facultatis partem ad metallicum & mercuriale elementum referunt, si rite præparantur & dextre usurpantur, non defraudandæ sunt sua laude, in morbis ubi cuneo & vecte quasi opus est. Nam summa activitate pollent, ac in exili admodum dosi in systema partium nervosarum potenter agunt magnosque effectus præstant. Quin innotuerunt mihi ejusmodi medicamenta, antimonialia inprimis, quæ pro diversa dosi & regi-

mine juncto, item pro diversa subjectorum ratione, in exigua mole, vomitum, alvum, immo salivam, movere possunt, sed perpauci Medici eorum rectum usum & peritam administrationem norunt.

CAPVT VI.

DE

ROBORANTIBVS.

§. I.

Tertium nunc ex summis remediorum generibus scilicet. *ANALEPTICA*. quitur, complectens ea, quæ solidis dicata sunt, ita *leptica*. quidem, ut circa eorum vires ac potentias motrices, easdem refocillando, firmando ac intendendo, occupentur, & desumpta a robore generali denominatione, audiunt **ROBORANTIA**. Horum pariter maxima in arte medica utilitas est atque necessitas; eo quod robore ac independente motuum exercitio, vita omniumque actionum integritas & continetur, & absolvitur; eaque propter ubi sanitas offensam patitur, roboris maximum momentum ac nonnisi motu labefactatæ functiones ad pristinum ordinem reducuntur. Jam vero plura, quoad vires & usum specialius distinguenda, hunc censum subeunt, & primum merito locum obtinent **ANALEPTICA**, quo quidem nomine insigniuntur, quæ vires imminutas & depressas erigunt, restitunt & confortantem, uti vocant, vim habent, & passim etiam cordialia & cardiaca dici solent. Huic scopo obtinendo serviunt ex vegetabilibus: flores rosarum, citri, aurantiorum, jasmini, liliorum convallium; herbæ: melissa, origanum, marum, poma citri, *Chinensis* recentia & ex aromaticis.

(III.)

Uuu

mati

matibus cinnamomum ; ex resinosis ipsa ambra ; ex animalibus moschus ; & quæ ex his omnibus præparata prostant , ut oleum de cedro , melissæ Turcicæ , rosarum verum , canange , quod ex floribus tilia in Persia elicitur , pomorum Bergamotte , essentia ambrae rite præparata , oleum cinnamomi in elæosaccharum redactum , quod in pulvere sic dicto solari Cellensi præcipuum , aqua melissæ citrata , liliorum convallium , cinnamomi cydoniata . Referri huc quoque possunt fructus fragorum , ribii , rubi idæi , ceraforum eorumque nuclei , & ex iis recentibus paratæ aquæ , succus limonum & exinde confectus sirupus .

Theoremata.

Cordialia hæc fragranti suavissimo subtili oleoso principio agunt & in nervos eorumque liquidum immediate fere penetrant , ipsique motum naturæ blandum & amicum insinuant . Est enim hæc indoles omnis substantiæ sulphureæ , tenuissimæ & halituosæ , ut interiora partium nervosarum promptissime pervadat ; ac celeriter effectum edat , quod graveolentia ipsaque suaveolentia , si quis ex idiosyncrasia eadem ferre nequeat , planum faciunt testatumque . Hinc etiam solo odore , ut in animi deliquio & syncopiticis , subito roborantem suam vim exserunt & vires erigunt , eo quod in nulla corporis parte , & nervorum , & vasculorum sanguineorum extremitates , tam nudæ minusque tectæ , quam in narium amplo & cavernoso ductu occurrunt , & admota fragrantia expedite ibi nervos & spiritus afficere possunt .

Corollaria practica.

I. Utut hisce dictis analepticis in refocillandis viribus non deneganda sit sua virtus ; ea tamen valde restricta & limitata est . Optandum quidem esset , ut in rerum natura certæ ejusmodi virtutis prostant remedia , quæ , ut vulgus putat & a medentibus etiam semper exigit , efficaciter vires in omni fere morbo , præsertim vero acutis & malignis , de-

pres-

pressas & deficientes redintegrarent ; sed quia in morbis vires non rectius & certius restituuntur , quam caussis morbificis quæ eas frangunt , sublatis & noxiis rebus e corpore expul-
sis, nisi hoc exsequatur Medicus, omnis analepticorum usus erit frustraneus.

II. Neque etiam existimandum est , restorationem virium veram & constantem tantum procurandam esse medicamentis, quæ motum in spiritibus & partibus solidis concitant. Nam in plurimis morbis, præsertim febribus & convulsionibus , magna quidem vis & potentia motrix cordi, arteriis & membranis nervosis inest , & tamen vires naturales sunt languidæ & valde infirmæ. Proinde potius verum virium naturalium robur maxima ex parte dependet a congruis alimentis, esculentis & potulentis, in bonos succos & sanguinem conversis , ex quibus postea tenuissimum illud, quod in cerebro separatur fluidum , & per nervos ad musculos & tunicas musculosas delatum , potissimum corpori & ejus partibus vigorem ac firmitudinem largitur , denuo ingeneratur.

III. Optimæ igitur materiæ nutrientia sunt optima analeptica , cujus generis sunt juscula ex carnibus gelatinosa , caponum, ossibus & eorum medulla , per decoctionem cum aqua, pauxillo vini, adjectis aliquot taleolis pomi citri, tantillo salis, pulveris macis & caryophyllorum, in clauso vase parata , item quæ ex pane nigro Westphalico, aqua & vino cum ovis conficiuntur, decoctum quoque succolade, cum vel sine lacte, lac ipsum asininum, aqua panis grossioris cum corticibus citri destillatum, & vinum maxime Rhenanum generosum & annosum, item verum Hungaricum. Hæc tamen præsidia alimentosa & nutrientia ad vires erigendas, non in ipso morbo , neque ubi tota massa sanguinis & humorum valde impura est , sed inclinatis morbis & ubi a præcedenti morbo, vel animi affectu, diuturna vigilia, corporis & animi labore ac fatigatione, vel nimis hæmorrhagiis, vires

exhaustæ sunt & attritæ, optime conveniunt, quin etiam tunc perita adhibenda moderatio, eo quod celeriter admodum in sanguinem transeunt ejusque copiam augent.

S. II.

II. De
balsami-
cis,

Analepticiis in roborantium classe succedunt BALSAMICA, quæ calidioris & acrioris sunt indolis. Comprehendunt hæc medicamenta sic dicta cephalica, nervina, aut apoplectica, antiparalytica, cordialia spirituoſa & hujus generis alia, & ex eorum censu quam maxime eminent lignum aloës, ejus resina atque essentia, agallochum album, fantalum citrinum & ejus essentia, in balsamum liquidum concentrata, ambra gryſea, liquidambra, opobalsamum, succinum, benzoe, styrax calamita & ejus resina, styrax alba, ladanum & ejus resina, balsamum Peruvianum, de Copaiva, Americanum rubrum, Tolutanum, cortex Peruvianus verus, costus amarus, chaccarilla, cinnamomum, caryophylli, cardamomum, cubebæ, macis, nucista, satureia, thymus, ruta, serpillum, lavendula, spica, origanum nostras & Creticum, majorana, melissa Turcica & nostra, chamomilla Romana, marum Syriacum, basilicum, abrotanum, spica Indica, schœnanthum, folia lauri, myrthi, & ex his destillata olea fragrantissima vera non adulterata. Ex compositis balsamum apoplecticum Crollii, Cellense, Scherzeri, nostrum liquidum vitæ, spiritus balsami Peruviani nostra methodo paratus, spiritus succini, mastiches, aqua apoplectica Sennerti, Anghaldina, essentia ambrae vera, spiritus volatiles oleosi, cum oleo cinnamomi, macis, de cedro essentificati.

Theoremata.

Enarrata hæc simplicia & ex iis præparata tenui æthereo & subtili volatili oleo, naturæ admodum blando & amico, in fluida non minus ac solida corporis nostri agunt virtutemque suam diffundunt, & partes sulphureas calidas & athe-

& æthereas in sanguine & humoribus deficientes, restituunt, augment atque motum intestinum calidum & spirituaſcentiam vitalibus humoribus ſcenerant. Pollent vero etiam ſale ſubtili acri baſamico, eodemque cordis, arteriarum & fibrarum muſculoſarum vim & potentiam elatiſcam intendendo, ſanguinis & humorum progreſſum ac circulum egregie promouent, quo poſtea fit, ut humores craſſi & viſcidi attenuentur, obſtructiones ſoluantur & ſaluberrimum perſpirationis negotium, quo optime morbi arcentur, integrum ſervetur ac illibatum.

Corollaria practica.

I. Igitur in omnibus morbis capitis, nervorum, ſpinalis medullæ, ſtomachi & cordis, qui a cauſſa ſecundum Veteres ſic dicta frigida ſoventur, humorum nempe ſpiſſitudine, condenſatione & ab atonia nervoſarum & muſculoſarum partium, ut in apoplexia, paralyſi, ſtupore & torpore ſenſuum, memoriæ debilitate, auditus difficultate, lipothymia, ingenti virium debilitate, provido, tam interno, quam externo uſu, ſuppetias ferunt exoptatiſſimas.

II. Stomachi quoque & inteſtinorum vitiis, quæ ex atonia, copia cruditarum acido-ſciſidarum, depravata digeſtione, natales ducunt, ut inflationi, item diarrhœæ, colicæ flatulentæ, vomitioni mirifice ſubveniunt, & maxime quidem conducunt ætate ſenibus & omnibus imbecillis & debilitatis, nec non qui laxioris ſunt habitus & conſtitutionis phlegmaticæ.

III. Cum fructu etiam uſurpantur, ſi a diuturna anni conſtitutione præhumida & frigida, tempore præſertim autumnali & hiemali, ac inprimis in regionibus ſeptentrioni vicinis, tulleſe humidæ, diarrhœæ, aſthmata pituitoſa, tumores oedematofi, coryzæ, rheumatismi, intermittentes quoque febres & a ſcorbutica impuritate provenientes ægritudines regnant, vel metuendæ ſunt, ſine potiſſimum præſervatorio.

IV. Cavendum vero ab eorum liberaliori dosi est, quando corpora succis & sanguine plena, alvinæ fordes restagnant, juvenibus & cholericæ sensibilibus indolis subiectis.

V. Ego medicamentum liquidum balsamicum, quod vulgo vocant balsamum vitæ, ex optimis his & maxime oleis veris non adulteratis conflatum, per viginti & quod excurrit annos in usu habui, cujus tam spectata virtus, ut reliquis omnibus roborantibus & balsamicis quisque facile carere possit, si unico hoc interne & externe recte uti norit. Et hoc suavissimum efficacissimumque medicamentum, eximia roborante & restaurativa facultate toties totiesque nobilitatum, late quidem jam innōuit; sunt vero, qui assimulatum huic, ex adulteratis maxime oleis, non tam concinnatum, quam confusum, nefario dolo meo sub nomine incautis venditant, quod tamen virtutem & famam suam nequiquam sustinere potest.

S. III.

III. *Stomachica.*

Sequuntur stomachi & intestinorum tonum roborantia, quæ simul carminativa complectuntur, eoque nomine laude digna ex radicibus: galanga, gentiana rubra, zedoaria, pimpinella, calamus aromaticus, arum; ex corticibus: canella alba, sassafra, citri, aurantium & pomorum Chinesis recentis, cortex Africanus, Winteranus, chaccarilla; ex aromatibus: piper, zingiber, caryophylli, cinnamomum, cardamomum, macis; porro chamomilla Romana & vulgaris, absynthium, mentha, carduus benedictus, semina quatuor carminativa; ex præparatis, oleum de cedro, aurantium per expressionem paratum, oleum chamomillæ vulgaris, dauci cretici, anisi stellati, cymini & carvi verum, menthæ, absynthii, spiritus salis, nitri dulcis; ex compositis sal volatile Sylvii, elixir stomachale nostrum, Michaëlis, essentia carminativa Wedelii, pulvis stomachicus Birckmanni, essentia corticum aurantium cum spiritu nitri dulci, tinctura

tar-

tartari & oleo aurantiorum per expressionem parata, essentia composita absynthii Conerdingii, aqua carminativa Dorncrellii, spiritus de tribus.

Theoremata practica.

Utut plurima ex adductis superius cephalicis & nervinis, in morbis ventriculi & intestinorum, præsertim, quia tono eorum dejecto, vel debilitato proveniunt, egregio etiam sint præsidio; suppetunt tamen adhuc alia, quæ vitiis harum partium amovendis, pro passionum differentia, specifica quasi efficacia sunt accommodata. Scilicet ad appetitum, ob saburram viscidorum & acidorum in ventriculo cruditatum vacillantem, redintegrandum, præter amara, ut radicem gentianæ rubræ, herbam absynthii, cardui benedicti & aromata, radix maxime galangæ, pimpinellæ, canella alba, piper, zingiber, arum cum fructu usurpari possunt. Ad nauseam, vomitionem & inversionem ventriculi compescendam, nil mentha, ejus aqua spirituosæ & oleo probe destillato, item mastiche & ejus spiritu, nec non qui ex balsamo Peruviano & sale tartari paratur, item liquore nostro anodyno minerali, præsentius & efficacius est. Ad doloris cardialgici, colici & torminum atrociam levandam, cortices aurantiorum recentes & ex iis rite extracta essentia, aqua & oleum cymini Æthiopici, oleum non adulteratum florum chamomillæ vulgaris, spiritus nitri dulcis bene præparatus, remedia sunt expeditissima. Ad intestinorum nimiam lævitatem & nimias dejectiones moderandas, cortex chaccarillæ peculiari splendet efficacia. In intestinorum inflatione ad elidendos flatu, aqua carminativa Dorncrellii, essentia carminativa Wedelii, item spiritus de tribus cum spiritu nitri dulci nuptus, essentia & aqua zedoariæ, cardamomum, oleum carvi & cymini verum destillatum, omnibus facile palmam præripiunt.

S. V.

Proximum est ut roborantia VISCERALIA, quæ nempe *IV. Visceribus sanguineis, ut hepatis, lienis, utero, renibus, pulmonibus.*

monibus firmandis & roborandis, quo eo expeditius officio suo fungantur, dicata sunt, adeoque ad horum classem hepatica, splenetica, pnevmonica, uterina, cachectica, anti-hydropica, antiicterica, antihysteriaca, antiphthifica commode referri possunt. Sunt vero hunc in usum commendabiles radices: gentianæ rubræ, aristolochiæ longæ & rotundæ, cichorii, zedoariæ, filicis, rhabarbi veri & rhapontici, curcumæ, ononidis, cortex chinæ, chaccarillæ, Winteranus, tamarisci, fraxini, capparum, cassia daryophyllata, herbæ: absynthium, centaurium minus, fumaria, carduus benedictus, trifolium fibrinum, hepatica nobilis, melissa, pulmonaria maculosa, scolopendrium, agrimonia, marrubium, cuscuta, veronica, scabiosa, epithymum, capillus veneris, pilosella. Neque minus laudanda hac virtute ex gummatibus & resinosis succinum, myrrha, aloë, bdellium, gummi hederæ, ammoniacum, olibanum, sagapenum, opoponax, asa foetida; ex mineralibus sulphur commune purum stillatitium, limatura martis & omnia ex marte parata, & quæ Chymia suggerit varia preparata, ut salia herbarum per incinerationem parata, arcanum & terra foliata tartari, ejus cremor, sal polychrestum, nitrum antimoniatum, spiritus salis ammoniaci, tinctura martis, ex floribus salis ammoniaci cum hæmatite præparatis, spiritu vini extracta, tinctura tartari, antimonii alcalisata, elixir proprietatis cum lixivio paratum, essentia fuliginis, elixir nostrum viscerale cum menstruo aqueo salino confectum, antimonium martiale cachecticum, massa pilularum Becherianarum & similium. Pertinent huc quoque fontes medicati sic dicti minerales, præsertim qui subtile quoddam martiale elementum custodiunt, ut Pyrmontanæ, Spadanæ & Schvvalbacenses, multo magis qui largius martiali ochra imbuti sunt, ut Lauchstadienses, Radebergeneses, Bebranæ & Freyenvvaldenses.

Theoremata.

Balsamica hæc visceralia principio & elemento, partim sulphureo, balsamico & terreo, paullo fixioris naturæ, partim etiam sale alcalino sulphureo, sive saponaceo, item amaricante, operationem suam in viscera, quorum vasa humoribus tenacibus crassis infarcta & obstipata sunt, edunt, succos lentos incidendo, dissolvendo & simul ipsis vasis & fibris a robore & tono dejectis vim contractilem & elasticam conciliando; adeoque in omnibus iis morbis longis, qui ab horum viscerum labe nascuntur, tum ad præservationem, tum ad curationem, polychresta & certæ efficaciæ sunt medicamenta.

Corollaria practica.

I. Licet omnia sic dicta visceralia in genere conveniant in eo, quod tonum viscerum roborent & infarctus atque obstructions expediant; nihilominus tamen pro viscerum & morborum differentia, eorundem discrimen & selectum probe servare necessarium. Ita exempli gratia, si hepar laborat obstructione, & inde morbi, ut icterus, cachexia & scorbutus, propullulant, quæ amaritie quadam saponacea & deterfiva vim suam exserunt erunt efficaciora, nominatim radices quinque aperientes, rhabarbarum, curcuma, opoponax, bdellium, sapo Venetus, elixir proprietatis sine acido, essentia rhabarbari cum sale tartari parata, essentia trifolii fibrini & omnia ex marte bene præparata.

Quando pulmonum nimia præsto est laxitas & infarctus, ac inde nati, vel nascuntur morbi, myrrha, gummi amoniacum, sulphur stillatitium, herba veronicæ, scabiosæ, chærefolii, pulmonariæ, pilosellæ, marrubii, capilli veneris, magis ex usu sunt. Ubi lien magnus & sanguine farctus gignendæ impuritati sanguinis, ac præsertim cachexiæ, admodum velificatur, cortices tamarisci, capparum, fumaria, scolopendrium, cuscuta, epithymum, radix ononidis, ipsaque martialia aliis præferenda. Quum ex imbecilli & nimium remisso renum tono nephritis & calculi

progignuntur, cortex radicis acaciæ & ejus infusum, item rob cynosbati & juniperi, specifica quadam activitate succurrunt. Ex labefactato uteri ejusque vasorum robore & retardatis in debito progressu sanguine & humoribus, longæ & multiplices, præsertim post abortum, passiones pullulant, quibus utique singulari quadam efficacia medentur aristolochia, tam longa, quam rotunda, artemisia, myrrha, matricaria, galbanum, bdellium, opoponax, succinum, massa pilularum Becherianarum & aliæ quoque ad earundem exemplar concinnatæ. Si intestina & quæ spectant ad ea glandulæ & tubuli secretorii & excretorii, biliarii, pancreatici, lactei, robore debito destituuntur, ut a copiosiori humorum decubitu fiant nimii alvi fluxus, vel subsistentes in vasis humores motibus, insultibus & paroxysmis febrilibus, fomitem & occasionem præbeant, rhabarbarum, cortex chinæ, Winteranus, chaccarillæ, martis tenuissimi croci atque essentia, præstabunt id, quod non facile aliis obtineri poterit.

II. Circa usum tamen roborantium id in genere tenendum est: quod longe meliorem effectum atque utilitatem præstent, quando non solum ante eorum oblationem sanguis nimis redundans subtrahitur & congruis laxantibus primæ regionis recrementa eliminantur, sed etiam si ipsa ad meliorem humorum fluxilitatem & mobilitatem conciliandam, in decocto, vel infuso, propinantur, vel adhuc rectius, cum potu acidularum, thermarum, aut feri lactis junguntur, quo certe horum roborantium, quæ adstringentis naturæ, operatio egregie adjuvatur atque intenditur, ad tollendos magnos chronicos & inveteratos morbos, imprimis quando paullo diutius continuantur & corpus simul convenienti motu, equitatione, vectura aut ambulatione exercetur.

§. VI.

VI. Adstringentia & traumatica.

Excipiunt ADSTRINGENTIA & VULNERARIA, Græcis traumatica dicta, quæ fixiori quodam leniter constringente elemento, laxas nimis, eliquatas, erosas ac læsas partes & si-

& fibras adducunt, stringunt, consolidant & conglutinant. Atque ex horum censu præcipua sunt radix caryophyllatæ, tormentillæ, bistortæ, consolidæ majoris, pentaphylli, plantaginis, rhapontici; ex herbis: vinca per vinca, fanicula, pyrola, consolida major, media, Saracenica, uva crispa, agrimonia, hypericum cum floribus, millefolium cum summitatibus, equisetum, veronica, fragaria, verbenæ, pilosella, teucrium, plantaginis species, folia quercus, botrys, melissa, mentha, betonica, urtica mortua, flores rosarum, balaustrorum, cortex chinæ, granatorum, radices acaciæ, succus acaciæ, catechu, sanguis Draconis, fructus myrtillorum, cydoniorum, ex aromatibus nucista, ex mineralibus hæmatites, alumen & omnes terrarum & margarum species; ex chymicis flores salis ammoniaci martiales, liquor martialis ex capite mortuo florum salis ammoniaci martialium paratus; inter præparata essentia traumatica Wedelii.

Theoremata.

Species quas jam recensuimus ex principio paullo fixiori terrestri cum acido juncto agendi facultatem habent, ac dum nimis relaxatas fibras paullo strictiores reddunt, a decubitu & stagnatione nimii liquidi eas liberant, simulque coeuntibus propius fibris solutis, consolidationem & coalescentiam promovent. Differt tamen constrictiva in ipsis virtus gradu; siquidem in radice tormentillæ, bistortæ & ejus extracto, floribus balaustrorum, corticibus granatorum, foliis quercus, alumine, liquore martiali, fructibus & cortice acaciæ, fructibus cydoniorum, & baccis exsiccatis myrtillorum, longe eminentior est, quam in herbis sic dictis vulnerariis, quæ subtiliori terreo alcalino principio, quod partibus sulphureis balsamicis fixioris indolis intermixtum, imbutæ, lenius & tutius operantur, & multi ac præstantis in praxi medica sunt usus. Quod autem hæc tam vulneraria, quam adstringentia, subtilius, solubile, terreum, constringentis facultatis elementum recondant, ex eo planius facile innot-

scit, quod infusum eorundem paullo saturatius, ad mixturam vitrioli martis, immo omnium liquorum martialium, non secus ac cum gallis fit, nigrum & atramentosum colorem recipiat.

Corollaria practica.

I. Si ullus remediorum usus cum prudentia & exquisita providentia instituendus, certe adstringentium. Nam quum vita & integritas totius corporis omniumque ejus partium in perpetuo & progressivo circulari motu humorum tenuium & fluidorum, per compagem corporis penitus ferme vasculosam & ex minimis prorsus tubulis coagmentatam, contineatur & absolvatur; constringentium vero ea vis atque facultas fit, ut fluidis mixta, ea incrassent, poros vero & tubulos solidorum coarctent atque angustent; in proclivi est: hujus virtutis remedia, naturæ animantium & vitalibus motibus minus favere atque amica esse, adeoque nec satis fida, nec segura, nisi magna cum prudentia adhibeantur. Experientia enim indies docet, ab ejusmodi improvide datis constringentibus, in compescendis nimis sanguinis, vel alui fluxibus, innumera damna & noxas induci, ac perquam facile inde ægrotantes lentas febres, cachexiam, tumores oedematosos, affectus spasmodicos, colicos & hypochondriacos incurrere. Et huc etiam referendus imprudens corticis chinæ usus, in profligandis intermittentium paroxysmis, quando hujus vi, idemtidem constringente, fordes viscidæ, biliosæ, salivales, quæ tubulis viscerum primæ sic dictæ regionis inhærescunt & excerni debebant, retentæ, ibi diutius detinentur, & vel recidivam, vel novum & deteriore morbum excludunt.

II. Si necessitas ejusmodi constringentia postulat, non simul & semel, sed successive atque in remissiori dosi & cum sufficiente liquido, subjuncto etiam corporis motu, propinari debent; id quod etiam perpetuo, quando cortex chinæ, vel etiam martialia, in usum trahuntur, injungere soleo.

III. In-

III. Infelix, intuta & periculi plena est cura, qua nimiae vomitiones, mictio cruenta, narium; uteri, aut ani hæmorrhagiæ nimiae, item hæmoptysis, adstringentibus compescuntur, quod certe nunquam cum bonis ægrorum rebus perficitur, nisi prius spasmi, a quibus plerumque ceu causis proximis sanguinis fluxus pendet, complacati, nimia motuum ferocia sedata & humores copiosius affluentes ad alia loca derivati.

IV. Herbae sic dictæ traumaticæ, seu vulnerariæ, atque earum decocta, non modo in vulneribus, erosionibus & continui solutionibus, sed & in quibusdam longis & valentibus morbis, ut phthisi, scorbuto, cachexia & calculosis passionibus, quando nempe a tono viscerum & glandularum dejecto & humorum hostili stagnatione vel stasi oboriuntur, insignem & commendabilem ferunt opem. Semper tamen cavendum, ne ubi nimia vasorum obstructio & fibrarum contractio, ac pulmones in phthisi tumoribus ac tuberculis duris obfessi, iis utamur. Alias certe vulnerariorum & leniter adstringentium usus in infuso longe saluberrimus, ad præscindenda calculosa in renibus concrementa molestissima, quæ ex nimis laxis vel exulceratis renibus potissimum natales ducunt, de quo lectu digna Cl. *Heucheri* dissertatio de *adstringentium usu in calculo*. Et hoc nomine infusum millefolii & ejus summitatum, veronicæ, hederæ terrestris, fragariæ, agrimoniae, corticis radices acaciæ, egregii usus. Pariter in involuntario urinæ stillicidio, tam in pueris, quam senibus, a nimia laxitate sphincteris suborto, ejusmodi infusa expertæ & desideratæ virtutis deprehendi, admoto simul exterius spiritu vini rectificato.

V. Efficacissimæ virtutis in externis læsis & vulneratis partibus traumaticum, quod sanguinis & humorum fluxiones promte compescit, est solus spiritus vini, probe rectificatus, quo certe nihil præstantius, si partes nervosæ, tendinosæ sensibiliores, cum nimia sanguinis profusione sauciatae.

Nam spirituosa non solum succos, ut videmus in sanguine & lympha, coagulant, sed etiam nimium humidum absument, fibras tensas & strictas reddunt, easdemque arctius adducendo & sanguinis stasin atque stagnationem removendo, dolores atque inflammationes arcent atque avertunt. Nec ingloria est traumatica facultate nostro tempore aqua spirituo-
sa l'eau d'arquebousade dicta, quæ ex optimis herbis vulnerariis destillatione cum vino Rhenano in balneo Mariæ paratur, cujus tamen virtus spiritui ac vino potius, quam herbis, quarum effectus in fixiori terreo elemento reconditur, quod alembicum non transcendit, tribuendus.

CAPVT VII.

DE

SEDANTIBVS.

§. I.

*Sedanti-
um effe-
ctus in
genere.*

Consideravimus hætenus succincte ea remediorum genera, quæ roborando agunt, ubi motus solidorum systaltici deficiunt, eorum tonus dejectus & partes nervosæ ac fibrosæ ipsaque vasa nimis resoluta & relaxata sunt: nunc transeundum ad eorum classem, quæ nimis & effrenibus solidorum & fluidorum motibus componendis, sistendis atque sedandis, & spasticis partium stricturis dolorificis remittendis & solvendis, virtute qua gaudent dicata sunt. Quumque adeo multiplex & late patens sit effectus, ad hanc classem referenda quam optime paregorica, quæ laxant blande & demulcent rigidas fibras simulque acrimoniam obtundunt, anodyna, quæ dolorum fero-

ciam

ciam levant, antispasmodica, quæ spasticas strictureas leniunt ac solvunt, antepileptica, quæ motus convulsivos sistunt, hypnotica, quæ somnum conciliant, & narcotica, quæ conspicuum sensationibus stuporem ac motibus torporem inferunt.

§. II.

Hac itaque sedativa generali & speciali facultate splen-
 dent, radices: pœoniæ, valerianæ, artemisiæ; herbæ: hor-
 minum, basilicum, solanum, paris; flores: salviæ, fraxinellæ,
 acaciæ, ulmaria, sambuci, tiliæ, pœoniæ, papaveris rhœados,
 chamomillæ vulgaris, millefolii, rosarum, malvæ, liliorum con-
 vallium, primulæ veris, liliorum alborum & omnia ex planta
 papaveris, semen, cortices, flores, succus, opium & ex hyo-
 scyamo albo ejus semen, semen anethi, pœoniæ; cortex quo-
 que sambuci, tiliæ & thymiamatis; ex aromatibus: crocus,
 nucifsta, macis; ex fructibus nuclei ceraforum, persicorum,
 amygdalæ amaræ nux vomica. Porro asa foetida, camphora,
 nitrum depuratum & artificiale, cinnabarine, nec non ex ani-
 malibus deprompta, castoreum, moschus, zibethum, axungia
 canis, humana, taxi, vulpis, lac, cremor lactis, vitellus ovi, lum-
 brici terrestres, rasuræ ossium, ut cornu cervi, dentis hippopo-
 tami, ungulæ alcis, unicornu animalis, eboris, lapidis manati,
 corii humani. Ex chymicis denique & præparatis: liquor
 noster anodynus mineralis, spiritus nitri dulcis, tinctura sulphu-
 ris volatilis, laudanum opiatum Sydenhami, cydoniatum, hy-
 stericum, theriaca, diascordium Fracastorii, theriaca cælestis,
 massa pilularum de cynoglossa, de styrace, pilulæ Wildegansii,
 Starckii, sirupus papaveris rhœados, albi, extractum croci, flo-
 rum papaveris rhœados, chamomillæ, millefolii, oleum hyo-
 scyami, lumbricorum terrestrium, pulvis antepilepticus Dres-
 densis, cujus basis carbo tiliæ, item artemisiæ, specificum
 cephalicum Michaëlis, pulvis Marchionis, aqua antepileptica
 Langii & aquæ ex floribus superius recensitis destillatæ, nec
 non unguentum populeonis.

Theoremata.

Sedantia hæc variis modis efficaciam suam tam in fluida, quam solida perficiunt. Paregorica quidem blandis mucosis, sulphureis, tenuibus partibus, fibras a spasmo duras & strictas, ipso contactu relaxant, spicula vellicantia involvunt atque obtundunt, adeoque in doloribus, tumoribus dolentibus, acribus fluxionibus, in cataplasmate, emplastro, vel unguento apprime ex usu sunt, ut crocus, flores chamomillæ vulgaris, meliloti, liliorum alborum, sambuci, malvæ, papaveris, folia hyoscyami, lac, cremor lactis, vitellus ovi, unguentum populeonis, ad ambusta, quod optime paratur ex malva, cortice arboris tiliæ, sambuci, oleo lini, ceræ.

Antispasmodica, quia plurimi morbi & symptomata, ut in sectione prima pluribus ostendimus, a spasticis stricturis & crispaturis vasorum & fibrarum nervearum tanquam causa proxima gignuntur, amplissimi in arte usus sunt, non vero una eademque ratione munere suo defunguntur. vel enim ipsas fibras tensas, duras & constrictas immediato contactu molliunt atque remittunt, ut lac, præsertim asininum, oleum amygdalarum dulcium, emulsiões ex seminibus quatuor frigidis, amygdalis, pinguedines animantium, cremor lactis: vel blando sulphure vaporoso fluidi in nervis motum ferociorem complacant, qua virtute imbutæ aquæ ex floribus salviæ, fraxinellæ, acaciæ, tiliæ, sambuci, ulmariae, persicorum, liliorum alborum, chamomillæ vulgaris, primulæ veris, millefolii, nucleis persicorum, ceraforum, malorum Armeniacorum, cum aqua pluviali vel rore Maiali destillatæ, quæ ob vim antispasmodicam, in convulsivis & epilepticis insultibus cum fructu adhibentur. Vel etiam quædam antispasmodica sulphure quodam tenui vaporoso ex regno animalis, adeoque magis amico, effectum exsequuntur, ut lumbrici terrestres, castoreum, pulvis secundinæ humanæ, intestini lupi, viperarum, rasura corii & cranii humani, ungulæ alcis, dentis hippopotami, lapidis manati, nec non moschus

ſchus & zibethum , quæ in convulſivis & epilepticis motibus ac in ipſa etiam chronica epilepſia inſigni cum fructu uſurpantur.

Anodyna & ad dolores leniendos ſomnumque inferendum accommoda facultate inſtructa ſunt papavera- cea & quæ ex opio & croco , nec non cynogloſſa parantur , quæ vaporofa ſua ſulphurea exhalatione nervorum & membranarum tubulos pervadendo , impetuoſam fluidi nervei motum compescunt , & ſic non modo in parte affecta , ſed & univerſo corpore motus cordis quoque & arteriarum ſedatiores faciunt. Nam uti ſub nimio motu & agitatione membranarum cerebri & nervoſarum partium vigilia præſto eſt ; ita ſub earum quietiori & pacatiori ſtatu ſomnus obrepit.

Narcotica vero quæ torporem & ſtuporem ſenſibus ac profundiorẽ ſomnum inferunt , vapore ſulphureo ingrato & adverſo , quo motus fluidi nervei fere extinguitur , minus amice operantur , adeo ut in imbecillis lethalem ſomnum , in aliis etiam inſaniam excitent. Infamata hoc ſunt nomine omnia quæ ex hyoſcyamo tam nigro , quam albo , ſtrammonio & ejus ſpecie datura , ſolano ipſiusque pomis concinnantur.

Nonnulla etiam ex ſedativis ſpaſmos & dolores ſopiunt ſomnumque conciliant , cauſas impediẽtes auferendo , quæ virtute eminent quam maxime nitrum , purificatum vel artiſticiale , item cinnabarina & camphora. Nitroſa quippe tum æſtum , tum motum inteſtinum calidum partium ſulphurearum in ſanguine , componunt , ſolidas partes humectant motusque in iis exorbitantes quietiores reddunt , adeoque virtutem poſſident , refrigerantem , humectantem , anodynam & antiſpaſmodicam egregiam. Cinnabarina dextre uſurpata in compescendis motibus epilepticis & convulſivis , qui a lympha ſubſiſtente viſcida in cerebro & ejus ac membranis ſpinalis medullæ oriuntur , egregii uſus , quia eandem

(III.) Yyy lon-

longiori usu potenter liquant. Camphora, præsertim cum nitro mixta, egregie discutit inflammationes, quibus semper vigiliæ, dolores, quandoque etiam deliria juncta sunt, & sic virtutem antispasmodicam & sedativam exserit. Afa denique foetida & sagapenum, quæ gummata graveolentem spirant vaporem, in spasminis intestinorum sedandis, qui feminas in malo sic dicto hysterico mire excruciant & affligunt, duplici modo suam efficaciam exserunt, partim quod spasmos ac dolores sopiant, partim etiam quod saponaceo gummoso acrisale humores tenaces resolvant & obstructions glandularum & minimorum tubulorum referent.

Corollaria practica.

I. Magnæ igitur sunt efficaciæ hæc sedativa, quæ subito etiam in exili mole sua perficiunt, ob agilissimum elementum, dum sulphurea vaporosa exhalatione, penitus in interiores poros & partium solidarum tubulos pervadunt & insignem in mobilissima, quæ sensum & motum partibus foenerat lymphæ, mutationem, ad motus effrænes complacandos, efficiunt. Sed uti in omni remediorum genere, leniora & mitiora, ceu securiora & naturæ magis amica, fortioribus magisque activis præferenda sunt: ita eadem cautio in antispasmodicorum, anodynorum & sedantium usu solícite tenenda & serio inculcanda; nec unquam facile ad validiora, ut opiata, descendendum est, ubi leniora, aquæ ex floribus suaveolentibus hypnoticæ, vel emulsiva ex semine papaveris, vel etiam nitrosa, cinnabarina & castorina sufficiunt.

II. Et licet opiata, per adjecta purgantia & balsamica, ut in pilulis Starkey, Wildegansii, vel per alexipharmaca, ut in theriaca cœlesti, diascordio Fracastorii, vel per analeptica, ut in laudano liquido Sydenhamii, correctæ, cum prudentia adhibita, virtute & usu eximio non destituantur; attamen si alia suppetunt securiori modo operantia præsidia, quibuscum idem effectus obtineri potest, præstat

ab illis abstinere, præsertim ubi debilia corpora, ætas senilis, infantilis & vires variis de causis prostratæ. Longe autem magis ab his cavendum, quibus narcotica admixta, ut sunt pilulæ de cynoglossa, præter opium etiam semen hyoscyami habentes, quibus tamen nostro tempore frequentius utuntur quibus opiata alias mirum exosa; ego vero non semel etiam ab harum usu pessimum notavi effectum.

III. Utut olim opiatis correctis ipse quoque frequentius usus sim; ex quo tamen, divina benignitas mihi concessit inventionem liquoris penetrantis & fragrantis aromatici saporis & odoris, ex ipsius vitrioli portione sulphurea, quæ etiam a veteribus Chymicis pro anodyna habita est, singulari quadam chymica encheiresi præparandi, ab omnibus aliis tuto abstinui. Hic quippe spiritus, quem liquoris anodynæ mineralis nomine insignire soleo, totus sulphureus est, subito & flagrantissime ardet atque absumitur & ocyssime a flamma candelæ, etiam tribus adhuc digitis remotus, flammam concipit, atque in calido conclavi subito in auras avolat; attactu tamen instar glaciei est frigidissimus, ac probe destillatus & rectificatus, omni aquæ instar olei supernatat. Usus vero hujus remedii amplissimus est & virtus multiplex, dolores quippe egregie levat & somnum conciliat, unde summo cum fructu in atrocibus colicæ, calculi, cardialgiæ & podagræ, capitis & dentium doloribus usurpatur. Sudorem quoque movet, ac licet ipse sit calidissimus, non tamen sanguinem commovet. Nullum præterea torporem nullamque debilitatem in capite relinquit, eamque ob causam omnibus imbecillis, ubi vires summe prostratæ, ut in hæctica febre, non sine fructu, & quod mirum, virium incremento, dari potest. Et quia ejus actio prima & præcipua in stomachum, in omnibus ventriculi morbis, nausea, inflatione hypochondriaca, asthmatica, cardialgia, incomparabilem flatibus exitum parando, edit virtutem.

CAPVT IIX.

DE

SPECIFICA QVORVNDAM REMEDIORVM IN CERTIS MORBIS EFFICACIA.

S. I.

*Dantur
Specifica.*

R Ecenſuimus haſtenus omnis generis quæ ad præſervandum & curandum faciunt remedia ſelecta & optima, eaque ſuccincte in certas claſſes ratione virium quas exſerunt & elementorum quibus agunt in genere rede-
gimus. Quum vero attenta in artis exercitio obſervatione compertum habeamus, nonnulla ſanitatis præſidia peculia-
rem, ſpecialem, ſive ſpecificam præ aliis in certis affectibus poſſidere facultatem, eaque propter etiam uſu & utilitate reliquis jam notis merito eſſe præferenda: utilem & gratum me præſtiturum laborem judicavi, ſi ea, quæ longo uſu explorata & in certorum morborum curatione ſpectata virtutis auxilia, enumerem & paullo ſpecialius evolvam. Non autem, ut vulgi Medicorum opinio fert, ſpecifica nobis audiunt ea remediorum genera, quæ ſemper, in omnibus ſubjectis, certo & indubitato ſalutarem in morbis exſerunt effectum, & nunquam medentis ſpem eludunt. Ejusmodi enim virtutis medicamenta nullibi ſunt reperiunda, & falſa utique eſt perſuaſio, quaſi operationes atque effectus formaliter inſint pharmacis & ab his tantummodo perficerentur, qui demum ex actione medicaminis, & reactione ſive ſynergia ipſius corporis, reſultant. Omnia quippe medicamenta agunt non tantum ſecundum ſphæram activitatis ſuæ, verum etiam

rece-

receptivitatem subiecti, ut, si idem remedium, eodem morbo decumbentibus decem personis obtuleris, alius atque alius & differens in singulis consequatur effectus.

§. II.

Fallax igitur, inanis & dubia est vulgaris illa de panaceis, arcanis & specificis contra hunc vel illum morbum præfidiis dolosa jactatio: & potius per specifica sic dicta medicamenta nulla alia intelligenda esse inculcamus, ac ea, quæ ejusmodi agendi viribus instructa, ut ad hunc vel illum morbum sanandum efficaciora sint magisque proficua. Nonnulla quippe ejus indolis elementa complectuntur, quorum singula ad expugnandam morbi causam aliquid conferunt, ut ex iis mixtum pluribus simul in morbo curandi indicationibus satisfaciat. Exemplo sit rhabarbarum, quod aliis laxantibus omnibus in diarrhoeis palmam præripit, eo quod non modo evacuat, sed & amaritie balsamica acidus & causticos succos cicurat atque contemperat, ac demum cessante purgatione, tonum intestinorum laxum nimis atque remissum, ob terreas subadstringentes quas recondit particulas, firmat iterumque adducit. Pariter manna in pectoris affectibus & tussi stomachali, quæ a cruditatibus acidis ortum trahit, ad repurgandam primam regionem, ob insitam, præter laxantem virtutem, ipsi dulcedinem copiosam, corrosivos, acidus & acres humores obtundentem ac demulcentem, omnia alia alvum subducentia longe antecellit. Alia remediorum hanc ob causam dicuntur specifica, quod eorum virtus in certo morbo ad certum edendum effectum, longa experientia innotuit & abunde confirmata est. Hinc cortex chinæ specificum in sistendis intermittentium paroxysmis, opium in doloribus levandis, mercurialia in expugnanda lue venerea. Quædam specificorum nomen gerunt, quia partibus morbo affectis magis amica sunt easdemque virtute sua quam maxime afficiunt. Sic partes nervosæ & membranaceæ cum ipsis nervis medicamenta subtili, aromatico, fragrante oleo imbu-

ta quam optime ferunt, minus vero narcotica, opiata & constringentia. Ventriculus acidis delectatur, ut iis perfusus melius appetat & digerat; contra ea pulmonum bronchia ab iis offenduntur & ad spasmos exstimulantur. Cantharides & insecta sale volatili caustico prædita, nec ventriculum, nec intestina afficiunt; renum autem tubuli urinarii, uretheres cum vesica ipsaque urethra, ab iisdem vellicantur & spasticis agitantur stricturis.

§. III.

In febris inter-
mittenti-
bus in
genere.

Sic concipienda virtus specificorum, quorum usus Medico frequens & in pretio esse debet: jam specialius paullo quæ ex ipsis his vel illis vitiis dicata sint & magis appropriata dispiciemus. Et ad febres quidem intermittentes, maximeque earum paroxysmos compescendos, cortex chinæ nostro adhuc tempore quam maxime celebratur, hanc ob rationem, quia præter adstringentem & febriles motus sistentem virtutem, quam cum aliis pluribus, ut vitriolaceis, aluminosis, radice tormentillæ ac bistortæ, communem habet, ob amaricans balsamicum elementum, morbificam materiam corrigente & solida languentia firmante efficacia, splendet. Potest autem hic cortex vel in substantia propinari, vel in essentiam aut electuarium redigi, vel etiam, quod optimum, vino Rhenano infundi & leniter decoqui. Pariter ad specifica intermittentium referri solent flores chamomillæ vulgaris, a *Baglivo* mirum dilaudati, dum ob insitam amaritiam & oleum, & vim antispasmodicam in febribus quam maxime proficuum & leniter etiam constringentem tonicam obtinent. Quod si vero pertinaces sunt hæc febres & mirum refractariæ, in causa plerumque magnæ istius glandulæ pancreaticæ obstructio, ad quam tollendam mercurio dulci, regulo antimonii medicinali & sulphure antimoniali correcto, dextre ac prudenter usurpatis, nihil efficacius.

Contu-
macibus.

§. IV.

Quarta-
na.

Speciatim in quartana peculiari quadam efficacia splendet

det essentia rhabbari & gentianæ, cum lixivio salis tartari & spiritu salis ammoniaci urinoſo parata. Etenim in hoc febre hepar & ejus vaſa ſanguine craſſo, ductus biliarii ſpiſſa & lenteſcente bile, ac primæ viæ cruditatibus acidis eminentius confertæ ſunt, eaque propter hoc medicamentum dum acidos ſuccos contemperat & quaſi dulcificat, ſtagnantem cruorem cum lenteſcente bile reſolvit atque attenuat, inertem quoque bilem debita baſſamica indole imbuat & ſimul blande alvum vacuat, omnibus aliis merito antepoſitum. Quando autem hæc febris adeo obſtinata & contumax eſt, ut omnia alia remedia eludat, mercurius dulcis, vel diaphoreticus, rite præparatus, efficaciffimæ virtutis medium, nec non antiquarium Riverii, quod pariter mercurio virtutem debet. Ac licet mercurialia exhibita etiam ſalivationem moveant, eadem tamen non pertimeſcenda, aut periculofa eſt, ſed potius ipſa ſuccedente febris ſæpe conquieſcit.

§. V.

Inflammationibus omnibus, quæ ſemper febre ſtipantur, nunquam periculo carent & plerumque in partibus nervoſo-membraneis conſiſtunt, ut cerebri & ventriculi membranis, pleura, bronchiis pulmonum, ſingulari quadam efficacia medentur nitrum purificatum cum momento camphoræ permixtum, demulcentia, leniter anodyna, emulſiva & diaphoretica fixiora. Inprimis nitrum in omni æſtu febrili reſtinguendo omnia alia antecellit, eo quod præter virtutem, qua motum inteſtinum partium ſulphurearum in ſanguine figit ac complacat, obhæreſcentem quoque in vaſorum anguſtiis ſpiſſeſcentem ſanguinem ac lympham ſolvit & fluxilem reddit & ſimul fibras rigidas & tenſas humectando relaxat, adeoque antiſpaſmodicam exſerit virtutem.

§. VI.

Ubi maligna, hoc eſt in putredinem prona, humori-
bus ineſt diſpoſitio, vel etiam per contagium ejusmodi mi-
aſmata illata, quæ ad inducendam corporis ſuccis putridam
cor.

corruptionem aptissima, in acutis non minus, quam chronicis, ego quidem camphora, præsertim nitro nupta, nihil deprehendi præstantius. Hæc quippe balsamica sua vi, crasin & mixtionem conservat atque tuetur, vim fermenti infringit, & perspirationem sine sanguinis exæstuatione intendendo, eliminationem sordium per cutis spiracula egregie promovet. Quod si febris vel inflammatio malignitati complicata, camphora nunquam sola, sed semper nitro remixta exhibenda. Ad vires autem in omnibus fere, ac potissimum malignæ indolis morbis, penitus prostratas, refocillandas, cortice citri, ob oleum quod complectitur, vix datur præstabilius, nec non cinnamomo ejusque aqua, non tamen spirituosa, sed cum succis fragrantibus, ut fragorum, rubi idæi & cerasorum, destillata. Ubi febris abest, oleum cinnamomi & cum eo artificiose confectum elæosaccharum, ad reparandas vires egregii usus. In ipsa peste, morborum maxime maligno, summum alexiterium dici meretur acetum, vel simplex, vel cum radicibus alexipharmacis & cordialibus artificiose præparatum. Succus quoque limonum, item pomorum citri, sirupus acetositis citri, cum oleo de cedro conditus, ut acida, potenter resistunt putredini, cujus matrix & fomentum est principium alcalino-sulphureum exaltatum, ad humorum & proportionis mixturæ in iis dissolutionem corruptivam tendens.

*Ipsa
peste.*

§. VII.

*Dolori-
bus car-
dialgicis,
colicis &
calculo.*

Accedunt dolores, qui si ex spastica strictura oboriuntur, ut cardialgia, colica & ex calculo, liquor noster anodynus mineralis omnibus palmam præripit, utpote qui non solum blande anodynam & discutientem, sed etiam, quod aliis sedantibus plane negatum, roborantem egregiam facultatem custodit. Ubi flatus restagnant & incarceratis iis nervæ ventriculi & intestinorum tunicae cum exquisitis torminibus distenduntur, corticibus aurantium, floribus chamomillæ, carvo & cymino, salubri discutiente effectū nihil superius, eo quod

quod propter subtile vaporosum quod recondunt oleum, anodynum & mitigantem, ac propter amarum, aromaticum, acre, fragrans elementum, roborantem & tonicum effectum exsequuntur, quo fit, ut postea flatuum causa & nuñera, cruditates scilicet, commodissime possint ejici.

§. IIX.

Neque etiam in aliis dolorum generibus probatissimæ *Rheumatis* virtutis auxilia deficiunt. Sic cruciatus artuum scorbuticos, *tum.* rheumatismos, arthritidem vagam egregie levant lumbrici *arthriti-* terrestres, vel succus ex ipsis expressus, vel pulvis illorum, *de.* præsertim cum absorbentibus, cinnabari & nitro remixtus, ac cum lacte asinino, vel sero lactis, largius & diutius usurpatus. Pulvere quoque antimonii crudi, si successive a minori ad majorem dosin ascendendo, a granis circiter decem ad drachmæ dimidiæ pondus, quotidie assumatur, interposito leniori ex temperatis lignis decocto, diurnas rheumaticas passiones & tractiones artuum molestissimas vidi sanatas. Ad podagram porro expugnandam commendabilis quam ma- *Podagra.* xime lactis asinini usus, priscis etiam teste *Plinio & Dioscori-* de frequentissimus. Neque minus podagricos egregie solatur decoctum ex radice artemisiæ, scorzonera, sarsaparillæ, chinæ, liquiritiæ, polypodii & hermodactylis, liberalius & aliquandiu haustum. In odontalgia rob sambuci interius *Odontal-* ad unciam unam cum jusculo ad diaphoresin proritandam *gia.* assumtum, & exterius in cerevisia solutum, qua cum os subinde colluitur, specificam certe & præsentaneam opem vexat-
is confert.

§. IX.

Pathemata hypochondriaca & hysterica multum aff- *pathe-* finitatis alunt, & atrociam suam exerunt maxime inflando *maribus* & spasmodice contrahendo intestina ac demum universum hypo- nervorum systema in consensum pertrahendo: habent ta- *chondri-* men spectata & experta quibus complacantur præsidia. Hæc *cu & hy-* inter præter thermas & acidulas, cum balneis & motu cor- *sternis.*

(III.)

Zzz

poris,

poris, tanquam potissima, connumeranda etiam gummata & medicamenta inficeti odoris, ut asa foetida, lagapenum, opoponax & castoreum, quæ vel sola in pilularum formam compacta, vel melius cum purgantibus, ut aloë correctæ, extracto rhabbari, hellebori nigri, myrrha & croco remixta, & crebrius, moderate tamen, usurpata, mirifice obvios spasmos complacant, tonum nervearum partium firmant & simul viscidos, tenaces humores colliquant & blande evehunt.

§. X.

In affectibus capitis & nervorum.

In affectibus capitis & maxime nervorum, qui ex imbecillitate cerebri & totius systematis nervosi viriumque languore ortum trahunt, in hemiplexia scilicet, paralyfi, sensuum imminutione, torpore & stupore actionum animalium, auditus difficultate, aurium tinnitu, syncope, vertigine, ventriculi & intestinorum debilitate, nec non diarrhœa & vomitu, nullum certe præstantius & præsentius mihi innotuit remedium, quam quod ex oleis cephalicis & aromaticis genuinis concinnatur balsamum liquidum, vitæ dictum, usu tam interno, quam externo, longe spectatissimæ facultatis.

§. XI.

Insania.

Præterea insanix, tam furibundæ, quam melancholicæ, præter sanguinis missiones, acidularum & thermarum usum nec non emetica, nonnulla speciali quadam efficacia dicata celebrantur. Prisci ipseque *Hippocrates* hunc in finem utebantur quam maxime helleboro albo, cujus virulentiam *Alpino lib. de method.* teste, ita cicurabant, ut eundem cum oleo vel etiam oxymelite decoquerent & antequam propinarent lac largius potui præberent: sed exolevit jam penitus hic helleborismus, hanc forsan ob causam, quod recentiores helleborum colligendi & exhibendi genuinum modum ignorarint, de quo videatur *Schulzii dissertatio de helleborismis Veterum*. Neque tamen negandum, quod in helleboro lateat adversus deliria ipsamque insaniam virtus, in-

primis

primis si ejus usus venæsectione & balneis ex aqua dulci, in omni amentia proficuis, secundet. In ea vero mentis emotione, quæ potius ab animi affectuum vehementia, quam hypochondriorum obstructione oborta, lac asininum, nitrum & sanguis asininus, in pulverem tritus, eximiam demulcentem, effrenes nervearum fibrarum strictiones sedantem possident facultatem, & inter initia saluberrimam præstant opem, eo certior, si clima mutetur & occasiones ad animum exæstuantum sollicitè evitentur.

§. XII.

Epilepticum malum quo truculentius & vel aspectu *Epilepsia.* horribilius, eo magis medentes solliciti fuerunt de præsiidiis ad abigendum illud. Et certe quamplurima passim quidem circumferuntur specifica antepileptica; sed ad meliora ac certiora suppetant pulvere lumbricorum terrestrium, cinnabari, pulvere secundinæ humanæ, rasura cranii humani, ungula alcis & corio humano, ego quidem vix crediderim. Hæc autem sicuti in epilepsia idiopathica & chronica conducunt; ita in symptomatica, palmam utique fert liquor noster anodynus mineralis, epilepticos egregie componens insultus.

§. XIII.

Ubi vesicularis & vasculosa pulmonum compages *Asthma-* crassa, tenaci pituita firmiter inhærescente farcta & obstituta *re.* in asthma, gummi ammoniacum, balsamus Peruvianus, crocus, opoponax, vel in pilularum consistentiam, vel cum tinctura tartari in essentiam redacta, usum atque utilitatem præstant incomparabilem. Quando autem pulmones phthi- *Phthisi.* sica labe affecti, si qua salutis spes, eadem quam maxime a lacte asinino, vel solo, vel fonti Selterano, qui idemtidem pulmonum vitiis apprime proficuis, confuso, expectanda. Neque minus hoc nomine commendationem meretur sulphur stillatitium purum, inprimis si cum pinguedine animalium, ut axungia humana, vel pinguedine canis recenti,

item spermate ceti dissolvatur, & ad stomachum roborandum aliquot balsami de Copaiva, olei ligni assafras & foeniculi guttulæ, adjiciantur. Ea quippe sulphuris facultas, ut non modo partibus languentibus robur addat, sed & simul dissolvat & discutiat spissiscentes succos, qua certe in pulmonum affectibus, exulcerationibus, tuberculis, vomitis, ex stasi & condensatione viscosi & caseosi mucilaginosi, ex chylo præcipitati succi, obortis, egregie opitulatur.

§. XIV.

Hydrope.

Præter phthisin hydropes difficillimis & fere insanabilibus morbis annumerantur, si tamen sanationem adhuc admittunt, elaterium certe apud Veteres magnæ famæ medicamen, quod per superiora & inferiora, si recte adhibetur, aquas educit, & corpore prius rite præparato humoribusque fluidis redditis, præmissis quoque & sub ejus usu exhibitis emollientibus ac oleosis, vix efficacia par obtinet. Quia vero etiam urinæ fluxu hydropicus tumor absûmitur atque abigitur; pulvis cantharidum cum sale tartari mixtus, additis aliquot ad arcendam inflammationem nitri depurati granis & uno camphoræ, diuresi movendæ largissimæ apprime inservit, modo humores ad hanc dispositi sint excretionem.

Ictero.

Icterus quoque malum sæpe valde contumax est, sed præter emetica, quæ efficaciter in ductus biliarios agunt, congrua dosi & opportune adhibita, rhabarbarum, radix curcumæ & rubiæ tinctorum, præsertim si in aqua & vino, adjecto nitro & sale tartari, decoquantur, in regio morbo singularem prorsus edunt effectum, quem etiam infusum corticis medii sambuci, nisi corpus nimis debilitatum, viscidam bilem colligando & calculos ex canalium biliariorum alveis eliciendo, exsequitur.

§. XV.

Calculo.

In calculosa renum dispositione spectatissima infusi summiratum millefolii est facultas, quando quis eo crebrius & diutius utatur. Nec eximia deneganda virtus fragis exsiccatis, fru-

fructibus alkekengi, cynosbati, semini dauci, ac potissimum cortici radici acaciæ, si vel cum infuso ex aqua, vel cum spiritu juniperi temperatiori, sumantur. Inest enim ipsis virtus quædam traumatica, leniter balsamica & subadstringens, qua remissum tubulorum renalium tonum egregie firmant, substantiam renum exulceratam & ex parte dissolutam continent atque percurant. Amygdalis autem amaris, ob anodynum oleum, nec non oleo amygdalarum dulcium, sub ipso cruciatuum paroxysmo demulcens & mitigans longe eximia inest virtus.

§. XVI.

Affectus sequiori sexui solennes, ex uteri & maxime *Mensium* mensium vel lochiorum vitio, præter aloën correctam, myrrha, croco, succino, castoreo & aristolochia rotunda, debita ratione in pilularem formam redactis, optime excipiuntur, eamque ob causam in iisdem nostro jam tempore maximam hoc nomine adeptæ sunt famam pilulæ Becherianæ & omnes ad earum exemplar paratæ. In virili autem sexu ad *Et hæ-* corrigenda hæmorrhoidum vitia, post mannam, infusum vel *morrhoi-* decoctum summitatum millefolii saluberrimi effectus; eo *dum vi-* quod hæc planta subtile, spasmos leniens atque demulcens *tis.* oleum recondit, quod multum ratione saporis, odoris & maxime coloris cærulei, convenientiæ alit cum oleo chamomillæ.

§. XVII.

Intestinatorum canalem graviter exagitat ipsumque *Dysen-* corpus innumeris pæne sedibus ferme exhaurit dysentericus *teris.* morbus, contagio infestus & ingentem sæpe stragem edens, qui pariter non quibusvis in alvi fluxibus proficuis, sed singularibus plane abigitur penitusque extirpatur auxiliis. Nimirum radix illa Americana ipecacuanha, experientia teste maximum antidyntericum, si modo initiante adhuc morbo, iusta dosi, semel, vel bis, aut ter exhibeatur. Postea vero præter alia acrimoniam obtundentia, blanda dia-
 Zzz 3 pho.

phoretica & temperantia interne & externe adhibita, itemque rhabarbarum, ceu optimum laxans, cortici chaccarillæ certissima flaccidas intestinorum fibras roborandi & motus effrenes sedandi inest efficacia.

§. XIIX.

Vermibus

In intestinis quoque vermes varias ludunt tragœdias & horrenda sæpe excitant symptomata, quibus extirpandis nonnulla peculiari quadam dicata sunt virtute, Græcis ob id anthelmintica vocata. Sed licet horum eximius circumferatur apparatus, non omnia tamen æque expectationi respondent, & nulla magis probatæ efficacix sunt ipsa asa foetida & sagapeno, præsertim si hæc cum purgantibus, ut mercurio dulci & extracto rhabarbari in pilularum forma dentur, hac cum cautione, quo ante & post hujus virtutis pilularum usum, aliquot cochlearia olei olivarum, vel amygdalarum dulcium ingerantur, quod certe vermibus, ut omnia oleosa, quam maxime infernum, & fibras intestinales a vermium arrosione spastica strictura affectas, egregie mulcet, ac efficit, ut verminosa progenies per ani secesum exturbetur. Asa quippe foetida & sagapenum nidore suo quem dispergunt adverso, vermes fugant, haud secus ac de allio domesticis & agrestibus experimentis constat. Semen autem cinæ, item santonici & herba tanacetæ, utiliter etiam contra vermes quidem usurpantur, sed non aliter agunt, quam quod putredinosæ coluviei, quæ vires frangit lentumque infert calorem & languorem, resistent & simul tonum intestinorum firmando expulsionem faciliitent ac juvent.

§. XIX.

*Nimius
hæmor-
rhagiis.*

Quando nimium sanguinis, ubicunque sit, ex apertis vasorum osculis effunditur, prompta ope & præsentaneis remediis opus est, ne graves inequantur passiones. Ac tum quidem ad compescendum cruoris stillicidium nitro in aqua communi soluto & successive oblato, nec ad arcendam novam hæmorrhagiam, pulvere dentis hippopotami, repetitis maxi-

maxime vicibus, vix quicquam præstabilius. Prodest tamen etiam massa pilularum de cynoglossa, ad grana sex vel octo, quæ ob cynoglossam, opium & semen hyoscyami narcotica virtute pollet, ac sensum solidorum exquisitiorem obtundendo, efficit, quo minus per spasmos sanguis impetuose ad certum quendam locum urgeatur ibique exprimatur. In *Seminis* seminis fluxu, præsertim virulento, vix melius & præsentius *fluxu.* suppediit præsidium terebinthina Veneta ejusque oleo æthereo, vel loco hujus balsamo de Copaiva aut Mecca, quæ si cum vel sine camphora, in emulsione ex seminibus quatuor frigidis, lacte, vel sero lactis, post congruorum purgantium, præsertim mercurialium usum, propinantur, incomparabilem præstant efficaciam.

§. XX.

Excipiunt morbi ex humorum impuritate oriundi, quæ *Scorbuto:* maxima in scorbuto. Est hoc malum maxime endemium, a pravo victu, sub coelo frigido & humido, prognatum, & a vita sedentaria atque moerore maxime exacerbatur; longa tamen experientia comprobata adversus illud remedia sunt sic dicta antiscorbutica, trifolium fibrinum, cochlearia, beccabunga, nasturtium, radix armoraciæ, quorum effectus eo magis exoptatus certusque, si succus ex ipsis expressus cum sero lactis ex nostra præparatione dulci, vel etiam lacte caprillo, disposito prius corpore, assumitur. Quod si scorbutus jam inveteraverit & doloribus stipetur, strobilos pini in sero lactis decoctos, addita medulla & pinguedine ex ossibus boum & vitulorum, continuato aliquandiu usu, eximie superias tulisse novi.

§. XXI.

Truculentus ille luis venereæ nomine qui insignitur *Lue ve-* morbus, vix funditus ex interioribus quibus insidet partium *nerea.* latibulis eradicari poterit, nisi admissis specificis, inter quæ argentum vivum, lignum guaiacum cum cortice ipsumque antimonium rite præparatum primas tenent. Nullum in

toto

toto rerum naturalium censu suppetit pharmacum, quod tam potenter universam lymphæ & humorum massam in motum cieat & largissimum salivæ ad aliquot interdum hebdomades durantem fluxum cieat, quam ipse mercurius, qui corpus subiens, ob specificam in minimis etiam moleculis omnibus succis superiorem gravitatem, ad intima corporis pervadit & per angustias tubulorum strenue eluctans, obstructions in iis solvit, simul quoque humorum corporis crasin penitus immutat eisdemque intestino quodam motu putredinosam quasi inducit colliquationem, & hac ratione, licet non sine summa molestia & quandoque etiam periculo, gravissimum hunc morbum aliasque chronicas contumaces, ex seri spurcitie ortas passiones, expugnat. Tutissimum autem ex mercurialibus salivandi scopo usitatis est ipse mercurius dulcis, si absorbentibus nuptus, per aliquot dies exhibeatur, ascendendo a minori, ut quinque granorum dosi, ad maiorem, duodecim scilicet granorum, donec saliva liberaliter fluere incipiat, observato simul convenienti diætetico regimine. Guaiacum sale subtili acri resinoso, quo aquam cui incoquitur imbuat, fibras vasorum & tunicas vellicando, totam humorum & lymphæ massam ad auctiorem progressum adigit, quo tenaces succi resolvuntur & obstructions referantur.

§. XXII.

Cutis de-
sedatio-
nibus.

Plica Po-
lonica.

Ad lepram, herpetem & scabiem mali moris, nec non alias cutis defoedationes & ulcerationes, optimum auxilium ex viperis earumque decocto, nec non antimonio, ac præcipue ejus sulphure diaphoretico, peculiari enchiresi confecto, iperandum. Plica quoque sic dicta Polonica, restitans aut præpostere abscissa, gravia invehit pathemata, ad quæ abigenda laudata virtus decocti herbæ & seminis lycopodii, quo caput sæpius tepide abluendum; quandoquidem hac ratione serum illud viscidum excrementitium, cerebrum & caput moleste afficiens, per cutis qua caput tegitur tubulos ipsos

ipſosque crines ſalutariter ejicitur. Oculos ſi infeſtat ſalſa & *Epiphora*
 calida deſluxio, cui rubedo juncta, in ſic dicta epiphora, &
 noctu præſertim palpebræ a viſcoſo humore conglutinantur,
 pauxillum, & vel unum granum, vitrioli albi, cum butyro
 recenti ſubactum & orbitæ oculi majori inditum, admirabi-
 lem fert opem & promte vitium abigit. Pelliculam viſum in- *Pellicula*
 tercipientem recens viperarum pinguedo oculo inſtillata prom- & *gutta*
 te abſtergit; & guttam ſerenam incipientem egregie diſcutit *serena*.
 ſulphur antimonii interius aſſumptum.

§. XXIII.

Quando partes contractura & rigiditate afficiuntur, ni- *Contra-*
 hil præſentius eſt, quam membra afflicta crebrius in animalia *tura*.
 recenter diſſecta & adhuc calentia immittere, quo blando,
 oleoſo & naturali calido vapore foveantur fibræ tenſæ & mol-
 liantur. Ubi poſt lapſum aut gravem contuſionem ac percuf- *Sanguine*
 ſionem partium externarum, ſtagnantes & coeuntes humores *congru-*
 & ſanguis varia creant incommoda, decoctum vel inſuſum ar- *mato*.
 nica omne fere curationis punctum abſolvit, ob ſingularem qua
 pollet incidentem, reſolventem & diſcutientem efficaciam.

§. XXIV.

Ultimo loco dum de ſpecificis ſermo eſt, non præter- *Ad longa-*
 mittendum laudatiſſimum illud & admirandæ prorfus ad va- *vitatem*.
 letudinem tuendam & longævitatē conſequendam præſi-
 dium diæteticum, Veteribus tantopere celebratum, lac aſi-
 ninum. De hujus efficacia longe ſaluberrima peculiari egi
 diſſertatione *de mirabili lactis aſinini uſu in medendo*, in qua
 pluribus, quibus morbis debellandis ejus potus proficiuus ſit
 atque accommodus, & rationibus & exemplis expoſui.
 Quam ſingulari autem virtute ad prolongandam vitam polle-
 at, luculentum eſt *Patini* teſtimonium *tomo II. epistolæ. pag.*
213. & dignum quod totum verbis latine redditis tranſcriba-
 tur: *precor, ait, Summum Numen, velis conjugii Tui perfe-*
ctam largiri ſanitatē. Elapſo decennio, lac aſininum erit admo-

dum salubre, quod ut ipsi ex voto proficiat, opto. Si ipsam ad sanitatem reducere possem, cras statim Lugdunum properarem, quod vero nimis procul remotum. Galenus quidem ad Stabiam montem agrotos suos ablegabat, unde sani redibant, id quod confirmatum habeo nummo Imperatoris Geta, quem Carolus meus aservat, signato imagine vaccae, qua hujus montis accolae lactis præstantiam indicare voluerunt. Suppetit etiam nobis Lutetia lac asininum optimæ notæ. Socrus mea, quæ octogesimo quarto anno apoplexia interiit, hoc per integros sexaginta annos usa est. Paruer a vigesimo secundo ætatis anno hoc lac potavit Domini consiliarii Laurentii mater, elapso anno, octogesimo septimo anno denata. Hujus soror, vidua Andrea Laurentii, Anatomici, idem fecit & ad octogessimum quintum annum pervixit. Et certe apud nos egregiam præstat opem, vere maxime & autumnis, imprimis ad arcendos morbos. Ego tamen ejus usum nemini suadeo, nisi viscera clementi & accommoda purgatione depurata prius fuerint ac preparata.

§. XXV.

*Specificæ
non pro-
miscue
juvant.*

Atque hæc sunt selectissima & usu comprobata ex omni remediorum censu. Monendum tamen, quod quum hæc ipsa, ut supra jam inculcavimus, neutiquam viribus polleant absolutis, sed relativis & certis conditionibus ac circumstantiis limitatis, in eorum usu harum imprimis exquisita habenda sit ratio, quo speratus respondeat effectus. Deinceps singularis efficaciam hæc quidem recte usurpata sunt remedia, sed nihil certe juvant, nisi prius corpus probe fuerit præparatum, & obstacula, quæ virtutem intringere aut impedire possunt, remota. Hinc quando sanguis in venis redundat & primæ viæ sentina sordium obsessæ, necesse est, ut sanguis prius subtrahatur, & prima corporis regio a crudorum, biliosorum & recrementitiorum succorum saburra repurgetur ac depleatur.

§. XXVI.

§. XXVI.

Neque etiam existimandum, specificis usurpatis, nul-^{Materia}lis plane aliis internis vel externis mediis, ad corrigendam hu-^{vitiosa}morum vitiosam qualitatem & evacuationem destinatis, opus ^{corrigen-}esse. Etenim hæc specificæ virtutis medicamina, efficacia^{da.}sua non tam materiam quæ in vitio est, quam potius ipsum motum afficiunt eumque ad naturalem successum reducendo juvant, quod tum demum quam optime perficitur, quando causæ morbificæ materiales sublatae, & præmissis, quæ temperando, resolvendo, discutiendo & obstructions expediendo humorum corrigunt vitia, appropriata debita proportionem, opportuno tempore & modo convenienti in ulum vocantur. Inprimis eo cura dirigenda, quo primæ viæ vacuæ ^{Prime}sint succis viscidis impuris, quibus oblatis medicamenti vis ^{via re-}quam maxime obtunditur, vel plane suffocatur, quum his ^{purgan-}expurgatis, integra & salva sua textura ex voto agat & in ven-^{da.}triculi ac intestinorum substantiam nervosam virtutem suam edat, eodem modo ac de emeticis, purgantibus, opiatibus, analepticis omnibusque quæ exili mole magnum edunt effectum, constat.

§. XXVII.

Denique in specificorum usu accommodata servanda ^{Et con-}methodus, ita quidem, ut artifex non solum tempus, dos ^{grua me-}ac regimen teneat, sed etiam quamdiu iisdem insistendum & ^{thodus}quæ victus ac vivendi ratio simul injungenda, exacte calleat. ^{servanda.}Etenim methodus medendi specialissima, quæ unice in medentis prudentia, judicio, diligenti attentione, meditatione & observatione naturæ ægrotantis consistit, tanti ad ipsum effectum est momenti, ut ipsis specificis & appropriatis solis longe sit anteposenda, & sine ea remedia, quantumvis egregia, alienæ & infructuosæ sint operationis, nec quicquam solidi in arte præstari queat. • Et hæc quicumque studiose observat omnia, is certe desiderato potietur fine, quantum scilicet malo plus valet ars nostra salutaris.

CAPVT IX.

DE

VENAESECTIONE ALIISQVE
SANGVINEM SVBTRAHENDI
MODIS.

§. I.

Prosteaquam igitur plura & selecta remedia, quæ inter-
no usu, cum in præcavendis, tum sanandis morbis,
rite adhibita egregium præstant usum atque utilita-
tem, fusius exposuimus: ordo rerum dicendarum exi-
gere videtur, ut jam etiam de illis agamus præsidis, quo-
rum usus legitimus externus plurimum in medendo valet.
Inter hæc vero primum atque præcipuum locum jure obti-
net sanguinis subtractio, sive per venam sectam, sive alios
modos facta. Et venesectionis quidem tanta certe est effica-
cia atque utilitas, ut si effectum celerem & egregium quem
præstat, spectemus, revera omnia interna in morbis, tam
avertendis, quam sanandis, longissime exsuperet. Neque ul-
lum remedii genus est, quod & operationis celeritate & to-
lerantiæ facilitatē se ita commendet, & quod a primis fere Me-
dicinæ incunabulis tam frequentis & laudati fuerit usus, quam
sanguinis per venam sectam evacuatio. Antiquissimus artis
nostræ parens *Hippocrates* eam nullo fere in morbo intermi-
sit, & Veteres fere omnes æque ac recentiores Medici, qui
non vanis & inanibus in praxi præceptis innutriti, ea care-
re nequeunt, ut adeo merito inter heroica & summæ virtu-
tis remedia locum præcipuum mereatur. Sed quemadmo-
dum nullum efficax remedium, nisi provide & dextre usur-
petur juvat, imprudenter vero administratum nocet: ita et-
iam hoc ipsum auxilium cautionem, observationem & pru-
den-

dentiam in usu exigit atque desiderat. Quare e re utique erit, ut quæ tam de venæsectionis, quam reliquarum sanguinis missionum, genuino ac salutari usu tenenda, edisseramus, & quidem concilis theorematibus, per subjecta scholia illustratis.

Theorema I.

Non excellentius, non præsentius, ad plurimos morbos, & acutos, & longos, arcendos, suppetit auxilium, ipsa sanguinis prudenter instituta missione.

Scholion.

In priori jam sectione ex instituto docuimus, quam graves & periculosæ passiones, ex nimia sanguinis redundantia, item ex evacuationibus ejus criticis, quæ fiunt in feminis per uterum, & in utroque sexu, maxime virili, per venas hæmorrhoidales, deficientibus, vel etiam suppressis, prove-niant. Evidenter namque deduximus, quod plethora, tum ad vasa, tum ad vires, liberum & æquabilem sanguinis circulum retardando & impediendo, ad colligendas impuritates humorum, ad hostiles stagnationes, infarctus, obstructions & funestas stases, imo extravasationes & vasorum ruptiones, occasionem & causam præbeat efficacissimam. Scilicet dum sanguis copia sua virtuti contractili & elasticæ cordis, arteriarum & reliquorum vasorum fortiter obnititur, non modo progressivum per universum corpus motum remorando, ut cruor spissus & ad infarctus, obstructions, foecundas morborum chronicorum matrices, aptissimus, evadat, efficit, sed & in sensibilibioribus subjectis atque in locis valde nervosis, spasticas eiendo stricturas, inæqualitatem in sanguinis progressu & magnas ac impetuosas congestiones ad has vel illas nobiles partes causatur, quæ gravissimos in pectore, capite & præcordiis morbos inducunt. Hos igitur omnes ancipites afflictiones venæsectio, tempestive & pruden-

Aaaa 3

denter instituta, in iis præsertim corporibus, quæ sanguine abundant, vasa plena & ampla habent & quibus sanguis nec per hæmorrhoides, nec menses fertur, præsentissime prævertit. Quumque copia collecti sanguinis vere, & quidem circa tempus æquinoctiale, ubi ob solis propiorem ad nostrum clima situm, aer tenuior & rarior maiorem in sanguine expansionem efficit, quam maxime periculum minetur, & morbos a plethora oriundos, teste etiam *Hippocrate*, proferat, utique convenientissimum est, ante illud tempus decenti sanguinis emissionem ipsius redundantiam imminuere & sic futuris imminentibus morbis opportune occurrere eosdemque præscindere. Neque vero semper opus est, ut adeo accurate illud æquinoctiale tempus observemus. Nam quando congesti sanguinis copia citiorem & celeriore evacuationem desiderat, vel quando mox sub finem Februarii & initium Martii serenum & tepidum cælum expansionem ac turgescentiam sanguini, motui progressivo insensam, infert, non adeo rigoroſe constitutus æquinoctii terminus expectandus, sed præstat tum anticipare eundem. Aliquot mihi nota sunt exempla eorum, qui ne a recepto discederent more ad æquinoctium usque distulerunt hoc auxilii genus, sed crescente nimis plethora, apoplectico insultu ante illud tempus perierunt. Neque etiam audiendi sunt illi, qui vel lunam decreſcentem, vel certam siderum constellationem, ut plurimum fallacissimam, quoad tranquillos & salutiferos in aëre effectus, opperiantur, sed mittendus est sanguis urgente plethora quocunque tempore, maxime si cælum serenum & tranquillum, sub quacunque lunæ phasi, vel siderum conjunctione. Pari ratione pro valetudine eorum, qui sanguinem copiosum in venis alunt est, ut circa æquinoctium autumnale iterum sanguinis detractionem admittant, ne cruor, accedente frigida hiemali aura, nimis spissescat & excretionum successu ob aëris varietatem & inclementiam feriant, fordescat, morbisque ex humorum impuritate & stagnatione

oriun-

oriundis occasio suppeditetur. Quin nonnullis eminentius sanguine repletis conducit, quo ter quotannis venam incidi patiantur, initiante scilicet Martio, adulto Maio & Septembri, & sic corpus a morbis defendant.

Theorema II.

Uti copia sanguinis ejus detractionem exigit; ita ejus inopia & virium defectus eam interdicat.

Scholia.

I. Sanguinis copiam vasorum repletio pulsuumque magnitudo, victus solennis lautus & vinosus, quietum & tranquillum vitæ genus, & intermissio vel naturalis criticæ aut artificialis consuetae evacuationis luculenter produnt; & hæc ubi præsto sunt, tuto & confidenter sanguinis detractio admitti potest. Contra ea quando corpus infirmum, emaciatum, pulsus debilis, ex inopia maxime sanguinis & virium, penitus est interdicenda, nisi præsentaneam noxam inferre velimus. Nam pulsuum in arteriis robur dependet maxime a copiosiori & vegetiori sanguinis ex sinistro cordis ventriculo in magnum arteriosum tubum impulsu; robur vero illud cordis ad expulsionem, a libero & sufficienti sanguinis per vasa coronaria in cordis substantiam, nec non fluidi nervei in fibras cordis influxu, proficiscitur; ideoque ubi pulsus parvus, debilis ac languidus ex fluidi nervei sanguisque boni pariori influxu & ex ventriculi in arterias impulsu, nocentissimum est venam pertundere in quocunque subjecto & morbo, quia plus sanguinis & virium, quæ tamen jam tum deficiunt, exhaurit atque absorbit.

II. Peccant subinde in eo Medici, qui vel in morborum declinatione, vel si morbis præcedentibus, ut febribus aut enormibus hæmorrhagiis, alii morbi superveniunt, prompti ad sanguinem emittendum sunt. Nil frequentius oc-

currit in praxi, quam quod feminis, superato qui sanguinem & vires consumsit morbo, mensium fluxus subsistat; quibus certe pessime consulunt, qui ad eum provocandum, vel pellentia, vel sanguinis evacuationes, administrant; quum potius in id incumbendum sit, quo & analeptics, & lautiori diæta, sanguis & laudabiles humores prius de novo ingenerentur.

II. Virium defectio quandoque non a defectu, sed nimia copia sanguinis fit. Observamus sæpius in plethoricis juvenibus & viris pulsum, qui antea fuerunt celeres, tarditatem & debilitatem; videmus quoque universi corporis & animi languorem insuetum & somni defectum, sub magna tamen arteriarum expansione. Hæc autem ubi subest causa, superfluum & arteriarum systolen ac motum mole sua impediens cruorem subtrahere omnino expedit, & hoc facto, pulsus illico crebrius atque validius micat. Sed prudentis utique & periti est Medici, talem virium oppressionem a copia sanguinis, etiam morbo præsentem, probe discernere ab ea, quæ virium & sanguinis inopiæ ortum debet.

Theorema III.

Post venæsectionem, sæpe excretiones salutares sanguinis, imo alvi, sudoris, urinæ vacuationes melius & liberiorius quam ante eam succedunt.

Scholia.

I. Quia salutiferæ omnis generis excretiones sanguinis circulum, prout ille celerior vel tardior, vegetior vel languidior est, sequuntur; facile patet, si ob nimiam sanguinis copiam ipsius motus progressivus una cum excretionibus fuerit retardatus, imminuta vasorum plenitudine, augeri sanguinis circulum, ipsum hac ratione reddi fluidiorem; excretoriorum & colatoriorum vias ab obstructio-

nibus

nibus liberari, & cruorem liberius & largius ad emunctoria pro subeundis excretionibus appellii.

II. Hinc sapissime annotavi, suppressum in seminis mensium fluxum, brevi post venam in pede sectam sponte repetiisse. Plura etiam mihi nota sunt exempla, pertusa paulo ante vena sanguinem ex ani venis profluxisse, qui antea vel plane nunquam prodierat, vel per longum tempus restiterat.

III. Frequenti porro observatione compertum est, in plethoricis non modo, sed & iis qui spasticis detinentur affectibus, urinam difficulter reddi valdeque aquosam & limpidam mingi, sed protinus post emissum sanguinem, urinosum laticem copiosorem stillare magisque tinctum. Idem jam pridem notavit antiquissimus *Cous Sect. VI. aph. 36.* inquiens: *difficultatem urinæ phlebotomia solvit, secare vero oportet interiores*; id quod etiam confirmat *Riverius, Cent. I. obs. I. item obs. 45. & 89.* fidem faciens: admissa venæsectione, urinas, quæ antea prorsus aqueæ, redditas fuisse coloratiores.

IV. Neque minus experientia aliquoties edoctus sum, in hypochondriacis, quibus alvus solenniter tarda atque compressa, post sanguinis missionem, eandem esse solutam & ad officium rediisse. Ratio hujus effectus procul dubio hæc est: in passione sic dicta hypochondriaca ob difficiliorem sanguinis per mesenterium & hepar transitum, vasa nimium cruore replentur, ob distensionem in eorum tunicis fit spasmus & motus peristalticus læditur, quo læso nec flatus, nec excrementa, per alvum rite secedunt ac evehuntur; a vena autem tempestive in pede pertusa, vel etiam quod non semel, sed sæpius observavi, evocato per hirudines ex ani venis cruore, restituto inde libero per tunicarum intestinalium vasa transitu & progressu, & reddito intestinis debito motu ac robore, melius alvina quoque succedit evacuationo.

Theorema IV.

Venæsectio sapius senibus utilissima, imo ad longævam vitam confert.

Scholia.

I. Communis, sed pessimus error est, ætatem senilem plane non ferre sanguinis subtractiones, quasi vero in grandævus non redundaret sanguineus latex, ut potius ejus & virium defectu laborarent. Jam lubens equidem concedo non omnes senes esse plethoricos, & hinc sanguinis detractione indigere, nec etiam atas per se ad repletionem vasorum quicquam confert. Verum sunt utique senes valentes, sani, firmi, vasis capacioribus instructi, qui bene appetunt, comedunt, & non tantum concoctu faciles, sed & difficiles cibos probe ferre & digerere possunt, ideoque neutiquam etiam dubitandum, quin ex bene concoctis alimentis copiosum chylum & copiosum sanguinem gignant & colligant, cujus florida facies & vasa sanguine turgida luculenti sunt indices. Accedit quod non modo in virili, sed & in extrema ætate constituti, non raro modicum sanguinis per sedis venas profluvium cum constanti virium duratione commodissime ferant, ac ipse aliquot octogenarios novi, qui copiosum mictu sanguinem sine notabili virium decremento emisissent. Quin potius quum senectus non adeo ad labores, exercitia & motus corporis apta sit & proclivis, eaque propter non æquali mensura & proportionem egesta ingestis respondeant, sanguisque motu & calore minus consumatur, necessario nimia humorum succrescit abundantia, viscerum infarctus vasorumque plenitudo, quæ, nisi mature solvatur, morbos senibus familiares foecundo gignit germine, marasmos, tusses, coryzas, raucedines, artuum dolores, renum & vesicæ calculos, paralyfes, urinæ difficultates, pruritus, scabiem siccam, quæ afflictiones, utut proxime non a copioso sanguine, sed potius ab impuritate feri proveniant, hæc ipsa tamen a succorum

corum copia, qua excretiones impuritaturn interceptiuntur, natales trahit.

II. Complura certe memoria teneo exempla senum, qui ad nonagesimum annum fere, salvi, incolumes & a morbis ætate provectis familiaribus immunes vixerunt, solo venæsectionis remedio, bis per annum admisso. Et quod senectuti non adversa sit sanguinis per venam vacuatio, universa Helvetiorum gens testatur, qui vel octogenarii, immo nonagenarii, singulis adhuc annis venæsectionem patiuntur: quam in rem *Vvesperus lib. de apoplexia* legi potest. *Primero-*
sius etiam lib. IV. de vulg. error. cap. 23. venæsectionem senibus plurimum commendat & *Derbeque obs. I.* tribus exemplis confirmat, quod senes octoginta annorum sanguinis e venamissionem commode ferre possint, in gravibus, tam ab internis, quam ab externis causis pendentibus vitiis, id quod etiam a me in peculiari dissertatione, *de magno venæsectionis ad vitam sanam & longam remedio*, assertum est ac demonstratum. Neutiquam tamen ex his eliciendum: senibus debilibus & languentibus, qui appetentia ciborum carent magnaue debilitate ventriculi & intestinorum laborant, suadendam vel commendandam esse venæsectionem, minime omnium vero, si cum morbo diuturno chronico conflictantur.

Theorema V.

Venæsectio in febribus continuis & acutis ut plurimum & necessaria & utilis admodum est.

Scholia.

Miror sane haud exigui nominis viros venæsectioni alias eximie patrocinant, confidentius tamen asserere: eandem in omnibus febribus acutis, benignis & malignis, exanthematicis, vel minus talibus, nunquam esse necessariam, sed semper fere noxiam, unica tantum synocha excepta, nec in hac etiam absolute, sed tum demum, quando eminens ple-

Bbbb a

thora

thora orgasmo stipata eandem exposcat. Dicunt quidem: frequentius observatum esse, admissa sub initium hujus febris sanguinis missione, periculosas circa statum sanguinis metastases & congestiones ad caput esse consequutas, lethalem phrenitidem cum convulsionibus inducentes. Autumant quoque, naturam corporis humani œconomiam magna semper cum sapientia regentem, his in febribus non sanguinis mole peccantis vacuationem, sed potius ejusdem per intensiorem calorem in serum excrementitium resolutionem cum materiæ noxiæ sequestratione, intendere; eaque propter contra naturæ institutum ac finem sanguinis educationem adornari, & naturam in saluberrimo secretionis negotio turbari. At vero & ratio & constans experientia huic asserto refragatur. Plures certe novi juvenilis & virilis ætatis vegetos & sanguine plenos hisce febribus correptos, qui ommissa venæsectione, intra paucos dies phrenitide, inflammatione ventriculi, faucium, vel etiam peripnevmonia obierunt; ubi post mortem totum corpus mirum intumuit & ipse ichor sanguineus largiter e naribus manavit, foetor quoque mox gravissimus cum putredine successit, nullam aliam ob causam, quam ob inflammatoriam sanguinis in partibus stasim. Vicissim multiplici observatione confirmatum habeo, unicam vel etiam repetitam sanguinis in acute febrientibus missionem, non modo anxietates, sed & alia sæva symptomata imminuisse, vel plane sustulisse. Ut taceam Gallorum morem, qui in omnibus febribus non semel, sed bis vel aliquoties, venam cum bonis ægrorum rebus pertundunt. Metastases vero sanguinis ad caput circa tempora critica venæsectionem ciere, fallacia causæ ut causæ videtur. Nam licet phrenitides & convulsiones malo successu febre acuta laborantibus sæpe accendant, eodem tamen modo, immo frequentius id evenit, ubi venæsectio ommissa, quam ubi admissa. Et quum omnes fere in febribus acutis, phrenitide & convulsione pereant; certe si

venæ

venæsectio horum causa, intermissa eadem, non facile quemquam acute febricitantem interire, prona fuit consequentia.

II. Ego potius neutiquam asseverare dubito, sanguinis missionem in febribus acutis sapissime utilem esse ad nodum ac necessariam. Etenim qui acutis corripiuntur omnes plus sanguinis & humorum abundantia, quam defectu laborant. Jam vero in comperto est, febris essentiam maxime in intensiōe toni & spastica quadam constrictione universi generis vasorum & fibrarum, a qua etiam & progressus sanguinis & caloris ac æstus incrementum dependet, consistere; notum porro est, spasmo vasorum alveos angustari, calore autem succos expandi majusque spatium affectare; ideoque redundans & exastuans cruor libero per sanguifera vasa transitu exclusus, non potest non impetuosè huc & illuc agi & ad vasa minoris diametri, quæ sanguinem secundum naturam non admittunt, tanquam loca incongrua pelli inque eorum angustis obhærescere ac ita incipere, unde periculosæ inflammationes, nonnisi tempestiva sanguinis detractione felicissime præscindendæ. Uberius hoc patet peritissimorum in arte virorum testimoniis. Ipse artis parens *Hippocrates, de vict. acut. §. 5.* in acutis sanguinis missionem laus commendat. Quin Veteres in ejusmodi præcipitis periculi morbis sanguinem ad animi usque deliquium subtrahebant, uti potissimum auctor est *Galenus lib. 1. de rat. vict.* perhibens: hujuscemodi missionem sanguinis non tentandam esse nisi in acutissimis morbis, iisque in quibus robustæ vires, florens ætas, plurimus sanguis, regio, æt & anni tempus bene temperata, quales morbi existunt febres ardentissimæ, dolores sævissimi, maximæ viscerum inflammationes, carbunculi, synochus, lassitudo phlegmonosa, dolores articulorum vehementissimi. In his enim omnibus multo sanguine semel

vacuato, statim quiescit calor, quibusdam alvus cietur, aut sudores moventur, & ita solvitur, aut saltem minuitur morbus, teste *Hollerio Comment. ad aphor. 3, sect. I. Hippocr.*

Theorema VI.

In febribus etiam exanthematicis, petechialibus, purpuratis, variolis, morbillis, quin ipsa peste, venesectione non prorsus intuta, sed prudenter adhibita, magno interdum præsidio.

Scholia.

I. Haud levis momenti inter Medicos viget dissensus: an in iis febribus, ubi pernicialis materia ad cutis superficiem appellitur, sanguis utiliter possit subtrahi? Complures affirmant, alii prorsus pernegant, utrique experientiam in partes advocant. Sed distinctio utique facienda & circumstantiarum rationi hujus remedii usus accommodandus. Nimirum ubi succi deficiunt, vires statim in principio elanguescunt, pulsus debilis, durus & parvus, vasa copiosa, sed angusta, vel etiam robur per animi afflictionem dejectum: verò: ubi malignitas humorum, ut cum scholis loquar, præsto est, damnosum magisque ad perniciem, quam salutem ægri vergens molimen est, sanguinem evocare. Etenim ad materiam non tam mole gravem, quam causticam, subtilem & virulentam, nervosis partibus infestam, eliminandam, valida cordis & arteriarum motrix vis requiritur, quæ a sufficienti sanguinis & fluidi nervei influxu expectanda. Deinde ipsa hæc pernicialis materia expellenda nonnisi beneficio sanguinis & humorum ad superficiem corporis advehitur, ubi vasa minoris diametri sunt, facile concidunt & nonnisi vegeto appulsu replentur. Quod si igitur quis succos & sanguinem ubi jam deficiunt & robur languet adhuc subtrahere vellent: is certe grave afferret damnum & nihil aliud efficeret, quam ut materia hostilis intus remanens, instar

venæ

veneni solidorum & fluidorum motum. perverteret ipsamque mortem inferret.

II. Longe alia ratio est, si ob nimiam sanguinis copiam ejusque ab æstu febrili rarefactionem, cordis & arteriarum tunica tam vehementer distenduntur, ut systoles earum imminuatur ac sufflaminetur, eaque propter sanguis non vegete ac libere ad minimos cutis tubulos appellat ibique materia quæ in vitio est se & excerni queat. Tunc utique ipsa ratio dictitat, evocata quadam sanguinis portione, residuo ad validiorem circuitum viam pandi, resistantiam tunicarum succorum impulsui æquabilem ipsumque systalticum & diastalticum reciprocum motum revocari, quo fit, ut sequestratio & evacuatio noxii quam optime & ex voto succedat. Obvium hoc est sæpissime in corpore juvenili & plethorico, sanguineæ constitutionis, sub diata lauta & vinosa, tranquillo etiam & quieto vitæ genere, aut ubi etiam ob intemperantiam animi affectuum excretiones imminutæ succorum abundantiam genuerunt. Hujus habitudinis corpora, quando purpura, petechiis, catarrhali benigna aut maligna febre, vel etiam variolarum morbo laborant, intermissa venæ sectione certo in discrimen adducuntur; contra ea omnia ex voto succedunt, si plethora demta, liberior sanguini conciliatur progressus.

Theorema VII.

Non perniciofa, sed quandoque admodum proficua est sanguinis missio in febribus, apparentibus jam in cute exanthematibus.

Scholion.

Per manus quasi tradita est opinio: efflorescentibus jam in corporis cortice petechiis, purpura, variolis & morbilis, nec sanguinem mittendum, nec alvum subducendam esse, ne maligna ad habitum corporis relegata materia irreparabili cum damno ad interiora retrahatur. Quamvis vero hæc

hæc observatio non exigui sit momenti ipsaque experientia nitatur, non tentandam esse sanguinis subtractionem, ubi natura, ut sic dicam, in opere excretionis occupata, & ubi exanthemata non longam & fixam sedem in cute habuerunt: nihilominus tamen dantur casus, ubi venæsectio comparentibus etiam efflorescentiis utilis est ac necessaria. Observavi enim in iis, qui purpura, sive primarius, sive secundarius morbus fuerit, variolis vel morbillis perierunt, vehementes spasmos, tam in artubus & partibus extremis, quam etiam abdomine, quos ob cutim contractam, non modo exanthematum retrocessio, sed & summa anxietas, corporis jactatio & sæpius delirium cum animi deliquio fuerunt insequuta; quæ omnia lethifera symptomata non tam, ut vulgaris fert sententia, a materia exanthematica interiora repente, quam potius a sanguinis impetu & congestione ad cor ac cerebrum facta, accesserunt. Hinc sola ratione ductus, quatuor intra anni spatium puerperas, purpura laborantes, conclamatis propemodum rebus, sola sanguinis e vena brachii emissionem, per DEI gratiam a præsentaneo mortis periculo vindicavi. Simulac enim sanguini exitus concessus, protinus præcordiorum anxietas animique defectio evanuerunt & melius sese habuerunt ægrotantes, summa cum Chirurgi & adstantium, mortem sub ipsa operatione præsagientium, admiratione. Eadem ratione in juvene, periculose variolis laborante, cum imminens delirium & ingens præcordiorum angustia mortem prænunciarent, venæsectionem in brachio summo cum sanitatis emolumento institui jussi. Neque hæc assertio clarissimorum Medicorum destituitur consensu, quos inter primo loco memorandus summus venæsectionis patronus, *Botallus*, qui *lib. de venæsect.* pag. 150. seq. testatur: se in bubonibus pestilentialibus & aliis exanthematibus, si febris non remiserit, summo cum fructu sanguinis missionem suavisse; ut *Muralium*, qui *Dec. II. Ao. VII. obs. 115. M. N. C.* venæsectionem in febre epidemia, papulis

per corpus sparsis, salutarem annotavit, aliosque prætereamus.

Theorema IX.

In morborum & febrium paroxysmis atque exacerbationibus venæsectio non sine periculo, die autem intercalari vacuo utiliter, instituitur.

Scholion.

In paroxysmis febrium intermittentium, in epileptico, hysterico, nec non hypochondriaco insultu, & quando-
cunque extrema frigent, vel interni calores & anxietates ægrum exagitant, admissa venæsectio symptomatum vehementiam non modo acuit, sed & mortis periculum arcessit. Ratio hujus phænomeni in præclivi. Etenim morborum & symptomatum exacerbationes nunquam non spasmi partium, præsertim externarum, ventriculi quoque & intestinorum comitantur, quibus sanguinis liber cursus intercipitur isque majori impetu ad vasa majora, pectus præsertim & cor, urgetur. Si quis itaque in brachio vel pedibus, ubi omnia spasmo constricta sunt, sanguinem evacuare instituat; is certe vehementiam spasmodorum his in partibus augebit. Nam quo largius atque uberius sanguis his partibus subtrahitur, eo plus incrementi capit spastica fibrarum contractio; quum nihil sit, quod spasticæ huic crispaturæ & regurgitationi sanguinis ad interiora magis resistat, quam validus cordis & arteriarum impulsus & liberalis sanguinis renitentis ad partes affluxus. Hinc utique differre oportet sanguinis subtractionem in diem intermissionis, vel remissionis, quo spasmus conquievit & liberior sanguinis ad partes affluxus restitutus. Est tamen ubi etiam ipso in paroxysmo spastico venam aperire insigniter conducit, non quidem in partibus spasmo affectis, sed iis ad quas sanguis maximo impetu grassatur. Sic sæpissime contingit, ut a spasmo partium abdominis, immo pedum, qui frigore horrent, ob incussum terrorem, aut aliam causam,

sanguis ad pectus & caput impetuose agatur ipsamque apoplexiam vel suffocationem minetur; quo in casu utilissime & cum præsentaneo levamine vena non partium inferiorum, sed superiorum in brachio, pertunditur.

Theorema IX.

Datur levior apoplexiæ species, quam sola tempestitiva sanguinis missio discutit.

Scholion.

Quando vel ex vehementiori animi affectu, præsertim terrore, vel graviore inferiorum partium spasmo, sanguis cum impetu ad caput latus, vasa membranarum cerebri arteriosa copia sua ita distendit, ut motus eorum systalticus sufflaminetur, species fit apoplexiæ levioris. Est hic affectus feminis sic dictis hystericeis, sanguine plenis & sensibilibioris corporis ac animi admodum familiaris, & a vulgo & imperitis Medicis pro animi deliquio venditur, a quo tamen longe multumque differt. Etenim sub animi defectione cordis & arteriarum pulsus silet, facies pallida est & spiritus plane interclusus: in apoplectico autem hoc leviori insultu, omnis, sensuum tam internorum, quam externorum, usus perit, membra immota jacent, cor vehementi palpitatione concutitur, pulsus magnus & celer micat & facies intumescit ac rubore suffunditur. Neque tamen mitior hæc apoplexia oritur a disruptis vasis, quod incurabile malum, neque a feri secessu, qui in paralyfin terminatur, sed a sola stagnatione sanguinis in canalium nimis distentorum alveis subnascitur. Compertum enim ex anatomicis est, arterias carotides & vertebrales etiam, quamprimum calvariam subeunt & per cerebri membranas excurrunt, crassiores suas tunicas, quibus alias in toto corpore arteriosa vasa vestita sunt, deponere; eaque propter non mirum est, a copia & impetu sanguinis ad cerebrum delati, vim eorum contractilem elasticam, cuius beneficio sanguis ulterius in venosos capitis sinus protrudi-

truditur, minui & solvi, sicque sublata carotidum systole, cruorem in vasis membranarum cerebri plexuque choroideo nimium distentis stagnare & hinc sequestrationem atque influxum liquidi nervorum, a quo motus & sensus, intercipi istudque in motu sisti. Quæ quum ita sint, jam facile liquet, ad restituendam systolen, sanguinis per caput liberum progressum & liquidi in nervos influxum revocandum, vix præstantius & aptius dari auxilium, sanguinis sufficiente, ex aperta amplo foramine brachii vena, detractio; ita enim intra breve temporis spatium mens, sensus motusque corporis ad officium redeunt.

II. Perperam autem ægotantium ita affectorum rebus & saluti consulunt, qui ob minus perspectas hujus mali causas, venam in extremitatibus inferioribus aperire suadent, quia hæ partes plerumque in ejusmodi accessione spasmis contractæ, frigida & a loco affecto nimis remota sunt, quo ipso impeditur, quo minus sanguis commode derivari queat. Quin aliquoties observavi, in corporibus, ubi totum nervorum systema ad spasticas contractiones valde proclive & extrema semper erant frigida, a venæsectione, eaque pariori, intra aliquot horarum decursum vehementiam spasmorum in inferioribus magis increvisse; qua postea sanguis ad caput impetuose propulsus, insultum quem descripsimus apoplecticum peperit, adeo subinde invalescentem, ut nisi tempestiva sanguinis missione fuerit discussus, ægrum jugularit, aut minimum paralyti memoriæque debilitate affecerit.

Theorema X.

Morbi capitis a sanguinis congestione vasorumque distensione oborti exigunt venæsectionem, in vicinis tamen partibus instituendam.

Scholia.

I. Vehemens & contumax capitis dolor, narium frequens stillicidium, insania melancholica, vertigo, opthalmia,

mia, capitis erysipelas, nec non laryngis & pharyngis inflammationes, sapissime ortum trahunt a spasms, nimia sanguinis ad superiora congestione & gravi vasorum distensione, præsertim in hypochondriacis, vel ubi ventriculus cum intestinis flatibus & scybalis turgent, vel spasticis constrictionibus laborant, quibus liber & æquabilis sanguinis circuitus intercipitur, ut magna copia & impetu ad alias partes, maximeque caput, ruat ibidemque morbos hos inducat. Et tum quidem ad derivandum sanguinis impetum omneque arcendum periculum, in loco capiti vicino, fronte scilicet, temporibus, sub lingua, item in collo, secare expedit.

II. In gravi quidem cephalalgia, ophthalmia, angina, venesectio sub lingua semper utilissima; in phrenitide vero, melancholia & capitis a causa interna dolore, vena jugularis externa commodissime aperitur, aut si hæc ab imperito Chirurgo inveniri non potest, vena secundum longitudinem frontis exporrecta, quæ jugularis externæ ramus, collo prius sub mento constricto & spiritu retento, pertundenda. Solennis jam fuit hujus frontalis venæ incisio antiquissimis temporibus, teste Hippocrate, Sect. V. aph. 68. sic perhibente: *parvi capitis posteriore laboranti in fronte excurrens vena incisa prodest.* Confirmat hoc Hollerius comm. in h. a. constat, inquiens, experientia, quod hac phlebotomia multi derepente a capitis dolore liberentur. Alexander quoque Trallianus lib. I. cap. 13. mirifice in phrenitide sanguinis e vena frontis missionem commendat, eademque phreniticum momento se curasse testatur; & cap. 16. de melancholia scribit: *si humoris sanguinei materia cerebro impacta fuerit, tunc audacter vena in fronte secatur: nam ob totius corporis vacationem, si loco jam remedia adhibeas, nihil nocet.*

III. Licet sectio venarum capitis, in fronte, pone aures, jugularis externæ, sublingualis, in morbis qui caput gravius offendunt, experientia teste, eximiam conferat opem;

opem; id tamen non universale est, neque omnibus omni tempore convenit, sed simul consideranda est ipsius corporis constitutio. Nam si ejusmodi capitis morbis magna vasorum plenitudo juncta, vel etiam spasmi vehementiores in inferioribus, sanguinem *ad pedes* & cum impetu ad caput urgent, verendum est, ne dato per apertam ibi venam vacuum spatium, major cruoris copia eo invitetur. Quapropter Veterum peritissimi, unanimi suffragio ut vena simul in brachio vel pede solvatur, suadent. Sic *Trallianus lib. 1. cap. 16.* si, præcipit, circa caput aliquid moliri cogites, priusquam totum corpus recrementis liberum reddideris, offendes magis, quam juvabis, copiosorem materiam ad locum affectum attrahens. Neque minus *Hollerius comment. in alleg. aphorism.* si dolor est, ait, in capite cum corporis plenitudine, oportet primum cubiti venam aperire, deinde secare venam frontis; si nulla adest plenitudo, tuto venam frontis statim secabimus; sique dolor capitis est per consensum; v. g. a suppressis mensibus, primum secanda est vena malleoli, deinde cubiti, tum frontis; si ceperit dolor a diaphragmate aut hepate, aperienda vena cubiti, post veniendum ad frontem; & quas plures adhuc de incisione ipsa tenendas cautiones subjicit.

IV. Ad sectionem venarum, quæ linguæ substratæ sunt, in angina, quod attinet; pariter notandum & eandem cum periculo in corpore plethorico tentari, nisi plethora prius per apertionem venæ in brachio soluta fuerit. Obsequendum itaque est consilio *Tralliani*, quod *lib. IV. cap. 1. de angina*, proponit: ego inquit, sane novi, cum usus valde urgeret, me venam cubiti mane aperuisse, diluculo linguæ subjectas secuisse, & vespere ex cremore prisane lacrimam scammonii exhibuisse, atque ita anginam percuravi. Pergit deinde: novi etiam jugulares venas a me sectas esse, cum linguæ subjectas non invenirem, ac plurimum adjuvissè.

Theorema XI.

In morbis pectoris, ut pleuritide vera & peripneumonia, incisio venæ in brachio sæpe summe est necessaria.

Scholion.

Utut pleuritis spuria, quæ rheumatismi, five doloris arthritici species est, a sero acri intra membranam pleuræ, costas cingente suborta, non semper sanguinis missionem poscat, sed sæpe sola diaphoresi felicissime tollatur; longe tamen alia ratio est pleuritidis veræ & peripneumonix, quarum illa nonnisi levior, hæc profundior pulmonum inflammatio est, a stasi sanguinis firmitus impacti pulmonum vasis prognata. In his enim utique sanguinis subtractione, quin non una, sed quandoque si corpus sanguine diffluit & plethora urget, reiterata opus est, ad incrementum inflammationis impediendum, quod fit, quando sanguis nimium in vasis congestus, stagnans & progressu libero exclusus, per proximum locum ad meliorem derivationem ex incisa vena evocatur, & quidem facta paulo ampliori incisione, quo eo citius & promptius impetu acquisito descendere & a pulmonibus derivari possit.

Theorema XII.

Triplex venæsectionis eximius usus, evacuatorius nempe, revulsorius & derivatorius.

Scholia.

I. Evacuatorius venæsectionis usus dicatus est minuendæ sanguinis plenitudini, & hoc proposito, nihil interest ex quacunque parte ipsum detraxeris. Derivatio ex usu est ad sanguinis fluxum ex parte affecta in alia loca opportuna adducendum & invitandum, quo ibi evacuetur. Sic in affectibus quæ abdomen excruciant spasticis, flatulentis & qui

& qui a fluxu mensium & hæmorrhoidum impedito vel suppresso eveniunt, tutius secatur vena pedis, quam brachii, ad derivationem. Hinc recte *Hippocrates lib. de nat. hum. §. 20.* inculcat: *oportet venasectionem in doloribus dorsi & coxendicum in poplitibus & malleolis efficere.* Et *Severinus de efficaci Medic. cap. 26. pag. 62.* tradit: in dolore nephritico præcavendo, in promovendis hæmorrhoidibus, purgatione lochiorum, in ani inflammatione & prolapsu, in sanguinis vomitu, in ischiatide venam pedis secari quam felicissime. Contra ea in affectibus capitis, apoplexia, lethargo, mania, melancholia, phrenitide, catarrho suffocativo, asthmate sanguineo, hæmoptysi, pleuritide, peripnevmonia, inflammatione hepatis spuria, sanguis mole & influxu peccans ac cito derivandus felicius & utilius ex proximiori loco, brachio nempe, exantlatur. Revulsio vero, seu potius avulsio, fit, quando sanguinis impetus ex partibus inferioribus ad superiores, sursum quasi retrahitur, sive revellitur. Ita in nimio mensium vel hæmorrhoidum fluxu utiliter vena secatur in brachio. Idem commodè fit in gravidis ad abortum præcavendum, si vasa uterina a sanguine nimium infarcta & distenta sunt, ut pondus uteri deorsum tendentis, inferioribus quodammodo molestum fiat & onerosum.

II. Usus venasectionis derivatorius & revulsorius caute atque prudenter administrandus. Nam si obstructions vasorum a sanguine impacto submovendæ, non adeo largam sed parciolem ex loco vicino portionem subtrahere expedit, quo reliquus ad partem laborantem majori impetu ruat, & obhærescentem in minimis vasculis elidat; eo quod a pariori sanguinis missione restitans in venis majorem a celeritate vim acquirit. Hinc est, quod apertio venæ saphænæ non raro mensium fluxum in momento restituat & hæmorrhoidale stillicidium segnius incisione venæ in pede promoveatur & expeditius reddatur; quum contra subtracto in manu vel etiam in pede nimio sanguine, sæpe effectus obtinendi deficiant.

ficiant. Si morbus vero est inveteratus & tanta vasorum obstructio, ut tolli nequeat; tum in corpore plethorico apertio saphænæ plus nocet, quam prodest, quia sanguinem versus uterum uberius allicit, ut major vasorum obstructio inde nascatur. Neque in hemicrania, seu capitis dolore contumaci, vertigine chronica, melancholia, venæ sectio in fronte quippiam adjumenti afferre potest, quia major inde sanguinis ad caput affluxus proritatur & vasa membranarum cerebri obstructa magis infarciuntur, sed præstat tunc sanguinem ex inferioribus ducere. In malo ischiadico recenti venæsectio in pede præsentaneum saepe conciliat levamen, in diuturno vero malo neutiquam, sed incremento favet. Tutius itaque, si corpus succis & sanguine sarctum, cum *Hollerio Commentar. in Sect. IV. aphor. 36*, primum venam secamus in brachio, deinde ischiadicam, ut non in uno, sed in diversis locis sanguis revellatur. Ac ibidem apprime ad veritatem hic auctor scribit; quod in dysuria, si sit ab infarctu renum a sanguine, item in inflammatione vesicæ, primum incidenda sit vena brachii, deinde etiam statim subjungenda saphæna in malleolo, aut poplite. Ex quibus omnibus plenius innotescit: in loco admodum vicino sectionem fieri posse, si morbus est recens & causa mobilis, neque adeo magna vasorum plenitudo; ubi vero diutius traxit ægrum, vel corpus nimium sanguine redundat, tum prius in remotioribus partibus, deinde in vicinis, venas aperire convenit.

Theorema XIII.

Multum interest ut iusta sanguinis quantitas evacuetur & quandoque reiterata venæsectione opus est.

Scholia.

Ætate adolescentes, vel tenerioris texturæ homines vasisque tenuioribus præditi, & feminae quæ facile incidunt in animi deliquium, ob largiorem sanguinis missionem. Absti-

abstinere ab ea debent, sed potius, si venæsectione opus angustiore foramine, neque simul & semel, sed plaga aliquoties digitis compressa, gradatim sanguis mittendus his est. Feminae vero post annum quinquagesimum, quo ordinario mensium fluxus definit, largiorem postulant sanguinis extractionem, quod etiam valet in viris robustis, qui magna habent vasa; & ubi sub lauto vitæ genere consuetus hæmorrhoidum fluxus cessare incipit. Vernali tempore, præsertim Majo, corpora largiorem sanguinis e vena fluxum ferre possunt, quam tempore æstivo, vel autumnali: parcius vero sanguis venis eximendus est, in nimis hæmorrhagiis, ut hæmoptysi, in enormi mensium vel hæmorrhoidum fluxu; neque etiam ante mensium ordinarium tempus multo sanguine corpus spoliare consultum, ne subsequuturus fluxus, vel plane cesset, vel imminuatur.

II. In febribus omnibus inflammatoriis, item exanthematicis, si ob nimiam sanguinis copiam opus est ejus missione, curatius paulo circumspiciendum est, ut justa emittatur quantitas. Nam si sub nimia ejus abundantia tantum parva portio educitur, ad unam vel alteram unciam, expansione sanguinis organica inde magis sæpe incremente, nihil juvat, ut potius plus obsit, inflammatio inde augeat & exanthematum eruptio minime promoveatur; si vero supra modum & magis quam par est sanguis e vena hauritur, tunc pariter plus detrimenti, quam emolumenti affert; siquidem expulsio exanthematum, quæ per sanguinem ad summam cutim delatum fieri debet, impeditur, ut materia corrupta summa cum pernicie intus maneat. In peripneumonia & pleuritide nimia sanguinis detractio impedit expectorationem & discussionem inflammationis, quæ etiam mediante sanguine fieri debet. In rheumatismis, erysipelate, doloribus arthriticis vagis & fixis, etiam hæc observatio, ut justa sanguinis quantitas ad morbum curandum relinquatur.

(III.) Dddd tur,

tur, necessaria, id est, ne vel nimium vel adeo exiguum evacuetur.

III. Si plethora, tam ad vasa, quam ad vires, nimis urget, magna sæpe sanguinis portio, interdum ad libram unam medicam, ex venis exantlanda est, si vero parum extrahitur, sanguine majus spatium inveniente, plus ejus elater intenditur, magis expanditur, & sæpe majori cum impetu in affectam partem irruit. Obversantur adhuc animo nostro exempla, ubi in eminenti plethora per parvum foramen duabus tantum circiter uncias eductis, intra paucas horas insultus apoplecticus sequutus fuit, qui largiori venæsectione in brachio, ad uncias octo, feliciter sublatus. Memini quoque a fluxu hæmorrhoidali, vehementia frigoris suppressio, in Principe plethorico summas præcordiorum anxietates fuisse subortas, ubi secta fuit vena in pede, qua non ultra quatuor uncias sanguinis emissum, consequente symptomatum exacerbatione, anxietatis scilicet præcordiorum, vigiliarum, inquietudinis, spirandi angustię, quæ tamen omnia repetita ad septem uncias sanguinis missione, & quidem in altero pede, protinus conquieverunt.

Theorema XIV.

Rhevmatismos, catarrhos, coryzam, tussim, venæsectio improvida sæpe gignit; tempestive autem admissa egregie arcet.

Scholia.

I. Observatio in praxi medica attenta sæpius nos docuit, a vena secta, præsertim vere & æstumno, tempestate non adeo placida & serena, complures post aliquot dies in graves catarrhos, coryzas, tusses, passionες rhevmaticas & febres catarrhales incidisse, idque familiarissime, si non probe vestiti, corpus auræ frigidiori & humidiori, maxime vespertinæ, objecerunt. Id enim fere perpetuum est, sub paullo largio-

largiori sanguinis missione perspirationem minui, adeoque humores per tubulosum cutis corticem sub forma vaporis evahi solitos in interioribus quodammodo remanere, id quod frequentius evenit, si corpora sunt spongiosiora & vasis exterioribus prædita. Neque ratio hujus effectus adeo latet. Nam detracta notabili sanguinis portione, vascula, præsertim minora & extrema, antea sanguine distenta, nunc detumescere & vacua fieri incipiunt. Et quum exquisitus admodum & sensibilis tonus in subcutaneo integumento vigeat, fit, ut sub auræ frigidioris accessu, fibræ cutis elasticæ contrahantur ipsique tubuli sudoriferi sic occludantur, unde recrementa sudoris non modo in corpore remanent, sed & ab exterioribus ad interiora, præsertim faucium & bronchiorum loca glandulosa, vel etiam ad articularum glandulas mucilaginosas, vel ad eorum ligamenta glandulosa, feruntur, ubi serum valde acre, salsum, stagnans, molestas irritationes vasorumque constrictiones efficiens, cursum humorum liberum impedit, unde secessiones feri, dolores, ardores & copiosi humoris affluxus suscitantur.

II. Quemadmodum vero ex improvida vel nimia sanguinis emissionem catarrhorum fons & origo promanat: ita crebriori observatu constat, venæsectionem prudenter vere & autumnio institutam & quotannis repetitam, complures a coryza, gravedine & tussi anniverfaria liberasse; maxime eos, qui antea sanguinis copia laborarunt, nunquam tamen venæsectionem admiserunt. Vernali enim tempore, ob majorem aëris rarefactionem & elasticitatem, turgent maxime sanguinea vasa, propter sanguinem a subtilioris ætheris accessu magis expansum. Si itaque omittitur sanguinis, vel a natura, vel arte facta vacuatio, sanguinis & humorum in locis maxime laxis, mollibus, glandulosis promptæ ac faciles fiunt stagnationes, decubitus & feri secessiones; quæ omnia mala per opportunam sanguinis ventilationem præscindi possunt.

Theorema XV.

Colica flatulenta uti a venæsectione nonnunquam exacerbatur; ita convulsiva & hæmorrhoidalis eadem sæpe levatur & abigitur.

Scholion.

Origo flatuum, qui intestina obsident atque moleste distendunt, pendet frequentissime ab intestinorum atonia, sive labefactato eorundem peristaltico motu. Nam sicut vigore hujus motus, & flatus, & alia in intestinis contenta, inferiora versus pelluntur: ita imminuto, vel destructo eo, ingens flatuum, præsertim in flexuris coli, circa hypochondria, proventus fit atque stagnatio. Hæc vero intestinalis atonia maxime originem suam ducit a defectu laudabilis fluidi nervei & sanguinei, quare senes itemque a morbo convalescentes, vel affectu animi diuturno debilitati, nec non homines phlegmate abundantes & infrigidantibus admodum cibus vescentes, colica frequentissime laborant, quæ non sanguinis imminutione, sed medicamentis carminativis, balsamico & aromatico elemento instructis, quam feliciter sanatur. Alia vero ratio est colicæ sic dicta spasmodicæ, sive convulsivæ, quæ a sanguine inter tunicas intestinales hærente easdemque cum vehementia distendente nascitur, ubi sanguinis tempestiva e pede missio, non modo ab hoc calamitoso malo præservat, sed & illud ipsum præsentissime mitigat, quod etiam *Riverius* jam *Cent. I. obs. 44.* recte annotavit.

Theorema XVI.

Tam ante, quam post venæsectionem, quædam utiles tenendæ cautiones.

Scholia.

I. Non facile, nisi summa necessitate urgente, in ipso æquinoctio vel solstitio, in plenilunio etiam & novilunio,

lunio, vel die pluvioso & turbido, venarum sectio celebranda est; sed consultius est, aliquot dies ante hæc tempora & die sereno præservationis causa hoc institutum perficere, hanc maxime ob rationem, quia circa hæc tempora mensium fluxus ordinario incidunt & plures ex morbis spasmodicis, paroxysmi epileptici & qui hypochondriacis & melancholicis sunt familiares, redire solent, ante quorum accessionem corpus a superflua sanguinis redundantia per venæsectionem liberare præstat.

II. Consultius semper est, præsertim si quis facile animo deficiat, non ventriculo vacuo, sed jussulo sumto, factoque paullo angustiori foramine, venæsectionem administrare.

III. Post sanguinis per sectam venam decessum, nec potu, nec cibo onerare ventriculum oportet, multo minus se inebriare, aut corpus frigido, vel humido aëri objicere. Crebra enim docuit experientia, plures hac ratione, Martio præsertim & Octobri, inprimis si corporis habitus fuit spongiosus, in coryzas, tusses, rheumatismos, febres catarrhales & pleuritidem spuriam incidisse; utpote per sanguinis missionem eamque largam, perspiratio non parum minuitur, eo quod ad subcutaneos & sudoriferos tubulos fluidum eximie exhaustum tanta mole non amplius accedens, eos non ita patulos atque apertos ut antea servat. Hinc aër frigidus accedens eos facile claudendo, humorumque cursum a superficie corporis ad inferiora reflectendo, jam memoratos morbos inducit.

IV. Magis pro sanitate est, primas vias ipsumque ventriculum a cruditatum copia & sentina humorum, non per forte purgans, sed laxativum, ante usum venæsectionis liberare. Cavendum vero maxime in plethoricis a fortibus purgantibus tanquam veneno, eo quod operationem suam vehementiori intestinorum spasmo exserunt eoque liberiorem san-

guinis progressum valde turbando, perniciales congestiones hinc inde in partibus sæpe efficiunt.

V. In feminis ob mensium fluxum, & viris hæmorrhoidum stillicidio obnoxiiis, præstat semper venam pedis aperire, ne sanguis ab his emunctoriis divertatur: viri vero hæmorrhoidibus vacui, venæsectioni in pede non in totum assuescant. Non semel enim observavimus, hæmorrhoides inde cæcas sine fluxu fuisse proritas, ad quas removendas venæsectio in brachio debuisset institui.

VI. A misso sanguine exquisitior victus ratio tenenda est, neque protinus æger ad pristinam diætam, perinde ut canis ad vomitum, redeat. Hinc majorem in modum detestandus est mos Germanorum, qui nunquam lautius edunt ac bibunt, quam ubi venæsectione perfuncti sunt.

Theorema XVII.

Cucurbitulæ cum scarificatione vicariam sæpe præstant venæsectionis operam.

Scholion.

Placet insignem locum ex ipso *Celso lib. II. cap. 10.* de usu cucurbitularum cum ferro adducere, sic habentem: *usus cucurbitula præcipuus est, ubi non in toto corpore, sed in aliqua parte vitium est, quam exhauriri ad confirmandam valetudinem satis est. Idque ipsum testimonium est, etiam scapello sanguinem, ubi membro succurritur, ab ea potissimum parte, quæ jam læsa est, mittendum; quod nemo cucurbitulam diversæ parti imponit, nisi cum profusionem sanguinis eo averit, sed ei ipsi, quæ dolet, quæque liberanda est.* Quare in rheumatismis, præsertim quæ dorsum, scapulas & brachia occupant, in doloribus quoque artuum utiliter scarificatio fit sat profunda, & ubi dolor pressorius & constrictorius frigidus occupat, sed quod notabile est, parcior semper sanguinis quantitas ex læsa, quam ex sana parte educitur. Ad dolo-

dolores podagræ avertendos, nonnulli singulis mensibus, non sine utilitate, scarificationem in planta vel dorso pedis admittunt. In efflorescentiis & deformitate faciei etiam utiles sunt scarificationes cum cucurbitulis, ad eliciendum & derivandum sanguinem a facie. In cutis defœdationibus, scabie, non inutiliter in obesis & spongioso corporis habitu præditis, idem talem adhibentur.

Theorema XVIII.

In acutis, ubi vires non patiuntur sectionem venæ & celerem sanguinis emissionem, præstat paulatim & successive eum, si opus est, per scarificationes & cucurbitulas evacuare.

Scholion.

Præclara sunt hanc in rem monita apud *Celsum* qui lib. II. cap. XI. opus est, inquit, cucurbitula in acutis quibusdam, si & levare corpus debet & ex vena sanguinem mitti vires non parium. Idque auxilium, ut minus vehemens, ita magis tutum, nec unquam periculosum, etiamsi in medio febris impetu, etiamsi in cruditate adhibeatur; ideoque ubi sanguinem mitti opus est, si incisa vena præceps periculum est, aut nobili in parte corporis vitium est, etiam huc potius confugiendum est; cum eo tamen, ut sciamus, hic, ut nullum periculum, ita levius præsidium esse, nec posse vehementi malo, nisi aque vehemens auxilium succurrere. Ego in experientia fundatum quam maxime egregium hoc *Celsi* monitum deprehendi. Non semel enim sed sæpius observatum a me est, morbos capitis, ut epilepsiam, vertiginem, insaniam, motus artuum convulsivos, a secta vena ac celeriori & paullo largiore sanguinis emissionem, incrementum cepisse, & paroxysmos sequentes graviores redditos, idque maxime annotavi in sensibilibus corporibus, juvenibus; contra vero educationem sanguinis per cucurbitulas quam optime ferre potuerunt & cum levamine maiorum.

lorum. Ratio mihi hæc videtur: quod vehementia spasmodum in partibus affectis, cui valde sanguis interius in vasis resistit, increseat, si subito ipsis detrahatur. In acutis febribus, quando a congestione sanguinis in capite metuenda est phrenitis, consultius etiam est per cucurbitulas occipiti appositas sanguinem detrahare, quam per venam cubiti sectam. Aegyptiis Medicis olim, ut refert *Alpinus de Medic. Aegypt. pag. 79.* frequenti in more positum erat, in omnibus acutis febribus, capitis doloribus & inflammationibus, item in putridis febribus, ubi ex rubore in facie, assiduus vigiliis, phrenitidem metuebant, venas intra nares scarificare, maxime in diebus criticis atque ab iis tepido aquæ dulcis balneo educi. Ubi vero in morbis celeri opus est auxilio & derivatione sanguinis a parte laborante, v. g. in insultu apoplectico, peripnevmonia, inflammatione uteri, syncope cardiaca, quæ ab infarctu sanguinis in corde fit, aut suffocationis periculo, parum opis præstant cucurbitulæ, sed potius circa locum affectum propius infligenda est plaga paullo amplior & sanguis celeriter educendus.

Theorema XIX.

Cucurbitulæ locum habent, ubi a sanguine vel sero in parte quadam externa stagnante dolores, tumores, inflammationes vel alia vitia fiunt.

Scholion.

Hanc veritatem quoque egregie confirmat *Celsus l. 8.* dum ait: *usus cucurbitule præcipuus est, ubi non in toto corpore, sed in parte aliqua vitium est, quam exhauriri ad confirmandam valetudinem satis est.* Usus enim scarificationis duplex est, vel evacuatorius, vel derivatorius, ille ad minuendam plethoram, hic vero ad extrahendam materiam corruptam & infixam utilis. Multi ex Veteribus & præcipue Aegyptii negabant, cucurbitularum usum ad solvendam plethoram aptum esse remedium, sed certis tantum locis & parti-

parti-

partibus afflictis imponebant cucurbitulas. Verum quando illæ ipsæ omnium regionum partibus, dorso, brachiis, femoribus, cruribus apponuntur & paullo profundiores ac repetitæ fiunt incisiones, ad uncias sæpe duodecim educi potest sanguis, ejusdem ponderis, consistentiæ, quam qui e vena extrahitur. Nam aliquoties fecimus experimentum, siccando sanguinem per cucurbitulas elicatum, & invenimus tres partes ut in sanguine per venam emissio fluidi, ad unam partem solidi, ut adeo vulgaribus in Medicina erroribus id accensendum sit, sanguinem tenuiorem per cucurbitulas, crassiorem autem per venas evacuari. Interim ad exhauriendam & divertendam materiam vitiosam, cucurbitulæ præ venæsectione eximiorem habent usum. In mentem mihi veniunt aliquot exempla, ubi in dolore vehementi scapularum, in oculorum doloribus & fluxionibus acribus, gutta rosacea, tumore capitis erysipelaceo, venæsectio in pede vel brachio admilla, nihil profuit, scarificatio vero in collo, occipite & pone aures, item appositio cucurbitularum in dorso, egregium attulit levamen. Ægyptii in capitis, oculorum, aurium doloribus & fluxione, ophthalmia, lippitudine, item ad procurandum somnum, occipiti, collo & pone aures cucurbitulas applicabant, & profundioribus scarificationibus sanguinem eliciebant, ut refert *Alpinus l. c.* sed prius semper venam cubiti jusserunt aperiri; quod consilium utique in plethoricis non spernendum, sed magni æstimandum, etiam tunc ubi venæ faciei aut narium scarificandæ, in capitis vehementibus doloribus, vel insania, ne scilicet major dato spatio ad has partes proritetur affluxus. Ad dolores podagricos avertendos scarificatio singulis mensibus in planta pedum egregie ex usu est, ut vel in ipsa podagra scarificationis utilitatem *Cardanus lib. de art. parv. pag. 113.* & *Platerus lib. II. prax. med. pag. 717.* aliquot historiis curatorum confirmet. Caterum ad sphacelum abigendum, ne ulterius serpat, ulcera quoque pessima curanda, quam optime ad-

struit *Severinus de efficac. Medic. lib. I.* scarificationis usum. In mensibus & hæmorrhoidibus suppressis, etiam crurum scarificationes *Galenus de sanguin. mission.* plurimum commendat, quæ locum habere possunt in iis, qui averfantur venæsectionem, vel ob vires cordis languidas, dispositionem ad lipothymiam, & teneritudinem ætatis sanguinis celerem ex aperta vena extractionem ferre non possunt.

Theorema XX.

Alius adhuc datur sanguinem extrahendi modus per hirudines, sive sanguisugas, a quibusdam Medicis mirum æstimatas.

Scholion.

Antiquissimis Medicorum hic sanguinem per hirudines evocandi modus minus cognitus fuisse videtur; meminit tamen ipsius *Plinius hist. nat. lib. XXXII. cap. 10. diversus*, inquit, *hirudinum, quas sanguisugas vocant, ad extrahendum sanguinem usus est, quippe eadem ratio earum, quam cucurbitarum medicinalium, ad corpora levanda sanguine, spiramenta laxanda judicatur.* Ex Arabibus quoque *Rhafi* sanguisugarum usus innotuit, & ex superioris ævi Medicis *Zacutus* maxime *Lusitanus*, nec non *Amatus Lusitanus* & *Mercatus* earundem appositionem mire collaudarunt, imprimis in morbis qui caput infestare solent, ut gutta rosacea, pustulis faciei, capitis doloribus, præcipue rhevmaticis, in vertigine, melancholia, angina & dentium dolore, in quibus easdem occipiti, collo & pone aures apposuerunt. Neque etiam ipse de salubritate evacuationis sanguinis per hirudines dubito, sed an major ab his, quam cucurbitulis scarificatis expectanda sit utilitas, ego quidem non sine ratione dubito.

Theorema XXI.

Hirudinum applicatio orificio ani in hæmorrhoidibus suppressis ac inde pullulantibus morbis, valde commendari solet.

Scholia.

Hic modus sanguinem eliciendi ex venis ani per appositionem hirudinum, aliis mittendi sanguinem methodis in morbis, qui ab hæmorrhoidibus suppressis proveniunt, ut pathematibus hypochondriacis & quos secundum Hippocratem hæmorrhoidum fluxus solvit, ut phreneticis, melancholicis, hypochondriacis, nephriticis, ischiadicis, his a quibusdam præfertur de causis, quod hi morbi a stagnante in vasis intestinorum, quorum exitus est in hæmorrhoidalibus, oboriantur sanguine, qui longe facilius & propinquius evacuari possit & pars affecta liberari & levari per hirudinum ex ani venis suctum, ac si sanguis in aliis locis mittatur. Neque etiam ego negaverim, quod hirudines dictis in morbis præstiterint quendam usum, præsertim si *Zacuti Lusitani*, nec non *Amarî Lusitani & Mercati* observationibus fides habenda; an vero a sanguisugis effectus præstantior expectari possit, quam vena secta in pede, vel scarificationibus profundis in cruribus, ego experientia destitutus certa fide asseverare nequeo. Nam vidi multoties in vehementibus & inveteratis hypochondriorum spasmis, hirudines sine effectû applicatas, vidi easdem levamen tantum ad tempus attulisse, vidi quoque ab earum appositione ad hæmorrhoides cœcas mali moris ulcera & fistulas procreatas. Deinde ingens ratio dubitandi, quod ex parte affecta sanguinem hauriant hirudines hæc est: quod ipsæ ex hæmorrhoidalibus externis, quum internæ lateant, fugant, quæ exiguum, vel plane nullum commercium cum vasis intestinalibus, mesaraicis & portæ ramis, in quibus tamen sedes pathematum spasmodicorum & hypochondriacorum, habent: in fluxu vero hæmorrhoidali, hæmorrhoides internæ sanguinem stillant, & ob id si convenienti modo & tempore fluunt, vitiis ex stagnatione in ramis venæ portæ oriundis, apprime opitulantur.

CAPVT X.

DE

BALNEORVM, PEDILVVIO-
RVM ET CLYSTERVM VSV
MEDICO.

S. I.

*Aqua
simplex
optima
medici-
na.*

Tanta est divini Numinis in procuranda hominum afflictorum salute benignitas, ut inter alia innumera, quæ in auxilium prompta sunt remedia, simplicissima & ubivis fere obvia prostant, quæ & securitate, & efficacia, tum in morbis avertendis, tum expugnandis, aliis pretiosis, raris, arte etiam chymica operose elaboratis arcanis, longe superiora sunt; id quod omnes ingenui & periti in arte nostra viri ultro confitebuntur. Exemplo sit aqua communis. Hæc certe pura, omnis etiam materiæ salinæ vel terreæ expers, longe magis quam ullum aliud medicinæ universalis meretur nomen, utpote quæ in omnibus individuis, omnibus morboris afflictionibus, tam internis, quam externis, acutis & chronicis, tam incomparabilem affert opem, ut nulla alia medicina huic æquiparari possit. Ipsi fontes calidi & frigidi salutiferi, quos provida & benigna natura nobis sponte largitur, laudatissimam suam quam exserunt in morbis, præsertim chronicis, debellandis efficaciam, humoris aquei bonitati, subtilitati & largiori hujus potui potissimum debent. Illa vero varii generis salia, quæ in sinu suo recondunt, tam neutra, quam alcalia, cum tenuissimo martis principio, vix aliud quippiam efficiunt, quam ut stimulum addant solidis corporis nostri partibus & tubulis, quo liquidum

dum ingestum expeditius per vasa minima & excretoria ferri, humores tenaces, spissos dissolvere & excrementitias impuras salino-sulphureas partes temperare, diluere & e corpore evehere possit. Infusa quoque theiformia ex appropriatis pro ratione morbi speciebus confecta, quæ nostro tempore familiaris usus sunt, nec non lignorum & radicum decocta ex aqua, quæ in expugnandis longis & rebellibus morbis plurimum valent, præcipuam certe tuam efficaciam ad fluidum illud aquæ elementum referunt, eo quod nec radices, herbæ & ligna in pulvere vel sub alia forma assumpta, nec ipsa decocta, nisi diluta satis & diutius usurpata, salutarem exserunt effectum. Pariter ptisanæ, quas olim *Hippocrates* maximi fecit in morbis acutis, & lactis vel feri lactis cura in iis morbis, qui ex acrimonia succorum proveniunt, egregii omnino sunt usus; præcipuam autem suam virtutem a diluente suo humore unice mutuant.

§. II.

Quod quidem quemadmodum de interno aquæ usu *Etiā* in propatulo est; ita eadem hæc aqua non minus externe *externo* etiam adhibita mirabiles plane & maxime salutares exserit *usu.* effectus. Testatum id faciunt balnea & pediluvia, quorum præcipuum ingrediens & basis est simplex quidem aqua; nihilominus tamen hæc sola, sine ullo alio additamento, modo aqua sit pura & levis, medicinalem longe saluberrimam præstant virtutem. Et certe balneorum aquæ dulcis usus in morbis præcipue internis & gravissimis, priscis jam tum temporibus fuit quam maxime solennis, ut ex *Hippocratis*, *Galen*, *Celii Aureliani*, *Aretæi*, *Celsi* & *Tralliani* scriptis *Veterum* culenter patet. Potissimum in gravissimis capitis morbis, ut *testimo-* infania, sive cum tristitia, sive cum furore juncta, in atroci *nio.* capitis dolore, Veteres summo cum fructu his utebantur balneis. Et *Alexander* quidem *Trallianus* lib. I. pag. 107. sic prodidit: *aquarum dulcium balneum, si quid aliud, melancholicis opulatur, sed diutius in eo morentur atque desideam, si*

etiam aspas fuerit. Idem confirmat *Aretius lib. VII. pag. 134.* qui melancholicos in aquis sponte calidis sæpe commorari jubet, hanc subjungens rationem, quia raræ & molles carnes ad hujus ægritudinis remissionem maxime faciunt, quæ tamen ficcæ & tensæ in melancholia laborantibus sunt. *Calius* quoque *Aurelianus lib. I. de morbis chronicis pag. 134.* maniacis aquarum naturalium usum plurimum commendat. Et *Prosper Alpinus de Medicina Aegyptiorum pag. 115,* commemorat: melancholicos plurimos tepidis balneis perfecte sanatos esse. Pariter in renum calculo *Alexander Trallianus pag. 543; 547. it. Aretius pag. 118.* si dolores valde urgent, infessus ad umbilicum usque mirifice commendant.

§. III.

Et aucto-
ris expe-
rientia.

Ob virtu-
tem spa-
smos re-
laxan-
tem.

Ipse etiam multiplici experientia edoctus, plena testi-
ri possum fide, quod in morbis capitis gravissimis debellan-
dis, ut mania, melancholia, mentis stupore & torpore, so-
mno inquieto cum terrificis insomniis, in hemicrania, verti-
gine, scotamia, dentium quoque atroci dolore & in gravio-
ribus aliarum nervosarum partium doloribus, ut ventriculi
cardialgicis, intestinorum iliacis & colicis, & qui a calculo
renali proveniunt, balnea aquarum Teplicensium, item in-
fessus in aquam puram temperate calidam, etiam sub ipso
paroxysmo & pathematum afflictione, præsentissimum at-
tulerint levamen. Tam efficax enim balnearum in com-
placandis doloribus & relaxandis spasticis stricturis est effi-
cacia, ut quamdiu iisdem afflictæ insident, omnes cruciatus
& spasmi fileant, relictis autem illis, iterum accedant. Neque
minus Veteres, teste *Celfo*, & *Ægyptii* teste *Alpino l. c. pag.*
114. in omnibus febribus, tam continuis, quam intermitten-
tibus, exceptis pestilentibus, familiariter & utiliter adhibue-
runt balnea, non tamen in principio & statu, sed decli-
nante impetu. Ipse quoque in quartana senum, diebus va-
cuis, emollientibus & nervinis balneis non semel sine fructu
usus sum.

§. IV.

§. IV.

Præter hanc autem fibras rigidas, tenfas & spafmo con-
 strictas emollientem & humorum ac sanguinis motum a capite
 & partibus superioribus. ad alia loca determinantem & deri-
 vantem virtutem, balnea aquæ dulcis etiam egregie circulum
 sanguinis & humorum atque perspirationem per summam cu-
 tim promovent. Nam humiditate relaxant fibras & poros cu-
 tis & calore suo expandunt sanguinem, majorem quoque cor-
 dis & arteriarum diastolen. quam in eadem proportionem &
 gradu sequitur systoles, efficiunt, unde pulsuum & magni-
 tudo & celeritas crescit & circuitus humorum acceleratur, hoc
 aucto, sanguis fluxilior fit & tenuior, ad extimos tubulos cor-
 poris summamque cutim promte fertur & diffusio atque exha-
 latio subtilissimarum sordium promovetur, quæ adhuc largior
 succedit, si quis statim a balneo concedit in lectum; eo quod
 circumfusæ aquæ gravitate vapores per spiracula exituri in
 balneo quodammodo coërcentur ac reprimuntur, hac autem
 remota & absterfa, in lecto ex apertis atque expansis tubulis
 magna feri copia prorepat, ut universum sæpe corpus sudore
 pertundatur.

§. V.

Porro balnea sive femicupia in eo peculiarem sibi
 vindicant efficaciam, quod usum & virtutem medicamento-
 rum sic dictorum generosorum, in persanandis gravibus
 morbis, mirifice secundant. Notissimum enim est, therma-
 rum, acidularum vel aliarum aquarum salubrium in longis
 & valentibus morbis potum, longe feliciorum effectum & suc-
 cessum sequi, quando interposito usu balneorum, quam si
 solus instituitur. Non minus, mirabilis thermarum Caro-
 linarum & acidularum Egranarum indies conspicitur in affe-
 ctibus, præcipue spasmico-hypochondriacis & ubi systema
 nervorum valde imbecille & afflictum est, efficacia, quando
 finito potu, in thermas Toeplicenses laborantes concedunt,
 & iis temperatis convenienti modo & tempore utuntur.

Sunt

Sunt enim hæ valde leves subtiles & puræ, quod partim per explorationem cum instrumento statico, partim etiam per evaporationem, qua nihil fere solidi relinquitur, innotescit, eaque propter ob insitam hanc puritatem atque subtilitatem, magnam vim penetrandi in intima solidarum partium & fibrarum quæ tensæ & constrictæ sunt habent, easdemque relaxando & emolliendo ad naturalem statum reducant.

§. VI.

*Ut mercuria-
lium.*

*Decotto-
rum su-
dorifero-
rum.*

*Purgan-
tium.*

*Et emeti-
corum.*

In atroci lue Gallica ejusque immanibus symptomati-
bus abigendis, preparato prius per venæsectionem, laxantia
& sanguinemedulcorantia corpore, ex mercurio bene præ-
parata & dextre applicata medicamenta, sive ad salivæ flu-
xum, sive ad sudorem movendum data, miræ sunt efficaciar,
quando sub eorum usu laborantes in balneum aquæ dulcis
indies fere descendunt, postea lecto se committunt & sudo-
rem expectant. Decocta etiam radicum, lignorum & san-
guinem depurantium ex aqua, in morbis cutaneis, dolori-
bus, exulcerationibus & qui ab enormi humorum acrimo-
nia oriuntur, longe felicius & citius desideratam exhibent ope-
rationem, si balneis interpolantur. Et certe dici vix pot-
est, quam copiosas, crassas, pingues aquæ innatantes sor-
des mali odoris sæpenumero balnea ex intimis cutis tubulis
eliciant. Si validioribus forsitan etiam opus est purgantibus,
vel etiam acrioribus urinam cientibus, tutius omnia illa præ-
missis balneis usurpantur. Veteres quidem in rebellibus ad-
modum morbis multum ellebori albi usu præstitisse constat,
sed nunquam eum facile adhibuerunt, nisi prius in balneum
corpus fuisset demissum. Hoc enim modo non solum succi
fluidiores & magis mobiles fiunt tubulique excretorii rela-
xantur, ut eo melius & minori cum molestia peccans materia
educatur, sed etiam remissis solidorum fibris, omnis noxa
drastrictici ejusmodi vehementes spasmos & strictureas inducentis
pharmaci arcetur. Idem ex usu est assumtis vomitoriis,
qui-

quibus Ægyptii, teste *Alpino de med. meth.* singulis mensibus ad præseruationem, sed nonnisi in balneo, utebantur.

§. VII.

Quando morbi ex uteri vitio & ejus vasorum nimia atonia ac distensione orti curandi sunt, ut fluor albus, vel præcavendus abortus, vel concrementa carnea, polypum referentia, vel molæ, quæ crebrioris abortus causæ sunt, expelli debent, vel etiam si menses non sufficienter fluunt ideoque in ordinem reducendi, certe ego nunquam non congruis internis remediis uterinis, emmenagogis, balsamicis & purgantibus, frequentem balneorum jungendum usum suadeo, cum exoptato semper successu. Medicamenta ex marte dextre præparata, liquida præsertim, item chinæ cortex, in infuso, vel decocto cum vino, leni sua balsamica adstrictione, tonum partium roborando in cachexia, in inveteratis intermittentibus febribus, in malo hypochondriaco, si ex motus peristaltici intestinorum debilitate provenit, exinium & saluberrimum præstant effectum; longe tamen tutior, longe felicior ab iis expectanda erit operatio, quando corpus sub eorum usu movetur, aut crebrius balneo immisum mulcetur. Et hæc omnia multiplici experientia edoctus scribo.

§. VIII.

Ad ejusmodi vero balnea non adhibendæ fontanæ, asperæ, graves & calcarea terra onustæ, sed leves, subtiles aquæ, cujus indolis est pluvialis, nec non fluvialis, post bres maxime hausta. Optimæ quoque ad instruenda balnea aquæ censendæ, quæ promte sub lotura maculas ex linteis abstergunt, ex quibus legumina & olera facile penitusque molita coquuntur, quæ parum vel nihil materiæ post evaporationem relinquunt, & herbæ thée aliisque fervide infusæ easdem expedite recludunt & extrahunt. Quodsi vero tales haberi nequeunt, utique arte illas corrigere & molles efficere oportet, id quod optime fit, adjecta portione lixivii,

(III.)

Ffff

vel

vel saponis Veneti, aut affusa quantitate lactis, aut quando decoctum furfurum triticeorum, item florum chamomillæ, nec non foliorum, florum & radicum liliorum alborum, ipsis commiscetur. Veteres uti patet ex *Celio Aureliano pag. 575.* olea adiciebant, & ad sopiendos dolores, item ad ischuriam curandam, quæ sit a spasmo & strictura orificii sphincteris vesicæ, ejusmodi balneis utebantur. Et sic concinnata emollientia balnea egregiam profecto opem ad facilitandum partum, præsertim in primiparis, ætatis paulisper adultæ & siccioribus, ultimis gestationis mensibus adhibita, conferunt. Pariter in atrophia dorsali infantum, item in rhachitide eximia splendent facultate, eo quod, tubulos partium obstructos & contractos adaperiunt, succum nutritium fluidiorem ac ut ejus æqualis & liberior fiat ubique dispensatio, efficiunt.

§. IX.

De balne-
is robo-
rantibus
nativis
martia-
libus.

Alia illorum naturalium balnearum est ratio, quæ ob principium martiale subtile quod recondunt, non emolliunt, sed potius partes roborant ac firmant. Innotescunt jam passim in Germania ejusmodi martiatæ aquæ, eoque nomine haud exiguam celebritatem nactæ sunt Freyenvvaldenses in Marchia, Bebrana in Thuringia, Radebergenes & a nobis detectæ Lauchstadienses in Misnia, Eppacenses & Weissenburgenes in Franconia. Omnes hi fontes levem quidem atque subtilem aquam vehunt, ob tenuissimum tamen martis sulphureum crocum, quem etiam si diutius quiescunt deponunt & cum quo lintea in balneis, nec non injecta ova, flavo colore imbuunt, saporis sunt paullo adstrictivi & interne etiam in iis morbis in quibus martialia locum inveniunt, a perito Medico cum fructu possunt usurpari. Longe tamen magis externus eorum usus in balneo celebratur, quam maxime proficius iis, qui corpora habent phlegmatica constitutionis, spongiosi fibrarum sunt habitus, vasaque copiosa & exilia gerunt. Sunt quoque ex usu ubi humores ob lentiores

san-

sanguinis cursum facile spissescunt, sordescunt & scorbuticam impuritatem contrahunt, unde languores, dolores rheumatici, arthritici, item tumores oedematosi, contracturæ quoque & imbecillitates ac refrigerationes artuum, foecundo pullulant germine, quibus omnibus hæc roborantia balnea, ob principium tenue sulphureum martis, quo tonum ac robur languentibus partibus addunt & fibras laxas nimis adducunt, egregie opitulantur. Et licet ea adstringentium horum martialium balneorum natura sit atque conditio, ut nonnisi tepida & admodum temperata adhiberi debeant, & calore intensiori corpus mirum offendant, sanguinem commoveant & dolores capitis partiumque languores inferant; nihilominus quando corpus post tepidum ejusmodi lavacrum, in quo superior ejus pars plus friget, quam calet, illico lecto committitur, incallescit, pulsus validius vibrat & sæpe ex toto corpore, cum insigni virium incremento & externarum partium robore, sudor disfluere solet.

§. X.

Accedunt balnea mitius roborantia artificialia, quæ nempe injectis & incoctis aquæ levi ac puræ speciebus cephalicis & nervis amicis concinnantur & pariter eximia splendent efficacia. Usurpantur ad hæc balnea conficienda, in primis folia lauri, herba melissæ, abrotani, majoranæ, origani, serpilli, thymi, rorismarini, hyssopi, hormini, menthæ crispæ, nepethæ, pulegii, matricariæ, flores chamomillæ vulgaris & Romanæ, quæ omnia sacco inclusa, adjectis aliquot salis communis & cinerum clavellatorum manipulis, cum aqua leniter decoquantur. Medicata ejusmodi corporis in folio lavacra saluberrima sunt in affectibus paralyticis, impotentia atque imbecillitate artuum, corporibus imbecillioribus, cachecticis, frigidis, senibus, ubi vires a morbis fractæ & nervi & ligamenta artuum quadam laborant atonia. Neque minus insigni cum fructu usurpantur in omnibus uteri morbis, qui post abortum, partum difficilem vel etiam puerperium

*De balneis
is robo-
rantibus
artificialibus.*

rium impetunt, nec non quando uterina compages nimia humiditate diffluit, vel plane liquor viscidus albus ex muliebri sinu stillat & inde sterilitas est; promovent quoque egregie cohibitum mensium, & in viris hæmorrhoidum fluxum.

§. XI.

Et vaporosa.

Aliud genus balnearum est, quæ audiunt vaporosa, sive Laconica. In his vapores, sive ficci calidi, ex accenso vini spiritu halantes, sive calidi humidi, ex decoctis herbarum cum vino vel aqua surgentes, immediate ad universum corpus, vel ad certas duntaxat ipsius partes, admittuntur. Est autem calidorum ejusmodi halituum maxima vis ad eliciendum sudorem, tubulos subcutaneos aperiendos, partes duras emolliendas rigidasque ac tenfas laxandas, nec non tenaces viscidos humores dissolvendos, & solis calidis aqueis tantum vaporibus durissima animantium ossa & cornua emolliri posse, vel coquis & pharmacopœis notum est. Hinc vaporosorum balnearum usus longe eximius in frigidis morbis, anasarca, tumoribus œdematosis, membris paralyti tactis, atque etiam lue sic dicta Gallica, item in tumore testium, ad prolapsum uteri, vel ani reprimendum, & pro diverso morbi statu & conditione ex variis concinnantur speciebus. In molestissimo illo dysenterix fere perpetuo comite, tenesmo, vapores ex lacte & floribus sambuci præsentaneum afferunt levamen. Utiles quoque sunt ejusmodi vapores seu foci ad hæmorrhoidum fluxum proritandum, ante hirudinum appositionem necessarii. Et quia egregie orificia venarum uterinorum mucosæ obfessa expediunt, ubi menses difficulter exsolvuntur summo cum fructu adhibentur.

§. XII.

Cautela in balneorum usu.

Quemadmodum vero unumquodque, quantumvis præstans remedium, imprudenter minusque circumspecte usurpatum, salubri destituitur effectu; ita etiam balnearum improvidus & sine exquisita cautione administratus usus, plus nocet,

cet,

cet, quam prodest. *Galenus* quidem tria hanc ob causam in balneis observanda præcipit, ne qui balneantur aliquo pacto horreant, ne ullum viscus imbecille habeant & ne multitudo crudorum humorum in primis viis adsit. Potiora autem in balneorum usu tenenda momenta huc redeunt. Nimirum antequam eadem administrantur, semper prius solvenda est plethora alvusque libera reddenda; alias ab æstu lavacri gravia damna a congestionibus sanguinis ac humorum ad pectus & caput inde metuenda. Deinde cavendum maxime, ne nimio lavacri calore corpora adeo exæstuentur & quasi elixentur, ut sudore prorsus diffuant; hoc enim factò, ingruit animi deliquium, capitis dolor, lassitudo totius corporis, mentis torpor, oris siccitas & sitis, quam si quis frigida potione restinguere velit, facile gravius malum sibi poterit arcescere. Tempus balneo commodissimum est matutinum, post somnum, concoctione peracta & vacuo ventriculo, præsertim si alvus ante soluta. Expedit etiam corpus in balneum non statim totum immittere, sed successive, primo pedes, deinde femora, postea abdomen usque ad cordis scrobiculum, augendo etiam paulatim aquæ calorem. Neque nimis diu in balneo calido, præsertim martiali, commorandum est, ne vires debilitentur. Post balneum corpus committendum est lecto, quo sudor proliciatur, qui cum jusculo, vel decocto, aut infuso appropriato promoveri potest. In balneis vero nativis temperatis, ut sunt in Misnia Wolckensteinenses & Wisenbadenses, per aliquot sæpe horas desidendum est, præsertim si morbus est gravis & contumax ex vitio nervosarum partium spasmo constrictarum, si mens ex hypochondriorum vel uteri vitio laborat, si contracturæ adsunt partium, ex nimia rigiditate ligamentorum & nervorum.

§. XIII.

A balneis caveant, quibus caput debile, qui catarrhis & coryza affliguntur, qui ad asthmata & ad animi deliquia

Ffff 3

A balneis
quibus
caven-
dum

quia proni, vel lento hectico calore tabescunt, tanto magis a vaporosis, præsertim quæ cum spiritu vini accenso apparantur; quippe quæ valde commovent sanguinem & plethoricis atque cacochymicis infensissima sunt, ac ut experientia constat, imprudenti usu morbos capitis, affectus soporosos, apoplexiam, epilepsiam, scotomiam, guttam serenam inducunt. Simili ratione detrimentosa sunt balnea iis, qui ira graviter excanduerunt, & ipse aliquot memoria teneo exempla, quod usurpatistum iis, febres hecticae, immedicabiles partium dolores & paralyses accesserint. Et quia dolor colicus sæpe a sanguinis per ani venas exitum molientis intra intestinorum tunicas stagnatione oboritur, sæpe etiam sub immanibus a calculo doloribus præsto est plethora, hoc casu, cautissime utique mercandum est cum ejusmodi calefacientibus balneis, quæ nonnisi plenitudine subtracta, adhibenda sunt.

§. XIV.

De pedi-
luyis co-
rumque
operatio-
ne.

Balnea universi corporis sequuntur pediluvia, quorum quoad ingredientia eadem ratio, minor apparatus & ob id frequentior usus & balnearum vicarius. Vel enim ex sola aqua levi & pura, sine aliorum additamento magnoque apparatu, parantur, vel ad corrigendum aquarum gravium & asperarum vitium, lixivium, aut furfures triticei & chamomillæ flores adjiciuntur, vel etiam lacipfis confunditur. Licet autem pediluvia tantum infimis & extremis corporis partibus admoveantur, eorum tamen virtus longe lateque se diffundit & graves in remotis etiam partibus morbos levat. Dum enim humore illo calido fovetur pedes, nervosæ, tendinosæ ac musculosæ in iis fibræ ex quibus intercurrentibus vasis coagmentati sunt, laxantur, remittuntur, pori & tubuli antea constricti ampliantur, sanguini aditus humoribusque debitus redditur commeatus; quo fit, ut impetus aliis partibus incumbens divertatur ac cum insigni levamine ad inferiora derivetur. Deinceps pediluvia etiam temperato suo calore agunt

agunt in sanguinem & humores sub eorum usu per pedum vasa transeunt, eosdemque tenuiores ac dilutiores reddunt, quo longe expeditius per omnis generis in corpore tubulos cursum conficiant & quaquaversum promptius excurrant, quo etiam fit, ut si paullo calidiora adhibeantur, arteriarum pulsus augeant & sudorem per universum corpus eliciant. Adhuc ingens est pedum, seu partium exquisitæ sensationis nervoso tendinosarum, cum omnibus nervosis universi corporis maximeque in inferiore ventre sitis partibus, consensus, adeo conspicuus, ut si tantum perfrigerentur, illico dolores colici exoriantur, alvus stringatur, cutis horreat, perspiratio intercipiatur & mensium ac hæmorrhoidum fluxus sistatur. Quare non dubitandum, quin, si tepido humore mulceantur & spastica in iis strictura tollatur, salubris effectus ad remotiora ipsius annuentia organa propagetur ibidemque sese exserat.

§. XV.

Et certe pediluvia laudatissimi ad derivationem usus *Quibus* sunt in morbis, qui a congestionibus ad caput & pectus, per *conve-* spasmos inferiorum maximeque hypochondriorum factis, sub-*niantur* nascuntur, ut præter soporosos affectus omnes fere capitis morbi sunt, insania, mania, melancholia, cephalæa, hemi-crania, clonus hystericus, vertigo, odontalgia, otalgia, gutta rosacea, ophthalmia, defluxiones oculorum salivæ, narium hæmorrhagiæ nimix & diurnæ vigiliæ, nec non quæ pectus affligunt asthmata convulsiva, dyspnœa a copia sanguinis, cordis palpitationes, tussis sicca, hæmoptysis. Porro ob insignem, qua pollent spasmos remittentem ac solventem efficaciam, egregie opitulantur in morbis spasmodicis convulsivis & doloribus, in cardialgia, dolore colico, præsertim hæmorrhoidali, torminibus ex calculo, ventriculi inflatione cum præcordiorum anxietate. Præterea etiam excretiones saluberrimas, perspirationis nempe, urinæ, alvi & sanguinis quoque sinceri, per menses & sedis venas, efficaciter *pedi-*

pediluvia promovent, sanguini liberum com meatum conciliando, eundem attenuando & ad excretorium tubulos alliciendo. Neque minus graves capitis pectorisque affectus arcant & præscindunt, maximeque eos, qui per periodos accedunt, quin quotidianum eorum usum truces periodicas cephalalgias abegisse, ipse expertus novi. Sunt quoque qui in febribus intermittentibus pediluviorum usum suadent, die quidem intercalari vacuo, nec sine salubri effectu, uti patet ex *Obs.* 144. *Dec.* II. *An.* VI. *Misc. nat. curios.* de quartana pediluvio sanata & quæ *Kozack de salib.* Sect. XII. cap. 10. plura hanc in rem habet.

§. XVI.

*Cautela
in eorum
usu.*

Monendum tamen, quod longe felicius succedat pediluviorum operatio, si plenitudo sanguinis per venæsectionem in pede prius imminuitur, si circa tempus somni administrantur, nec pedes post eorum usum refrigerantur, sed calidi servantur & in lectum transferuntur, eoque facto, auctior per universum corporis ambitum redditur perspiratio. Cavendum vero est, ne pedes lavacro immittantur eo tempore, quo mensium fluxus imminet, aut jam exsolvitur, eo quod divertendo ab utero & ad inferiora invitando sanguinis apulsus, ut ipsum profluvium vel sistatur, vel intercipiatur, efficiunt; contra ea aliquot ante statam menstruam periodum dies, ad promovendum fluxum egregie faciunt, præsertim si temperata emmenagoga, vel pilulæ ad mentem Beccheri paratæ, simul in usum trahuntur. Abstinendum quoque quam maxime a pediluviiis constringentibus, aluminosis, sulphureis, ad resiccandum molestum pedum sudorem, oedemata discutienda, ulcera abigenda, item si doloribus podagricis pedes exercentur; siquidem iisdem non sine periculo materia illa virulenta ad interiores nobiliores partes retropellitur. Et quoniam communis fervidus in Carolinis fons, vulgo *der Prudel*, virtutem quam maxime repellentem possidet; providus utique lavacri ex eo usus esse debet,

in

in omnibus passionibus, ubi materia vitiosa externo corporis cortici incumbit, ac præsertim in doloribus arthriticis & podagricis.

S. XVII.

Inter remedia externa, domestica & facile parabilia *Clysteres* connumeranda etiam clysmata, sive enemata, quæ nihil aliud *affines* sunt, quam decocta ex certis speciebus confecta & per syringam ano pro vario scopo & usu infusa. *balnei.* Habent hæc multum cum balneis affine atque commune. Balnea quippe lavacra sunt partium externarum, clysteres vero intestinorum quæ crassa vocantur, quæ eluunt, abstergunt & a contentis repurgant. Balnea vel emollientia sunt, vel roborantia, clysmata pariter pro varia ingredientium ratione, solidas, rigidas, tensas & strictas partes molliunt & laxant, vel flaccidas & a tono dejectas firmant atque adducunt. Deinceps sicuti balnea sola applicatione externa toti sanguinis & humorum massæ virtutem insinuant, ut liberiores & expeditiores eorum progressum faciant simulque salutare excretionem faciliunt: ita etiam enematum operatio non solum in sanguinis & humorum circuitum, ex immutatione pulsus, sed etiam ad excretionem movendas, præter alvi subductionem, ex perspirationis & urinæ uberiori successu, luculenter patet. Balnea porro vi pollent insigni antispasmodica eandemque in diffitas spargunt partes: clysteres non minus hac pollere virtute, qui artis exercitia tractant quam optime norunt. Et denique quemadmodum immisso in lavacrum corpore, congesti præter naturam & non sine periculo in certa loca humores, ad alias externas & inferiores partes derivantur, quo æquabilis ipsis reddatur ubique commeatus: sic etiam clysmata ad divertendas a pectore & capite sanguinis congestionem, gravium pathematum genitricem, insigni & laudatissimo usu plurimum valent.

S. XIX.

Solent vero clysteres pro diverso medicationis scopo *Et sunt*
(III.) Gggg ex

vel alte-
rantes.

ex variis concinnari speciebus. Et sicuti indicationes in mēdendo ad quatuor potissimum fines directæ sunt, alterantem nempe, evacuantem, roborantem & sedativum: ita eadem etiam clysterum ratio, ut iisdem vel indurata stercorea emolliantur, aut qualitate infesta acria, acida & salsa recrementa attemperentur, vel contenta in crassorum canali evacuentur, vel languentes intestinorum fibræ & delassatus peristalticus in iis motus roborentur, vel denique spasmi tunicarum intestinalium remittantur & fibræ strictæ nimis laxentur. Quod si igitur intentio est duras faeces & stercorea arida humectandi, vel etiam succos acres, salios, corrosivos, acidos, biliosos in crassis obhærescentes obtundendi, clysteres optime parantur ex emollientibus & demulcentibus, cujus generis sunt lac animantium, decoctum rasuræ cornu cervi, pedum vervecinorum & vitulinorum, avenaceum, juscula carniū pinguiā, pinguedines animantium, butyrum insulsum, decoctum ficum, mel, manna, saccharum, decoctum radicis altheæ, liliū alborum, seminis lini, foenu græci, florum chamomillæ, verbasci, meliloti. Quæ quidem ingredientia, quum simul eximiam spasmos relaxandi virtutem obtineant, in omnibus affectibus spasmodicis, doloribus, febribus, sanguinis congestionibus, & ubi alvus sive propter spasmos obstipata, sive stercorea indurata obstructa, commodam & utilissimam locant operam.

§. XIX.

vel evacuantes.

Ubi alvum simul evacuare & faeces atque humores stagnantes subducere constitutum est, salia ejusmodi decoctis adjecta omne ferunt punctum, ut sunt sal commune, gemmæ, Ebshamenſe, Sedlicenſe, digestivum Sylvii, nec non ammoniacum. Et certe dimidia salis uncia clysteri adjecta in evacuando majoris efficaciam est, quam aliquot unciam electuariorum ex purgantibus & laxantibus concinnatorum. Celsus jam hunc in finem muriam alvo infundendam suadet, id quod etiam cum nostra muria, quæ & pota & per clysterem

rem injecta potenter purgat, nec non cum Sedlicensi aqua, optime succedit. Huc quoque referenda enemata, quæ ex urina humana, vel animantium parari solent, ad educendas alvo viscidos ac lentos succos. Neque minus sapo Venetus solutus egregie pro clysteribus inservit, tum maxime, quando acida, viridis & corrosiva bilis tenellorum adhuc lactantium infantum intestina gravius exagitat. Quando vero fortiori stimulo opus est, tutius emetica, quam draastica & acriora cathartica clysteribus commiscantur, eamque ob causam *Derebeque in observant.* vinum emeticum clysmatibus in hydropes & apoplexia indendum commendat.

§. XX.

Roborantes clysteres virtute sua non modo intestinis, *Vel roborantes.* sed & aliis partibus atonia laborantibus dicata sunt, & ob id varia etiam recipiunt. Quum quidem tunicæ intestinorum languentes roborandæ, carminativa sic dicta ex usu sunt, quæ flatu discutiant & recrementorum evacuationem secundant, & ex his maxime semina quatuor carminativa majora & parata ex ipsis olea, baccae lauri & juniperi. In gravioribus capitis morbis, ut apoplexia, paralyti, affectibus soporosis, auditus & visus debilitate, utiliter herba rutæ, majoranæ, rorismarini, faturejæ, thymi, salviæ, flores lavendulæ, spicæ adjiciuntur. Ubi passiones ex uteri vitio, maximeque ejus atonia oriundæ, affligunt, ob peculiarem & specificam quasi facultatem cum fructu adhibentur herbæ pulegii, artemisiæ, matricariæ, sabinae, menthæ, flores cheiri, calendulæ, radices aristolochiæ, nec non myrrha & galbanum, & ex his concinnati clysteres crebrius injecti in restituendo mensium fluxu & expellendis morbis eximia pollent efficacia.

§. XXI.

Ego quoque experientia edoctus in chronicis ex suc- *Varit* corum impuritate, viscerum prava constitutione, infarctugeneris, humorumque stagnatione, affectibus, præsertim cachexia, scorbuto, malo hypochondriaco, mensium vel hæmorrhoi-

dum suppressione, maximi facere soleo clysteres, quibus admixta amara & balsamica, cujus generis sunt trifolium fibrinum, summitates centaurii minoris, carduus benedictus, radix gentianæ, scolopendrium, rhabarbarum, essentia rhabarbari, elixir proprietatis, essentia fuliginis alcalifata, spiritus cornu cervi & massa pilularum balsamicarum. Et solo ejusmodi clysterum usu, desperatos se ad sanitatem reduxisse hypochondriacos testatur *Hercules Saxonia lib. I. prax. cap. 16.* Neque minus roborantia apprime proficua clysmata confici possunt ex vino, quibus etiam ubi vires admodum languidæ nec corpus nimis sensibile, addi potest balsamum nostrum vitæ dictum. Hinc in *Actis Anglic. pag. 598.* mentio injicitur clysteris ex vino Hispanico, pipere & vitello ovi, egregiæ virtutis, quod tota nocte retentum, viscera calefaciat & aliquot horis post sudorem moveat. Quin tam conspicua clysmatum ad corroborandum universum nervorum systema est virtus, ut ipsos febriles in intermittentibus insultus compefcant. Etenim *Helverius* in peculiari tractatu, de methodo febres sine interno medicamentorum usu curandi, perhibet; febres sola clysterum injectione ex decocto corticis chinæ cum aqua, vel etiam addito tantillo vini, optime posse persanari, id quod etiam *Albrecht, in Misc. nar. cur. Dec. III. An. III. obs. 127.* quinque confirmat exemplis. Et *Ægyptii* in quartana pro secreto habent clysterem ex decocti majoranæ libra una & tribus olei laurini unciiis, uti auctor est *Alpinus de Medic. method. pag. 189.* addens: *hoc clystere, & in meipso olim quartana vexato summa cum utilitate usus sum, & nonnullos tribus solummodo hisce clysteribus usos, sanatos fuisse, vidi.*

§. XXII.

Vel sedantes.

Superfluunt denique clysteres sedantes, doloribus complacandis & spasms solvendis inservientes. Horum in numero sunt clysteres ex meris oleis, pinguedine animantium & butyro insulso conflati, qui, ubi tunicæ coli a vehementi spasm

spasmo obsidentur, ut ipsius cavum angustetur, flatus retineantur & dira oboriantur tormina, uti obvium est in colica convulsiva spasmodica, præsertim hæmorrhoidali & quæ ab inhærente acri caustica a superficie corporis repulsa materia suscitatur, laudatissimæ sunt virtutis. De his magnifice admodum ex Veteribus sentit *Aetius*, qui *lib. IX. cap. de colica* clysterem antispasmodicum parari jubet, ex butyro recenti, adipe anserina, gallinacea, medulla cervina, adipe ursina, cumino, foliis rutæ, nardo Celtica, castoreo & oleo rutaceo, addito hoc præcepto: *vere hoc ipso in vehementibus doloribus, evacuatione tamen prius per alium clysterem facta, & post hora spatium mensuram unam mediocris poculi repositam infunde & jube quiescere ac aliquandiu pharmacum retinere, atque ita divinam ejus videbis facultatem.* Quod si verò spasmis nimius æstus sanguinisque orgasmus jungitur, ut in doloribus capitis, articulorum, hæmorrhagiis, clysteres cum sero lactis, vel lacte ex emollientibus & anodynis quam optime injiciuntur, floribus scilicet chamomillæ vulgaris, sambuci, verbasci, meliloti, nec non croco, nitro depurato & oleo amygdalarum dulcium. Non minus in pathematibus spasmodicis, epilepticis & convulsivis motibus, ut specifica addantur ex usu est. In hysteriis quidem pathematibus sagapenum, asa foetida & castoreum accommoda sunt. In epileptico & convulsivo insultu, radix, semen & flores pæoniæ, succus lumbricorum terrestrium, liquor cornu cervi succinatur, utiliter commiscetur; ejus generis clystere ex antepilepticis & tinctura castorei parato primiparam epilepsia tentatam egregie esse levatam testatur *Hardeus in Misc. nat. cur. Dec. III. A. II. obs. 100.*

§. XXIII.

Hi itaque clysteres pro varia medentis intentione amplissimi in praxi medica sunt usus, quem *Celsus lib. II. cap. 12.* rum usus sic in compendio sistit: *alvi ductio per lotiones semel vel sum-* varius.
mm bis non omittatur, si caput grave est, si oculi caligant; si

morbus majoris intestini est, quod Græci ἡμῆρ nominant; si in imo ventre aut in coxa dolores sunt; si in stomachum quadam biliosa concurrunt, vel etiam pituitosa eo se, humorve aliquis aque similis confert; si spiritus difficiliter redditur; si nihil per se venter excernit; utique si juxta quoque stercus est & intus remanet, aut si stercoris odorem nihil desiciens ager ex spiritu suo sentit; aut si corruptum est quod excernitur; aut si prima inedia febrem non sustulit; aut si sanguinem mitti, quum opus sit vires non patiuntur, tempusve ejus rei præterit; aut si multum ante morbum aliquis potavit; aut si is, qui sæpe, vel sponte aut casu purgatus est, subito habet alvum suppressam. Præter ea autem quæ in superioribus de enematum in variis morbis utilitate passim inferui, tenendum adhuc, quod in genere quam maxime conducant his, quibus venter ægrius descendit & stomachus imbecillis medicamenta ad subducendum efficacia sustinere nequit. Pariter in febribus continuis & exanthematicis præstat semper clysteribus & venæsectione, si opus est, curationem auspicari, & sub eadem etiam si alvus clausa, clysteribus insistendum. Christianus quoque Langius in Misc. natur. curios. omnibus vulneratis serio commendat clysmatum usum, ne alvi suppressio inflammationes vel sanguinis stagnationes augeat. Possunt etiam clysteres aliis adhuc quam quorum meminimus ulibus, pro varia morbi ejusque causæ conditione, adaptari, quo imprimis referendi illi, qui in diarrhoeis, dysentericiis & intestinorum erosionem, tam ad acrem humorem contemperandum, quam exesas partes consolidandas summo injiciuntur cum fructu, conficienda ex decocto pedum vitulinorum, vitello ovi, fevo hircino, bolo Armena, tragacantha, succo cancerorum fluviatiliū, spermate ceti, balsamo de Copaiva & sulphuris terebinthinato.

§. XXIV.

*Et late
patens
virtus,*

Et licet clysteres efficacia sua proxime afficiant intestina & in substantia & materia crassorum limites non transcendunt; nihilominus tamen eorum virtus, non modo ex intesti-

nis

nis, tanquam partibus nervosis & quæ cum reliquis nervosis corporis partibus exquisitum consensum alunt, ad alias & remotas etiam propagatur, sed & ipsi sanguini ac lymphæ insinuat. Prius ex eo patescit, quod clysmata, si nimis acria, teste *Avicenna can. med. lib. 1. Sect. IV. cep. 17.* febrem accendant, emeticis imbuta vomitum moveant & dolores vel in suprema corporis regione complacent; posterius vero nutriendi, confortandi & stupefaciendi eorundem facultas testatum facit, & quod, ut quidem fidem faciunt *Act. Angl. pag. 598.* spiritus vini per inferius os injectus, longe magis inebriet & infatuat, ac si eadem mensura per oesophagum ingurgitetur. Potissimum tamen conspicuus est clysterum in intestinis tenuibus doloribus & spasticis constrictionibus laborantibus effectus, hanc maxime ob causam, quod illud crassorum amplissimum colorem tenuia cingat iisdemque ubique fit circumvolutum, eaque propter infusum eidem emolliens & paregoricum clyσμα, blando tepore suo, contigua tenuia simul afficiat, & penetrante per tunicarum poros vapore, iisdem facultatem insinuet, haud secus ac vesica decocto emolliente repleta extrinsecus apposita, in magnis internarum partium doloribus, spasmis & inflammationibus levamen affert præstantissimum.

§. XXV.

Ut autem saluberrimus clysterum effectus eo certius *Cautela* obtineatur, utique in eorum, haud secus quam in aliorum *in ipsorum* sanitatis præsidiorum usu, circumscriptio adhibenda & necessaria quædam cautiones tenendæ. Nimirum sunt quidam *applicacione servanda.* adeo sensibilis naturæ, ut intestina clysteres plane ferre nequeant, & ipse viderim, colicos aliosque dolores eo magis increvisse, quo plura clysmata injecta, qui postea solo interno convenienti laxante eximie levati. Et sicuti in his clysterum injectio non urgenda; ita etiam acres non statim applicandi, quando alvi excrementa diutius retenta, ne plus trahant ad infarcta intestina & obstructionem obfirmant, sed
poti-

potius præmittenda his enemata, quæ laxant, lubricant, ster-
cora emolliunt & evacuationi viam pandunt, uti perite mo-
net *Mercatus l. I. pag. 64.* Post pastum quoque clysterum usus
intempestivus minusque proficiuus, eo quod ciborum conco-
ctionem atque digestionem inturbat; chyli elaborationem
& extractionem impedit ac nimis celerem ingestorum evacua-
tionem proritat.

§. XXVI.

*Et moni-
ta.*

Neque etiam alvum crebro nimis & jugiter clysteribus
solicitare expedit; tum quia virtutem intestinorum expultri-
cem sequiorem reddunt, ac ut natura iis assuefacta officii spon-
tanæ excretionis obliviscatur faciunt, tum etiam, quod sub-
ita & repetita crebrius liquoris clysmatici vel nimis calidi, vel
perfrigerati infusione, ordinata illa & naturalis fibrarum inte-
stinalium tensio lædatur & inordinati motus provocentur, ac
quum nullum enema applicari possit, quocum non simul fla-
tus intrudatur, flatuum metuendus sit proventus. Præterea
quia intestina etiam crassa partes sunt admodum nervosæ,
omnia quæ nervis sunt inimica, frigida scilicet, acida, auste-
ra, drastica virulenta & salia acriora, opiata, narcotica, item
adstringentia, penitus ex clysteribus debent excludi, ne mo-
tus intestinorum peristalticus inde lædatur, vel destruat,ur,
quo salvo, ciborum digestio cum saluberrimis secretionibus
& excretionibus ex voto succedit, quo destructo, intestina
spasmodicis, flatibus & fecibus multis cum molestiis obsidentur.
Quibus denique addi etiam merentur præclara *Celsi l. c.* monita
servanda, inquit, illa sunt, ne ducatur ulla cruditate sub-
stante; ne in corpore infirmo, diuque in adversa valetudine exhau-
sto; neve in eo, cui satis alvus reddit quotidie, quive eam liqui-
dam habet; neve in ipso accessionis impetu, quia quod tum
infusum est, alvo continetur, regestumque in caput,
multo gravius periculum efficit.

